

*Рангея Рагхав*

---

# **ТОКАЙГАЧА ЧОРЛАЙМАН СЕНИ?**

**РОМАН**

*Тошкент*

*Ғафур Ғулом номидаги Адабиёт ва санъат нашириёти*

*1984*

И (Ҳинд)  
Р 14

Русчадан  
*Аҳмаджон Ёқубов таржимаси*

$$P \frac{470300000 - 44}{M352(04) - 84} 116 - 84$$

© Ғафур Ғулом номидаги Адабиёт ва санъат нашриёти, 1984 й. Таржима.

Қиши куни кечки пайт оқ мармардан тикланган бу қаср деворлари эртаклар саҳифасидан тушиб келаётгандай туюлади. Қүёшнинг сўнгги нурлари хушбўй ююба<sup>1</sup>ларга тегиб, улкан оқ толлар ва тут дараҳтлари учидан енгил сирғанди ва ниҳоят пастга тушди-да, ўтиб кетган пода туёғидан кўтарилган йўл чанги қалин пардасини олтинлантириди. Даладан салқин шабада эсди.

Бир минг тўққиз юз қирқ тўққизинчى йил эди. Оёғимни яра-чақага тўлдириб юборган касалликни даволашда шаҳар ҳакимларининг дори-дармонлари ҳам, жарроҳларнинг ўткир тиғлари ҳам, гомеопат врачанинг сув дорилари ҳам ожизлик қилиб қолди. Шундан сўнг хилват бир қишлоқда маҳаллий табиб ихтиёрига тушиб қолдим. Мени даволовчи кишини Сукхрам деб аташар эди. У бўйнига маржон осиб, бошига катта "салла ўраган, икки қўлига эса шилдираб турган шиша билакузуклар тақиб олганди. Табиб бутун қишлоқ аҳлидан яширин тарзда ўрмондан доривор ўт-ўланлар териб келарди, қаршимда ўтириб олиб, кўзларини ола-кула қилганича касал оёқларимга куфсуфлаб, бармоқларини қирсиллатар ва атрофимда айланиб, бўғинқ товушда алланималар дея бақиради. Бу муолажанинг еттинчи куни у оёғимдаги латталарни ечди ва «Тақсир, бугун мен билан бирга сайдга чиқсанг бўлади», деди.

У мени ўртасида оқ мармардан қурилган ажойиб қаср бўй чўзган боқقا бошлиб кирди.

Сукунатга чўмган кўхна боғда қушларнинг сайраши тинган, қоронғулик ҳамма товушларни ютиб юборгандай. Фақат кишиларни ибодатга чақираётган ибодатхона қўнғироқларининг бир хил оҳангда даранглаши ҳамда қайтаётган подадаги ҳайвонлар бўйнидаги қўнғироқчалар жирингги чўкаётган оқшом сукунатини бузиб турарди.

- Қайтиш вақти бўлди, тақсир,— деди Сукхрам.
- Анови ёқда бўй чўзиб турган нима?
- Тақсир, кўриб турибсан-ку, қалъа.

<sup>1</sup> Ююба — итшумуртлар оиласига мансуб пакана дараҳт.

- Уни ким қурган?
- Қасрни тиклаган рожанинг ўғли.
- У жудаям ғалати.
- Қалъа чала қолган.
- Нега?
- Уни қураётган рожа қазо қилган. Айтишларича, уни акасининг хотини заҳарлаган экан. У кўра-била туриб, аёлнинг қўлидан заҳарни олиб ичган.

Сукхрамнинг кўзлари намланди. Мен қизиқиб қолдим.

- Сукхрам, наҳотки, шундай бўлган бўлса? Нега йиғлаяпсан?

— Ўзим ҳам билмайман, тақсир! — Сукхрам кўз ёшларини артди-да, гуноҳкорона жилмайди. — Ҳозир замонлар бошқа. Рожалар ҳокимиятдан маҳрум бўлишган, улар ҳақида гапиришнинг нима ҳожати бор?

— Йўқ, йўқ, Сукхрам,— мен Сукхрамнинг гапига қизиқиб қолдим ва ундан бу ҳақда ҳикоя қилиб беришини илтимос қилдим.

Сукхрам илтимосимни эшитмагандай эътибор бермади.

— Юрғанда оёғинг оғримаяптими? — қизиқсинди у.

— Йўқ. Эртага ҳам сайрга чиқамизми?

— Нега чиқмас эканмиз, сен тузала бошладинг-ку.

— Сукхрам, ана бу ёқдаги нима? — дея сўрадим, кўм-кўк тоғ томонни кўрсатиб. Тоғдан сукунат ва муздеккина шабада тараляпти. Гўёки осмондан тушаётган қоронғўлик аввало тоғ чўққисида тўпланиб, кейин шамол шиддати уни ҳар томонга тарқатиб юбораётгандай.

— Вақт алламаҳал бўлди, тақсир,— деди Сукхрам қатъий. — Қайтиш пайти етди.

Қизиқсинишдан ичим пишиб турганини кўра-била туриб жавоб бериш ўрнига у сухбатни таққа тўхтатди-да, жўнаб қолди.

Учинчи куни ўрмонга отландик. Дарахтлар учидан кўтарилаётган тутунга тикилиб қолдим.

— Бу нима, Сукхрам?

— У ёқда гулхан ёқишади. Бу — таборимиз<sup>1</sup>.

Биз яқинроқ бордик. Дарахтлар ортида кичкина-кичкина ўн чоғлиқ уйчалар. Улар кечқурунги нимқоронғуликда қалин япроқлар орасидан аранг кўриниб турибди. Олдинда қудуқ қораши. Мен ўша ёққа юришга жазм этдиму ҳайратдан тўхтаб қолдим: қудуқ сари ўн уч-ўн тўрт ёшлардаги қиз бормоқда эди. У гулдор юбка кийган, эгнида елкаларини очиб турган ўйма ёқа кофта. Унинг латиф, нафис гулдай юзидан, шаҳло мовий кўз-

<sup>1</sup> Табор — чайла.

лари-ю, олтин сингари товланган соchlаридан нигоҳимни узолмай қолдим.

Унинг нозик бурни сал кўтарилган, ёноғи чўғдай ёниб турибди. Қиз менга жилмайди.

— Чанда?— Сукхрамнинг ҳайратга тўла товуши эшитилди.— Нега уйда ўтирмадинг?

— Ноn ёпдим, энди сувга чиққандим.

Қиз бутун қиёфаси билан бу ердаги маҳаллий аҳолидан озмоз фарқ қиласа-да, чамаси Сукхрамнинг қизига ўхшайди. Факат унинг овози шу ердагиларники сингари кескин, ўткир, қаттиқ жаранглайди.

Сукхрам бирі<sup>1</sup> чекди ва тоғ этагига жойлашган, ой нурида чўмилаётган ҳашаматли уй томонга ўйчан нигоҳ ташлади.

— У қанақа иморат бўлди, Сукхрам?

Унинг ўрнига қиз жавоб қайтарди:

— Бу дак-бунгало — меҳмонхона, илгари бу ерга зодагон жаноблар келишарди, аммо эндиликда уларнинг замони ўтди,— қиз шундай деди-ю, кулиб юборди. Сукхрамнинг юзи тундлашди. Ўша оқшом у бир оғиз ҳам гапирмади.

Мен ўз хонамга, тўғрироғи, ўзим жойлашган дўстимнинг уйига қайтдим. Уй эгалари дастурхон атрофида чақчақлашиб ўтириб бу ердан тезроқ кетишга ташна эканликлари, қишлоқ мөъдаларига текканлиги ҳақида интиҳосиз муҳокама юритишиди. Улар қишлоқча ҳаётдан анчагача шикоят қилишиди, лекин охироқибатда қишлоқ шаҳардан ҳар ҳолда анча афзал деган хулосага келишиди. Шу важдан ҳар нима бўлса ҳам қишлоқда қолмоқчи бўлишиди. Кейин оёғим хусусида гап кетди. Сукхрамни эслашди, мен унинг қизини учратганимни айтдим. Уй эгаси чилимни бир ёққа қўйди, қўлини тосда ювиб, уни бир четга сурди. Чанда билан учрашганлигим ҳақидаги гапим негадир унинг таъбини хира қилди.

— Хўш, айтинглар-чи, ўзи нима гап?— сўрадим.— Айтайлик, у бу ерлик қизларга ўхшамайди. Хўш, нима бўпти? Бунинг сизлар учун қандай аҳамияти бор?

— Ҳозир Нарешгинамни ахтаргани боргин, ўшанда тушунсан...

— Нима демоқчисизлар, ҳеч нима тушумаяпман?

— Гап шундаки, ҳозир Нареш бирорта дараҳтнинг тагида туриб хўрсиняпти, Чанданинг номини ҳижжалаб тақрорляяпти.

Мен кулиб юбордим. Дўстимнинг тўнғич ўғли эндигина ўн бешга қадам қўйган. Чанда ундан ҳам ёш — ё ўн уч, ё ўн тўртда. Менимча, яхшигина шапалоқ билан сийланса ҳар иккови ҳам муҳаббат дардидан халос бўлади.

<sup>1</sup> Б ири — энг паст тамаки япроғидан тайёрланган сигарета.

— Наҳотки уни севиб қолган деб ўйласаларинг,— деб гап бошлаётсан уй бекаси сўзимни тўхтатиб қўйди:

— Ярамас бола ўзини тҳакур<sup>1</sup> уйидан эканлигини унугтиб қўйди. Натни — лўли қиз<sup>2</sup> кетидан соядай эргашгани эргашган, бизни шармандаи шармисор қилди!

Дўстим ирғиб ўрнидан турди. Гарчи тҳакур бўлса ҳам унинг содда, яхши одам эканлигини билардим. Уни зўравонлик ишлат-маслик ҳаракатида<sup>3</sup> иштирок этганлиги учун икки марта турмага қамашган ҳам.

— Мен Нарешни ахтаргани бораман,— деди у.

— Шундай зимистонда қаёққа борасиз?— уни йўлдан қайта-ришга уриндим.

Чиндан ҳам шунақаям зим-зиёки, ҳеч нарсани кўриб бўлмасди. Қаердадир узоқда қоплоннинг ўқиргани эшитиляпти.

— Катта фонарни ёқма, мен кичкинасини, электр фонарни оламан,— у бошига шарфини боғларкан, хотинига ана шундай деди.

Буларнинг ҳаммаси саргузашт роман саҳнасини эслатарди. Ўз-ўзимдан бўғилиб, мен дарров кийиндим, қўлимга таёқ олиб, дўстимга эргашдим. Эри билан бирга кетаётганимга Нарешнинг онаси севиниб кетди. Унинг фикрича, Чанда зодагон оиласа ишлашиб учун Нарешни сеҳрлаб қўйганмиш. Лекин дўстим эса бошқача фикрда. У ҳаммасига муҳаббат ҳақидаги китоблар сабабчи, бола уларни ўқиб бутунлай ақлдан бегона бўлган: на-зарида у лўли қизни севиб қолган, бечора қиз эса бутунлай бошини ўқотган.

Аёллар оқилона фикр юрита олармиди?

Мен дўстимнинг далилларини эшитиб, беихтиёр кулиб қўйдим. Аёллар ҳаммавақт ўғлим сутдан оқ, мусичадан беозор деб ўйлашади, эркакларнинг ҳйила-найранглари ҳақида тасаввурга ҳам эга эмаслар. Улар хотинлар йўлдан уруш бобида нақадар эчил эканлигини билишади, холос.

<sup>1</sup> Тҳакурлар — Шимолий ва Марказий Ҳиндистонда олий ҳарбий ер эгаси табақасига мансуб кишилар. Индуизм диний анъанаисига мувофиқ, иккинчи ўринда турадиган табақа — ҳарбийлар табақаси. Рожастонда феодал аристократини унвони.

<sup>2</sup> Натни — натлар табақасига мансуб қиз-аёл. Натлар ҳинд жамиятидаги энг паст ҳисобланган табақага киради. Улар қўшиб юрадиган дарбадар қабилалар бўлиб, бу табақа аъзолари ҳуққавозлик, акробатлик, рақс тушиш, найрангбозлик, илон авраш, музикачиллик, табиблик билан шугулланади. Бошқа табақадагилар булар ҳақида ёмон фикрда, 1924 йилдан бошлаб натларни сал гуноҳи учун тергов, суд қўлмай қамаб қўявериш қонунлаштирилган. Уларни ҳинд лўлилари деб ҳам аташади.

<sup>3</sup> Зўравонлик ишлатмаслик ҳаракати — ҳар қандай зўравонлик хатти-ҳаракатлари батамом бартараф этилмагунча инглиз маъмурларининг бўйруқларига гражданларнинг бўйсунмаслик ҳаракатини Ганди ташкил этган. Бундай ҳаракат плани 1920 йилда Калькутта шаҳрида Ҳиндистон миллий конгресси партияси фавқулодда сессиясида қабул қилинган.

Изғиринли совуқ шамол юзларни чимчилади. Ўрмонга киргач, йигитчанинг: «Чанда! Эҳ, Чанда!» деган товушини эшитдик.

Кейин ҳаммаёқ жимжит бўлиб қолди. Дўстим фонарни ёқди. Кўп ўтмай қаршимиздан Нареш чиқиб келди. У бизга қўшилди. Отаси индамай йўлга тушди, менинг борлигим уни хижолатга солаётганга ўхшайди. Нареш уйга келгач, бепарвогина дастурхонга ўтириди.

Онаси кечки овқатни қўйди.

— Ўғлим, нега овқатга қарамаяпсан? Наҳотки қорнинг очмаган бўлса?— деб она гоҳ-гоҳида гапириб турди.

Мен кўчага чиқдим, ёнимдан сигарета олиб чекдим.

Эртаси куни барвақт турниб дўстим билан далага отландим. Унинг эллик бигҳ<sup>1</sup> ери бўлиб, уни қудуқ сувида сугорар, ҳозир эса буғдой билан арпа ўроқقا келган эди. Далада ўғил болалар у ёқ-бу ёққа югуришар, бақиришиб-чақиришар, қушларни ҳайдашарди, аввалги йилги бир тўп сарғайган япроқлар ёнида қўш ҳўқизлар абзалини ушлаб сувчи ўтиради. Далада Нарешни ҳам кўрдим. У қудуқдан унча узоқ бўлмаган жойда ўй сурниб ўтирибди. Отаси нари кетиши билан унинг ёнига ўтиридим.

— Нареш, нималар ҳақида ўйлаяпсан?— сўрадим.

У индамай менга қаради.

— Китобларимни ўқиганмисан?— сўзимда давом этдим.— Мен уларда табақа кишанларини узиш хусусида ёзганман. Нима ҳақида ўйлаб юрибсан, Нареш, шуни менга айт.

Нарешнинг ёш, беғубор, мулоим юзида ғам қўланкаси намоён бўлди. Лекин бу ўшдагилар қайғуси узоққа чўзилмайди, унинг ўрнини орзу, умид эгаллади. Ёшликда бутун олам нуқул бизлар учун яралгандай бўлиб туюлади. Хўш, нима бўпти, йигитлар эрқак бўлиб етилади, Чандага ўхшаган қизлар жажжигина аёл бўлишади. Капалак гулдан гулга кўчиб ўтиб, хушбўй шира тўплаш учун ғумайдан чиқмай турса ҳам капалак қурти ўз ипини чуваб йигиради, дунёга майин, мулоим ипак толасини ҳадя қиласди. Бу шундай паллаки, киши ўзининг гўзалликка бўлган азалий интилиши, ўзининг қувноқ умид ҳамда ширин хаёллари шарофати билан шоирона туйғуларнинг меҳрли қасри остонасида туради. Ману<sup>2</sup> замонидан то бизнинг кунларимизгача ҳамма вақт шундай бўлиб келган. Гўзаллик ва поэзия ширин болалик уйқусидан кейин ўз қанотларини кенг ёзгандай бўлади. Куррамиз талай асрлардан буён интиҳосиз ҳаёт гирдобида айланана-айланана ўзининг улкан жисмининг ҳар бир бўлакчаларида инсон туйғулари ва орзулари барҳаёт оқимини кўтариб келяпти.

<sup>1</sup> Бигҳ — ер ўлчови.

<sup>2</sup> Ману — ҳинд мифологиясида Одам ота сингари дастлабки одам.

Мен йигитчага меҳр билан назар ташладим. Унинг ёноқлари лоладай қип-қизил, у қуёшнинг ёрқин нурларида олтинранг бўлиб товланаётган қадимий қасрга нигоҳини қадаган.

Унга бошқа савол бермадим. Индамай дўстона гаплашиб ўтиришимиз, юракдан сухбатларимизнинг муқаддимаси бўлди, холос. Кечқурун даладан қайтаётган пода шохларида қуёш нурлари ўйнаётган пайтда яна ўрмонга — Сукхрам ёнига жўнадим.

Йўлимиз кўл ёнидан ўтарди. Қуёш шуъласи кўл сатҳига тўқ-сариқрангли парда ташлаган, у гўёки будда монахи кийимига<sup>1</sup> ўхшаб кетган эди. Уша куни Сукхрам жуда ўйчан эди. Биз хилватгина жойга бориб дам олиб ўтиридик. Қалин бутазор бизни қуршаб туар, гоҳ у, гоҳ бу ерда тамар — ҳинд дараҳтлар қоплаган кичкина ташландиқ ибодатхоналар кўзга ташланарди, улар орасида қулоқни қоматга келтириб, қарғалар қағиллаб учишарди.

Тўсатдан ёнгинамизда кимдир гапириб қолди:

— Чанда, шундай ният қилган бўлсанг, қалъага бирга бора-миз, бўптими?

Мен Нарешнинг овозини танидим.

Сукхрам ўз ўйлари билан банд ҳолда ўтирибди. Гўё у ҳеч нарса эшитмагандай эди.

Буталар ортидан Чанданинг овози келди:

— Билмасам, севгилим! Назаримда мен негадир ана шу кўҳ на қалъанинг эгасига ўхшайман. Шуниси қизиқки, ундан анча ийроқда яшайман!

— Хоҳлайсанми, сени қалъага олиб бораман? Хоҳлайсанми, Чанда? — деган овозларни эшигдим.

Шундагина Сукхрам сесканиб қўлларимдан маҳкам ушлади.

— Кўрқмайсанми?

— Нимадан қўрқардим? Айтишларича, шу ёқларга ҳам қоплонлар келармиш, лекин шу ерда учрашишдан қўрқмаяпмизку!

— Нареш, сен чиндан ҳам ботир йигитсан!

— Яхшиси, айт-чи, нега энди қалъа менини деб ўйлайсан? Чанда кулиб юборди.

— Кеча отамнинг қутичасидан ёшгина бир хонимнинг фотосуратини топиб олдим. Расмга қараб, ўзимни кўзгуда томоша қилаётгандай бўлиб кетдим! Бу жуда ғалати, тушуниб бўлмайдиган ҳодиса. Аёл бизга ўхшаб кийинмаганди. Фотосурат тагида яна бир расм бўлиб, унда эҳтимол, бир неча йиллар олдин яшаб ўтган бўлса керак, зодагон тҳакурани<sup>2</sup> тасвирланган эди.

<sup>1</sup> Будда монахи кийими — Будда монахлари тўқсариқ рангдаги кийим кийишади.

<sup>2</sup> Тҳакурани — тҳакур хотини, олий насабли хоним.

Шу пайт негалигини ўзим ҳам билмаган ҳолда миямга мен ҳам худди ана шу хонимдай бўламан деган фикр келди...

Сукхрам дик этиб ўрнидан турди, бор овози билан бақирди.

— Чанда! Ҳой, Чанда!

Буталар ортидан енгилгина шарпа ва тез узоқлашиб кетаётган оёқ дупири эшитилди. Биз буталарни қайириб қарадик, лекин у ёқда ҳеч кимнинг қораси кўринмади. Сукхрам кучли ҳаяжонда эди. Мен эса гап нималигини билмай гаранг эдим. Сукхрам жаҳли чиқиб пўнғирлади: «Яна ўт аланга олади, яна осмонни тутун қоплайди!» У ташландиқ қалъага даҳшат билан тикилди ва тўсатдан қаҳ-қаҳ отиб қаттиқ кулди. Мен аллақана-қа бўлиб кетдим. Сукхрамга қарашиб ўта қўрқинчли эди.

— Жувонмарг бўлгур беором инс-жинслар! Ҳеч кимга тинчлик бермаяпсанлар!— деди у қалъага қараганича.

— Сукхрам!— чақирдим уни.

У яна қўлимни маҳкам ушлади.

— Мен ҳақ гапни айтяпман, тақсирим! Қалъага пойдевор қўйиладиган куни инс-жинслар қаҳрини юмшатиш учун қурбонликка бир одамни олиб келишган — ўшанда шунаقا урф-одат бор эди. Инсон қони билан ювилиб қурилган қалъа кишиларга осойишталик билан баҳт бера олармиди? Қалъада туғишган aka-укалар бир-бирига душманлик қилиши: акаси хотинига укасини заҳарлашни буюрди. Эридан тул қолган ёш бева оғироёқ эди. У ўрмонга яширинишга мажбур бўлди, уни кекса дарвиш ўз қанотига олди. Дарвиш бола дунёга келгач, уни нат — лўлиларга элтиб берди. Уларнинг таборида гўдакнинг ҳаёти бехатар эди. Бола икки ёшга тўлганда ёш бева хотин эрининг қотили бўлмиш акасидан ўч олиш ниятида раққоса кийимида қалъага суқулиб киради. У юзини парда билан яширади, унинг рақслари рожани мафтун қиласди. Рожа унга дур, гавҳарлар қадалган безаклар юборади, аммо у безакларни майдалаб талқон қиласди, укасининг қотили юзига отади. Қейин эрини заҳарлаган овсинини ўлдириб, ўша кечасиёқ ўзига кўнгил қўйган хизматкор билан қочиб кетади.

Бироқ, кўп ўтмай уларнинг ҳар икковини ҳам ушлашади. Ёш жувонни қатл қилишади, хизматкор эса қочиб қутулишга улгуради. Уша одам болани тарбиялайди. Бола нат бўлиб ба-логатга етади.

— Хўш, кейин-чи?

— Кейинми?— Сукхрам оёғи остидаги ер титрагандай енгилгина қалқиб кетди.— Мен ўша авлоднинг охирги тҳакуриман, тақсири,— деди у бўғиқ, ўзгарган товушда.— Қачонки тҳакурини натлар орасида бир неча мўддат яшаб, кейин қўшни рожалар ёнига боргандা, улар: «Сени ўз даврамизга қўшмай-

миз, сен натлар тегиб ҳаром бўлган овқатни егансан<sup>1</sup>, дейишиди. Ўшанда ёш бёва: «Қалъя меники, ҳар қандай қилиб бўлса ҳам уни ўзимга қайтариб беришларининг уддасидан чиқаман, дейди. Кейин қалъя ҳақида инглиз мэмхоним гапира бошлади, бугун эса Чанда нималар деганини эшитдингиз..»

Сукхрамнинг сўзлари жуда ошиқиб билмоқчи бўлганим ажойиб воқеа устидаги пардани кўтаргандай бўлди. Сукхрам эса ҳаммасини ҳикоя қилиб берди.

— Мен ҳеч қачон ўзимни нат деб ҳисобламаганман,— ҳикоя қила бошлади Сукхрам.— Мен ҳақиқий тҳакурман.

— Сени боқиб, тарбиялаган кишилардан воз кечяпсан. Бу оғир гуноҳ, Сукхрам. Ҳамма одамлар бир-бирини кўра олмайди деган фикрга ўз-ўзингни ишонтиргансан, қўйнингда нафрат деб аталмиш заҳарли илонни иситгансан, у сени чақа-чақа ақлингни заҳарлаб қўйган. Ўрмон ўсимликларининг сирини билган одам,— деб давом этдим,— инсонийлик дараҳти дунёдаги муқаддас дараҳтлардан бири эканлигини ҳам билиб қўйиши керак.

Сукхрам менга астойдил тикилди, гўё гапларимни эшитмандай индамай қўя қолди.

Қоронги туша бошлади, биз уйга қайтдик. Эртаси куни Сукхрам ҳикоясини ёза бошладим. Ўзимдан ҳеч нарса қўшмадим. Баъзида ўз-ўзимга буларни ёзишининг қандай зарурати бор экан, деб савол берардим. Лекин ҳар сафар ўрта аср ҳинд рожаларининг ҳаёт тарзи мураккаб машиналар асири бўлмиш бизнинг кунларимизда ҳам ўзгармади, одамлар бу ҳақда жиддийроқ ўйлаб кўрсинг деган фикр миямга келарди.

Сукхрам ҳар куни келиб турарди: биз бирга сайр қиласардик, унинг оддий ҳикояларини эшитардим. Бу воқеаларнинг фожиали ечимини ўз кўзим билан кўришга муваффақ бўлдим. Охир оқибатда Сукхрам қизининг жасади устида қўлига оғир кишанлар солингган ҳолда тик турди.

Қитобхон! Ажойиб воқеаларни ёқтиранг, бу китобни ҳам ўқиб қўй. Ҳаёт ҳамиша биз ўйлагандай эмас.

Бу даҳшатли тун эди. Бўрон қутуради. Мен Чанданинг муздек бетларини силаб-сийпардим. Унинг юзлари нақадар гўзал! Нареш безовталиқдан ўзини у ёққа, бу ёққа ташлар, ҳадеб: «Уни тинч қўйинглар, ухлаб олсин. Эртага ўзи уйғониб, ҳузуримга келади», деб такрорларди.

— Эсингни йиғ, ўғлим! Болагинам!— онасининг овози узилиб қолар, йифидан елкалари титрарди.— Толеим йўқ! Нега аёл бўлиб туғилдим? Аёллар қачон баҳтли бўлибди? Ҳеч қачон!

<sup>1</sup> Сен натлар тегиб ҳаром бўлган овқатни егансан — индуизм олий табақа вакилларига энг қўйи табақа — хор табақа қўлидан овқат олиб ейишни тақиқлайди. Бу қонунни бузгандар шармандаларча тозаланиш удумини бажо келтириши шарт.

— Сукхрам,— астагина сўрадим,— демак уни сен ўлдирди-  
нгми?

— Ҳа, тақсир. Аммо мен Чандани эмас, тҳакуранининг жони-  
ни азоблаётган инс-жинсларни ўлдирдим. Унинг жони орамизда  
тентираб юрганди. У қалъани тарк этгиси келмади. Тҳакура  
қанчадан-қанча одамларни йўлдан адаштириди. Чанданинг жо-  
нини халос этдим. Рожа эгалламоқчи бўлган битмас-туганмас  
хазиналарни тҳакуруни эрини ўлдирган ёвузнинг юзига улоқтири-  
ди, қалъага ҳам, унинг ҳамма хазиналарига ҳам эга бўлди.  
Ўшандан буён тўрт авлод ўтди. Инс-жинс эса ҳамон одамлар  
орасида санқиб юрибди. Тақсир, бойлик бамисоли олтин қафас,  
қафасга тушган одам тўтиқушдан ҳам хароб бўлади, эшигини  
очиб қўйса ҳам ундан чиқиб кетмайди!

Полициячилар Сукхрамни олиб кетишди. Ёрқин чақ-  
моқ нури қалъа томон қўлларини чўзиб турган Нарешни  
ёритди.

— Чанда!— қичқирди у.— Чанда, сен ғолиб чиқдинг! Қалъа-  
нинг эгаси бўлиб қолдинг!

У тўсатдан хаҳолаб кулди. Эшик ортида бўрон ваҳимали  
гулдиради. Одамлар бошига тушган бу оғир кулфат бутун та-  
биатни ларзага солгандай... Чанда ҳалок бўлди, Нареш ақлдан  
озди.

Бироқ ҳикоям ҳали өлдинда. У тўрт авлод ҳаётини қамраб  
олади, ҳар бир авлод ҳаётида феодализмнинг очкўз иблисона  
табиати, пойдеворига инсон қони қўшиб қурилган қалъа ҳукм-  
ронлик қиласди. Бинонинг ўзи кишини алдайдиган қиёфада гў-  
зал, лекин унда шу кунгача кишиларни бир-биридан жудо қил-  
ган хунуклик ва ёвузликни ҳамма вақт ҳам пайқаш қийин...

Дўстимнинг кўзларида ёш йўқ. Хотини ҳам тинчиб қолди.  
Бўрон тинди, Нареш тош ҳайкалдай қотди. Шамол шиддати  
ҳам сусайиб, сукунат ҳукмрон бўлди.

Лекин мен биламанки, бу ҳолат узоққа бормайди. Яна ша-  
мол гувиллайди, булутлар чопқиллайди. Яна уйқуга кетган ўр-  
мон инграйди, тун қоронгулиги ваҳимали овозларга тўлади.  
Дўстимнинг кўзларидан яна шашқатор ёш оқади, хотини  
бўзлаб йифлади. Нареш яна телбаларча кулиб, ўзини у ёқ-бу  
ёққа уради. Телба! Ӯн беш ёшли бола киши қалбини увишти-  
радиган даражада даҳшатли қаҳ-қаҳ уради!

Тун чекинди. Борлиқ шундай ёришиб кетдики, япроқлардан  
томаётган томчилар ҳам яқзол кўзга ташланди.

— Яқинроқ кел,— тўсатдан Нареш мени чақириб қолди.—  
Ҳеч ким мени тушунгиси келмайди. Ёлғиз сен тушунасан! Ҳов  
ана, Чанда! Қара, қара, у зодагон хонимга айланди. Суратдаги  
ўша безакларни тақиб олибди. Чанда бугун ва ниҳоят қалъа-  
нинг эгаси бўлди...

— Ёшим ўн иккига тўлди,— ҳикоя қилди Сукхрам.— Мен ҳали баланд, болаларга хос овозда гапирадим, аммо аста-секин ёшлик — балоғат сари қадам қўярдим.

Кўп ҳодисалар унут бўлиб кетди, бироқ ўша ўн тўрт кунлик тўлин ой чиққан тун хотирамдан асло кетмайди.

Отам ҳужрада ўтириб олиб вино ичарди. Унинг мўйловлари узун, кўзлари бургутники сингари ўткир, онамдан бошқа ҳамма ундан ҳайиқарди. Онам натни эди. Ёши ҳам ўттиз бешлардан ошмаган.

Тоғдан тушган ой нури водийни кумушлантирган, унинг товланиб жилваланиши қуруқ ўт-ўланлар пояси орасида юпқа тиф каби ялтиради. Ӯшанда бундан ортиқ гўзал манзарани тасаввур қиломасдим. Отамдан бир неча дона бирини ўғирлаб чиқиб, киши кўзидан пана дараҳт остида, ажиб тарзда эгилиб-букилган илдизлар орасидә ойдинли тун кўланкаларига узоқ тикилиб ўтиредим. Узоқда йигит-қизларнинг қўшиғи эшитилмоқда. Кимнингдир ширали, балаңд овози ёқимли, киши қалбини қитиқлайдиган мусиқа таратар, бу эса мени ажиб ҳаяжонга соларди.

Тўлин ой гардиши тоғлар ортида сузіб келиб кўлга дадил шўнғиди, сон-саноқсиз пассажирлари ёрқин сариқ шуълалардан иборат кумуш қайиққа айланди. Югуриб келаётган тўлқинлар қайиқни ағдариб юборди, ёрқин сариқ шуълалар тўлқинларда иргишлаб ўйноқлади.

Мен уфққача чўзилиб кетган қоп-қора сукунатли ўрмонга маҳлиё бўлиб тикилдим. Ой нурида ўрмон алоҳида гўзаллик кашф этганди.

Тўсатдан отамнинг хирқироқ, ўғон овози эшитилди:

— Сукхрам! Ҳой, Сукхрам!

Мен чопқиллаб унинг ёнига бордим.

— Сукхрам! Ўрмонга борамиз. Шифобахш, доривор ўтлар қаерда ўсишини сенга кўрсатаман. Бугун тўлин ой чиққан, ҳамма нарса кафтдагидай кўринади.

— Маъқул, ота,— дедим.

У мени қучоқлаб, пешонамдан ўпди. Ундан бадбўй вино ҳиди анқирди, чунки уйимизда ҳамма ичади. Мен жуда кичкиналигимда онам мени ухлатиш учун бир неча томчи вино берган. Мен винонинг ҳидига кўнишиб қолганман, ўша тўлин ой чиққан куни мени ҳайратга солган бошқа нарса. Отам одатдан ташқари ҳаяжонли кўринар, осма илдиз новдаси ерга чуқур кириб, янги дараҳтга ҳаёт баҳш этаётган баҳайбат банан сингари тебранарди. У кекса банан дараҳтидай елкамга қўлини қўйиб, бепоён осмонга, ой туфайли кумушланган самовий бўшлиққа ўйчан тикиларди.

Биз буталар орасидан йўл очиб бордик. Ўрмон ортида натни куйлади:

Жоним, ёнингда ухлагим бор, ойдан қўрқаман,  
Борлиқ ой нурига чўмилди.

Нат унга жавоб қилди:

Ой юзли соҳибжамол, ойдан нечун қўрқасан?  
Сен унинг фарзанди-ку...

Биз ўрмон ёқалаб бордик. Отам тунд эди, ён-верига қарасади. Мен уни биринчи маротаба ўйчан ҳолда кўришим. Отам жасур одам, у қўли билан тулки иини бузиб ташлайверади, оҳуни қувлаб бориб қулатади, улкан жайрадан ғолиб чиқади. Бир куни биз томонларда изғиб, атрофдагиларга даҳшат солган сиртлонни ҳамманинг кўз олдида ўлдирган. Отам бир жойда муқум турмаган. У қишлоқдан қишлоқча кўчиб юрган. Онамни жуда яхши кўрарди, бирор марта ҳам унга қўл кўтартмаган. Онам ичиб масти бўлгач, бошқа эркакларга ишва қилган пайтларда отам индамай уни даст кўтартганича уйга олиб кетаверган. Кечалари отам унинг қулоқларига ширин — ёқимли сўзларни шивирлаганини кўп эшигтанман.

Биз ўрмон четида турган маъбуда Дурганинг унча катта бўлмаган ибодатхонаси ёнидан чиқдик. Ибодатхона орқасида гулхан олдида ёнма-ён ўтирган эркаклар билан аёлни кўрдик. Аёл онам эди. Улар вино ичиб, кулишиб ўтиришарди.

Отам ўша томонга бораётуб, онамнинг рўпарасида ўтирган кўмирдай қоп-қора Исланинг заҳархандали товушини эшитиб, таққа тўхтаб қолди.

— Оббо, тҳакури тушмагур-еў, сени ҳам зодагон хонимлар қаторига қўшишмоқчи, шундайми?

— Ҳа,— онам ғалати, ишончсиз товуш билан жавоб қилди. У яна бирон гап қўшмоқчи бўлдию ўзини тийди.

— Уни лўли хотин түққан,— яна гап бошлади Исила.— У бўлса зодагонлар натни ўз одами деб билишини хоҳлайди. Иштаҳасини қараю! Шу важдан-да нуқул: «Мен нат эмасман, мен нат эмасман! Мен тҳакурман!» деб бақиргани бақирган.

Ҳаммаси кулишди. Иккинчи эрқак — Манка сопол идишга вино қўйиб айлантира бошлади. Идиш қўлдан-қўлга ўтди, ҳар ким кўпроқ сипқаришга интилди. Мен отамга қарадим. У ерга міхланиб қолгандай эди. Юз ифодасидан қўрқиб кетдим. Мен бу ердан тезроқ кетиш маъқул деган ўйда гап қотдим:

— Ота, ҳадемай ой тоғ ортига яширинади, унда ҳеч нарсани кўрмай қоламиз.— У сесканди. Қўлимдан ушлади, кейин биз жўнаб кетдик.

Ўша тунда ўрмон менга сеҳрли бўлиб туюлди. Ўрмон орти-

дан яна қўшиқ янгради. Қўшиқ овози бизга элас-элас эшитиларди, тўсатдан мен ухляпману тушимда маъносини ҳеч ўқиб бўлмайдиган алла эшитилаётгандай бўлиб кетдим.

Отам ўрмондан қандайдир илдиз — ўт-ўланларни излаб топди, йиғиштириди, қўлимга тутқазди.

— Уғлим, буларни яхшилаб эслаб қол,— деди отам, улардан қандай фойдаланиш ҳақида гапирди.— Мен дунё тургунча яшамайман. Дори ясаш ҳунарини натлардан ўрганганман. Уларнинг удумига кўра, ота ўз ҳунарини ўғлига ўргатиши, ошириши лозим.

— Биз натлардан эмасми?

— Йўқ, ўғлим,— деди отам тантанавор равишда.— Биз бу бебаҳт қабила тоифасидан эмасмиз. Уларни таъқиб қилишади, турмаларга ташлашади. Бироқ сен билан мен, биз тҳакурмиз. Эшитяпсанми, тҳакурмиз!

Отамнинг шивирлашлари хуштак каби товуш бера бошлади.— Анови ёққа қара. Уғлим, бу нималигини биласанми?— У узоқда қорайиб турган деворларни қўли билан кўрсатди.

— Чала қурилган қалъя,— дедим.

— Бу бизнинг қалъамиз. Унинг эгалари — сен билан мен. Эндиликда унга инглизларнинг хушомадгўйи рожа хўжайнинлик қилмоқда. У тун-кун ярамас аёллар билан айш суриб ётибди. Оддий халқнинг қайфу-кулфати билан иши йўқ! Бу ярамас қалъани ҳаёсизларча эгаллаб олди. Унинг ҳақиқий эгалари эса биз!— Отам ҳаяжони зўрайганидан гапиришга қийналди, сал оқ оралаган бир тутам сочи салласи тагидан чиқиб пешонасига тушиб қолди. Қалин қошлиари остидаги катта-катта кўзлари ярқираб кетди.

Мен донг қотиб қолдим. Биз чала қурилган қалъя эгалари! Бизни бойлиқ, ҳокимият кутмоқда. Икки чеккамдаги томирларим лўқиллай бошлади. Назаримда баланд, осмонўпар деворлар янада ўсиб кетгандай бўлди.

— Ота,— шивирладим мен.— Шу гаплар ростми?

— Рост, ўғлим,— жавоб қилди у.— Бир вақтлар авлод-аждодимиз қалъага эгалик қилишган.

— Буни сенга ким айтган?

— Бобонг.

— Унга ким айтган?

— Бобонгнинг отаси.

— Менга ҳам айтиб бер!

Отам фикрларини тўплаб олиш ниятида кўзини ерга қадади, сўнг гап бошлади:

— Сенинг катта бобонг, менинг эса бобом шу қалъанинг ҳақиқий меросхўрлари бўлишган. Биз нат эмас, тҳакурмиз. Уқдингми?

— Уқдим, ота, нега бу ҳақда илгари менга индамагансан?— сўрадим жўшқин оҳангда.

— Ҳозиргача бамисоли кичик бир бутазор эдинг. Сени ўт олдирсам озгина сув билан ўчиб қолардинг. Эндиликда сен ёш ўрмонга ўхшайсан, оловни яқинлаштирсам, озгина эсган шамол ҳам алангангни баттар кучайтиради.

Мен кўкат устига ўтиридим, бошимни қўлим билан чангала-дим. Отам менга меҳр билан боқди.

Бирдан ўрмондан онам чиқиб келди. Қўлида ой шуъласида ярқираб турган ханжар. Онам яқинлашиди-да, мени маҳкам қучоқлади.

— Сен менинг ўғлимсан, менинг. Эшитяпсанми, унинг эмас, менинг ўғлимсан,— бидирлади у.— Сен унинг ўғли эмас. Сен тҳакур эмас.

— Ҳой хотин!— аламли қичқирди отам.

— Бу менинг болам!— давом этди онам.— Менинг яккаю ягона ўғлим. У сенга ўхшаш тентак бўлмайди. Сен жинни бўлишгача етдинг, лекин болагинамни асраб қоламан. Сукхрам сендаقا бўлмайди!

— Қўйиб юбор,— ялиндим мен.

— Мен билан шундай муомала қилгани уялмайсанми?— ўшқирди менга.— Кўрнамак! Сен туфайли не-не оғир кунларга бардош бердим!— Онамнинг овозида ҳам алам, ҳам меҳр, ҳам рашк оҳанглари жарангларди.— Сен эса,— у отамга ғазаб билан қичқирди,— ифлос лўли зотидансан, сенинг тҳакурлигинга ким ҳам ишонарди! Яшаш жойинг исқирт ҳужраю қасрлар ҳақида лоф урасан. Аммо болагинам сира сенга ўхшамайди!

— Ҳой хотин, унингни ўчир!— бўкирди отам.

— Мени қўрқитиб бўпсан! Телба тҳакур!— онам ғазаб билан қичқирди. Унинг қўзларида ўт чақнади.— Сен ўзинг сув ичаётган қудуққа тупуряпсан! Отанг ўлганда ожиз бир гўдак эдинг. Отам сени тарбия қилди. Қанчадан-қанча натлар мени олишмоқчи бўлишди, лекин мен фақат сени дедим, сеники бўлдим. Бир умр мендан ҳазар қилиб юришингни қаёқдан билай! Сен мени севибсанми? Сен фақат ўғил туғиб беришимни истагансан, уни тҳакур қилишни орзу қилгансан. Мен эса сенга ҳаётимнинг қаймогини бердим. Полиция бошлиғи Харнам жаннатмисол ҳаётни ваъда қилди, сени деб унинг таклифини рад этдим. Каримхон сени турмага қамаб қўйди, унинг нафси-ни ором олдирмагунча сени бўшатмаслигини айтиб дағдаға қилди. Сени қутқариш учун унинг ҳузурига бордим, айтганини қилдим. Сени, ўғлингни деб қаҳатчилик йиллари қишлоқма-қишлоқ юрдим, оз-моз ишлаш, сизларни оч қолиб ўлишдан сақлаш учун туннй бошқа эркаклар оғушида ўтказдим. Қабила-дошларим ҳеч қачон мендан ҳазар қилишмади. Ёлғиз сенгина мени назарингга илмадинг.

Онам масть, оёғида зўрға турарди. Отам юзини қўллари билан яшириб, унинг гапларини индамай эшитди.

— Сукхрам, рожагинам,— онам менга юзланиб гапида давом этди,— сенга ҳақ гапни айтяпман, сен унинг боласи эмассан, сен натсан. Отанг кимлигини айтольмайман. Натнилар ўз боласининг отаси кимлигини қаёқдан билсин!

— Йўқ!— қаттиқ қичқирдим.— Мен унинг ўғлиман. Мен тҳакурман! Мен тҳакурман! Ота, тўғрими, мен тҳакурман-а?

Отам қўлини юзидан олди, бош чайқади.

— Онанг кўп жиҳатдан ҳақ, майли,— деди титроқ овоз билан.— Бироқ сени менинг ўғлим эмассан деб ёлғон айтяпти. Сен меникисан! Сен тҳакур ўғлисан! Сен қалъа эгасисан...

Отам гапини тугатмасдан онамга хитоб қилдим:

— Эшитяпсанми, отам нима деяпти?

— У билан тилинг биттами?— деди онам ажабланиб. Ҳали ҳам менинг гапларимга ишонгиси келмасди.— Она муҳаббатини қадрлаганинг шуми? Илонбачча!— Гаплар томоғида қайнади, лекин тўсатдан телбаларча кулиб юборди, отамга юзланиб деди:— Қани, тҳакур! Меросхўринг ўзингга бўлсин! Алвидо!

Шундай дедиую қоплонлар сув ичгани келадиган ярим бузуқ эски ҳовуз томондаги чакалакзорга ўзини шитоб билан урди. Онам орқасига қарамай югурап, мен саросима билан унинг изидан қараб турардим. Отам бақириб, унинг орқасидан чопди.

— Ҳой хотин!— деб қичқирди у чопиб бораркан.— Тўхта! Ялинаман! Тўхта! Ўғлимиз ҳурмати, тўхта!

Лекин онам янада тезроқ юргурди, кўп ўтмай буталар орасида кўздан ғойиб бўлди. Бир лаҳзадан кейин ўша ердан даҳшатли дод-фарёд кўтарилиди, иккита қоплон билан олишаётган отамга кўзим тушди. Мен одамларни ёрдамга чақириб бақирдим. Табордан қўлига машъала ушлаган кишилар етиб келди, лекин вақт ўтган эди. Отам билан онам ҳалок бўлишганди.

Мен ёлғиз қолдим.

Қўзларим ёшга тўлди. Онамнинг ғамгин қиёфасини хотирладим. Отамнинг бепарволиги азобига чидашда менга бўлган меҳри тиргак бўлган, бироқ нафратимга тоқат қилолмай ўлимни афзал кўрган. Юрагим қонга тўлди. Ўша тун мён етим қолдим.

Ёнимга Исила билан Манка келди.

— Бу ҳодиса қандай содир бўлди?— сўради улардан бири. Мен жавоб бермадим, йиғлашни тўхтатмадим.

— У ҳамма нарсадан хабардор шекилли,— деди Исила.

Манка бош чайқади, шеригининг гапига жавоб бермади.

Улар кетишли, мен яна йифига зўр бердим. Миямда тарқоқ фикрлар чарх ура бошлади: ўзимни тҳакур, қалъа хўжайини ҳолида кўрдим, назаримда отам билан онамни ўзим ўлдиргандайман. Эндиликда ҳолим нима кечишини тасаввур қилолмасдим.

Ой тоғлар ортига яширинди. Ташвишли ўйларга чўмиб тонг қоронғусида ёлғиз ўтиргандим, кимдир бошимни меҳр билан силай бошлади. Угирилиб, Исланинг қизи Пъярини кўрдим. У оппоққина, кўзлари катта-катта қизча эди. Яқинда тўқ-қиз ёшга тўлганди. Канжарлар<sup>1</sup> табақасидаги қизларга ўхшаб бошига рўмол ўраган эди. Пъяри канжар болалари билан ўйнаб, дўстлашиб, уларнинг одатлари, удумларини ўрганиб олганди. Қизча тўлагина, ўз тенгдошларидан анча кучли, эпчил — чаққонликда истаган ўғил бола билан баслашаверарди.

— Сукхрам,— деди у мулойимгина.

Мен индамай унга кўз тикдим.

— Ифгаяпсанми?

Мен унинг елкасига бош қўйиб, аччиқ-аччиқ йиғладим, у бошимни силади.

— Пъяри, уйга кир,— чақирди Исила.

— Бормайман.

Исила нима гаплигини тушунмади, у яқинроқ келиб, қизининг қўлидан ушлади. Пъяри йиғлаб юборди.

— Сен билан кетмайман!— оёқ тиради у.

— Нима бало бўлди сенга ўзи?

— Сукхрам билан қоламан.

Табордаги одамлар бу гапларни эшитишиди, улар кулишди, кимдир гап қотди: «Исила, уни ҳам чақира қол. Ахир Сукхрам бизга бегона эмас-ку».

— Хўш, Сукхрам,— деди шунда Исила,— қарорим шундай: Пъяри айтгандай бўлсин, бизникида яшайверасан. Бордию қизимни хафа қилисанг ё ундан нафраланссанг, аллақандай bemаза қилиқлар кўрсатсанг, худо ҳурмати, ханжарим қонингни ичади, ўлганимда эса нат Исланинг арвоҳи мен учун сендан қасос олади!

Биз таборга қайтдик. Қўч-кўронимизни Исланинг кулбасига ташидик. Пъяри билан отасидан ташқари ҳужрада унинг онаси Сауно ҳам яшарди. Пъяри Исланинг ёлғиз қизи эди, бироқ унга мутлақо ўхшамасди.

Отамнинг қутисини очганимда зодагон хонимнинг портретини топиб олдим. Кийимларига қараганда у анча илгари яшаб ўтганга ўхшайди.

— Бу ким?— ажабланиб сўради Пъяри.

— Мен қаёқдан билай?

— Суратни жойига солиб қўй!— деди Исила қаҳр билан, лекин Пъяри ўжар қизча эди.

<sup>1</sup> Канжарлар — энг қўйи табақадан бўлиб, улар ҳинд лўлилари, -касб-корлари арқон ва чилвир ясаш.

— Дада, бу кимлигини сен биласанми? — бўш келмай таъкидлади у. — Айта қолгин!

Пъярининг онаси Сауно ип йигириб ўтиради. Исила қизининг хархасидан қутулиш учун уни тарсакилади. Пъяри йиғлаб онасига ёпишдӣ. Исила бамайлихотир чилим чека бошлилади.

— Нега бақрайиб турибсан? — Исила менга ўгирилди. — Бор, ўйнаб кел.

Мен жойимдан қимирламадим.

— Нега уни ҳайдаяпсан? Уялмайсанми? — Сауно мени бағрига олиб эрига ўшқирди.

Исила жирканганича елка қисди ва тескари қараб олди.

— Қизингни эрка-тантиси қилиб юборган эдинг, энди болани ҳам бузяпсан, — тўнғиллади у.

— Мунча ўчакишидинг? — деди Сауно. — Ёлғиз қизинг илтимос қилди. Наҳотки жавоб қайтариш шунчалар қийин бўлса?

— Бўпти, бўпти, — Исила юмшади. — Суратдаги аёл уч авлод олдин яшаб ўтган, ҳамма бало-қазолар ўшандан бошланган. Беномус аёл хизматкори билан дон олишади. Манови шўрлик эса — Исила бармоғи билан мени кўрсатди, — ўша суюқ оёқ аёл ўғлининг авлоди...

— У кўҳна қалъа хўжайини бўлганмиди? — сўради Сауно.

— Ҳа.

Сауно қизини, кейин мени қаттиқина ўпди.

— Исила! — деди у тантанавор тарзда. — Бугун қизимни қалъанинг ҳақиқий эгалари авлодидан бўлган одам билан қовуштиридинг! — Саунонинг кўзлари севинчдан порлаб кетди. — Уқдингми, Пъяри? Энди сен натни эмассан, сен зодагон одам хотинисан. Сен хонимлардай яшашинг керак. Узингни ана шундай қадр-қимматга лойиқ ҳолда тута оласанми? Улар сингари бегона кишилардан юзингни яшириб, ҳашаматда яшайсанми ёки бошқа натнилардай қўлма-қўл юрасанми?

— Нималарни валдираяпсан, Сауно? — Исила хотининга бақирди, кўзлари бесаранжом атрофга жаланглади.

— Ҳали мен валдираялманми? — Саунонинг ҳаҳри келди. — Демак, сен қизинг ҳузур-ҳаловат, обрўда яшашини хоҳламас экансан-да? Биз натмиз. Бу ерда бизни бирор сариқ чақага олмайди. Полициячилар қачон хоҳлашса ўшанда турмага ташлашади. Рожаларнинг хизматкорлари аёлларимизни ўғирлаб кетишади. Булар етмаганидай яна бизни ўғрига ҳам чиқаришади!

Исила индамай трубкасини тўлдирди, эътиroz билдиришга ўрин ийӯқ эди. У мен тарафга гуноҳкорларча нигоҳ ташлади. Мен ерга тикилиб ўтирадим, Сауно меҳрибонлик билан соч-

ларимни силарди. Пъяри бошини онасининг тиззасига қўйиб ётди. Исила ўрнидан қўзгалиб, уларга яқинлашди.

— Йўқ, Сауно, тушунсанг-чи,— Исила Пъярини ўзига тортиб гапира бошлади.— Пъяри менинг қизим. У сенинг сингари натни бўлишини хоҳлайман. Бошқа ҳеч ким бўлмайди. Кимки ерда омонат туриб, осмонга етаман деб интилса, албатта, юзтубан йиқилади..

Мен иргиб турдим, Пъярини қучоқлаб, бағримга босдим.

— Пъяри менини!— дедим дадил.— Мен тҳакур, у эса менинг тҳакураним!

Сауно кулиб юборди.

— Исила, эсингдами!— эрининг қўлини ушлаб хитоб қилди,— бир вақтлар сен ҳам мени мана шундай қучоқлаб, худди шу сўзларни айтгансан.

Исила хотинига меҳр билан боқди, кейин менга бурилди. Кўзлари дарҳол ёмон ўқрайди.

— Хўш, нечун тҳакурман деб чираняпсан?— гердайиб сўз қотди. Унинг товушидан истеҳзо, ажабланиш ва... ачиниш маъносини пайқадим.

— Муҳтарам тҳакур, оёқларинг остида тиз чўкаман,— Сауно бош эгиб, ҳазиллашиб таъзим бажо келтирди.

— Ҳой шўрпешона! Ҳамма вақт эсингда бўлсин!— деди Исила дўқ билан.— Сен нат! Сен биз билақ яшайсан, ҳатто тҳакурнинг ити ҳам сендан тумшуғини буриб кетади. Тушундингми?

Менинг кўзларимда ёш йилтиради.

— Қовоғинг осилиб, ҳўнграб йиғлашга бошладинг!— деди Исила афтини бужмайтириб.— Кимнинг ота-онаси ўлмабди! Эҳ, лапашанг! Юр, сенга ўрмон илдизлари, ўт-ўланларини кўрсатай. Таборимизда уларнинг сирини мену отанг билардик, холос. Отанг тирилиб келмайди, энди сенга мен ўргатаман. Бу катта маҳорат,— у паст овозда сўзида давом этди,— шундай катта санъатки, доривор ўсимликлардан фойдаланишингни билишса, ҳатто полициячилар ҳам ортиқча жонингни қийнайверишмайди.

Мен кўз ёшларимни артдим. Сауно кулиб, пешонамдан ўпди. Пъяри ҳам онасидан кейин меҳрибонлик кўрсатиб қўлимидан тутди. Ўзимни яқин кишиларим даврасида ўтиргандай ҳис этдим, шу муддат ичидаги дафъа кулимсирадим.

— Исила зийраклигимдан мамнун бўлди,— Сукхрам ўз ҳикоясини давом эттириди.— Мен ўрмон ўт-ўланлари ҳамда илдизлари сирини тез уқа қолдим.

...Мен ўн олтига, Пъяри ўн учга етдик. У ҳанузгача вақтини канжарлар орасида ўтказарди. Шу тўрт йил ичидан натларнинг ҳамма ўйинларини мукаммал ўргандим: ликиллаб турган бамбўк ёғочидан тепага кўтарилиб, аргамчи устидан юришгача бориб етдим, эпчили, чаққонлик санъатим ортди. Довруғим тҳакурлар яшайдиган хонадонларгача бориб етди. Исила мен билан фурурланиб юрди. Мен чинакам лўлига айландим. Аммо менинг Пъярим натни бўлмади. У мени жуда яхши кўрар, бироқ бутун вақтини чодирда канжарлар ёнида ўтка зарди.

Бир куни уйга анча кеч қайтдим. Остонада Исила билан Саунонинг гаплари қулоғимга чалинди.

— ...Хўш, нима бўпти?— деди Сауно.— Ўн уч ёшимда қизлигим билан хайрлашгандим. Эслаб кўр, ўша йиллари етилган аёлга ўхшамасмидим? Пъяри эса ўн тўртга қадам қўйди.

— Хўш, нима демоқчисан? Сукхрам ҳам бўй етиб қолди.

— Э, қўйсанг-чи, томирларида ёшлиқ қони қайнамаяпти. Винони ҳам чинакамига ича билмайди, ҳар сафар ичганда афтини бужмайтиради, ҳеч ким уни қизлар билан гаплашаётгани устидан чиққани ҳам йўқ. Шу ҳам йигитми? Мундоқ сўкиниши билса-чи. Эркак эмиш! Ўғирлик ҳам қилмайди, на карта, на соққа ўйнашни билади...

— Нега шундайлигини биласанми?— Исила маккорона кўзларини қисди.— У мендан қўрқади, менинг ўлдириб қўйишимдан қўрқади.

— Ўлдирасанми?

— Бўлмасам-чи. Ҳов ўшанда пўписа қилгандим-ку.

— Бу қанақаси, Пъярига яқинлашишини ҳам ман қилгансанми? Э, агар у эркаклигини кўрсатмаса, қизим ёнида ётиб бўпти.

— Нималарни валдираяпсан, Сауно?

— Воҳ, воҳ, воҳ, ҳеч нарса билмагандай ўзингни гўлликка соласан-а. Гўёки Пъяри менинг қизим эмас! Аёл ҳақиқий эркак билан яшашни хоҳлади. Бордию Сукхрамингнинг қўлидан ҳеч вақо келмаса, Пъяри бошқасини топиб олади.

— Бас, Сауно! Уятинг ҳам йўқ! Улар ҳали гўдак-ку!

— Зўр билимдонсан,— Сауно жилмайди.— Гўдакмиш-а!

Кимнингдир енгил қадамлари эштилди. Бирор менга яқинлашди. Пъярининг қадам ташлашини сездим, қоронғида унга қўлимни чўздим. Пъяри бўйнимдан қучоқлаб, менга маҳкам ёпишиди. Шу лаҳза тўсатдан ўзимни эракақдай, Пъярини хотиндай ҳис этдим.

— Э, сенга гапириб нима қиласман,— яна Саунонинг товуши эштилди.— Аллақачон қариб қолгансан.

— Ҳа, сен ҳали ёшмисан?

— Қизимиз битта-яримта азамат билан қочиб кетади деб қўрқаямсан.

Мен Пъярини маҳкамроқ қучоқладим, томирларимдаги қон кўпирисб оқаётганини, юрагим тез, қаттиқ ураётганини, ҳар бир юрак уришини қулоқларим эшитаётганини бемалол пайқадим. Мен яна, қўлларим оғригунча Пъярини бағримга босдим, лекин у оғриқдан афтини бужмайтирамди, менга маҳкамроқ ёпишиди.

Хужрада Исила баҳайбат қаддини ростлаб, ўрнидан турганини. кўрдим. Шамнинг нурсиз шуъласи унга тушди.

— Буларни нимага айтаётганимни биласанми?— Сауно овози тутила-тутила савол берди.

— Йўқ.

— Ундаи бўлса қулоқ сол. Қизим тҳакурнинг хотини бўлади, у хонимлардай яшаши керак. Унинг бизга ўхшаб ҳаёт кечиришини хоҳламайман.

— Шоҳдан узилган олма танадан узоққа тушмайди,— Исила кулиб юборди.— Сен ким бўлсанг қизинг ҳам шундай. Сукхрамга қара, отасини узгану унга қоплаган. Отасидай камгап. Баъзида ўзини бизнинг хўжайицимиз деб билмаяптимикан, у тҳакур бўлиш орзусидан воз кечиб юбормас деб хавфсираб қоламан. Қўлдаги сув бир неча бор қуриб қолади, аммо ҳар ёғингарчилик мавсумида кўл яна сувга тўлади, чунки кўл дарё эмас. Сауно, ҳозир ўз қабилангдан воз кечишга тайёр турибсан. Ифлос касалликни юқтириб олганингда сени даволаганман. Нега энди ўзингни мендан олиб қочасан?

— Ҳадеб ўшани эсга солаверасан,— Сауно қизариб кетди.— Яхиси қизингга қарасанг-чи. У канжарлар билан ила-кишиб юрибди.

Мен зарб еган одамдай титраб кетдим, Пъярига қарадим. Қоронгуликда унинг кўзлари тинч, осойишта нур таратиб турганини, лабида табассум ўйнаётганини аниқ кўрдим. Унинг нигоҳида қўркув ёки хижолатдан асар ҳам йўқ эди. Пъяри чанқоқлик билан лабини лабимга босди. Унинг нафасидан вино ҳиди анқиб турарди.

— Боламни ҳаётимиздаги шармандалиқдан халос қиласди деган ниятда Сукхрамга она бўлдим. Олий табақа аёлларида айтарли ҳеч вақо йўқ, аммо улар ҳурмат-эътибор билан қуршалган. Қизим ўшалардай яшай олмайдими? Қизимни вояга етказарканман, нуқул шу умид билан яшадим.

Саунонинг юзида сўлишнинг илк аломатлари сезилиб турибди, кўз осталарида майда, оғиз четларида эса чуқурроқ ажинлар пайдо бўлган. Исила хотинига жавоб қайтармади. У бошини эгиб, у бурчакдан бу бурчакка юра бошлади, кейин тўхтаб, бошини кўтарди.

Пъяри эҳтирос билан лабини лабимга боса берди. Ўпкам вино ҳиди билан тўлди, бошим айланниб кетди, лекин Пъярини ўзимдан нари итармадим, уни бағримга зўр куч билан боса бердим.

— Сукхрамни ҳеч вақога ўргатмадинг,— деган товушини эшитдим.— Уни хотин кишига айлантириб қўйдинг. Йўқ, ийқ, хотин кишига ҳам эмас, чунки хотин кишида эркакларга қаратанда ишқивозлик, эҳтирос кучли бўлади. Сен эса уни...

— Бас, Саuno! Жуда ҳаддингдан ошиб кетдинг!— деб бақирди Исила.

— Бўлмаган гап! Сукхрамнинг онаси билан дон олишганинги мени билмайди деб ўйлайсан шекилли?

Исиланинг қўлида пичноқ йилтиради, лекин Саuno гапдан қолмади.

— Мени қўрқитмоқчи бўляпсанми? Майли, бошқа ҳеч нарса демайман.— Саuno виқор билан жим қолди. Юзлари қаҳрли бўлса ҳам, эрига тикилган кўзларида меҳр тобланди.— Исила,— деди у узоқ сукунатдан кейин,— ёшлигимдан энг яқин дўстимсан. Ҳамиша сени юракдан севдим, доимо кўнглим сени деди. Менга яқинроқ кел, сени афв этдим.

Унинг нигоҳларида таънадан ном-нишон қолмаган, унинг ўрнини меҳр қоплаганди. Исиланинг юзи бўртиб кетди, чамаси ўз қилмишидан уялди шекилли. Тўсатдан у бармоқларини қисирлатди. Пъяри товуш келган томонга қўрқув ичиди бурилди, ҳатто гандираклаб кетди. Уни ушлаб қолдим. Пъярини қучоғимдан қўймай у билан бирга ҳужрани айланниб, орқа ҳовлига чиқдим. Исиланинг оти қулоқларини динкайтириб, бошини биз томон бурди, бизни таниб, бемалол ўтни чимчиласда давом этди, ўйларес сингари сезидирмай эмаклаганича итимиз Бухра яқинлашди. Ит думини ерга чўзиб оромимизни қўриқлаш учун ёнимизга ўтирди.

Пъяри қучоғимда ором олиб ухлади.

Тўсатдан ўз-ўзимдан Пъярининг бошини меҳр билан силадим, бир вақт қарасам тун охирлаб қолибди.

— ...Илгари куни полициячи келди. У Пъярини кўриб қолди,— Саунонинг товуши қулоғимга чалинди.— Бугун нима сотдинг?

— Сен яхшигина калава тайёрлабсан. Уни чойшаб тўқиш учун бердим.

— Менга юбка керак.

— Харлалнинг қўтоси эркак қўтосча туғибди.

Саuno кулди:

— Худога қанча сифин масин, унинг сигири ҳам, қўтоси ҳам нуқул новвос туғади. Новвосдан нима фойда? Яхшиямки, бизнинг Сукхрам пул топадиган бўлиб қолди.

— Тўғри, Сауно. У зеҳни ўткир йигит чиқди. Бошқаларга мутлақо ўхшамайди. Илгари куни катта қишлоққа борувдим, Чандон уни роса мақтади.

— Қайси Чандон? Маргхатда хумча юмалатиб афсун қила-диган<sup>1</sup> Чандонми?

— Ҳа. У Сукхрам доривор ўсимликлар илмини эгаллаб олса, Пъярига кумуш безаклар сотиб олиш имконига эга бўла-ди деди.

— Пъяри ўзбошимча қиз. Унинг кун бўйи топган пуллари-ни салласининг орасидан олаётганини кўриб қолдим.

— Сукхрам қаёққа гойиб бўлдийкин?

Саунонинг юзига ғам кўланка ташлади, ўйга толди.

— Пъяри ҳам йўқ.

— Қизи тушмагур яна канжарларникида юргандир.

— Ишқилиб Сукхрам хафа бўлмаса яхши эди-да?

— Ҳаммаси оллонинг қўлида. Менимча, Пъярини жуда яхши қўради.

— Бўлмаса-чи, ахир, уни уйимизга Пъярининг ўзи олиб келган-да.

— Хўш, нима бўпти? Сен уни эмас, онасини яхши кўрар-динг-ку.

— Яна эски ашулангни бошладингми?— Исила сергак-ланди:

— Ҳозирга келиб нега бўғиласан?— Сауно кулиб юборди.— Эсингдами, бир куни сенга аччиқ қилиб қўшни қишлоқдаги бошқа одамниги кетиб қолгандим, сен суд орқали мени уйга қайтармоқчи бўлгансан?

Исила индамай трубкасини тутатди, бир неча бор тамаки тутунини ичига тортди.

— Ишқилиб, Сукхрам хафа бўлиб қолмасин-да,— такрор-лади у.

Сауно эснади.

— Мен ётаман. Уйқум келялти,— деди у.

«Уларга ғалатига ўхшаб кўриняпман. Нега рақсга тушиб, вино ичмайман? Нечун ҳозиргача аёлсиз яшаб келяпман?» Пъяри қучоғимда ухлайди. У менинг хотиним. Лекин Пъяри

<sup>1</sup> Маргхатда хумча юмалатиб афсун қилиш — Ҳиндис-тондаги қўйи табақалар орасида иссиқ-совуққа, афсунга ишониш кучли. Жасадлар кўйдирладиган жой — маргхатда инс-жинс, алвастилар кўп деган эътиқод мустаҳкам. Шу-важдан ҳар бир қишлоқдаги маргхатда афсунгарлар бор. Гўёки улар инс-жинс, парилар билан алоқа борлаб турармиши. Ӯшаларнинг ёрдами билан истаган орзуни рўёбга чиқариш мумкинмиш. Буининг учун маъбуда Дурга ибодатхонасидан озор етказган одам томонига хурмачани юмалатиб, турли афсунларни ўқиб келинса, у албатта ўлар экан. Борди-ю, озор етказувчи ўлимдан омон қолса, худонинг қаҳрини юмшатиш учун битта хўрозни қурбонлик қилиши шарт.

нега ҳадеб қанжарларга кетиб қолаверади? Бордию бу ярамас қиз яна ўша ёқقا борадиган бўлса адабини бериб қўяман! Ярамас қанжиқ!»— қизишиб жаҳлим чиқди.

Аммо узоқ муддат аччиқланиш қўлимдан келмасди, бора-бора қайгули ўйлардан холос бўлдим. Бирдан назарим узоқда кўриниб турган қалъя деворларига тушди, ой ўроғи унинг устига эгилиб ёритиб турарди. Қўз олдимда намоён бўлган манзара га маҳлиё бўлиб, қараб қолдим. Қачон бўлмасин қалъя эгаси бўлармиканман? Унинг хўжайини бўлганимда қалъага натларни киритаман. Уларнинг хотинлари бегона эркаклардан юзларини яширишади, улар бошқача ҳаёт кечиришади. Одамлар натларни ҳурматлашади, унга тавозе билан салом беришади...

Бирданига ширин хаёллар барҳам топди, мени совуқ тер босди. Нималарни орзу қиляпман? Натлар қаёқда-ю, уларга тавозе билан салом бериш қаёқда! Ёлғиз тҳакур ўзим, улар эса паст одамлар, ўғри, кассоб жиноятчилар. Йўқ, уларга қалъада жой йўқ. Мени телбалик қамраб олди. Назаримда мовий тоғлар мени ёнига чақираётгандай бўлиб туюлди. Одамлар асрлардан бери киши оёғи етмаган қалин ўрмонларда истаган нарсанинг иложини қиласидиган дарвиш — йоглар яшши ҳақидаги ҳикояларни эшитиб келишади.

Бордию ўшаларнинг сирини билиб олсам рожа бўлишим мумкинми? Ҳа, ҳа, рожа! Мен катта, ҳашаматли машинада кетаётганимни яққол тасаввур қилдим. Эҳтимол, рожа ҳар куни қиём суртилган нон еса керак, шунинг учун ҳам унинг юзи мөш еган хўроздай қип-қизил. Унинг қулоқларида олтин, кумуш сирғалар ярқираб туради! Унинг атрофида мулоғимлар парвона. Полициячилар ўз ҳокимларига ҳурмат, тавозе билан боши ерга теккундай бўлиб эгилиб салом қилишади. Буларнинг ҳаммаси қандай гўзал, қандай зўр ҳашамат! Ҳатто қўз олдим қоронғулашиб кетди. Натнилар рожа шарафига рақса тушиб, қўшиқ айтишади... Мен рожа бўлишни хоҳлайман!..

Бордию жуда кўп пул тўплаш қўлимдан келса, ўшалардай яшашим мумкин. Нат бўлишдан қутулардим. Ахир, мен уларнинг қабиласидан эмасман-да. Аҳмадобод ёки Қалькуттага бориб, ўз ҳунаримни кўрсатишм мумкин. Яхшигина пул топган бўлар эдим. Қанчадан-қанча эпчил ҳаракатлар, кўз бойлашларни биламан! Маноҳар чевар мени ниҳоятда эпчил акробат деб бежиз айтимаган.

Ўшанда нат Бҳикамники сингари дала ҳамда боғларим бўларди. Пъяригинам ўзи овқат пиширмасди, бошқалар овқат тайёрлашар, у эса ейишдан бошқасини билмасди. Унга тириклик ўтказиш учун пул топишнинг ҳам ҳожати қолмасди.

Хаёлга берилиб, шундай чуқур хўрсиндимки, Пъяри бирлаҳзага уйғониб кетди. У менга қаради, шунда унинг бекиёс

гўзаллиги биринчи мартаба мени маст-аласт қилганлигини ҳис этдим.

— Менинг эржоним! — Пъяри бўйнимга осилиб шодон қиқирлади.

Тонг оқариб қолди. Қуёшнинг дастлабки заррин нурлари таралди. Пъяри кўксимга бошини қўйиб ухларди. Мен ҳам уйқуга кетдим.

Мен Саунонинг бақириғидан уйғониб кетдим.

— Ҳой, уйғонасанми-йўқми? Эй худойим-е! Шундоқ аёзли тунда булар кўчада ухлашади-я. Буни уятчанглигини қаранг-а! Ахир, бизга бегона эмассан-ку. Бордию қизим шамоллаб қолса нима бўлади, а?

У Пъярини ҳам турткилаб уйғота бошлади. Мен ўтирган жойимда кўзларимни ишқаладим. Чиндан ҳам хижолатда эдим. Тонг отгунча бошимизда ўтириб чиқсан Бҳуро бу туннинг қандай ўтганига шоҳид эди. Мен ўнга қараётганимни кўриб, Бҳуро иргишлаб, думини ликиллатди. Отимиз Юҳора ҳам пашшаларни ҳайдаб думини силкитар, улар жуда қийнаб юборса тўёқларини жаҳл билан ерга уриб тепинарди.

Ўрнимдан туриб бири чекдим. Деҳқонлар аллақачон дала-га йўл олишди, уларнинг кир-чир, исқирт болалари кўча тупроғини чангитиб ўйнашади. Натнилар бошларига кўзаларини қўйиб, қишлоқдан анча узоқдаги қудуққа тизилишганича йўл олишди. Чунки уларнинг қудуқлари алоҳида. Ҳавога янги ёпилган нон ҳиди ёйилди.

Пъяри уялибина ўрнидан турди-да, қочиб кетди. Мен ювингани кетдим, қайтиб келиб, ёғоч сўрига ўтирганимда, Пъяри ҳужрага янги ёпилган нонларни кўтариб кирди. У аллақачон бошига рўмолини ўраб олишга улгурибди. Нонга қалингина қилиб ёғ суртилибди, устига қизил қалампирли қайла солишибди.

— Бугунги нонлар бирам мазалики! — деб мақтаб қўйдим.

— Бўлмасам-чи, бошқача бўлиши ҳам мумкин эмас, — деди Сауно илжайиб.

— Бу гапинг билан нима демоқчисан?

— Мана шу нонларни ҳар куни ёпман, аммо ҳеч ким мақтамайди, бугун қизим ёпган эди, тинимсиз мақтов сўзлари ёғиляпти!

Мен хижолат бўлдим, бироқ Саунонинг гапларида заррача бўлсин гина, рашк йўқ эди, у ҳазиллашаётганди, кўзлари севинчдан порлаётганди.

— Менга қара, Сукхрам! — чақирди у.

— Лаббай!

— Ишга бормайсанми?

— Йўқ, баданларим зирқираф оғрияпти.

— Бу кечаси зах ерда ётиб ухлашнинг жазоси.

Мен кулимсирадим, менга қўшилиб Пъяри ҳам жилмайди.

— Сен нега тиржаяяпсан? — Саuno қизига дағдаға қилди.—

Қани, ишигни қил, тонг сағардан бери ўчоқ олдида куймаланаман, сен бўлса қудуқдан сув келтирганинг йўқ. Отанг сени жуда эркалатиб юборди. Ҳали қараб тур, ярамас қиз! Бир адабингни бериб қўйай!

Пъяри кўзани олди-да, қочиб кетди...

#### 4

Бу ерда Сукхрам йўқ деб ўйлайман. Унинг кейин сўзлаган хикоялари ҳақиқатга тўғри келмасди, ахир, у бор ҳақиқатни айтиб беришдан ожиз эди. Лекин мен одам танишга устаман. Инсон кўнгли табиатнинг энг қийин жумбоқларидан бири, бу жумбоқ хурсандчиликда эмас, балки ғам-аламда ечилади. Сукхрамнинг қалбида эса яхшилик билан ёмонлик ўртасида тинимсиз кураш борарди.

Мен маҳаллий тҳакурлардан бўлган дўстимнинг хоналаридан бирида ўтирибман. Деразадан йилнинг совуқ пайтларида қандайдир бошқача бўй таратадиган ясминнинг кишини маст қиласидиган муаттар ҳиди кирмоқда. Дерағзанинг тепасида ёрқин, яримтаки ой гардиши нур сочиб турибди. Кўзга аранг илашадиган майда ёмғир севалаяпти, ёмғир ҳавони қалин, вазмин намликка тўлдирган.

Қаердандир — анча йироқдан канжарларнинг қўшиғи эшитилади. Миямга беихтиёр, нега энди ҳозиргacha таъқиб қилинган, ҳамма юз ўғирган бу одамларга ёрдам бериш у ёқда турсин, ҳатто ачиниб ҳам қўйишмайди, деган фикрлар келади. Уларнинг қўшиқларида зўр жозиба бор. Улар совуқ рутубатли тун бўлишига қарамай қўшиқ кетидан қўшиқ айтишапти. Йилнинг худди шундай мавсумида улар жуда қийналишини Сукхрам менга айтиб берганди. Совуқ — табордагилар учун чинакам оғат, чунки уларнинг киядиган иссиқ кийими йўқ, бутунлай музлаб қолмаслик учун гулхан ёқишади. Гулхан ҳам ёрдам бермаса одамлар бир-бирини иситишга уринади. Инсон зотининг мана шундай ночор ҳолда яшаши ҳақидаги фикрдан юрагим ниҳоятда эзилиб кетади.

Мен ҳам Сукхрамни хотирлайман. Бу қанақаси бўлди? У баҳти келажак ҳақида орзу қилган. Бу орзу уни бутунлай қамраб олган, оромини бузган, аммо ўз интилишларини поёнига етказиш учун йўл топа олмаган. Фарибона кулба, доимо қашшоқлик, қабиланинг шафқатсиз қонунлари унинг қўл-оғи ни боғлаб қўйган. Бир парча нон топиш учун интиҳосиз курашда умрининг энг яхши йиллари, ёшлик кучи шу алпозда ўтди.

Пъярининг меҳр тўла кўзлари, гўзаллиги, ёшлиги туфайли очилган ажойиб оламда нега у ўзини ҳамиша бегонадай ҳис этди? Сауно ҳам умрида тортган хўрлик, зорликлар учун ўчишни астойдил орзу қилди. Бироқ қандай қилиб? Ўз яқинларидан нафратланиш, жирканиш йўли биланми?

Бу одамларнинг ахлоқий қонунлари мени хижолатга солмайди, лекин улар ўзларининг қотиб қолган тушунча ҳамда тасаввурлари оламида яшаётган таңқидчиларимни анча довдиратиб қўйиши муқаррар. Чунки улар ҳамма томондан мустаҳкам ақидалари, эскирган фикрларига ўргимчак уясига тушгандай ўралиб қолишган.

Қўшиқ тинди, тун ҳам туман кўрпасига ўраниб уйқуга кетгандай ҳаммаёқ сукутга чўмди. Ой фақирлар уйи деразасига тутилган дағал каноп матодан сизиб ўтган ёруғликнинг мужмал нурига ўхшаб кетди.

Нареш баҳайбат дараҳт остида ўйчан турибди. Ним дараҳтнинг йўғон танаси музлаб қолганидан ундан баралла совуқ чиқаёттир. Нареш Чанда ёнига келаётганди, лекин нимадир уни тўхтатди. Қоронғуликдан чўчидимикан? Мен уни қизиқиб кузата бошладим.

Эҳтимол, у орқага қайтмоқчиdir?

Йўқ! Ошиқнинг қатъияти олдида кўрқув чекинади.

Эннига юпқагина қофоздан ясалган кўрпача ташлаб олган нимжонгина бола — Нареш яна олдинга интилди. Унинг юзида зўр қатъият барқ уриб турибди. Ўзининг ҳам эр етиб қолганини айтмайсизми? Нарешнинг бўйи унча баланд эмас, шунинг учун худди ёш папайя дараҳтига ўхшаб кетади.

У оқ-сариқдан келган, териси майин, ҳали китобхонлар қўлига тушмаган, янгигина нашр қилинган китобдай бежирим. Ипакдек силлиқ соchlари кўрпача тагига яширган, аммо ҳалитдан ажин тушай деб турган кенг пешонаси рўй-рост кўриниб турибди.

Нарешнинг кўзлари ажойиб, шаҳло, самимий боқувчи бу кўзлар ўқ еган оҳунинг кўзларига ўхшаб кетади, уларга юрагингиз ачишмай қарай олмайсиз, чунки ярим ёпиқ киприклар орасидан боқиб турувчи кўз қорачиқларида эзилаётган юракнинг раҳм-шафқат сўраб ялиниши, умидсизлик, ноҷорлик маъноларини ўқиши мумкин.

Изифирин шамол суюкларимгача зирқиратар, лекин мен шиддатли шамолнинг кучи билан олишиб олдинга интилардим. Агар шамол йигитчани ўз қанотларида гул каби енгилгина кўтариб кетаётган бўлса, мен билан катта ҳамда бақувват дараҳт сингари муомала қиласди: мени илдиз-пилдизим билан қўпориб ташлаш масадида у ёқдан-бу ёққа тебратарди.

Биз боф дарвозасидан ўтдик. Ярим вайрона уйда боғбон ухлар, ёнгинасида қўтослари ётарди. Йўлнинг икки чети кимсасиз, жимжит. Боғнинг ичкарисида ўзида даҳшатли инс-жинслар, алвастилар ҳақидаги сир-асорни сақлаган оқ мармар қаср қад қўтариб турарди. Нареш қўрқмай дарвозадан ичкари кирди. Коронгулик уни ютди-қўйди. Унинг ортидан боришга юрагим бетламади ва арк ёнида тўхтаганимча қолдим. Назаримда қаср ичида Нареш ёлғиз эмасди.

Ҳаққаҳа эшитилди. Ҳа, икки киши — Нареш билан Чанда кулишарди! Мен қизнинг совуқ ҳавода анчагача тарқамай муаллақ турган кумушдек жарангдор кулгисини эшиитдим. Бу кулгу ёмғир мавсумида ҳўл бўлиб кетган товуслар шарқдан эсган илиқ шамолда қанот ҳамда думларини қуритиб олиш учун ростлайдиган қасрнинг мармар ётқизилган майдончаси устида қотиб қолгандай бўлди. Ҳозир эса майдон устида икки ўсмирнинг шодон кулгилари чарх урмоқда.

Тўсатдан мени маъносини ўзим ҳам тушуниб етмаган бир ташвиш, ҳадик қамраб олди. Бу ерда нима қиляпман? Қандай қарорга тўхтاشим керак? Ўзимни ўзим койидим. Бу жойга нечун келиб қолдим? Очиқ ҳаводаги изфиринда совуқ еб ўтириш менга зарур эканми?

Ҳозир Нарешни чақириб, таъзирини берсаммикан? Бироқ шу заҳотиёқ юрагим орзиқиб кетди: неға энди уни олдинроқ, шу ёққа келаётганидаёқ чақириб олмадим?

Кутилмаганда кимнингдир тўнғиллаган овози эшитилди:

— Қизи тушмагур, яна қочиб кетибди! Йўқ, бу қиз тинкамадоримни қуритади! Бу ҳамишалик ташвишдан қачон қутулар эканман-а? Ярамас қиз! Шайтондан тарқаган! Турган-битгани шундоқ онасининг ўзгинаси! Онаси ҳам ҳамманинг бошини айлантириб юришни яхши кўрарди!

Мен Сукхрамнинг товушини танидим. У мени кўрмади, чунки мен дараҳт соясида турардим.

Сукхрам чамаси Чандани ахтариб юрарди. У ўзини дарвозага урди, ичкарига кирди, аммо қизини топа олмади, унинг алланималарни гўлдираб, қайтиб чиқиб келаётганини эшиитдим.

Кеча тугаб бормоқда, қаердадир бойқуш ҳувиллаб ҳаққаҳ урди. Оёқларим совуқдан қотиб қолди, мен қайтишга жазм этдим. Йўл-йўлакай Нарешни қасрда қолдириб хатога йўл қўймадимми экан деб шубҳаландим.

Уйга яқинлашганимда худди уни ўша дараҳт остида турганини кўриб ҳайрон бўлиб қолдим.

Ийитча ҳам мени кўргач ажабланди, бунақа зимиstonда қаёққа борганимни сўради.

— Сайрга чиқувдим,— дедим кулимсираб, лекин у ақл-ҳушини ўнглаб олмай туриб уни саволга тутдим:

— Ўзинг нима қилиб юрибсан?

У ҳеч нима демади, оғир хўрсинди-да, аста-секин уй томон јора бошлади.

Ўйга қайтиб кирганимиздагина ниҳоятда совуқ қотганимни билдим. Анчагача исий олмадим, кўрпанинг ичига киргач, қон юритиш учун анчагача баданимни ишқаладим, кейин уйқуга кетганимни пайқамай қолибман.

Эрталаб мени дўстимнинг хотини уйғотди.

— Жуда қаттиқ ухлаб қопсан-ку, тақсир. Сенга бир бало бўлдими?

Кўзларимни ишқалаб, туриб ўтирдим. Нарешнинг онаси олдимга қайноқ чой қўйди, менга муғамбirona нигоҳ ташлади.

— Кечаси кўп ўқибман. Анча барвақт уйгонган эдиму турсам қиладиган ишим йўқ деб ётавергандим. Кейин яна кўзим кетиб қолибди...

— Тонг ёришмасдан уйгониб турганингни ҳеч эслолмайман,— деб қулди аёл.— Билиб қўй, бугун бошқача чой дамладим: чойга кардамон билан озгина зировар солдим. Дўстинг шунаقا чойни жуда ёқтиради. Унга ёққани сенга ҳам ёқса керак деб ўйладим!

— Шунақами?— ҳазиломуз ажабландим.— Бунаقا чой ичиш қоидаси бу ердагиларнинг ҳаммасига мажбурийми?

— Бу қанақа ўринсиз ҳазил?— бека ёлғондакам аччиқланди, кейин ўзини тутолмай кулимсиради.— Етар ҳазиллашганимиз, чойни қайноқлигида ич, у бўлмагур фикрларни ҳайдаб, мияни мусафро қиласди.

Икковимиз ҳам кулиб юбордик. Шу пайт остоңада ғамгин, нимадандир ҳадиксираган қиёфада Нареш кўринди. Биз унга қараб, бир-биримизга савол назари билан тикилиб қолдик.

— Хўш, қўлингдан нима ҳам келарди, бекам,— дедим хўрсишиб.— Унга Чандани олиб беришдан бошқа иложинг қолмаганга ўҳшайди.

— Ўйлаб топган гапингни қара-я,— бека чойдан бўшаган пиёлани оларкан тўнғиллаб қўйди.— Аввало менга заҳар келтириб бериб, кейин уни натнига уйлантиришинг мумкин,— аёл шундай дедию, дўқ-дўқ юриб чиқиб кетди.

Мен ўйга толдим. Нарешнинг онаси ёшлигида соҳибжамол ўтган бўлса керак. Бундай дейишимнинг сабаби шуки, бизнинг асримизда киши гўзаллигига ана шундай нуқтаи назар билан ёндашилди. Лекин гўзаллик ҳамма ёшдагиларга ҳам хос эканлигини мен яхши биламан, чунки ёши ўтган кишилар ўзига хос кўркамликка эга бўлади. Бека Нарешни жон-дилидан яхши кўради, аммо бу меҳр у яшаётган жамият доирасида бўғилиб қолган. Шунинг учун ҳам киши ҳаёт гўзаллигини ўзининг нотўлиқ тасаввурларига таяниб, чекланган ҳолда тушунади. Камонси-

мон қошлари билан мужгон ўқини отишга шай турган ўзумри-ни ҳақиқий ҳиндларга хос бегамлик билан ўтказмоқчи эканлигини пайқайман.

Бека Нареш ҳақида сўз юритса юзи жиддийлашади, бутун қиёфаси билан ўғлини яхши кўришини, аммо унинг бебошлик қилишига йўл қўймаслигини билдиришга интилади.

Ха, меҳр-муҳаббатимиз, самимий оиласи туйгуларимиз ҳам жамоатчилик фикри занжирлари билан чамбарчас боғлаб ташланган. Биз ўз эркинлигимиз нашъасини суриш ўрнига уни барбод қилганимиз. Жамиятимиз қонуни ана шунаقا, уни янчид ўтишга ожизмиз. Қонунлар шунақаям илдиз отганки, уларни кавлаб ташлаш имконияти ҳақидаги фикрни ўйлашнинг ўзи даҳшатли гуноҳ бўлиб ҳисобланади.

Мана, беқиёс гўзаллик соҳиби бўлмиш Чанда ҳам инсоний ҳуқуқлардан маҳрум. Чанда шунақаям чиройлики, ҳозир ўрта аср даври бўлганида уни бирон-бир рожа албатта ўз маликасига айлантириб оларди.

Табиат яратган мукаммал, бекаму кўст чирой эгаси бўлмиш бу соҳибжамол қиз ўз социал мавқеи билан осонгина эгаллаб олиш мумкин бўлган аёллар тоифасига кириб қолган. Айтишларича, Амбапали<sup>1</sup> бениҳоя чиройли бўлганидан қадимиј афсонавий Лачхавлар зотидан бўлган ҳукмдорлар уни эгаллаш учун ҳаёт-мамот жанг қилишга шай бўлганилар. Ана шунда эркаклар аёлни мол-мулк тақсимлагандай бўлиб олишган, уни оила бошлиғи бўлиш ҳуқуқидан маҳрум қилишиб, чўрига айлантиришган.

Орадан кўп замонлар ўтиб кетди, аммо биз аёлларга ҳозиргача чўрига қарагандай муносабатда бўлмоқдамиз, бирон-бир ўзгариш ясашга ожизмиз.

... Қўёш ўз ётоғига шошилди, салқин тушди. Дўстим чангга беланганича ҳориб-чарчаб қайтди. Менинг фикрларим унга таъсир қилмади. Унинг ўз ташвишлари бор эди.

— Ҳосил пишганда,— деди у устидаги чангларни қоқа-қоқа,— ҳукумат донни штатдан ташқарига чиқаришни ман этади, уни ноилож арzon-гаров судхўрларга сотишга мажбур бўламиз. Судхўрлар бутун ҳосилни харид қилиб бўлгач, ҳукумат донни ташқарига олиб чиқишга рухсат беради. Биз ўз донимизни судхўрлардан уч баравар қимматига сотиб оламиз. Энг хунуги шундаки, аввало ҳукумат штат аҳолисининг манфаатини кўзлаб ана шундай йўл тутади, кейин эса бутун Ҳиндистон халқи манфаати учун янги қонун чиқаради...

<sup>1</sup> А м б а п а л и — ҳозирги Фарбий Покистон териториясидаги Ганг ва Браҳмапутра дарёлари ўрталигига жойлашган, эрамиздан олдинги VI асрларда кичкина Лачхави князлигига яшаган ишратвозд аёл номи.

— ... Орадан икки йил ўтди,— деб Сукхрам ўз ҳикоясини давом эттириди.— Бутун умрим бошқача ўта бошлади. Төнг пайтида қишлоқни тарқ әтардим. Мени доим Пъяри билан қўшни нинг ўғилчаси Рамлал кузатиб боришарди. Исила одам чақи-рарди. Биз қишлоқма-қишлоқ юриб томоша кўрсатардик. Тунни ўтказиш учун чодир тикардик. Ухлаш олдидан Исила ҳаф-сала билан тушган пулларни санар, кейин яшириб қўяди. Пъяри овқат пиширади. Сауно биз билан бирга юрмас, ўзи ёлғиз ўйлуттарди. У тиланчилик қиласади. Бирорта одамга илашиб қолгач, қутулиш учун озгина чақа ташламагунча ор-қасидан хираклик қилиб эргашиб кетаверарди. Баъзида қамишдан сурнай ясад, қишлоқ болаларини чақирап, ўз матоҳини озиқ-овқатга алмаштириб оларди. У бундай ишларга устаси фаранг эди. Пъяри ҳам томошабинлар чўнтагини қоқлашга уста эди. У гоҳ рақсга тушиб давра айланар, гоҳ юзини ноз-адо билан рўмоли учида яшириб, оломон олдидан бўксаларини тебратиб ўтиб қоларди. Одамлар Пъярига завқ-шавқ билан тикилишарди, лекин у жуда эҳтиёткорлик қиласади, юзини ҳеч кимга кўрсатмасди.

Бир куни Чхахран қишлоғида томоша кўрсатардик. Номерлардан бири пайтида сирғаниб, арқондан қуладим, лекин пастга тушиб кетаётib бир амаллаб арқонни қўлим билан ушлашга улгурдим, ҳавода осилиб қолдим. Пастдаги оломон даҳшатдан қичқириб юборди. Чунки акробатнинг арқондан қулаши — ўлгани. Пъяри ҳаётим учун ташвиш тортиб эҳтиёткорликни бой берди, ёпинчигининг бир чети бошидан тушиб кетди. Ӯшандаги ҳамма унинг юзини кўрди. Қийин, ҳавфли вазиятдан чиқиши учун ҳазилакам ҳаракат қилмадим. Арқонга қўтарилиб, унга оёғим билан илашдим, бошимни пастга қилиб, бир муддат чай-қалиб турдим.

— Мана буни маҳорат, эпчиллик деса бўлади!— Исиланинг баланд овози янгради.— Муҳтарам жаноблар, бунга эътибор беринглар! Бу номерни энди кўрсатишими!

Пастга тушганимда Пъяри ёнимга чопқиллаб келди.

— Бундай қилишга қандай журъат этдинг?

— Жўрттага қилди деб ўйладинг шекилли?

Пъяри хўрсиниб қўйди, холос.

Майдондаги томошани тугатганимиздан кейин шу ердаги заминдор ҳузурига келдик. У кираверишда мулоғимлари билан ўтиради. Исила олдинга чиқиб, унга эгилиб таъзим қилди.

— Қудрати зўр жаноб,— гап бошлади у,— тирикчилик ўтказиш учун озгина пул ишлаб олиш ниятида қишлоғингфа келдик. Бизни марҳаматингдан дариф тутмасссан?

«Құдрати зўр жаноб» заминдор ўзига ҳафсала билан оро берибди — сочларини инглизча усулда текислатибди. У бошқарувчисига қандайdir буйруқ берди, кейин ёнида қамишдан тұқылған стулда ўтирган полициячига бурилди, улар алланималар ҳақида гаплаша бошладилар.

Заминдор қишлоқда ҳокими мутлоқ эканини, күнглиға нима маъқул келса, шуни қилишини билардик, бироқ у ҳам қишлоқ удумлари билан ҳисоблашуви керак эди. Заминдор — бизнинг падари бузрукворимиз, биз — унинг фуқароси. Бизни бокиши, озгина пул ишлаб олишга имкон бериш — унинг бурчи. Шунинг учун ҳам ҳамиша унинг ҳузурига таъзим бажо келтириб борамиз. Бироқ бу сафар полиция участкаси бошлиғи бизга шубҳа билан қараб:

— Анови йигит натми? — деб сўради.

— Худди шундай, тақсир,— бошқарувчи боши билан тасдиқлади.

Бошлиқ Ислиага яқинроқ кел деб ишора қилди. У яқинлашиб, яна эгилиб салом берди.

— Үғирлик қымалмаяпсизларми мободо? — бошлиқ жиддий савол берди.

— Асло, қаттакон тақсирим. Тирикчилик ўтказиш учун ўз меҳнатимиз билан пул топамиз. Биз фақир одамлармиз, құдрати зўр тақсиримдан, отамиз ҳамда оғамиздан бирон егулик беришини, адолат кўрсатишини илтимос қиласмиз. Нега үғирлик қиласканимиз?

Бошлиқ шарақлаб кулди, унинг уни тепага диккайған мўйлаблари мени даҳшатга солди. Пъяри ёпинчиғи билан юзини тўсиб турарди, полициячи бўлса ўша томонга бир неча бор қайрилиб, Пъярига суқ билан тикилди. Пъяри бу нигоҳни пайқаган бўлса керак, юзини яна астойдилроқ яширди. Полициячининг нигоҳи Пъярининг келишган қадди-қомати, дўмпайған баланд кўкракларига михланди. У томогини шишириб, чақишига ҳозирланган кўзойнакли илон қиёфасига кирди. Пъярига еб қўйгундай тикилиб турарди, бироқ Ислиани чақишига ҳозирланди. Мен на ўлик, на тириклигимни билмай гаранг турардим. Дамим қайтди, даҳшатдан нафас ололмай қолдим, кимнингдир кўзга кўринмас қўли томогимдан бўғаётгандай эди.

Чодирга қайтганимизда Сауно нонни ёпиб, бизни кутиб ўтирган экан. Бугун у полиция участкасида садақа сўраб, икки ана<sup>1</sup> ишлаб олибди. Ўша пулга ун харид қилибди. Бир рупияга йигирма сер<sup>2</sup>, икки анага эса икки ярим сер ун сотиб олиш

<sup>1</sup> Ана — рупиянинг ўн олтидан бири. 1957 йилдан бери Ҳиндистонда ўнлик система жорий этилган. Бир рупия Ҳиндистон пули.

<sup>2</sup> Сер — 993 грамм. 1958 йилдан бошлаб килограмм ва литрга тенглаштирилган.

мумкин. Тўрт киши бўлганимиз учун ҳар биримизга ярим сердан мўлроқ ун тўғри келди. Бу анча кўп. Саuno нонни қўлбola ўчида ёпибди, нон совиб қолмаслиги учун товага солиб, бурчакка қўйиб қўйибди.

Нонни мақтай-мақтай ея бошладик. Анчадан бери бунчалик иштача билан нон емагандим. Биз бугунги кун воқеаларини гапириб, бир-биримизга ҳазил-мутойиба қилдик. Пъяри ёпинчиғини кўтариб ўтиради. У нондан майдо-майда тўғрамларни синдириб, ҳафсала билан чайнарди. Ҳовлида полициячининг қораси кўринди. Саuno бизга ташвишли назар ташлади, Исила титрай бошлади, Пъяри ёпинчиғини яна юзига туширди. Бхура яқинлашди, у думларини диккайтириб, қаҳрли ҳурпайди. Ит бизга қараганда ўзини анча мустақилроқ тутарди.

Семиз юзлари қип-қизил навбатчи полициячи Исила мурожаат қилди:

— Бу қишлоққа қаердан келдинг?

Исила еяётган нонини товага қўйиб ўрнидан туриб таъзим қилди.

— Тақсир, биз бутун вилоятни кезиб, тирикчилик ўtkазиб юрибмиз.

— Сени бошлиқ чақирапти.

— Раҳминг келсин, тақсирим. Қанақа ножӯя иш қилибмиз?

— Бу ёққа кел!

Улар бир четга чиқиши. Полициячи Исила бир нима де-ди-да, жўнаб кетди. Исила қайтиб келиб ўтири, ҳеч нарса бўлмагандай нонини bemалол чайнайверди. Нонини еб бўлгач, Саунога қаради, Пъяри томонга имо қилди. Саuno: «Анови нега келганини билгандим», деган маънода бошини қўйи солди.

Қоронғи тушди. Мен бўйра устида ётиб чекдим. Саuno билан Пъяри суҳбатига қулоқ солдим.

— Анови саллот нимага келганини билдингми?— сўради Саuno.

— Пайқадим. Бошлиқ мендан кўзини узмаганди. Эҳтимол, у ёнига боришмни хоҳлар. Аммо Сукхрам рози бўлмайди.

— Рози бўлмайди дейсанми? Буни қара-я! Бу эркакларнинг иши эмас, унга индамасанг ҳам бўлаверади.

— Хафа бўлади.

— Бу аёлларнинг иши, уни ўзимиз ҳал қиласиз. Нимага хафа бўларкан? Йўқ деб кўргин-чи, тириклайн теримизни шилиб олади. Отанг билан эрингни турмага ташлашади. Боқувчисиз қолиб нима ҳам қилардинг? Очдан ўлмаслик учун қўлма-қўл юрасан.

Пъяри ўйланиб қолди.

Атроф зим-зиё бўлди. Пъяри тўсатдан ўрнидан туриб, қишлоққа йўл олди, лекин мен уни қувиб етиб, қўлидан ушладим.

- Қаёққа кетяпсан?
- Шундоқ ўзим, ҳеч қаёққа.
- Ёлғон гапиргани уялмайсанми?
- Кўлимдан нима келарди?
- Борма, вассалом.
- Бормасам оқибати нима бўлишини биласанми?
- Биз ҳозироқ бу ердан кетамиз.
- Бизни бошқа қишлоқда ушлаб олишади. Пиёда узоққа кетиб бўлмаса!

Ночорлигимдан фифоним осмонга чиқди. Наҳотки, биз шунчалар кучсиз, ожиз бўлсак? Шу пайт кўхна қалъа ёдимга тушди. Мен нат эмас, тҳакурман. Тҳакурнинг хотини полиция бошлиғи ёнига гуноҳ қилгани бориши мумкинми?

- Ҳеч қаёққа бормайсан,— дедим дадил.
- Ахир, у сен билан отамни қамчилаб, ҳаммаёқларингни моматалоқ қилиб ташлайди.
- Майли, ураверсин.
- У барибир мени олиб кетади. Ҳозир совға-салом беради, зўрлаб олиб кетса калтаклайди ҳам.

Мен ҳеч қанақа гапни эшитгим келмас, миям айниб қолган-дай эди. Мен хотинимнинг қўлидан маҳкам ушладим.

- Шармандаликтан ўлим афзал!
- Шу арзимас нарса учун ўлиш керакми?— Пъяри кулди.— Йўқ, йўқ! Қабиламдаги аёллар ҳамиша шу ишни қилишади. Нима, осмон узилиб ерга тушармиди?

— Ахир, тҳакур хотини эканингни биласан-ку!— қичқирдим мен.

— Ҳов албатта, тақсирам.— Пъяри захарханда қилди.— Ҳар куни эрталаб чўри қиз келиб мени чўмилтиради. Чамарин<sup>1</sup> мен учун тезак ёлади. Домни<sup>2</sup> рақс тушиб, ашула айтиб кўнглимни хушнуд қилади. Телин<sup>3</sup> оёқларимни ювиб қўяди. Кўкфуруш аёл остонамга сабзавотларни келтиради, заргарнинг хотини қимматбаҳо безакларни олиб келади. Қушбеги билан извошчининг хотини эса...

— Беҳаё, суюқоёқ!— ғазабдан ўзимни тутолмай бақирдим. Пъярининг кўзларида ёш йилтиради, аммо бу ёш ўша заҳоти куриди-қолди.

— Қуриб кет, сендан қанақа жанобу ҳукмдор чиқарди!— кўзларидан ўт чақнаб гап бошлади у.— Сенда заррача бўлсин

<sup>1</sup> Ч а м а р и н — кўнчилар табақаси аёли.

<sup>2</sup> Д о м н и — сават, арқон тўқийидиган дом табақаси аёли.

<sup>3</sup> Т е л и н — ёғ тайёрлайдиган, ўсимлик ёғини ташиб юрадиган тели табақаси аёли.

ачиниш деган нарса йўқ! Сен аёлни ҳимоя қилишинг керак, сен бўлса ўзингни ўйлайсан, ўз орномусингни талашиб оворасан. Нега мени тўхтатасан? Бақириб-чақириб мени ҳимоя қилган бўлдинг-а? Мен натни эмасманми? Ўзинг ўйлаб кўр, бошимни қаёққа урай? Ҳуснимни, ёшлигимни яширишга уриндим, одамлар барибир пайқаб қолишаپти. Ҳеч ким мени кўрмайдиган бўлиб яшириниш қўлимдан келармиди? Чиройим кўзга ташлангандан нечун хижолат бўлишим керак? Чиройимни одамлардан яширмайман.

Ўмидсизликдан бошимни чанглаб инグラб юбордим. Фазабдан бўғилиб қолдим.

— Майли! Чодирга бор! Мен қайтгандан кейин борарсан!— дедим Пъярини тутиб.

У итоаткорлик билан орқага қайтди. Мен эса қоронгулик сари, қишлоққа қараб йўл олдим. Негалигини ўзим ҳам билмаган ҳолда Махатма Гандини хотирладим. Қишлоқдаги баъзи савдогарлар уни мақташган эдилар, кейин бу қилмишлари учун уларни қамаб қўйишиди. Савдогарлардан Гандининг барча камбағаллар баҳт-саодати учун курашаётганини билиб олдим. Аммо Ганди мендан анча йироқда эди, мен эса заминдорнинг уйига кетаётган эдим. Унинг дарвозаси олдида чироқ по-риллаб ёниб турибди. Дарвоза ёнида қоровул икки киши билан суҳбатлашиб ўтирибди.

— Нима бўлди?— деб сўради қоровул мендан.— Тақсирим сенга ҳеч нарса бермадими?

— Берди, азизим, берди.

— Хўш, унда сенга яна нима керак?

— О, муҳтарам тақсирим!..— деб узуқ-юлуқ гап бошладим.

— Хўш?

Фазаб, норозилигим гапиришга қўймади. Шу лаҳза кўз ўнгимда Пъяримнинг юзи намоён бўлди. У меники! Мен Пъярини яхши кўраман! Нечун энди уни бошқа бирор эгаллаб оларкан? Фақат маъсума аёл муштипар бўлгани учунми? Бунга у айборми? Мен қуммикка ташланган балиқдай нуқул оғзимни очиб эснардим, лекин айтадиган гапларим бўғзимда тиқилиб қолганди. Қоровул гулдираб кулиб юборди.

— Сукхрамни бир-иккита мушт билан сийлаш керақ, ана ўшандагина бу ҳароми тилга киради,— деди қоровул уй бошқа-рувчиси ва унинг оғайнисига қараб.

Э, парвардигори олам! Ақлим хиралашди. Мен бу одамлардан кўмак сўраб келибману нималарни эшитяпман ўзи?! Ўзимни унутиб жон-жаҳдим билан бақирдим:

— Мен эмас, ўзинг ҳаромисан! Ифлос ит! Зоти паст лайча! Қоровуллик қиласадиган кўпрак ит!

Кейин нима бўлганини элас-элас биламан. Фақат уччови-

нинг: «Ур, уни! Ур, уни!» деб менга ташланишганини эслайман. Кўз олдимда кимнингдир нағал қоқилган ботинкаси намоён бўлди. Кўп ўтмай юзим қони оқиб турган бир парча гўштга айланиб қолди. Қаршимда қора доиралар сузди, ҳущимдан кетдим, полиция участкасида ўзимга келдим. Қулоғимга қоровулнинг гаплари чалинди:

— Бошлиқ жаноблари, анови ярамас ўғирликка келган экан. Бузоқнинг терисини ўғирлаганда қўлга туширдик. Тақсир, шундай боплаб адабини берингки, кимлигини, насл-насабини билиб қўйсин. Сурбет! Тақсир, у пандит<sup>1</sup> Вачанхардни ҳақорат қилди. Худога шукур, бизда юртни манови қароқчи ҳатлар эмас, рожалар идора қиласди!

Мен бу гапларнинг ҳаммаси ёлғонлигини, мен ўғирлик қилишга эмас, заминдор билан гаплашгани келганлигимни айтмоқчи бўлдим, бироқ гапларим томоғимда тиқилиб қолди. Кўзларимда ёш тирқиради, полициячилар кулишиди.

Бошқарувчи билан қоровул кетгач, уйимизга борган полициячи шундай деди:

— Нега йиғлайсан? Уйингдагиларга хабар қилдим. Пъяри бошлиқ жанобларининг ёнига келди, у киши хурсанд бўладилар, эртага эрталаб сени авф этадилар, уйга қўйиб юборадилар. Йиғлашни бас қил!

Мен яна ярим беҳуш ҳолатга тушдим, дераза остида Пъярининг жаранглаган овози мени сергаклантириди.

— Қаерда у?— сўради Пъяри.

— Анови ёқда.— Полициячи заминдорнинг уйини қўрсатди.

Кейин нима бўлганини билмайман. Туннинг қолган қисми ни қаттиқ алаҳлаш билан ўтказдим, вақт мен учун тўхтаб қолгандай, фақат адо бўлмас дил хасталик қилгандай эди.

Эрталаб мени қўйиб юборишиди. Участкадан қайтаётганимда оёқларим чалмасиб кетаверди, таборга бориб олишга кўзим етмади. Бахтимга Исила учраб қолди, чодирга етиб олишимга кўмаклашди. Ислининг кайфияти жойида эди, чодирга киргач кўзим Пъярига тушди. У бурчакда индамай ўтирганича онасининг гапига қулоқ соларди.

— Ҳали фўрсан. Ҳаётни тушуниш керак. Ҳамма шундай йўл тутади. Бой-бадавлат хонадонлар аёлларига қарасанг, ҳаммаси ҳалол, олижанобга ўҳшайди. Аслида-чи, унақа эмас. Кечактанг сенинг юзингдан ўтиб бошлиқ индамаса керак деган ниятда судхўрнинг уйига ўғирликка тушибди. Судхўрнинг ўзи қишлоқларга қарздорлардан пул ундиргани кетган экан. Ҳўш, унинг хотини бўлса пичоқ чархловчи билан бамайлихотир ҳузур қилиб ётганмиш. Ҳамма шунақа умр кечиряпти.

<sup>1</sup> Пандит — ўқимишли, билимдоң браҳман, бу ерда ҳурмат маъносида.

— Отам кечаси нималарни эплаштирибди?

— Тўртта кумуш билакузук, қўшқатор қилиб тизилган икки шода йирик мунчоқ.

Пъяри ҳадиксираб олазарак бўлди, бироқ мени кўриб кулимсираб қўйди, елка қисди-ю, лом-мим демади.

— Сени қўйиб юборишдими, болагинам?— Саuno севиниб кетди.— Нега остонада қаққайиб турибсан? Ичкарига кир!

Мен индамай бурчакка бориб ўтиридим. Бошим тарс ёриламан деб лўқилларди.

— Вой, ҳаммаёғи қон!— юзимга қараб бақириб юборди Пъяри.— Она, қарагин!

— Кўряпман. Уларнинг кавушларига мих қоқилганга ўхшайди.— Саuno ярам, кўкарган жойларимни диққат билан кўздан кечирди.— Отангда бунаقا тириқлар кўп, санаб адоқ қилиб бўлмайди.

Ҳар иккала аёл қип-қизил қонга бўялган юзимга хотиржам тикилишар, мен эса газаб билан аламимни аранг босиб турардим.

— Нақадар шафқатсиз одамлар,— дея олдӣ холос Пъяри, кейин кўзада сув келтириб, юқбасининг чети билан юзимни арта бошлади. Саuno чодирдан ташқарига чиқди.

— Ҳадеб нималарни ўйлајсан?— сўради Пъяри.

Мен жавоб қайтармоқчи бўлдиму бироқ индамадим, Пъяри кўзларимга тикилди-ю, ҳамма нарсага тушунди.

— Биламан, мени яхши кўрасан. Жудаям яхши кўрасан!— деди у меҳрибонлик билан.— Аммо мен шу ерда — қаршингда ўтирибман. Сени ташлаб кетмайман. Тунги воқеадан кейин камиб қолдимми? Жин ҳам ургани йўқ.— Пъяри бир оз жим ўтиргач, ўрнидан турди, трубкани тамакига тўлдириб, менга узатди.

Мен чекдим.

— Сен беҳудага аччиқланяпсан. Аёл киши эркакларнинг иродаси билан қилган қилмишидан уялмаслиги керак. Сиз эркаклар қилгуликни қилиб қўйиб уялмайсизлар-ку! Икковимиз бир-биримизни яхши кўрамиз. Мен сени ташлаб кетмайман. Ахир, илгарилари ҳам канжараларга борардим, барибири, сендан воз кечмадим-ку.

Мен индамадим. Назаримда ҳаёт мен учун тамом бўлгандай эди.

— Сен ҳануз ўзингни тҳакур деб ҳисоблаяпсанми, тентаквой?

— Пъяри кулди.

Мен кун бўйи бурчакда ётдим. Ухлаб қолганимни билмай ҳам қолибман. Кечаси уйғондим. Пъяри елкамдан қучоқлаб ёнимда ётарди. Унинг қучоғида яна ўзимни бахтиёр ҳис қил-

дим. Газабим тумандай тарқади. Жилмайганимча Пъярининг юзларини силадим, у ҳам менга қараб жилмайди.

— Овқат олиб келайми?

У менга нон берди. Нонни еб бўлишим билан сув келтириди. Сувни ичиб бўлганимдан кейин Пъяри яна ёнимга ётди.

Эртаси куни Исила менга шундай деди:

— Бошқа қишлоқларга кетамиз. Йўлда молларимизни со-тамиз. Мен бир тҳакурни биламан, ҳамма молларимизни яrim баҳосига индамай сотиб олади.

Биз чодиримизни йиғишириб, аравага жойладик. Исила от етаклади. Сауно, мен ва Пъяри арава кетидан эргашдик, орқа-мизда эса Бхура чопқиллаб кела бошлади.

## 6

Сукхрам ҳикоясини давом эттирди:

— Мен йигирма иккига қадам қўйдим, Пъяри эса ўн тўқ-қизга кирди. Исила вафот этди. Сауно уйга ёшгина натни етак-лаб келди... Ҳа, Исила вафот этди. Изгиринли совуқ тунлардан бирида у шамоллаб қолди, иситмаси кўтарилиб, бир неча кун алаҳлаб ётди. Мен дори олиб келиш учун табибга югурдим, аммо дори кор қилмади. Сауно эрини иситиш, шамоллашни йў-қотиш ниятида унга қайноққина тариқ бўтқа ичирди, шундан кейин кўп ўтмай у бутунлай кўз юмди. Биз унинг жасадини куйдирдик. Сауно узоқ йиғлади, кейин кўз ёшларини артиб, деярли хотиржамлик билан:

— Энди дунёда яккаю ёлғиз қолдим, ҳеч кимим йўқ,— деди.

— Биз-чи?— сўрадим.

— Сенинг ўз хотининг бор, сен уники, меники эмассан.

— Агар унга кўз олайтирсанг кўзларингни ўйиб оламан,— дей Пъяри онасига хуруж қилди.— Ёлғиз яшай олмасанг, би-ронта бўйни йўғонни топиб ол.

— Эҳ қизим-а! Эркакдан нима фойда! Уни қопга солиб, қочиб кетмасин деб пойлаб ўтириб бўлармиди? А? Уни деб яшаб ўтган кишим оламдан ўтди, энди ҳеч кимга керагим йўқ, ҳамма мени хўрлайверади! Бироқ мен қариб мункиллаб қолганим йўқ, жонгинам! Ҳали куч-қувватим бор. Кучдан қолганимда бирорта чолни топиб оларман, тириклилигимни бир амаллаб ўтказарман. Қизимнинг уйида хўрлик тортгандан кўра шу маъ-кул бўлса керак.

— Э-э, сизларни қаранглар-а!— гапга аралашдим.— Исила-нинг кули совумасдан жанжаллашяпсизлар!

— Раҳмдил одамнинг топилиб қолганига куйиб ўлайми! Бо-қувчиси ўлган бўлса у энди сенинг топганингни ейиши керакми?

— Йўқ, қизим, сен бутунлай виждонингни йўқотибсан! Қўрқма, ҳамиша елкангга ўтириб, сенга оғир юк бўлмайман,

малол келмайман. Лекин шуни билиб қўй. Маурсинхнинг хотини энаси Малунинг гапини ерда қолдирганида, бир тўғрам нонини аяганида у Маурсинхнинг ҳузурига боради, Маурсинх кампирни яхшигина сийлайди. Менинг сийлайдиганим йўқ. Отаси ўғлининг қилмишидан севиниб кетган. Қейин шундай деган: «Хотинингнинг адабини бериб, ота-боболарим номини улуғлабсан». Мисгарнинг хотини Албенинг эри ҳаёт бўла туриб еттига ўйнаши бўлган! Ҳеч ким унинг мушугини «пишт» демаган. Эри ўлгач, бошқа бир мисгарга тегиб кетган. Сартарошнинг хотини Канпури қариб қолганди, аммо унинг рашкчи эри уни вафосизликда айблаб турмага қаматтирган. Бироқ бу уни инсофга келтирмайди, у учраган эркак билан айш қиласверади. Шунаقا, эркаклар ўша аёлнинг умрининг охиригача ташлаб кетишмади. Қизим, уйингдан кетаман! Эртагаёқ кетаман. Натни нимадан ҳам қўрқарди? Қимни ёқтирса, ўша билан яшайверади!

Пъяри енгил нафас олди. Менинг яна бир нәрсага ақлим етиб қолди: эндиликда бутунлай Пъярининг ихтиёридаман. У мени полициячилардан, рожаларнинг мулозим ҳамда малайларидан, бошқа казо-казолардан ҳимоя қиласди. Нега мен бу қадар ожизман? Эҳтимол, винога ружу қўйганимданмикан? Дор устида ҳунар кўрсатолмай қолдим, ўрнимни Пъяри эгаллади. Унинг кўзни қамаштирадиган ҳусни томошабинларни мафтун қилиб қўярди. Унга яқинлашишга журъат этган пайтимда у: «Ҳозиргина саррофнинг ўғли кетди», деб ёнига йўлатмасди.

Ўша пайтларда Саuno:

— Қизим, баҳор тездагина ўтиб кетади, ёшлик ҳам бир лаҳзалик давр,— деб ҳадеб тақрорлайверарди.

Она-бала ўртасидаги рашк ҳамда адоват ўти тездагина сўнди. Саuno ўз ғамини ўзи еб, уйдан кетди. Пъяри икковимиз қолдик. Мен бу ерлардан анча йироққа, бошқа князликларга кетмоқчи бўлдим. Ўша ёқларда бетелфурушлик қилсак ҳам күнимиз ўтади. Бироқ Пъяри розилик бермади: «Эҳ, дангасавой, бетелфурушнинг хотини қанча даромад қиласди! Хоҳ судхўр бўл, хоҳ тҳакур бўл, мен натнилигимча қолавераман!»— деди. Пъяри оёқларини чиройли ўйнатиб рақсга тушар, бўксаларини енгилгина тебратарди. Мен ўзимни тутолмай завқланиб кетардим. Шундай лаҳзаларда Пъяри менга жуда-жуда ёқарди. «Менга яхшироқ қара,— дерди у ҳар бир ҳаракати билан,— супургируш ёки чамар аёл сингари эрининг чўриси бўлмайман. Мен яшашни, хурсандчилик қилишни истайман. Қалбимдан фақат сен ўрин олгансан. Бироқ севмай қолгундай бўлсам, ўша заҳоти сени ташлаб кетаман».

Бу менинг ғашимни келтиради. Вино бошимни айлантирас,

қўлимга арқон олиб уни савалашга тушардим. Пъярининг ба-данлари кўкариб кетар, мени золим, шафқатсиз деб атаб йиғ-лар, кейин бўйнимга осилиб, бағрига маҳкам босиб гапиришга бошларди:

— Нега мени кўча фоҳишасидай ураверасан, ярамас! Ишратпараст пиёниста! Сенинг хотинингман-ку, ахир. Мени уриш сенга ёқса уравер, бироқ шуни билиб қўйки, барибир сендан қўрқмайман.

— Нега бўлмаса сени ташлаб кетаман деб пўписа қиласан?

— Тентаккинам, ғашингга тексам жаҳлинг чиқади. Узинг ёмон кўриб қолган бўлсанг нега арқон билан урасан? Узинг совиб, мен билан ишинг бўлмай қолди. Қишлоқдан ўтиб келаётсам ҳамма эркаклар бир-бирига гал бермай мени чақиришади. Сарроф пул ўрнига ун билан дон беради. Ёлғиз сенгина менга севганинг ҳақида гапирмайсан, ҳеч вақо совға қилмайсан, бераҳм одам!

Пушаймон бўлиб, уни меҳр билан бағримга тортаман.

— Манзилимизга қайтайлик,— илтимос қилди Пъяри,— у ерда қадрдон дўстларинг кўп.

— Йўқ, асло! Сен яна канжарлар олдига югуриб қоласан.

— Онт ичиб айтаманки, бунақа ўй хаёлимда ҳам йўқ. Болалигим ўтган манзилни эслаб қўйдим, холос.

— Мен у ёққа боришини истамайман.

— Нега?— ажабланди Пъяри.

Мен жавоб бермадим.

Бу уни ранжитиб қўйди.

Бошқа бир куни уни уриш учун қўлимга яна арқон олдим. Бу сафар Пъярининг шунақаям жаҳли чиқдики, қўлига кириб қолган кавуш билан менга жавоб зарбалари бера бошлади.

— Кимнинг қўлидан нон еяётган бўлсанг унинг юзига тупурма. Сенга нима етмаяпти? Ҳамма бемазалигингга индамай бардош берадиган чўри эмасман-ку. Сени ташлаб кетаман!

— Қаёққа?— сўрадим қаҳр билан.

— Хоҳлаган томонимга.

— Мени ташлаб-а?

— Албатта.

— У юзингга, бу юзингга шапалоқ тортворсам.

— Мана, ур!— Пъяри жавоб кутмай, уриш учун бетларини тутиб берди. Унинг беадаблиги ғазабимни қайнатди, қулочкашлаб тарсаки тортиб юбордим. Пъяри йиқилди, лекин ўша заҳоти ўрнидан туриб менга ташланди. У эпчиллик кўрсатиб, оёғи билан юзимга тепганини ўзим ҳам билмай қолдим. Зарба қаттиқ тушди, бурним қонади. Пъяри кулди, уришдан тўхтаб ёнимга ўтирди.

— Нима, оғрияптими? — ҳамдардлик билдири у.

— Оғрияпти,— деб жавоб қайтардим, ёнимда ётган ўроққа әпишдим.

Бироқ Пъяри пинагини ҳам бузмади.

— Майли, сүя қол. Ўлсам сенинг қўлингда ўлай!

Ўроқ жааранглаганича қўлимдан тушиб кетди. Пъярининг муҳаббати яна ғолиб чиқди. Мен тик турганимча унга маҳлиё бўлиб тикилдим. У нақадар гўзал! Унга сукланиб қараётганимни пайқаб, Пъяри қизариб кетди, юзини ёпинчиғи билан яширди.

— Хой, бунча тикилдинг, мен сенга бегона хотинманми?

Қоронғуликда бир-биримизга ёпишиб индамай ўтиридик. Отимиз жаҳл билан ер тепинди, Бхура эса атрофга югуриб, қоронғуликка қараб гоҳ-гоҳида ҳуриб қўйди. Қишлоқ ортидаги супургиfurуш уйида ҳам шовқин тинди. Фақат қишлоқ ахлатхонаси томонидан чўчқаларнинг хўриллагани баралла эшитилиб турди. Ҳамма чироқлар ўчган, фақат ибсдатхона шами кучсиз сариқ нур таратиб турибди. Қўкиш-қора осмонда ёрқин юлдузлар порлади. Мен қўлимни бошим остига қўйиб ётдим. Пъяри ҳамон ёнимда ўтиради. Бирдан у қўйнидан беш рупия қоғоз пул чиқарди.

— Шунча кўп пулни қаердан олдинг? — мен бирдан ҳушёр тортдим.

— Қўлидан ҳеч иш келмайди деб ўйлайсан-да? Сен индамаганинг учун мен ҳам айтмайман. Таборга нега қайтмаслигинг сабабини айтмаяпсан-ку? Бирон-бир каншар билан ила-кишиб қолишмдан қўрқяпсанми?

— Бундан қўрқаётганим йўқ. Кўхна қалъя менга тинчлик бермайди.

— Чунки у ерда инс-жинслар яшайди. Ахир хоҳ камбағал, хоҳ рожа бўлайлик, ўлганимиздан кейин ўзимиз ҳам руҳ, арвоҳга айланамиз-ку.

— Мен қалъанинг эгасиман, Пъяри.

— Шойи кўрпа-тўшакда ётишни хоҳлайсанми? Чўри қизлар оёғингни уқалашини кўнглинг тилаб қолдими? Ўзим уқалаб қўя қолай.

— Йўқ, жонгинам, булар ҳақида ўйлаётганим йўқ. Лекин қалъя кўз олдимда бўлса у мени ҷақираётгандай бўлаверади.

— Сен рожа, мен маликангман. Эҳтимол, малика ҳар куни эрталаб ёғли нонларни ер,— Пъяри хаёлчан гап бошлади.— Билқилигаган юмшоқ ёстиқларга бош қўяди! Нақадар баҳтли!— Пъяри ширин хаёлларга берилди. У анчагача индамай қолди, кейин чуқур хўрсинганини эшийтдим.— Ўз тақдиримни ўзгартириш учун нималар құлмадим! Менинг шу алпозда яшашимга ёлғиз ўзинг айбдор! Малика бўлиш менга насиб құлмаган бўлса, полиция бошлигининг маъшуқаси бўлиш қўлимдан келади.

— Нималар деяпсан ўзи, Пъяри? — дедим овозим титраб.— Мен сенсиз яшолмайман, наҳотки мени ташлаб кетишни ихтиёр қилган бўлсанг?

— Сени ташлаб кетиб бўладими! — Пъяри кулди.— Сен ҳам ёнимда бўласан.

Менинг эсим оғиб қолди.

— Ростданми? — Мен уни елкаларидан ушладим.— Манови пулларни сенга ким берди?

— Рустамхон,— бошқа ёққа ўйчан тикилган ҳолда жавоб қилди Пъяри. Гўёки, мен унинг ёнида йўқдай эдим.— Сенга шоҳона қасрлар ҳақида хаёл суриш бўлса бас, хаёл суравер. Сен ҳеч қаҷон қалъа эгаси бўлолмайсан. Лекин сени эр қилиб ўзим танлаганман. Сени қасрларга етаклаб олиб боролмасам ҳам майли, лекин сенга ҳокимият бераман. Лекин бу зўр машиқат эвазига, қимматга тушади, унда сен полициячилардан қўрқмайсан. Биз тўй, дафн маросимларидан кейин сарқит овқатларни йиғишириб юрмаймиз. Мен Рустамхоннида яшайман, сен ёнимда қоласан. Менга шунча пулни берган ҳам ўша, унга шунақаям ёкиб қолибманки, мени сизлаб гапиряпти. У сени турмага ташламоқчи, бироқ бунга йўл қўймайман! Шу ерлардан кетайлик, кетайлик, деб сени кўп қистадим! Бироқ сен розилик бермадинг. Энди кетиш ҳам мумкин эмас. Эндиликда мен тинчгина яшайман, сенинг ҳам омадинг юришади. Безак билан савдо қилувчи Рамкалининг хотини Рустамхоннинг ўйнаши экан. У меъдасига теккани учун қарамай қўйибди.

Пъяри гўё овоз чиқариб хаёл сурарди. У менинг фикримни сўрамас ёки маслаҳатимни олмас, нуқул келажакни таъриф-тавсифлаш билан овора эди.

— Қусурини роса қилиб; менга пул беришда алдамчилик қилган тҳакурларни унга калтаклаттираман. Браҳман<sup>1</sup> Ниротичинг уйини ёндираман. У ярамас мени фоҳиша деб айтишгача борди! Браҳман тозаланмаган бир бутун шакарқамиш беришга ваъда қилди. Ишини битказиб олиб, ҳаммасини унуди, бу етмаганидай ҳақорат ҳам қилди. Лекин эндиликда менинг ҳукмим ўтади, уларга кўрсатиб қўйман. Рустамхон бутун район бошлиги Иқбол Баҳодирнинг энг яқин одами. Бошқарувчи Пескар кўнгил изҳор қилиб, мени йўлдан ўтказгани қўймайди. Рустамхоннига келгач, уни ҳам қўлга олишимни ҳамма баралла айтяпти. Ҳали кўрасан, муҳлат берсанг бўлди,— Пъяри кейинги сўзларини менга ўгирилиб айтди.

— Пъяри! Нималар деяпсан?

— Ҳа, ёқмаяптими? Бўлмасам-чи, ёқмайди-да! — Пъярининг

<sup>1</sup> Браҳман — олий табақа вакили.

овозидан аччиқлангани сезилди.— Мени бундан кейин ҳам хўрлашларини хоҳлайсанми?

- Ахир, сен ўзингни сотиб юрган аёл эмассан-ку!
- Унақа эмасман. Шунақа дейишга кимнинг ҳадди сиғяпти?
- Лекин, ҳозир сен тутмоқчи бўлган йўл...
- Демак, мени бахтиёр ҳолда кўришни хоҳламайсан, шундайми?

— Сенингча, шу бахтми?  
— Агар мен уникида яшасам, ҳеч ким ҳуда-беҳудага натларни калтаклаб турмага ташламайди. У менинг гапимдан чиқмайди! Мен фақат ўзимни ўйлаётганим йўқ.

- Қароринг қатъийми?
- Қароринг қатъийми, деб сўрайди-я? Бу ерда сен нима қилиб ўтирибсан?

— Наҳотки буни мен ҳал қиласам?  
— Аҳмоқ!— жеркиб ташлади Пъяри.  
— Яхши, кетавер, мен ҳам кетаман.  
— Мени ташлаб-а?  
— Ҳа.  
— Хотинингни ташлаб қочиб кетасанми?  
— Ахир сен ҳам ташлаб кетяпсан-ку.  
— Сени деб.  
— Кетавер, кетавер, саҳоватли маъбуда. Сенинг марҳаматингга муҳтоҷ эмасман.  
— Ҳали шунақами?— Пъяри товушини баландлатди.— Эҳтимол, кундошим топилиб қолгандир?

Мен индамадим.  
— Энди ҳаммасига тушуниб турибман.  
— Ҳеч нарсани тушунмайсан.  
— Мендан қутулмоқчисан, ҳамма айбни менга ағдаришдан хурсандсан.  
— Кетишдан олдин сени бўғизлаб ташлайман, шуни билансими?

— Ма, бўғизла! Бироқ билиб қўй, Рустамхон ҳамма авлод-аждодингнинг, ҳатто марҳумлари қўлига ҳам кишан солади, сени дорга осади. Худодан қутулиш мумкин, аммо полициядан ҳали ҳеч ким қутулгани йўқ. Рустамхон менга шунақаям мезрибонлик кўрсатдик!

— Бўлмасам-чи, сен уни беқиёс чиройинг билан мафтун қилгансан!

— Боримча!  
Мен гап қотмадим.  
— Ахир у менга бегона,— ҳаяжон билан гап бошлади Пъяри.— Сен ўз эримсан. Сен ташлаб кетсанг мени ким ҳимоя қиласди?

Пъяри менга маҳкам ёпишиб йиғлаб юборди, мен бўлсам ни-  
ма қилишимни билмай қаққайиб туравердим. Пъяри мен учун  
азиз, мўътабар эди. Унингсиз ўтган умр мен учун умр эмас.  
Мен уни қучиб шундай дедим:

— Пъяри, сени ташлаб кетолмайман, қўлимдан келмайди!  
Елғиз бўлиб, етим қолганимда сен ёрдам қилгансан. Хўрлик —  
зорликларга ҳам, калтаклашларга ҳам розиман, сенинг садо-  
қатли, итоаткор итинг бўлай, фақат мен билан бўлсанг бас.

Пъяри менга янада қаттиқроқ ёпиши.

— Ёшлик ҳа-ҳу дегунча ўтиб кетишини биламан,— шивир-  
лади у.

— Бир кун келиб Рустамхон ҳам мени ҳайдайди. Ўшандা  
менга ёлғиз ўзинг қоласан. Сендан бошқа ҳеч кимим йўқ!

Бутунлай қоронғу тушди. Шамол ҳуштак чалиб ёпирилиб  
эсди, шамол билан бирга тунги ўрмоннинг кишини маст қилувчи  
муаттар ҳиди ҳам бизгача етиб келди. Ҳужрамиз эшиги ортида  
Бхура уфқдан кўтарилиган ойга қараб секингина ҳуриб қўйди.  
Йироқ-йироқларда сукунатга чўмгандай тоғлар кўкка бўй чўз-  
ган. Қалбимдаги ҳаяжон бўрони тингандай бўлди. Пъяри ухлаш  
учун ечинди. Липиллаб турган шам унинг силлиқ, майин бадан-  
ларини олтинлантириди. Мен ўрнимдан туриб шамни ўчирдим.

## 7

— Тонг отди,— деб Сукхрам ўз ҳикоясини давом эттириди.—  
Уша куни кечаси Пъяри ухломади, бир зумга кўзи илинар-  
ди-ю, кейин уйқусида алланималарни гапира бошларди. Мен  
унинг шивирлашларига қулоқ солдим. Пъяри нуқул: «Наҳотки,  
кетиб қолсанг? Мени ташлаб кетма!»— деб тақрорларди.

Мен уни овутиб бағримга босардим. Шу лаҳзада ўз жўжа-  
ларини меҳрибонлик билан қаноти остига олган товуққа ўхшаб  
кетгандай бўлардим. Мен ҳам: «Кетмайман, кетмайман,— деб  
меҳрим товлаб шивирлардим.— Сени ташлаб кетмайман».

Унинг ҳаяжони анча пасайди. Саҳар пайтида аёз тушди.  
Кўзим уйқуда бўлса ҳам унинг аъзойи бадани титраётганини  
билиб турдим. Мен унинг юзига боқдим, унинг лаблари асабий  
титрарди. Титроқни босиш учун лабини қўлим билан беркит-  
дим, у бир оз тинчланиб қолди.

Пъярининг хушрўйлигига ҳамиша сажда қиласман. Ундан  
аччиқланган, ҳатто ёмон кўриб қолган пайтларимда ҳам Пъяри  
ёнимда пайдо бўлиши билан инон-ихтиёrim қўлимдан кетарди,  
мен соатлаб унинг келишганд, кўркам қадди-қоматига маҳлиё  
бўлиб қоламан. Шунда Пъяри тўлиб-тошиб куларди, у ўз ҳус-  
нининг кучини яхши биларди. У пайтларда ёш, кучли эдим,

кўнглимда ширин орзулар барқ уриб туради. Мен фақат Пъярига яқинлашиш йўлини ахтарардим, фақат угина чанқоғимни бостирарди. Бироқ ўша туни уни бағримга босиб ётганимда кўнглимда янги туйғулар жўш урди. Илгари Пъярини қулоқлаганимда фақат аёл кишини кўрардим, ўша тунда эса Пъяри аёлнинг ўзигина эмаслигини илк бор тушуниб етдим. Ўша тунда унинг баланд, бўлиқ сийнаси, ингичка бели, чиройли бўксалари мени ақлдан оздиргани йўқ. Аёл кишининг гўзаллиги фақат шу билан чегараланмаслиги менга яққол равшан бўлди. Аёл маъбуда сингари иззат-ҳурмат, эҳтиром ҳиссини ҳам уйғотиши мумкин эди.

Ташвишли ғафлат уйқусидаги Пъярида тўсатдан қаршимда намоён бўлган янги туйғу ҳамда эҳтирослар оламини кўрдим. У ҳатто уйқусида ҳам ўнгидаги каби менга қўлини чўзар, парвардигорнинг қулоғида ётганида ҳам фақат менини бўлишга интиларди.

Нима бўлаётганини тушунмасдим, лекин қалбим: сени жону дилимдан севаман. Сен — менини, мен эса сенга қарашли деб куйларди...

\* \* \*

Сукхрам шу ерда сўздан тўхтади, мен эса ўйга толдим.

Сукхрам ўз туйғуларини ифодалаш учун сўз тополмай қолди, лекин у нима демоқчи бўлганини тушуниб турибман. Бу инсонийликнинг уйғониши, ҳаётимизнинг янги нур бўлиб муҳаввар қилювчи чинакам муҳаббатнинг сеҳрли қудрати ҳақидағи ҳикоя эди. Ана шу лаҳзагача Сукхрам нуқул соҳибжамол Пъяридан, унинг ёшлиги, гўзаллигидан баҳра олишга интилди. Ўша кечаси йигит Пъярини бағрига босди, уни баданининг ҳар бир ҳужайраси орқали ҳис этди, аммо илгариги кўр-кўронада кучли эҳтиросни туймади, унинг ўрнини янги, ўзи бошидан кечирмаган туйғу эгаллади, бу туйғу Сукхрам учун мутлақ кутилмаган ва нотаниш эди. Ана шу янги туйғу ўзи муҳаббат деб ҳисоблаб юрган эҳтиросни кўнглидан суриб чиқарди. Сукхрам олдинлари кўпгина эркаклар таҳқираган аёл танасини қулоқлаб ётар эди. Натлар қабиласи эр-хотинлик садоқати ҳақидағи тушунчага эга эмасдилар. Натлар жинсий яқинлик қилишни айб қаторига қўшишмасди. Уларнинг хотинлари эркаклар эҳтиросини қондиришни ўзларининг бурчлари деб билишарди. Бошқа эркак билан бўлишдан уялишмасди ҳам. Лекин Сукхрам ўзини тҳакур деб билар, улуғлик савдоси эса қалбини заҳарлаган эди. Фақат Пъярининг жозибали муҳаббатигина ана шу заҳарнинг ёйилиб, унинг туйғулари йўқ бўлиб кетишига, заҳарли уруғнинг униб, илдиз отишига имкон

бермади. Пъяри Сукхрамга ўз танасини бағищлади, у бундан мамнун эди, бундан ортигини истамасди ҳам. Аммо ўша тунда бу оми, маданиятдан йироқ одам қалбиде янги туйғу үйғонди. Кечаси Пъяри билан олишув пайтида у аёл кишининг мағурор ва эркин қалбини рўйи-рост кўрди. Унда қанчадан-қанча қувноқлик, ғам-алам, муҳаббат ва нафрат бор эди! Фақат ана шу туйғуларгина аёл кишининг қадр-қимматини, эътиборини оширади, фақат аёл кишигина ўзига бир-бирига зид, энг муросасиз тушунчаларни үйғунлаштира олади.

Пъяри Сукхрамга ёпишганича жим қолди. Унинг кўзлари юмуқ, у ўйқуда, лекин лаблари қимирлаб турибди, ана шу қимирлашдан Пъярининг қалб азоби ва меҳр-муҳаббатини уқиб олиш мумкин. Сукхрам ухлаётган хотинининг юзига тикилиб туриб, унинг фикрлари ичига тобора чуқурроқ кириб борарди, шуниси фалатики, истак муҳаббат олдидা чекинаётганини ҳис қилмоқда эди. Бу чинакам ажойиб лаҳза эди. Тунги шабаданинг аста эсиши, аранг кўриниб турган ўрмон ва туннинг сирли нафас олишида — ҳаммаёқда бепоён оламнинг ҳар бир бўлакчасида жаранглаган беқиёс, ҳамиша голиб, мафтун этувчи улкан муҳаббат ҳукм сурарди. Бугун аёл кишининг чинакам гўзаллиги голиб чиқди, Сукхрам ҳам бу гўзалликнинг улуғворлиги маъносига тушуниб етди. Бугун янги муҳаббат дунёга келди. Сукхрамнинг ҳаёти унинг нури билан мунаввар бўлди.

Сукхрам ҳикоясини давом эттирид:

— ...Бирдан Пъяри уйқусида бақирди, қарасам бадани терлаб кетибди. Сесканиб кетдим. Назаримда у ёнимдаю қўлимдан чиқиб кетадигандай. Мен қўрқиб кетдим, овозим борича уни чақиридим:

— Пъяри! Кўзингни оч! Сенга нима бўлди, Пъяри!

Пъяри бошини кўтарди.

— Қўрқинчли туши кўрдим. Воей, шунақаям қўрқинчлики! — Пъяри дағ-дағ титарди. Пъяри бўйнимга осилди.— Бошқа ухламайман. Ухлаб қолишимга йўл қўйма.

— Нега?

— Яна ўша туш қайтиб кирса-чи?

— Эсипаст, ҳеч қачон бунақа бўлмайди.

У бир оз индамай ўтириди.

— Улар бизни айирмоқчи бўлишиди...

— Қимлар?

— Билмайман. Атроф илонга тўла эди.

— Илон!!!— қўрқувдан чинқирдим.— Мен Хонумонга атаб шам қўяман, тангри Шива<sup>1</sup> бўйнига гулчамбарлар иламан, ав-

<sup>1</sup> Шива — хонавайронлик келтирувчи ҳинд олий худоларидан бири.

лиё дарвиш қабрига шам ёқаман. Ийдгоҳ<sup>1</sup>даги чумолиларга шакар элтаман, хоҳласанг браҳманга назр-ниёз олиб бораман. О, муқаддас тангри! Ҳар ҳолда тушингга нималар кирди?

— Тушимда ўрмондан кетаётганишман. Ёнимда сен йўқ эмишсан. Бирдан тун зулматида ярқираб турган гавҳарни кўриб қолдим. Мен эгилиб, уни олдим, шу пайт каттакон даҳшатли илон пайдо бўлди, вишиллаганича менга ташланди. Мен ундан қочдим, аммо тўрт тарафимда яна илонлар галаси: «Уни ушла, уни ушла. Қочиб кетолмайсан?» деб вишиллайвериши. Шунда сени кўрдим, баланд тоғ тепасида туриб мени чақирипсан. Лекин сен жуда юксакда бўлганинг, юқорига чиқишга иложим йўқлигидан: «Сукхрам! Ҳой Сукхрам!» деб сени имлармишман. Аммо бўғзимга бир нарса тиқилиб, овозим чиқмайди. Тун қоронғилиги аста-секин тарқала бошлади, осмонғор гумбазлари сингари тепамга ёпирилиб келаверди, ёпирилиб келаверди. Ҳаммаёқ гувиллаб, жаранглаб, гулдираб кетаверди... Жуда кўп канжарлар тинтирашди, уларнинг ҳаммаси қўшиқ айтапти. Тўсатдан қаршимда биринчи маъшуқим кўринди. У мени қутқариб қолмоқчимиш, менга қўлини чўзяпти. Мен эса: «Найкас, йўқол! Сен Сукхрамимни тўсиб қўйдинг. Йўлдан қоч!» деб турибман. У билан олиша бошладим. Илонлар бўлса тобора яқинлашиб келишяпти. Ниҳоят улардан бири қаршимда бўй чўзди, томоқларини шишириб, чақиш учун менга ташланди, шу заҳоти уйғониб кетдим.

Унга далда бериш учун кулиб юбордим.

- Қўрқма! Буларнинг ҳаммаси туш-ку.
- Ахир, ҳамма вақт яхши тушлар кўрардим-да.
- Тентак, ҳеч ким нуқул яхши тушларни кўравермайди.
- Аммо мен кўрган тушни ҳам ҳеч ким кўрмайди. Худоларнинг қаҳри келганидагина шунақа тушлар кўриш мумкин.
- Бироқ худоларга раҳм-شاфқат сўраб илтижо қилдим-ку.
- Сен мени чинакамига яхши кўрассан,— Пъяри қўлларимни маҳкам қисди. Одатда бошига чамбарак қилиб ўраб олинадиган, елкасига гажак бўлиб тушадиган соchlари ҳозир паришон бўлиб кетганди.

Биз яна ўрнимизга ётдик.

- Осмондаги юлдузларнинг кўплигини қара. Сукхрам, буларнинг ҳаммаси марҳумларнинг руҳи!
- Тўғри, Пъяри. Одамлар шундай дейишади.
- Ўлганимиздан кейин руҳимиз юлдуз бўлиб осмонга учиб кетади. Кейин улар пастга тушади, тўғрими?

<sup>1</sup> Ийдгоҳдаги чумолиларга шакар элтаман — ийдгоҳ мусулмонларининг ийд байрами ўтказадиган, атрофи тўснлган жой. Худоларнинг кўнглини юмшатиш учун ийдгоҳдаги чумолиларга шакар элтиб берилади.

- Ҳа, Исила шундай деганди.
- У афсун қилишни биларди, аммо менга ўргатмаган.
- Нега?
- Билмасам. Исила менга сенинг отанг ҳам афсун қилишини айтган.
- Отамми? Уни яхши хотирлолмайман.
- Үнда сен кичкина эдинг.
- Гүёки сен катта эдинг!
- Мен ҳам кичкина бўлганман.
- Лекин сен ўшанда менга раҳм қилиб бошпана бергансан.
- Кўйсанг-чи,— Пъяри хижолат чекди.— Эркакларга бошпана бериш аёлларнинг ишими?

Унинг хижолат бўлиш сабабини тушундим: у менинг кўз ўнгимда мурувватли бўлиб кўринишни хоҳламасди.

- Сукхрам! Афсун қилишни ўргангин.
- Нега энди?
- Қанча хоҳласанг шунча пул ишлаб олган бўлардинг.
- Нега бўлмаса отанг ўзи хоҳлаганича пул ишлаб олмаган?
- У афсун қилиш сирларини эгалламаган, фақат бир неча афсун қилиш дуоларини билган, холос. Вассалом. Афсун қилиш сирлари ҳамма учун ҳам очилавермайди, уни ўзимизнинг ҳунарни ўргангандай ўрганиб бўлмайди. Қишлоқда бир қария бор. Айтишларича, у одамларнинг дилидагини шундоққина кўра олар экан. Бир сафар қария мени учратиб қолди-ю, юзини шу заҳоти терс ўғирди. Мени: «Алвасти! Жодугар!» деб сўка бошлади. Мен жуда қўрқиб кетдим.

Унинг гаплари мени ҳайратга солди. Бу сўзларда янги, но маълум олам жарангларди. Назаримда мен ерда эмас, осмонда учиб юрардим.

«Сукхрам!»— кимнингдир товуши эшитилди.

Мен жавоб бермадим.

«Қаёққа учеб кетяпсан?»

Мен индамай учишда давом этавердим.

Бирдан ўзимни қалъада кўрдим. Ўзимнинг қалъам. Қаршимда одамларим бош эгиб туришибди...

Пъярининг товуши мени карахтликдан ҳушимга қайтарди.

— ...Қалбимда фақат сен яшайсан. Бу — энг муҳими. Қолганлари — бемаънилик. Дунёнинг ташвишлари билан ишим йўқ. Айт-чи?! Рашқ қилиб мени ташлаб кетмайсанми? Мени бошқа эркак билан кўрсанг қаҳринг келмайдими?

— Йўқ,— гарчи бунга ишонишим анча қийин бўлса-да, шундай жавоб бердим.

— Яна битта илтимосимни бажо келтиришга ваъда берасанми?

— Қани, гапир-чи.

— Бошқа аёллар орқасидан юриб илакиша кўрма!

— Нега? Сен ўзингни эркин деб ҳисоблаяпсан-ку?

— Менинг йўриғим бошқа. Азалдан шу йўлга кирганман.

Аммо сенга ҳеч қанақа бошқа хотин тегмаган. Сен ҳамиша менини бўлгансан, ёлғиз менини.

— Нечун менга бунақа талааб қўясан?

— Шуни хоҳладим, вассалом.

Аёлларнинг кўнглида нималар ҳам яшириниб ётмайди, деб ҳайрон қоламан. Болалигимдаги бир воқеа эсимга тушди: Хажари исмли нат машҳур ўғри эди, ҳеч қўлга тушмасди. Бир куни маст бўлиб, Чанду исмли бошқа бир натнинг хотинига шилқимлик қиласди. Чанду хотинини ҳимоя қиласди, ўртада ханжарвозлик бошланиб кетади. Оломон тўпланади. Ҳамма уларни индамай томоша қилишади. Чандунинг хотини хавфхатарни босиб-янчиб тўсатдан уларни ажратиш учун ташланади, Чанду адашиб кетиб хотинининг кўксига ханжар уради. Шундан кейин Хажари Чандуни нимталаб ташлайди, эрталаб қўлга тушмас жиноятчининг ўзи полиция участкасига боради. Уни дорга осишади. Муҳаббат унинг кўзини кўр қилиб қўяди, ўлимнинг чангалига ўзини тутиб беради.

Мен ўтириб бири чекдим.

— Пъяри!— деб чақирдим.

У ҳам ўтириди.

— Чекасанми?

— Майли.

Биз биргаликда чекишдик.

— Ёнимга келиб турасанми?

— Нима дединг? Яна бир марта такрорлагин!

— Баъзида ёнимга келиб турасанми?— Кейин қўшиб қўйдим.— Полициячинг мени боқадими?

— Сенга у эмас, мен ғамхўрлик қиласман! Фақат шу шартга кўнсагина унинг уйида яшашга розилик бераман. Унинг уйида яшаш мен учун қўрқинчли эмас деб ўйлайсанми?

— Наҳотки қўрқув нималигини билсанг?

— Билмадим, аммо сен билан бўлсан унча қўрқинчли эмас.

— Яхши, сен билан бораман, аммо ўз пулимга кун кўраман.

У норози оҳангда пиқиллаб кулди, лекин кўзлари севинчдан порлади. Менда ўз қадр-қимматим туйфуси борлиги унга ёқиб тушди. Хотинининг ҳисобига яшаган эркак одамми?

— Мен сенинг нонингни емайман,— деб такрорладим.

— Ихтиёering, мен қистамайман. Бироқ сенинг ҳурматингни жойига қўйишлари ҳақида қайфураман.

Биз ўшанда келажагимиз қандай бўлишини тасаввур ҳам қилолмасдик. Лекин полиция бошлиғининг ҳуқуқи катта эканини билардик. У рожанинг энг ишонган одами. Қишлоқ аҳо-

лиси полициячи номини эшитса титради. Уни энг олий табақа кишилари қабул қилади. Полициячи қаерга борса натлар ундан яширинишади. Кўнгли тусаб қолса натлар ёки канжарлардан истаган аёлни уйига келтиради. Ундан ҳаммамиз саросимага тушиб қўрқардик, чунки полициячи хоҳлаган вақтда биздан истаган кишини турмага ташлар, ўғирликда айблаб калтакларди. Баъзида у қўлга тушиб қолган ўлжасига заҳарланган сув сепиб юборар, натижада қизил доғлар пайдо бўлар, бадани шиша бошлар эди. Полициячи ҳамиша ҳақ бўлиб чиқарди. У бизни дунёдаги бор ҳақоратлар билан болаҳонадор қилиб сўкар, бирор киши салча эътиroz билдирса, ўша бечорани дарҳол турмага ташлашарди. Турманинг ҳаддан ташқари оғир меҳнати кишининг популдириғини пасайтириб қўярди. Бир куни полициячилардан бири натнига таносил касаллигини юқтирди. Бечора аёл узоқ дард чекди, уни фақат Исила ўз доривор ўсимликлари билан даволади.

— Сен шифобахш ўтлар сирини биласанми? — тўсатдан сўраб қолди Пъяри.

— Ҳа.

Пъяри жим қолди.

— Буни нега мендан сўрадинг?

— Сени моҳир табиб деб ҳаммага овоза қиласман. Ҳамма сенга хушомад қилади.

Мен мамнун бўлиб унинг бошларини силадим, кейин сув ичиш учун ўрнимдан қўзғолдим.

— Менга ҳам сув келтир,— илтимос қилди Пъяри.

— Ўрнингдан туриб, ўзинг ича қол.

— Жонгинам, бугун қалбим меҳр-муҳаббат билан тўлиб тошган, мента май қўйгин,— Пъяри кулимсираб қўшиқ бошлади.

Мен кулиб юбордим, унга сув келтиредим, кейин яна бири чекдим. Пъяри яқинлашиб ёнимга ўтириди.

— Пъяри, бугунги тунимиз уйқусиз ўтди.

— Ҳали тонг юлдузи қўрингани йўқ.

— Менга қўшиқ айтиб бер.

— Қайсини.

— «Севгилимсиз азоб чекаман»ни.

— Мен ёнингда ўтирибман-ку. Нега шу қўшиқни эшитгинг келиб қолди?

— Шу тунда менини бўлмаганингни биласан-ку.

— Бошқа тунларда ҳам шундай бўлган-ку.

Пъяри қўшиқ бошлади:

«Севгидан куйиб кул бўлдим. Севгилим, ялинаман, кел! Хазон бўлди тоғдаги гуллар. Муҳаббатим! Сен ҳам сўласан! Севгилим, қалбимга боқ, унда нима қолганин кўр. Йилларнинг

кўхна сирин билишга аҳд қилганинг биламан. Сукут сақлаб ўтирасан муқаддас ўт ёнида. Менинг йогим, қалбимга боқ, қалбимда ловиллайди бир гулхан.

«Қалбингдаги муқаддас ўт тафти жавоб ўти туғдирди менда,— қўшилдим мен.— Севгинг ёрқин ўтида мен ҳам ёнаман, сен ёнимда бўлмасанг сир ўрганиш йўлига аҳд қилиш қаёқда?..»

«О йог, аҳдинг маҳкам бўлса гар, кетга қайтиш йўқ сенга. Муқаддас ўт ёнида турмуш сирин билавер. Агар барвақт келиб қолсанг, ғазабланар барча дугоналарим. Афсун қилиш сирларин билади деб, мен ҳақимда тарқалар миш-миш. Афсунгарлик қила-қила, айлантиридим йогни эшакка. Оталар удумин унтиб у, хизмат қилас менга гўёки қулдай!»

«Севгилим, эшакмизми, афсунгармизми, буни ҳеч ким биломас, эвоҳ. Хотин зоти жаврашга одатланган, ҳеч ким уни тилидан осмас ҳеч қачон. Муқаддас ўт шуъласида кўрдим сени ёргинам аниқ. Устимдан ўрлаган тутун, эслатади гажакларингни. Муҳаббатдан лов-лов ёнаман. Қандоқ қилас мен? Кўрсат менга илож йўлин. Аҳдим занжирига занжирбандман мен, занжирларни парчалаш иложсиз, эвоҳ...»

«Мени ҳеч бир севмайсан, оромингни бузмайсан! Ўзинг билан оворасан, кун чиққанин билмайсан! Тиниқ кўлнинг соҳилида, дугоналар даврасида, товусгинанг рақсга тушса, юраккинанг сезар, талпинар. Буғу қувиб буғуни, ахтарса гар салқинни, уни кўриб юрагингда жўш уради эҳтирос. Севги афюн таратар, севгинг сенинг алдатар! Сен мисоли ёмғир булути, сайр қилувчи ёз осмонида. Лахза ўтса, ёмғир йўқ, майсаларда из бор ҳўл, менга тақдир насиб этмиш бу аниқ, тун-кун йифлаб ёш тўкарман қайноқ, ёниқ».

«Онт ичаман, сенга ёргинам! Барибир мен ортга ҳеч ҳам қайтмасман. Бир чеккага қочади кундуз, тун пардаси ёйилиб, чараклар юлдуз. Севгинг нуқул айбор, йог бўлгач, ором топиб бўлмадим бедор. Осоийшта қалб билан севги сирин топмоқчи бўлдим. Аммо шуни билдимки, ёрим, мен-ла бўлсанг, шудир тинчим, мадорим».

Қўшиқ овозларимиз осойишта тун бағрини тўлдирди. Пъярининг ширави, мулойим, баланд овози сўнгги куплетда менинг кучиз овозим билан бирикиб кетди:

«Бугун севги қилди яна тантана,— чўл устида қўшиқ янгради.— Севгилиси дугонамнинг ёнига келиди яна. Омониз қилич ҳаммаёқни қиласди яксон, ўз қинини кесолмайди, у қолар омон. Дараҳт гулханга озиқ беради. Шу озиқ бўлмаса сўнади гулхан. Эй севишган қалблар, менга айтинг-чи, дастлаб севги ўтида қайсинингиз ёнасиз. Бу саволдир қадимий, жавоби ҳам янгимас: олов ёниб тугайдими ёки ул дараҳт?»

Янги куннинг тонгини ана шундай қўшиқ билан қаршиладик, табрикладик.

Сукхрам ҳикоясини давом эттирди:

— Рустамхон уйи ярми тош, ярми гувала девор эди. Рустамхоннинг аждодлари бу ерда азалдан яшаб келади. У асл мусулмон бўлиб, беш вақт намозни канда қилмас, округ полиция бошлиқлари олдида обрўйи катта эди. У судхўрлардан пул суғуриб олиш санъатини мукаммал эгаллаганди. Рустамхон олий насабли тҳакурларга эгилиб салом берар, зотининг тайини йўқлар салом берса бош қимирлатиб ҳам қўймасди. Камбағал браҳманларга енгил таъзим билан: «Ассалому алайкум, жаноби пандит» деб салом-алик қилас, бойлари олдида мартабаси улуғ қариндошини учратиб қолгандай поий патак бўларди.

Мен Рустамхонга нафратланмай боқолмасдим. У новча, ориқ, кўзлари бежо, муғамбир одам эди. Рустамхон ўз ҳузурига келувчиларга бир марта назар ташлабоқ ундан нон чиқиши-чиқмаслигини билиб оларди. Бир куни унинг олдига ифлос, йиртиқ кийимларда бўёқчи Раҳматали келди, ўзининг қашшоқлигидан шикоят қила бошлади. Рустамхон уни шунақаям қўрқитиб ўтакасини ёрдики, бечора чўнтағидаги охирги қирқ рупиясини ҳам унга ташлаб кетишга мажбур бўлди. Рустамхон қишлоқда натларга даҳшат солиб гердайиб юарди.

Дўппи тор келиб қолган пайтларда натлар садақа сўрашар ёки қишлоқ тҳакурлари учун ёввойи асал тўплашарди. Бундан ташқари улар доривор ўсимликлар, дори-дармон тайёрлашарди. Доривор ўсимликларни билишда менинг олдимга тушадигани йўқ эди. Бир куни шифобаҳш ўтлар, афсун ёрдамида чаён чақиб олган қишлоқ танобчисини даволадим. Шу лаҳзада ўз-ўзимни талашга бораётгандай бўлиб кетдим, буни Пъярига айтишга юрагим дов бермади...

Рустамхоннинг уйига яқинлашганимизда бирдан бўғин-бўғинимгача бўшаб кетиб, оёғимни идора қилолмай қолдим. Пъярининг эгнида кенг, кир, юпқа ва дабдаласи чиқиб кетган кофта, ёпинчиги минг ямоқ, шундай бўлса ҳам юзини ҳафсала билан яшириб олганди. Шу лаҳзада ўз-ўзимни талашга бораётгандай бўлиб кетдим, буни Пъярига айтишга юрагим дов бермади.

Мен тўхтаб тош плита устига ўтиридим, эҳтимол, бу ер илгари ҳинд зиёратчилари тўхтайдиган ғарифхона бўлгандир. Пъяри тупроқли йўлнинг ўзигагина ўтира қолди.

- Кетайлик,— шошилтириди у.
- Оёғим тортмаяпти.
- Бу қанақа қилиқ?
- Кўнглим чопмаяпти.

- Мени ҳам у ёққа қўймассан?
- Сени тўхтатиб бўлармиди?
- Сен қолавер. Мен кетдим.

У шундай деди-да, кетди. Мен бир оз ўтиридим, кейин тош плитага чўзилдим, кўзим илинганини пайқамай қолибман. Бир соатча ухлаган бўлсам керак, бир бола мени уйғотди. Унинг оғзида сигарета.

- Ҳой, уйғонсанг-чи! Сукхрам деган нат сенмисан?
- Ҳўш, нимайди? — дағал жавоб қайтардим.
- Сени бошлиқ чақирияти. Оёғингни қўлингга олиб югар.

У зудлик билан етиб боришингни буюрди.

Бола қочиб кетди, мен Рустамхоннинг уйига судралиб бордим. Унинг уйи ғиштили девор ортида бўлиб, ҳовлиси оддийгина эди. Ҳовлининг ичкарисида тўрт бурчакли уй. Бир томондан хизматкорлар учун қурилган гувала уй дарвозага туташгац, унинг ёнида айвонли бино. Айвон остига қўтос боғлаб қўйилган, ёнида қўтосчаси ўйноқлаб турибди.

Кираверишда дом табақасига мансуб қораҷадан келган аёл ўтирган жойда тўхтадим.

- Ўтавер,— деди у.
- Мен осто надан ўтдим.

Хўжайним тепага чиқишингни буюрдилар. Бахтинг бор экан, омадинг юришибди.

Тепадаги хонада гулдор гиламлар устида янги юбка ҳамда кофта кийиб олган Пъяри ўтиради. Бошида ҳам янги ёпинчиқ. Мен ўз кўзларимга ишонмай унга қараб қолдим. Оғизлари бетел<sup>1</sup> чайнайвериб қизарив кетибди. У ҳеч қачон кўзимга бунчалик чиройли кўринмаган эди. Рустамхон каравотда ётибди.

— Ҳа, келдингми, Сукхрам? Пъяри сени оғиздан қўйгани йўқ. Ўтири.

Мен таъзим қилиб ўтиридим.

Пъяри бошини ёпиб, менга тантанавор нигоҳ ташлади.

— Хотининг жуда садоқатли экан,— давом этди Рустамхон.— У менга: «Тақсир, менинг Сукхрамимни бошпана бериб олиб қолсанггина уйингда қоламан», деб туриб олди. Бошқа гапни эшитишни ҳам хоҳламади. Майли, у айтганича бўла қолсин. Лекин, Сукхрам, шуни билиб олгинки, эндиликда у хотининг эмас, беканг бўлади. Тушунарлимис? Сен пастда дарвоза ёнидаги ҳужрада яшайсан. Қўтосларга қарайсан!

Худди мени бирор тарсакилаб юборгандай бўлди. Пъяри — менинг бекаммиш!!!

— Тақсир, мен фақир одамман. Мени марҳаматингга кўмид ташладинг. Тақдир шу аёлни менга насиб этган экан. Пъяри

<sup>1</sup> Бетел — япроғи чайнаш учун ишлатиладиган ўсимлик.

шунақаям хушрўйки, у сенинг уйингдақа уйда туғилиши, ҳузур-ҳаловатда яшаши керак эди. Тангрим Пъярининг илтижоларини қабул қилди, у ўз жойини топди. Тақсирим, энди кетишга ижозат бер. Мен бошқа оила қураман.

Пъяри ғазабдан лабларини тишлади.

— Сен ҳеч қаёққа бормайсан, уқдингми? — деб қичқирди у.

— Ярамас хотин, наҳотки мени ўзингга хизмат қиласади деб ўйлассанг?

Рустамхон ётган жойидан қўзғалиб ўтиреди.

— Ҳой ҳайвон, ўжарлик қилма, бўлмаса қобирғаларингни синдириб ташлайман!

— Тақсирим, синдирсанг синдира қол, аммо тирик эканман, сизларинг айтганларинг бўлмайди.

Пъяри гиламдан туриб ёнимга келди.

— Тақсирим, уйингдан кетаман, берган кийим-кечакларингни қайтариб ол,—деди у Рустамхонга.— Бу мени тинчгинага яшаттирмайди. Уйингга ҳар куни келиб тураман. Зиён кўрмайсан. Бу мени баҳтиёр кўришни хоҳламайди! Ўрмонда тунашими истайди. Майли, шунисига ҳам шукур.

Рустамхон нима қилишини билмай қолди. Пъяри жулдур кийимларига қўл узатди.

— Уларга тегма, Пъяри! Ялинаман! Уларга қўл тегизсанг ўлганим,—деб қичқирдим.

Пъярининг узатилган қўли муаллақ қолди. Кўзларида ёш йилтиради.

— Мақсадинг нима; бадбаҳт? — сўради Пъяри.

— Шу ерда қолишингни истайман!

— Сен ҳам қоласанми?

— Хизматкор бўлиб ҳеч қачон!

— Эҳ, сени қара-я, тақсиримнинг уйида эрим бўлиб қолмоқчимисан? Сенда заррача бўлсин уят борми? Бошқаларнинг ор-номуси билан ишинг йўғ-а.

Рустамхон чекди, менга ҳам сигарета узатди. Мен бир неча бор иштиёқ билан ичимга тутун тортдим.

— Сен ҳақсан, Пъяри,—дедим анча тараддусланиб тургач.— Бу иш эмас. Биздай паст одамлар бунақа ишларни очиқ-ошкора қилмаймизу шундай улуғ хонадонда бўлиб ўтаверадими?

Гапларим Рустамхонга ёқиб тушди, мамнун бўлганидан жилмайиб қўйди.

— Тақсирим, сени инсофга чақираман,—ялиндим мен.— Одамларга қайси юз билан қарайман? Ҳурматли тақсирим, ўғирлик қилган деб, мени турмага қамаб қўя қол, умримнинг қолганини қамоқда ўтказай.

Рустамхон савол назари билан Пъярига қаради, унинг ўл-

гудай оқариб кетганини кўриб, рад ишораси билан бошини сарак-сарак қилди.

— Йўқ, Сукхрам, бунаقا йўл тутолмайман. Бу сенга нисбатан ўта адолатсизлик бўлади. Мен ҳар қандай адолатсизлик душманиман. Сени турмага қамаб қўйишга арзийдиган ҳеч қанақа гуноҳ қилганинг йўқ.

Гашимни келтириш ниятида Пъяри мен томонга қарамади, аммо кўзлари қаҳрли чақнарди. Мен Рустамхонга ўгирилдим.

— Тақсирим, илтимос, мени бир неча кунгагина қамаб қўй. Кейин раҳм-шафқат қилган бўласан-да, чин ваъдамни олиб қўйиб юборасан. Мен ҳар куни рўйхатдан ўтиш учун участкага келиб тураман. Сен номингга доғ туширмайсан, Пъяри сен билан қолади, мен эса елкамдан тоғ тушгандай енгил торта-ман, тақсирим!

Режам Пъярига ёқиб тушди, лекин ўшанда нима қилаётганимизни икковимиз ҳам билмасдик. Мен ихтиёрий равишда Рустамхоннинг қули бўлиб қолгандим. Пъяри эса ҳар қанча уринса ҳам қутулишнинг имкони йўқ тўрга ўралашиб қолганди. Бордию Пъяри Рустамхондан қочиб кетса, умрбод қамоқда ётишим керак. Ўшанда икковимиздан ҳам ақл қочган экан.

Рустамхон: «Балиқ тўрга тушди!» деган маънода мамнун жилмайди. Энди у бир неча кунга Пъярини бериб, ўғирлик қилиб, хотиним билан қочиб кетишимдан ҳадиксирамасди.

— Майли, Сукхрам, бунинг иложини қилса бўлади. Ҳаммаси ҳақиқатга тўғри келиши учун қўтосимни арқондан ечасан. Хотиржам бўлавер, иш хамирдан қил суғургандай силлиқ битади.

Эртаси куни унинг қўтосини ўғирлаб кетдим. Қишлоқ четида мени ушлаб олишди. «Бечоранинг иши юришмади: хотини қочиб кетди, ўзи турмага тушди», деб ҳамма менга ачинди. Мен доғланган тахир ёғ билан савдо қилувчи Анарчанд деган савдогарнинг оёқларига йиқилдим, у мени кафиликка олди. Рустамхон чин ваъдамни олиб қўйиб юборди. Одамларнинг менга раҳми келди, ичимда эса улардан кулдим. Улар Пъярини вафосизлик қилгани учун сўкишди, мен эса бундан жудаям мамнун эдим. Мен унинг ҳузурига туш пайтида келиб, қоронғи тушгунча қолиб кетардим. Пъяри мени дарвоза ёнидаги хонага ўтқазиб, яхшигина сийларди. Бора-бора бундай ҳаёт кечириш менга ёқиб қолди, ҳатто қўтосларни ҳам парваришлай бошладим.

Менга фақат бир нарса камлик қиласарди.

Тунлари ғам-алам чекардим, Пъярини қўмсардим. У тобора мендан узоқлашиб борарди. Муносабатларимизда илгариги яқинлик, эркинлик йўқ эди, бўлиши ҳам мумкин эмас. Пъяри анча ювилиб қолган покидон, унинг қаршисида мен ифлос жулдуровоқи кишидай эдим. У мен томон эгилганда унинг сочларидан таралаётган ясмин ёғининг ҳиди бошимни айлантириб

юборарди. Пъярининг хулқида ажиб ўзгаришлар юз берди. У мендан қанча узоқлашса, мен унга шунча кучлироқ интилардим. Мен унда пайқаган энг ҳайратга соладиган ўзгариш шу бўлдики, Пъярида уялиш туйфуси кучайди, салга қизариб, хижолат чекадиган бўлиб қолди. Унинг қадам ташлашлари ҳам ўзгарди, энди Пъяри кўркмай, тортиммай қаддини адл тутиб, ишонч билан юради. Унинг кулишлари ҳам бошқача бўлиб қолди, жувон оғзи қулогига етгунча хандон ташлаб кулишни ташлаган, тишларини хиёл кўрсатиб секингина илжаярди.

Пъярининг бурнида булоқи йилтираб қолди. Булоқи тақиши мен учун катта воқеа, чунки Пъярининг танаси ҳам энди олтин юзини кўрди! Безак унга шунақаям ярашибдики! Бетелдан қизарган лаблари, қорайган милклари билан у зодагон оила аёлларига ўхшаб қолган эди.

Мен унинг ҳузурига туш пайтида келардим, бу вақт уйда ундан бошқа ҳеч ким бўлмас, мен эса кечқурунгача шу ерда қолиб, кейин ухлаш учун чодиримга жўнардим. Ёнимга бошқа натлар ҳам чодир тикишди, биз бир оила кишлиридай тотувмиз. Янги келганлар нуқул ўғирлик қилишар, уларнинг хотинлари эса бегона эркаклар билан дон олишар, шу йўл билан оила тебратишарди. Ана шу аёллар орасидаги Қажри Пъяри билан тенгдош эди. Унинг эри кўмирдай қопқора, қари киши. Қария вино ичишга ружу қўйганидан ҳеч ким уни кайфсиз ҳолда кўрмасди. Бу ҳам унга камлик қилгандай, аллақаерлардан наша ҳам топиб келар, нашани чекиб, винони ичиб, тоңг ёришгунча донг қотиб ухларди. Чол ашаддий қиморбоз бўлиб, пулга ҳамиша муҳтожлик сезарди. Пул сўраб Қажрига мурожаат қилишни маъқұл кўрарди. Қажри эса, бошқа аёллардан ўта ҳисидорлиги, оқпўстлиги билан ажralиб турарди. Сал ичиға ботган юзи чиройига унча-мунча соя ташларди. Унинг кўраклари кичикроқ, аммо дирк illаган, чиройли, кенг бўксалари таранг эди. Кўзлари унча катта эмасди, аммо қисиқроқ, филайга ўҳцаган бўлса ҳам ўта жозибали. У бурнига булоқи тақиб, қошкўзинга сурма тортиб юради. Қажри узун, кенггина кўйлак кияр, ёнгил иргишилаганга ўхшаш тез қадам ташларди. Мен уни ҳеч қаочон ғамгин кўрмаганман, юзидан ҳамиша табассум ари-масди.

Пъяри билан ёлғиз қолганимда уни қучоқлашга интилардим, аммо у шоша-пиша ўзини олиб қочар, ўзига яқинлаштири-мас эди. Бундан таҳқирлангандаи бўлардим. «Нега у ўзини қучоқлаттирмайди? Менга овқат беради, ёнимда ўтиради, ўзи-га нега яқинлаштирмайди? Мен билан чақчақлашиб кулишади, лекин кулгиси қандайдир сўниқ, маъносиз, қувноқ эмас, лаб-ларининг четида ғам мухри бўлмиш ажинлар пайдо бўлиби-ди»,— деб фифоним чиқади. Нима қилишимни ҳам билмай қол-

дим... Баъзан Пъяри киприк қоқмай менга узоқ тикилиб қолган пайтларни пайқадим.

— Ҳалиям чодирда тунаյпсанми? — деб сўраб қолди бир куни.

— Ҳа, аммо ҳозир ёлғиз эмасман, ёнимда бошқа одамлар ҳам истиқомат қилишяпти.

Пъяри янги қўшниларим ҳақида батафсил сўраб билиб олди — энг майда-чуйда тафсилотларга ҳам қизиқди. Гапларимни эшишиб бўлиб:

— Мен тирик эканман, Кажрига илакиша кўрма. Бунга тоқат қиломайман, — деди қатъий қилиб.

— Ахир, мен тирик одамман, эркакман! Ўзинг мени яқинингга йўлатмаяпсан. Сен бўлса бутунлай анови солдатингга қараашлисан!

Пъяри, нимагалиги номаълум, тўсатдан йиглаб юборди, кейин тезда кўз ёшлини артди.

— Бу — тақдир, Сукхрам. Кажрини эса қўй! Мен ёлғиз сеникиман.

Мен уни тушунмадим, кўнглим ғаш эди. Нат қўшниларим қувноқ, беташвиш ҳаёт кечиришарди, уларнинг мушугини ҳеч ким «пишт» демасди: ахир, улар менинг дўстларим, мен эса Рустамахоннинг алоҳида марҳаматидан баҳраманд эдим. Тўғри, баъзида бошлиқ уларни ўз ҳузурига чақирап, бироқ қайси судхўрни талаш лозимлиги ҳақида йўл-йўриқ берарди, холос. Ўғирланган молларни полициячи билан бўлишиб олишарди. Бундан ташқари қишлоқ чеккасидаги сойликда полициячилар қиморхона очишиди, ундан келадиган даромаднинг учдан бири ҳам полиция бошлиғи чўнтағига тушарди. Айтишларича, Рустамхон илгари рожанинг қўлида хизмат қилган экан. Рожанинг сочини олган эканми, соқолини қирган эканми, ишқилиб, хўжаси ундан мамнун бўлган экан. Бир куни рожа уни чақириб: «Тила тилагингни!» депти. Рустамхон эса ўзини йўқотмабди, рожанинг оёқларига йиқилиб: «О валинеъматим, менга уй керак. Биламан, хонадонингиздан ҳатто итлар ҳам оч чиқиб кетмайди, мен эса садоқатли мулизимингизман», — депти. — «Сен айтганча бўлсин, — рожа розилик берибди, — уй қургин. Сен ҳам одам қаторига қўшилгин». Рожа уни полиция бошлиғи қилибди. Рустамхон эса бир йил ичидаги ҳашаматли уй қурибди. Бу ишлар деҳқонлар билан ижаракилар ҳисобига бўлибди. У қанчадан-қанча одамларни салгина гуноҳи учун турмада ҳалок қилган! Бир деҳқон ўладиган қилиб калтакланган, аммо урган одам полиция бошлиғига пора берган, у эса юқорига рапорт ёзмаган. Жабрланувчига: «Врачдан справка келтир», деб айтган. Қасалхона қишлоқдан етти миля узоқда бўлган, бечора июнь ойининг жазирама офтоби остида ўша ёққа борган. Йўлда аҳволи оғирлашиб ҳушидан кетган.

Уни йўлдан олишиб, докторга олиб келишганда у справка учун ҳақ сўраган. Пули бўлмагани учун «Енгил лат еган» деган мазмунда қофоз берган. Бечора дехқон уйга қайтаётиб йўлда ўлган. Эвазига полиция бошлиғи уйи олдиаги майдон, эни ҳам, узуни ҳам йигирма беш ярд<sup>1</sup> келадиган, тош плита ётқизилган майдонга айланди.

Мен қароргоҳни тарк этиб, қалъя билан видолашдим. Кейин Исила билан Саунодан жудо бўлдим, аммо менинг Пъяригинам бор эди. Қачонки, Пъяри ҳам кетгач, мен билан бирга оту итим Бхура қолди, холос.

Қоронғи тушди. Чодирда ётардим. Чодир пардаси орқасида кимнингдир қадам товушлари эшитилди, остонаяда Қажри пайдо бўлди.

— Хўш? — ўрнимдан турмай савол бердим.

— Ма, еб олгин, — у олдимга тўрт дона кичик, дум-думалоқ пирожнийларни қўйди.

Лекин менинг овқат егим йўқ эди.

— Ўзинг нега емайсан?

— Мен тўқман.

— Шунча пирожнийни қаердан топиб келдинг?

— Бугун катта қишлоққа боргандик. У ерда кшатрийлар<sup>2</sup> байрами бўлди. Улар зиёфат улашди. Менга ҳам тегиб қолди. — Менинг овқатга қўл урмаётганимни кўриб қўрқа-писа савол берди: — Хўш, нега емаяпсан? Ёқмадими?

Ўрнимдан турдим.

— Буларни Куррига олиб бор, — дедим. Унинг эрини шундай деб аташарди.

— Жин урсин уни, маст ётилти. Унинг ҳақида гапиришни ҳам хоҳламайман. Пирожнийдан татиб кўргин.

— Қажри, қорним тўқ.

— Илтимос қиласман. — Шундай деди-да, ёғоч сўрига ўтирди, елкамдан ушлаб мени ҳам ўтиризи. Кейин қўлини кенг кўксим узра юргизди.

— Мен ҳар куни сенга овқат келтираман. Оқлаганга яраша яхши уйни оқлаш керак. Шарти кетиб, парти қолган вайронани безашдан не фойда? — У мускулларимни силади. Елкам билан тирсагим орасидаги икки бошлиқ қаттиқ мушагимни бармоқларида куч билан эзди. — Сен аёлларга ишонма. Мана, хотининг сени ташлаб кетиб, ҳозир полициячи билан яшяяпти. — Қажри бармоқларини бақувват бўйинларимдан юргизди. Мен пирожнийни едим. Менга жуда ёқди.

— Қажри, ўзинг ҳам егин.

— Йўқ, буларнинг ҳаммаси сен учун.

<sup>1</sup> Ярд — 91,43 сантиметрга тенг узуилик ўлчови.

<sup>2</sup> Кшатрий — ҳарбийлар табақасига мансуб киши.

— Қайсарликни қўй, е! — Мен унга пирожний узатдим, шулаҳза у юзини очиб ўтирганини пайқаб қолдим<sup>1</sup>. Ҳозиргача бунга эътибор бермаган эканман. Бундан у шунақаям хафа бўлдики, менга тескари ўгирилди. Мен Қажрини ўзимга қаратиб, оғзига зўрлаб пирожний тиқдим. У оғзи тўла пирожний билан кулиб юборди, сўнг гап қотди:

— Жўда ширин экан-а?

— Бўлмасам-чи,— маъқулладим унинг гапини.

У иккинчи пирожнийни ҳам еди. Мен туриш учун сўридан оёғимни осилтиридим.

— Қаёққа, Сукхрам?

— Сув ичаман.

— Мен шу ердаман-ку, нега турасан? Ҳозир сув келтираман.

У сўридан ирғиб туриб сув келтирди. Мен идишга очофатдай лабимни босиб лўқиллатиб сув ичдим. Қажри ҳам ичди. Мен яна ёнбошладим.

— Трубканга тамаки босиб берайми?

— Нега, менда бири бор.

— Тўхтаб тур, мен ҳозир.— Қажри чопқиллаб чиқиб кетди, сал ўтмай қўлида сигарета билан қайтиб кирди.

— Ма, чека қол.

Бу ниҳоятда қиммат сигарета эди.

— Курри бу ердалигингни билиб қолса-чи? — савол бердим.

— Бу омонат вайронанинг қўлидан нима ҳам келарди.

Ўзимни ўзим боқяпман. Умуман, уни кўргани кўзим йўқ!

— У сени савалайди, Қажри.

— Қайтимини ҳам олади. Бўш келиб бўпман. У мени ураётганини кўрсанг, мен бечорага ҳимоят бўлмайсанми?

— Уни уялтиришга уринаман.

— Холосми? «Сенинг қобирғаларингни пачақлаб ташлайман», деб айтиш ўрнига-я?

— У эринг.

— Сендақа латтадан хотининг ҳам қочиб кетган. Бузоқнинг ўзисан.

Мен лом-мим демай аламимни ичимга ютдим, ўйга толдим.

— Жин урсин хотинингни! Нега хафа бўласан? Кетган бўлса кетибди. Бевафо хотин. Нега уйингга бошқа хотинни олиб келмаяпсан?

— Адашяпсан, Қажри, у мени севади!

<sup>1</sup> Юзини очиб ўтирганини пайқаб қолдим.— Яқин вақтларгача ҳинд аёллари бегона эркаклар билан гаплашганда юзини сарисининг чети ёки ёнчиниги билан яширишган. Ёки парда ортида туриб суҳбатлашишган. Ҳозир ҳам баъзи жойларда бу одат бор. Бордию аёл эркак билан юзини очиб гаплашса, бу эркакка ўз муҳаббатини изҳор қилиш маъносини билдиради.

— Ҳа, албатта, бунга ким ҳам шубҳа қиласди? Пъяри оёқларига хушбўй ёр суртятти, сен эса сочларингни сув билан ювяпсан. У юмшоққина ёстиққа бош қўйиб ҳузур қиласди, сен бўлса...— Кажри ўз гапидан завқ олиб кулиб юборди.— Бхурани олиб ётибсан. Икковларинг ҳам ит билан ётибсизлар. Сен-ку садоқатли жонивор билан, хотининг анови ифлос ит, полициячи билан ётибсизлар.— Кажри чигаллашиб кетган сочларимни меҳр билан ёза бошлади.— Уни тез-тез хотирлаб турибсанми?

— Ҳа.

— Ундоқ бўлса уни унуголмаётгандирсан?

— Унуголмайман.

Кажри чуқур ҳўрсинди.

— Кетганига анча бўлдими?

— Уч ой ўтди.

— Ўшандан бери сўққабошмисан?

— Ҳа.

— Қўришиб турасизларми?

— Ҳар куни қўришамиз.

— Ҳаммаси равшан: у сени сеҳрлаб қўйибди.— Кажри бошини ликиллатди.— У заҳарли илоннинг ўзи! Бошингни роса айлантириби у манжалақи!

— Кажри, бас қил уни ҳақоратлашни,— дедим чўнтағимдан сигарета олаётib.

— Энди сўкмайман. Ма, чек.— У менга пачкали сигаретани узатди.— Ҳаммасини олавер.

— Буни ўзингга олгансан-ку. Майли, ихтиёринг,— мен сигарета чека бошладим.

Кажри кулнинг тўкилишига ўйчан тикилиб ўтирди, кейин иккиланиброқ гап бошлади:

— Хотининг кетгандан бери юрагинг ачишиб ёнаётган бўлса керак.

— Нега унақа бўларкан?

— Чунки у тошюрак аёл. Ҳозир дунёдаги ҳамма аёллар шунақа бўлса керак деб ўйлайпсан.

— Йўқ, унақа деб ўйламайман.

— Ростдан-а?

— Рост. Сен Пъярини сўкяпсан. У менсиз умр ўтказолмайди; чунки ҳар куни ёнига чақиради.

— Қўрадио хайрлашади, шунақами?

— Ҳа.

— Қўради холосми?

— Нима, ишонмаяпсанми?

— Негадир ишонишга ақл бовар қиласди. Сен ғўламисан? Е томирларингда қон қайнамайдими? Ахир, сен эркаксан-ку!

Мен ҳеч нима демадим.

— Эрим чол одам. Қоп-қора, ифлос чол, парти кетиб шарти қолган. Уни ташлаб кетишининг айни пайти. Сен кучли, чиройли йигитсан, баданинг ҳам оқ. Бир куни тҳакурлар орасида сендақа азаматга кўзим тушиб қолди. Кўрдиму ҳушимдан ажралдим. Унга жону жаҳонимни сарфлагим келиб кетди. Сени фақат тошиорак хотингина ташлаб кетиши мумкин. Бу ҳақда у билан гаплашиб кўрдингми?

— Йўқ. У бошқа аёл билан илакицсанг ўлганим деб айтди.

— Қип-қизил аҳмоқнинг ўзисан!

— Нега?

— Шу ярамас аёлнинг гапига қулоқ солиб ўтирибсан. Сенинг ўрнингда бўлганимда уриб, тишларини синдириб ташлардим.

— Нималар деяпсан, Қажри? — мен қўрқиб кетдим.

— Гапим тўғри эмасми? — деди у астойдил.

— Эркаклар бардошли бўлиши керак,— сабот билан уқтиридим унга.— Аёллар улардан ожизроқ.

— Эй худойим-еъ, топган бемаза гапларингни қара-я. Бардош! Аёллар ожизроқмиш! Ҳали аёллар бардоши нималигини билмайсан! Аёллар сендақа эркакларни етти пуштигача кавушининг тагида ўз измида тутиб келяпти! Эркакларда бардош бўлганда хотинлари қочиб кетмасди. У сал пўписа қилса каллангни ўйқотиб қўйибсан. Сен унинг қули! Шундайлигингча қолавер! Ёшлигимни чол билан ўтказиб хазон қиладиган, сенга ўхшаган тентаклардан эмасман.

— Мендан нимани истайсан, Қажри?

— Ҳали ҳам фаҳминг етгани йўқми?

— Йўқ, дилингдагини айтганинг йўқ-ку.

— Э, сенга гапиришнинг ҳам фойдаси йўқ,— аччиқланди Қажри.— Пъяри сени ҳис-туйфуси йўқ тўнгакка айлантириб қўйибди! Сен ранг ёпишса ҳам сезилмайдиган қоп-қора, ифлос тўшакка ўхшаб қопсан! Мен кетдим!

Уни ранжитиб қўйишини истамадим.

— Кетмагин, Қажри,— илтимос қилдим.— Озгина ўтири.

Қажри итоаткорлик билан ўтирди.

— Қажри!

— Нима дейсан?

— Эртага бозорга борасанми?

— Сенга зарур бўлса бораман.

— Илтимос, боргин. Мановини ол.— Мен сопол кўзачадан беш анна олиб, унинг қўлига бердим.— Сут олиб келгин.

Қажри ниҳоятда аччиқланди, мис, кумуш тангачаларни юзимга улоқтириди, улар ҳар томонга сочилиб кетди. Оғриқ азобига чидолмай қўлим билан юзимни беркитдим.

— Енгилоёқ хотинининг шўрлик қули, пирожнийларим учун

пул тўламоқчи бўляпсанми? Мени ҳам унга ўхшаган сотқин, бевафо деб ўйладингми? Унинг хайр-садақаларини олавериб бойиб кетдингми!— деб хитоб қилди Кажри. Лекин ўша заҳотиёқ кафтини менинг кафтларим орасидан ўтказиб, юзимни силай бошлади.

— Оғрияптими?— сўради раҳми келиб.

— Йўқ,— кулимсирадим мен.— Жудаям жаҳлинг чиқдими?

— Сен аччиқланмасмидинг? Қалтаклаганинг маъқул эди.—

Кажри хўрсинди. Уни юпатмоқчи бўлдиму яна Пъярини хотирладим. Пъяри мени кутяпти. Аммо у мендан йироқда, жуда йироқда. Энди санам қабиламизга мансуб эмас, яқинлашишимга ҳам йўл қўймаяпти. Фақат боқяпти. Эгасининг олдида эркаланиб, думини ликиллатиши учун итни ана шундай боқишиади. Пъяри нуқул ўзини ўйлади. Мен билан иши нима?

Ховлида Бхура ирилладию дарҳол тинчиди. Муздек шабада эсди. Осмонда бирин-кетин юлдузлар милиллади. Яна сукунат ҳоким. Оlam торайди. Унда фақат менинг кичкина чодирим, Кажри, мен ҳамда атрофимизда ухлаётган натлар бор, холос.

— Сукхрам, сендан бир нарсани сўрасам майлими?

— Сўрайвер.

— Жавоб берасанми?

— Албатта.

— Юзингга пулларни улоқтирганимда нега мени урмадинг?

— Чунки ниятимни тушунмадинг, Кажри. Пирожнийга пул бериш хаёлимда ҳам йўқ эди. Кўзингда севинч аломатларини кўриб кайфиятим кўтарилди. Кўзларингда яна севинч нурлари чақнасин деб сут олиб келиш каби аҳмоқона баҳонани ўйлаб чиқаргандим.

Кажри ўзини тутолмади, кўзларида ёш кўринди.

— Мени қувноқ, бахтиёр кўриш сенга ёқадими?

Мен индамадим.

— Сукхрам,— деди меҳрибонлик билан,— айта қолгин!

— Ёқади.

— Сен олижаноб одамсан, Сукхрам. Олижаноб эркаклар камдан-кам учрайди. Она бўлган хотин ўз боласи учунгина саҳоватли бўлади. Эркакларнинг йўриғи бошқа. Сен жуда яхши одамсан, шунинг учун ҳам Пъярининг азобларига бардош беряпсан. Сукхрам, сенда мутлақо айёрик деган нарса йўқ! Ёнингга ҳар кечак келиб турсам майлими?— сўради Кажри ҳадиксираб.— Жаҳлингни чиқармайман. Ширингина суҳбатлашиб ўтирамиз, бўлтими?

— Йўқ,— деб жавоб қилдиму аллақандақа бўлиб кетдим.

— Бир вақтлар чолим ҳам яхши одам эди. Менга ҳар хил эртак, ҳикояларни айтиб берарди. Сукхрам, сен эртак айтишини биласанми?

Мен аччиқланиб, унинг қўлини қаттиқ қисдим. Қажри ша-рақлаб кулди:

— Бир тўтиқушим бор эди<sup>1</sup>, у ҳам кўпгина эртакларни биларди...

Менинг ниҳоятда жаҳлим чиқиб, унинг қўлларини орқасига қайирдим.

— Йўқ, сен ўткир пичоқ эмас, гулқайчисан,— Қажри бўш келмади.— Бошингга мева «тўп» этиб тушмагунча уни узиб олишни ўйламайсан. Эҳтимол, пичоқни қандай ушлашни ҳам билмассан?

— Қажри, сен маккор аёлсан!

— Мен маккорами? Мени ҳайронликка соляпсан, бу фикр миянгга қаёқдан келди?

Юзига қараб, гапларимдан боши осмонга етганини фаҳмладим...

Осмондаги юлдузлар сўна бошлади, Қажри қўзғолди.

— Мен кета қолай, ҳадемай Курри уйғониб қолади.

— Қўрқяпсанми?

— Унинг бошига такира-тукур тушиб турадиган туфлим қўрқсин.— У менга тикилиб қолди.— Бир оғиз гапинг. Қол десанг қоламан.

— Кета қол, Қажри. Эртага келасанми?

— Пулингни бер, эртага сут келтираман.

— Коронғида сочиған пулни қаёқдан топасан?

— Майли. Сутни ўзим келтираман.

— Айт-чи, Қажри, нега энди мени боқмоқчи бўлиб қолдинг?

— Нега дейсанми? Оламдаги аёллар ўз ўчогига нима учун ўт ёқади? Ўз эрини боқиш, едириб-ичқизиши, меҳрибонлик кўрсатиб эркалаш учун. Эркаклар бамисоли ким боқса, ўшанинг қўлини ялайдиган кўплак итнинг ўзи.

— Йўқол кўзимдан!— бақирдим ғазабга миниб.

Қажри хандон ташлаб кулди, жудаям хурсанд ҳолда: «Эртага келаман» деди-да, чопқиллаганича кетди.

## 9

Сукхрам ҳикоясини давом эттириди:

— Пъяри ўч олишни бошлади. Бир куни браҳман Ниротининг уйи ёниб кетди. Бу ҳодиса шанба куни юз берди. Браҳманнинг хотини бефарзанд эди. Кимдир ёнгин чиқишида шу аёлнинг ўзи айбдор деган миш-миш тарқатди. Қадимий хурофотга кўра, агар аёл киши, шанба куни еттита уйни ёндиrsa, у ҳомиладор бўлар эмиш. Полиция ўша заҳотиёқ аёлни қамаб қўйди.

<sup>1</sup> Бир тутиқушим бор эди—эртаклар тўплами «Тўтинома»га ишорат.

Яна орадан бир ҳафта ўтар-ўтмас ер солиғини тўламагани: учун икки тҳакурни полиция қамаб қўйғанлиги ҳақида овозалар тарқалди. Кўп ўтмай ҳукумат уларнинг ерларини кимошибди савдоси йўли билан сотганлигини, улар қашшоқлашиб қолганини ҳамма билиб олди.

Мен Пъярининг ҳузурига борганимда у виқор билан кара-вотда гердайиб ўтириб, бетел чайнарди.

— Эшитдингми? — сўради Пъяри.

— Нимани? — ўзимни ҳеч нарса билмаганга солдим.

— Ниротининг уйи ёниб кетди, икки тҳакурни қашшоққа айлантиридим! — Пъяри хандон ташлаб кулди, унинг кўзларида ёвуз тантана, нафрат учқунлари чақнади.

— Пъяри, уларнинг ҳам бола-чақаси бор. Гўдакларнинг ҳоли нима кечади? Хотинлари-чи?

— Мен тутган йўлни тутишади. Худога шукур, дунёда полициячи битта эмас.

Мен ҳайратдан оғзим очилиб қолди: Пъярининг сўзларидан заҳар томиб туарди.

— Сен ҳеч кимдан қасос олишни истамайсанми? — тўсатдан сўраб қолди у. — Айтсанг бўлди. Бир зумда ўч оламан!

— Истайман.

— Кимдан?

— Ўч олишга қурбинг етадими?

— Номини айтсанг кифоя.

— Менинг икки душманим бор. Бири — мулозимлари мени калтаклаган заминдор, бошқаси — сен ҳузурига борганингда мени қамаб қўйған ўша полиция бошлиғи.

— Мени масхара қиляпсанми? — Пъярининг юзи хафа бўлганидан тумтайиб қолди.

— Ҳеч ҳам! Сен фил тугул отга ҳам минмаганингни айтмоқчиман холос. Нечун бурнингни осмонга кўтарасан? Улуғ, зодагон одамларга қўйл кўтаришга қодирмисан? Нега жим бўлиб қолдинг? Улар сенинг ишонган тоғинг Рустамхонни эртагаёқ хоҳлаган анжир дарахтига осиб қўйишади. Ишонма фоз, ҳунаринг оз деган мақолни унутибсан, Пъяри! Каллангни ҳам йўқотиб қўйибсан!

Пъярининг ўтирган жойида боши қуий эгилди.

— Пъяри, зўравонликнинг таги мўрт бўлади. Менга ўхшаганларни эзиб, зулм ўтказганлар узоқ умр кўрармиди? Ҳатто уч дунёни<sup>1</sup> эгаллаган Раван<sup>2</sup> ҳам ўлдирилган. Худо Виш

<sup>1</sup> Уч дунё — ҳинд мифологиясида осмон, ер, еrostи дунёси подшоҳлиги.

<sup>2</sup> Раван — қадимий ҳинд эпоси «Рамаяна»нинг персонажларидан бири, ёвуз, маккор дэв, Ланки (Цейлон)нинг ҳокими. Хотинини ўғирлаб кетгани учун Раса уни ўлдиради.

на<sup>1</sup> шер қиёфасига кириб Хирнакусни<sup>2</sup> енгган. Бу дунёда ҳаммамиз ўламиз. Нега ўзингни гуноҳга ботирасан?

— Лекин мен бу ёқса сенинг розилигинг билан келганман,— кўз ёшларини артаркан эътироуз билдирид Пъяри.

— Бунақа ёвуз ишларга қўйл уришингни мен қаёқдан билай?

— Бу ёқса келмасимдан олдин ана шу тҳакурлардан ўчилишимни сенга айтган эдим.

— Сени мақтанган, шойи ёстиқларга бош қўйиб ётишни орзу қилган деб ўйлаган эканман.

— Сен айтган ўша ёстиқларга тупураман! Ёлғон гапирган бўлсам бетелдан қизарган сўлакларим ўрнига оғзи-бурнимдан қон келсин! Ёлғиз сенгина бошқалардан кўра мен учун мўътабарроқсан, шундай бўлиб қоласан.

— Бўлмаса сени бу ёқса нима етаклаб келди?

— Сенинг тўқ, хушбахт бўлишингни хоҳлагандим.

— Ҳой, эҳтиёт бўл!

Пъяри менга киприк қоқмай синчиклаб тикилди, кейин астагина сўз қотди:

— Бугун товушинг сал бошқачароқ жаранглайпти, ўзинг ҳам ўзгарибсан. Нега шунақа бўлдийкан?

— Ўзинг ҳам бошқача бўлиб қолганингни пайқаяпсанми?

— Бошқача? Қанақасига?

— Мен ўзингники эканлигимни таъкидлаяпсан, тўғрими?

— Ҳа.

— Яқинингга йўлатмаяпсан-а?

— Қалбим сенини.

— Сен фақат қалбим эмас, балки хотинимсан ҳам! Ё хотиним эмасмисан?..

У жавоб беришга улгурмай туриб жаҳл билан қичқирдим:

— Сен кўпроқ бойларнинг, Рустамхонингнинг ор-номуси ҳақида қайфуряпсан. У полициячи! Унинг қўлида ҳокимият бор, ҳукуқи зўр! Пъяри, менинг қўлимда эса фақат ханжарим бор, холос! Бунақа Рустамхонлардан ўнтасини қиймалаб, қарға-қуз-ғунларга ем қилишимни биласан. Мени мулозим, ўзингни бека деб биляпсан-а? Энди ҳузурингга келишни истамайман. Қажри тўғри айтган экан.

— Нима деди?— шошилиб сўради Пъяри.

— Сендай одамни ташлаб кетган бўлса, у тошюрак экан деган эди.

<sup>1</sup> В и ш на — Браhma ва Шива каби худолар қаторида туради. У балоқазодан қўриқловчи худо.

<sup>2</sup> Хирнакус (тўғрироғи, Хиранйакашибу — «олтин кийимли») девлар йўлбошчиси, у худоларни менсимаган.

— Бечора, сени яхши кўриб қолганга ўхшайди! Чиройлисан, оқ пўстсан, худо сени куч-қувватдан ҳам канда қилмаган. Яна нима керак? Албатта, Қажри сен билан бирга қоламан деб ҳам айтган бўлса керак?

— Буни қаёқдан билдинг?

— Жонгинам, ичу тошингни билиб турибман,— Пъяри илжайди.— Мендан сирингни яшириб бўпсан! Илгаридан қанотингни кесиб қўйганман. Мендан қочиб кетишга уринсанг умрингни турмада ўтказаман! Бошқа аёлнинг бўйинингга осилишига тоқат қилолмайман.

— Ўрнимда илондай тўлғаниб ёлғиз ётишимни хоҳларкансан-да? Менга қанақасига хотинсан! Тошюраксан, алвастисан! Бировларнинг уйига ўт қўясан! Сени бўғизлаб ташлайман!— деб бақирдим.

Аммо Пъяри заррача ҳам қўрқмади.

— Ҳар куни Қажри билан бирга ётсанг ҳам тинчимаяпсанми?— заҳарханда билан сўради Пъяри.

Мен довдираб қолдим.

— Менга бевафолик қилдингми?

— Ким бевафолик қипти?

— Мен-ку буёққа очиқ-ошкора келганман, сен эса зимдан бевафолик қилгансан.

— Гапимга қулоқ сол, Пъяри,— дедим ўзимни йўқотиб,— Қажри менга мутлақо хотин эмас. У мени жонидан ортиқ севади, аммо юрагимдаги оловни сўндиrolмаяпти. Мендан жуда узоқлашиб кетганинг жаҳлимни чиқаряпти, бунчалик ўзгариб кетасан, деб ўйламагандим. Қажри аёлларнинг ҳамма макрҳийлаларини фақат аёлларгина тушунади деб айтди. Рустамхонникига шундоқ келиб-кетиб туриш қўлингдан келмасмиди? Келардинг, яна кетардинг — вассалом. Аммо сен уни ёқтириб қолганинг учун бу ерда қолдинг. У сени сеҳрлаб қўйган. Рустамхондан ўч олмаслигим учун қўл-оёғимни боғлаб қўйдинг, унинг жонини омон сақлаб турибсан...

— Жим бўл, бўлмаса оқибати хунук бўлади!— Фазаб билан қичқирди Пъяри.— Аблаҳ натларингнинг чодирларини ёндириб ташлайман! Қажрининг танасида соғ жой қолдирмайман! Сени ҳам янчиди ташлайман!

Бу авж олишдан ҳайрон бўлиб Пъярига қарадим, унинг кўзлари ғазабдан чақнарди.

— Қажрини қўлингдан тортиб оламан!— Пъярининг товуши титрай бошлади.— Сочингни юлганингча қолаверасан. Қўл-оёғингни боғлаб қўйиб, кўзинг олдида уни бошқа эркакларга қўшиб қўйишга бўйруқ бераман, аламингга чидолмай ирғишилаганингда аҳволингга куламан. Муҳаббатимни шунчалар хўрладинг. Менга ҳам, муҳаббатимга ҳам ишонмадинг. Сен ишон-

ган тогум эдинг, аммо мени алдадинг. Бошқа аёлларни деганингдан кейин нега ёнимга келасан?

Пъярининг кўзлари намланди, у юзини қўли билан яширди. Нима бўлаётганига ақлим етмади. Лекин унга яқинлашиб, даҳанидан ушлаганимда жаҳл билан ўшқирди:

— Менга қўлингни тегизма, тегизма дәяпман!

Мен зарб егандай титраб кетдим, Пъярини итариб, эшикка йўл олдим, лекин у мендан олдинроқ бориб эшикни тўсди.

— Кетяпсанми? — қичқирди у.

Мен индамадим.

— Кетавер! Кетавер! Кўнглімни ҳам, танамни ҳам топтадинг, энди кетавер, аммо шу бугуноқ ўзимни ўлдираман, ханжарим юрагимни адашмай топади!

Мен яна индамай туравердим.

— Гапларимни эшитмадингми?

— Эшитишни ҳам истамайман.

У менга бекиёс ғам-алам билан тикилди.

— Мендан нафратланяпсанми?

— Мунофиқлик қилма. Мен эмас, сен нафратланяпсан. Ҳатто яқинлашувимга ҳам тоқат қилолмаяпсан, жирканяпсан.

— Ха, ха, нафратланаман!

— Пъяри! — ялина бошладим.

— Нафратланаман! — у боши билан эшик тавақасига суянди. — Сендан эмас, ўзимдан нафратланаман. Менга чидаб бўлмас оғриқлар азоб беряпти, жонимни қўйгани жой тополмаяпман. Хафа бўласан деб сенга айтмагандим. Сен ҳеч нимани тушишини хоҳламайсан. Сенга яхшилик қилиб ўзимни олиб қочганман. Сени, чиройли баданингни яхши кўраман. Умрим тугади ҳисоб, аммо шу бемаъни касалликни ўзингга юқтириб, оғришингни истамадим. Сен ҳанузгача ишонмайсан-а? Майли, кетавер, ҳаммасига ўзим айбдор. Сени ушлаб қолганимда ҳам, барибир, сенини бўлолмайман.. Боравер, Кажрига уйланиб олақол. Мени бутунлай унутиш учун ўша билан бу ердан узоқ-узоқларга кетгин.

Пъяри гандираклаб, аста-секин ерга чўка бошлади. Уни даст кўтариб, каравотга ётқиздим, кейин сув келтириб юзига сепдим. Пъяри ўзига келди.

— Пъяри! — деб чақирдим титроқ овоз билан.

— Нима дейсан! Сукхрамгинам! — деди, кейин савол берди. — Илтимосимни бажо келтирасанми?

— Истаган илтимосингни айтавер, Пъяри, ҳаммасини бажо келтираман,— овозим бўлинниб, юрагим ташвиш билан тепа бошлиди. Бўлиб ўтаётгандарнинг ҳаммаси даҳшатли тушга ўхшарди.

— Ростдан-а?

— Ҳа, Пъяри, айтавер, мен кутяпман.  
— Қачон бўлмасин Қажрини олиб кел, менга кўрсат!  
— Пъяри!—ўз қулоқларимга ишонмай бақириб юбордим.  
— Бақирма,— деди осоиишта оҳангда.— Кўрқма, унга ёмонлик қилмайман, ҳеч нарса демайман.

Мен бошимни ҳам қилдим, анчагача индамай ўтирик.

— Йўқ, Пъяри,— дедим ниҳоят.— Ишон, сени ташлаб кетмайман. Бўлар иш бўпти. Энди Қажрига қарамайман. Қел, иккевимиз бу ерлардан қочиб кетайлик. Князликдан қочиб кетиб, инглизлар ҳокимлик қилаётган губернаторликнинг бирон жойида бошпана топармиз. У ёқларда бизга тегишмайди.

— Тегишмайди дедингми? У ёқларда солдатлар йўқми? Полиция ҳам йўқми?

Мен бақириб-чақиришга, йиғлашга тайёр эдим, чиндан ҳам кўзларимда ёш кўринди.

— Сукхрам, йиғлаяпсанми? Айт-чи, бу ожизлик ёшларими ё мұҳаббат ёшларими? Меникими ё ўзингнйкими, кимнинг кўз ёшлари?

— Сеники, Пъяри,— дедим унинг қўлларини ушлаб.

— Эркак бўлатуриб йиғлаяпсан,— Пъяри ғамгин кулимсиради, қўли билан соchlаримни силарди.— Сен ҳам мардлик кўрсатолмасанг, кимга суюнаман? Мен ожиз бир аёлман. Қаердан куч-қувват оламан?

Бошим айланди. Орадан талай кунлар ўтгач, бугун яна Пъяри менга қадрдон бўлиб қолди. Бизни ажратиб турган девор қулади. Икки далага тўплланган сув марзанни тўлдириб ягона оқимга бирикиб кетди. Ўша куни мұҳаббатимиз қайта тирилди. Буғдои донидан ўсиб чиққан, эзилган, тоғталган нозик поя ана шундай тирилади, бош кўтаради. Шу лаҳзагача мен дор арқони устида ҳаёт билан ўйнашиб, нозик, қалтис ҳунар, эпчилликлар кўрсатиб юргандай бўлсам, эндиликда Пъяри мени кутиб турган ерга тушдим, мен учун ортиқ на қўрқинч, на хавфхатар бор.

Пъярининг ғамгин кўзларида меҳр, жонланган умид нурлари порлади. Пъяри яна кўзимга ўта чиройли бўлиб кўринди.

— Ўзгариб қолдинг дейишга тилинг борганлигини қара!— Пъяри жилмайди, аммо шу лаҳзада бошини эгди.— Нега индамаяпсан?— деб сўради.

— Нима дейишими ҳам билмай қолдим.

— Нега?

— Бошим айланиб қолди, Пъяри.

— Сен яна дилимдагини тушунмадинг,— деди алам билан, кейин индамай қолди. У менга яна юзини ўгиргунга қадар бир неча лаҳза ўтди.— Бунга ким айборлигини биласанми?

Мен индамадим.

— Ёлғиз ўзим айборман, бошқа ҳеч ким. Буни тушуниб етдим. Энди менинг хусусимда қанақа фикрдасан?

Кажрининг мени лақиллатиш жуда осон эканлиги ҳақида айтган гапларини эсладим. Ҳозир Пъяри чиндан ҳам менга яхшилик құлмоқчими ёки аёллик макрини ишга солмоқчими — билмасдим.

— Кажрини олиб келасанми? — сўради у.

— Уни калтаклашга амр берасанми?

— Сен уни ҳимоя қилишдан чўчияпсанми? Жонинг кўзингга ширин кўриниб қўрқяпсанми? Эҳ, ҳезалак! — деди у ачитиб.

Унинг гаплари мени қаттиқ ранжитди. Пъяри мени масхара-лаётгандай бўлиб кетди. Шу қадар юраксизлигим, осонгина ён беришим туфайли у мени ташлаб кетмаганмикан? Мен Пъярининг қўлидан ушлаб эшик томон судрадим. Пъяри менга ажабланиб қаради.

— Қаёққа кетяпмиз?

— Мен буюрган ёққа.

У кулимсираб:

— Ўша ёққа бормасам-чи? — деди.

— Нима дединг? — ўқирдим унга, юзига тарсаки тортиб юбордим.— Гапир?

— Сендаги эркаклик энди тилга кирди!

— Яна тарсаки ейсанми?

— Кўйиб юбор қўлимни!

— Йўқ, мен билан кетасан. Сен билан Қажри бирга яшайсанлар.

— Эсинг жойидами ўзи? — менга ўшқирди у.— Қажри билан бирга тураманми? У манжалақи ким ўзи?

— Ҳой, хотин, унингни ўчир! Яна финг десанг тилингни суғуриб оламан! Ҳой, полициячининг тагида ётган ифлос, ўзингга ортиқча бино қўйма! Тилингни тий, уқдингми? Ҳозиргача финг демай келдим, бироқ гап бошладимми, ҳеч ким монелик қиласлиги керак. Ҳаммаси мен айтгандай бўлади.

— Ўша гапингга — манови! — у ўгирилиб думбасини шаппатилади.

— Демак, кетмайсанми?

— Йўқ.

— Йўқми?

— Йўқ.

Мен унинг у бетига, бу бетига тарсаки тортиб юбордим. Пъяри бошини чангллаганича оёқларим остига тиз чўқди.

— Мени кечир, хўжам. Сен билан бирга кетаман.

Мен нафасимни ростлаш учун четландим.

— Бир зумда чинакам эркак бўлдингу қолдинг. Сени эркак қилишга қанча уринмайин қўлимдан келмади, ярамас Қажри

бўлса сени дарҳол тҳакурдан натга айлантириб қўйибди. Қажри сени сеҳрлаб қўйгандир. Майли, бораман. Ҳўжам, мени ана шу сарқит ёнидаги иккинчи хотинга айлантирасанми ё унга чўри қилиб берасанми?

— У сарқит бўлса, сен ким? Сен билан юзлаб эркаклар тунаబ дон олишган. Ахир менинг иккинчи хотин олишга ҳаққим йўқми?— деб сўрадим кеккайиб.

— Йўқ, сен ёлғон гапиряпсан. Мен ҳамиша битта эркак— сен билан бўлганман. Бошқалари билан пул топиш учун гаплашганман. Мен уларга қалбимни бермаганман, сен эса Қажрига кўнгил берибсан.

Пъяри ҳақ гапни айтди. Мен ўтириб ўйга толдим. Пъяри яна мендан устун келди. У каравотда бир оёғини букиб, иккинчисининг тиззасидан қучоқлаганича гўё маликалардай виқор билан ўтиарди. Шу пайт эшик ортида Рустамхоннинг огоҳлантирувчи йўтали эшитилди. Дадиллигим йўқолиб, аъзойи баданим қалтирай бошлади. Лекин Рустамхонга бўлган нафратим ортди, холос. Шунда у билан очиқчасига олишишга ожиз эканман, унга билинтиrmай панадан туриб тиф отишими кераклигига тушубниб етдим.

— Энди кет,— қўл силтади Пъяри.— Эртага Қажрини олиб кел. Ваъда берасанми?

— Кажри сенга ўхшамайди, у менга буйруқ беришга интилмайди. У мен нима десам шуни қиласди. Эртага уни олиб келман. У мени севади.

— Ҳар куни бирга ётганингдан кейин севади-да.

— Уни ҳам бирон-бир полициячиникига жойлаб қўяман, ана шунда нима бўлишини кўрамиз?— дедим аччиқланиб.— Сенда-қа тошмехр бўлиб қолармикан?

Мен унинг жавобини эшитмай пастга тушдим, қўтосга ўт ташладим. Пъяри орқамдан чиқди. У трубкани тўлдириб Рустамхоннинг олдига қўйди.

— Сукхрам!— деб чақирди Рустамхон.

— Лаббай, тақсир.— Мен таъзим қилдим.

— Ўтир,— у чилимни сўраркан амр қилди. Мен ўтирдим. Рустамхон бир неча бор ичига тутун ютиб, паға-паға қилиб чиқарди.— Менга бир холис хизмат қилмайсанми?

— Қанақа хизмат, тақсир?

— Айтишларича, табиблиқдан хабаринг бор экан.

— Яхшими-ёмонми, ким билсин, гоҳида унча-мунча уринаман.

— Оёқларимга бир қара.

Мен яқинлашиб, тўпигидаги ярага кўзим тушди.

— Хўш, бу қанақа яра? Нега индамаяпсан?

— Тақсир!— Мен гандираклаб кетдим, Пъярига қайғули назар ташладим. У қўли билан юзини яширди.

— Ҳа, унда ҳам шунақа яралар бор,— Рустамхон боши билан Пъярига имо қилди.

Ақлдан озаётгандай бўлдим. Бошимни чанглаб, инグラб юбордим. Рустамхон менга ҳайрат билан тикилди.

— Нима гап, Сукхрам?

— Сен! Сен ўзинг нима қилиб қўйдинг, Рустамхон!— унга одобсизларча муомала қилганим, дадиллигимдан ўзим ҳам ҳайрон қолдим.— Шу ифлос касал билан оғриган экансан, хотинимга яқинлашишга нечун журъат қилдинг? Ахир у ойдан ҳам мусаффо, шамдан ҳам мулоийм эди-ку!

— Ким билсин, эҳтимол касалликни менга у юқтиргандир.

— Яна шу гапни такрорласанг, сени ҳам Рустам, ҳам хон қилиб қўяман, иккига бўлиб ташлайман, уқдингми?

Мен ўрнимдан турдим. Рустамхон қўрқув ичида қўлини силкитди.

— Сукхрам, ўтири, ўтири. Тақдирдан қочиб қутулиш қийин. Буни даволаса бўладими?

Юрагим эзилиб, қон бўлиб кетди. Пъярининг оёқларига йиқилиб:

— Пъяри, сен инсон эмас, авлиёсан!— деб шивирладим.

Пъярининг кўзлари ёшга тўлди. Мен биламан, бу — севинч ёшлари эди.

Пъяри шунинг учун мени ўзига яқинлаштирумagan экан-да. У мени балодан қутқариб қолмоқчи бўлибди. Энди ҳаммасини тушундим. Қўзимдан оққан ёш гапиришимга имкон бермади. Рустамхон ҳайрати ошиб мени кузата бошлади. Қанча вақт ўтганини билмайману, ўзимга келганимда қалбим чил-чил бўлган эди.

— Табиб!— деб ингради Рустамхон.— Мени қутқар! Пъяри ни қайтариб олиб кетавер. Қасаллик мени адойи тамом қилди. Бордию касалимни билиб қолишиса мени хизматдан ҳайдаб юбо-ришади, қашшоқ одам бўлиб қоламан. Одамларга кўп ёмонлик қилдим, улар мендан қасдини олишга уринади. Сукхрам, мени қутқариб қолишинг қерак! Пъярига ёқиш учун ҳамма айтганларини қилдим. Уни деб тҳакурларни ўз душманимга айланти-дим.

Мен унга қарадим: наҳотки буларнинг ҳаммасини Пъяри деб қилган бўлса?

— Яхши,— дедим мен.— Сени даволайман. Бироқ гапимдан чиқмайсан. Тўйиб овқатланишдан сақлан. Туз, ёғ солинмаган, нўхатдан пиширилган нон ейсан. Иннайкейин, Пъярига тегмай-сан.

— Ҳамма айтганларингни қиламан,— деб зорланди Рустамхон,— лекин Сукхрам, уни севаман!

Севаман! Рустамхон Пъярини севади!!! Бу жодугар аглаҳ одамни итоаткор ит қилиб қўйибди...

Ва ниҳоят Рустамхонни даволашга ваъда бериб, кетиш учун қўзғолдим.

Дарвозадан чиққанимда орқамдан Пъяри етиб келди.

— Эртага Қажрини олиб кел, бўптими?

Мен маъқул деб бош ирғадим.

— Бордию у рози бўлмаса-чи?— сўради Пъяри.

— Унда яхшигина савалайман. Оёқларинг остигача судраб келаман.

— Буни хоҳламайман.

Мен ўйланиб қолдим.

— Кўндиргину куч ишлатма.

— Майли, уриниб кўраман.

Кетаётганимни кўриб, у мени тўхтатди.

— Хўш!

— Мендан аччиқланмадингми?

— Йўқ. Ахир, ўзингга яқинлаштирмаслигинг боисини тушунмаганман-да.

— Фақат қалбингни эмас, танангни ҳам севишимни хәёлинга келтирмагансан. Сени ўзимдан нари итариш осон бўптими? Муҳими, сен соғломлигингча қолдинг.

Кўнглим севинчга тўлди.

— Сукхрам, мен тузала олармиканман?

— Албатта тузаласан. Ана ўшандада бу ерлардан кетамиз, маъқулми?

— Албатта! Истайсанмӣ, Қажрининг чўриси бўламан! У сенига қувонч баҳш этди, бу менинг қўллимдан келмади.

Фақат шундагина Пъяри жуда катта саҳоватли қалб эгаси эканлигини англадим.

— Анови ярамас сени қўйиб юборармикан?

— Сен уни қўрқитгин, хотинимни қўйиб юбормасанг даволамайман деб айтгин. У ўлгидек юрак олдирибди, энди ҳамма айтганингни қилади.

Унинг фикри менга маъқул тушди. Наҳотки Пъяри яна ўзимники бўлса? У менга астойдил тикилиб қолди. Унинг қўзлари бир олам қувонч билан порляпти.

## 10

Таборга қайтиб қелганимда одамлар қўшиқ айтар, рақсга тушар, хурсандчилик авжида эди. Қайфи ошган Курри музика оҳянгига мос тебранар, Қажрига қараб қичқираради:

— Йўқол қўзимдан! Уйимга бошқа қадам босма! Голи меники! Сен менга ҳеч ким эмас!— Курри ширакайф натнини қучоқлади.

— Голининг бир қўзи қийшиқ,— деб кулди Қажри.

— Майлига. Сен билан кечирган оиласи ҳаётимиз тамом, вассалом! Голи винони яхши кўради, у яхши, сен бўлса тентаксан.

Кажри хандоқ ташлаб кулди.

— Ҳой аёл, менга қара,— деди кимдир,— эринг ҳайдаятию сен нуқул куласан-а?

— Йиғлаб менга зарур кептими, худога шукур, манови жирканч маймундан қутулдим.

— Манжалақи! Ўзинг маймунсан!— бўкирди Курри.

Кажри яна шарақлаб кулди.

— Кажри, энди нима қиласан?— сўрашди аёллар.

— Сизлар орзу қилгандан ҳам зиёда эр топиб оламан.

— Кимни?

— Сукхрамни!

— Қойил-э,— деди кимдир завқланиб.

Ҳамма мени қуршаб олиб табриклиша бошлашди, фақат Курри тийилмади:

— Унинг Сукхрами учига чиққан аҳмоқ, ўжар ҳангги эшак. Бу эса ургочи эшак. Уйланишаверсин. Икки тўйни битта қилиб ўтказамиш, мен Голига уйланаман.

...Аёллар тўй қўшигини бошлашди. Қекса руҳоний — нат келиб бизга зиёфат тайёрлашди. Ўйин-кулги авжига чиқди, вино коса, қўзалардан дарё бўлиб оқди. Таборда хушчақчақлик бошланди.

Қош қорайди, Кажри чодиримга кўчиб ўтди. Мен ҳамон ўй сурардим, нима бўлаётганини тушуниб етмасдим. Энди Кажри менинг хотиним бўлди. Тўй муносабати билан Кажри сандиқдан ўзига жуда ярашадиган шойи кофтасини олди. Уни кийиб, чинакам соҳибжамолга айланди. Қорачироқдаги ёғ кўп ўтмай ёниб битди, чодир ичи қоронгулашди.

— Нималарни ўйлаяпсан, Сукхрам?

— Пъярини ўйлаяпман.

— Ўшани ўйлаяпман дегин?— Кажрининг фифони чиқди.—

Унда нечун менга уйландинг?

— Нега дейишга бало борми? Ахир мени яхши кўрасан-ку?

— Аммо Пъярини жуда ёмон кўраман.

— У бўлса сени ёқтиради.

— Бе-е, қўйсанг-чи,— Кажри ишонқирамади.

— Рост айтяпман.

— У менинг тўғримда нималар деди?— шубҳаси тарқамаган

Кажри савол берди.

— У сени хотин қилиб олишимни тайинлади..

— Буни яхши ўйлаб топипти. Ўзи ўша ёқда қолар эканми?

— Йўқ. Қайтиб келади.

Бу хабар Қажрини яшиндек гангитиб қўйди.

— Қаёққа?— ишончсизлик билан сўради у.

— Шу ерга.

Кажри йиғлаб юборди.

— Нега йиғлайсан? Пъяри чўринг бўлишга ҳам тайёр.

Кажрига яқинроқ ўтириб, уни қучоқладим. У кўз ёшларини юбкасининг этаги билан артди.

— Ҳеч қачон ундоқ бўлмайди,— деди у.

— Сен шу қарорга келдингми?

— Ҳа. Пъяри кўп маккора. Бунақа режани беҳудага ўйлаб топмаган.

— Нега унақа дейсан?

— Нега, нега эмиш, наҳотки ўзинг тушунмасант?

— Тушунмадим. Шунчалик доно экансан, ўзинг тушунириб бера қол.

— Пъяри мени севиб қолганингни билган, шу важдан ҳамма нарсага тайёр, фақат уни ташлаб кетмасанг бўлгани. У ўзи ни яхши аёл қилиб кўрсатиб туради-да, яна сени тузогига илинтиради. Мени қоралашга интилади, сен бўлса унга лақقا ишониб ўтирибсан. Пъяри таъна қиласвериб, менга кун бермайди. Сен жудаям бўш одамсан. Ҳадемай унинг гапига кириб, мени савалайсан ҳам.

— Нега унақа дейсан? Наҳотки менинг муҳаббатимга ишонмасанг?— шундай дедим-да, Кажрини бағримга босдим.

— Сукхрам! Айтишларича, одамлар, айниқса камбағаллар баҳт нималигини билишмас эмиш. Бу ёлғон гап, Сукхрам. Ниҳояти аёллар ором нималигини билишмайди, холос, шу важдан бири бошқасининг пайини қирқиб юради. Ҳамма бало шундан бошланади.

— Сен тентаксан, Кажри.

Ташқарида Бхура жаҳл билан ҳурдӣ, кейин ҳаммаёқ тинчиб қолди.

— Сукхрам, бугун вужудларимиз бирлашди.

— Кажри, Пъяри бебаҳо аёл. Полициячи унга ёмон бир қасалликни юқтирибди, шу учун мени ёнига йўлатмай, касалдан сақлаб қолибди.

— Менинг чўрим бўлишга ҳам тайёр эканлиги боисини энди тушундим!— Кажри қаҳ-қаҳ уриб кулди.— Шундай демаса уни ташлаб кетардинг, тўғрими?

— Кажри, уни даволайман. Бунақа касални даволашни биламан.

— Унга худди шу керак.

Кажрининг сўзлари мени шубҳага солди У пешонамга тушиб турган соchlаримдан маҳкам ушлаб, қатъият билан шундай деди:

— Энди тушундингми? Тушундингми — йўқми? Тентак. Аёл макрини фақат аёл тушунади. Шуни ҳам билмайсан?

Сукхрам ҳикоясини давом эттиради:

— Қажрининг сўзлари ичимда бўрон қўзғади. Пъярининг боқиб турган кўзларини хотирладим. Қажри айтган гаплар мағзини чақдим. Бир-бирига зид, ғалати туйғулар мени азоблай бошлади. Қажридан эҳтиёткорлик билан сўрадим:

— Эртага мен билан бирга борасанми?

— Қаёқقا?

— Пъярининг ёнига.

— Нега борарканман?

— Пъяри сени кўрмоқчи.

— Унга нима керак экан?

— Мен уддасидан чиқолмаган ишни қилиб сенга баҳт келтирган аёл жуда яхши бўлса керак, деб сен билан дийдор кўришишни истаб қолди.

— Маккор илон! Қайси биримиз яхшироқ: уми ё менми, шуни билмоқчи!

— Унга олиб келаман дедим.

— Олиб келаман!!!— Қажри ҳайрат билан хитоб қилди.— Мен борарканманми?

— Нега энди бормас экансан?

— Нега энди у кишининг ўзи келмас экан? Ахир, у мени кўрмоқчи-ку! Чанқаган одам қудуққа ўзи келади.

Қажрининг фикри тўғри, лекин мен ваъда бериб қўйгандим.

— Эҳтимол, борсам ўзимни таҳқиrlаган бўламан деб қўрқарсан?— дедим истеҳзо билан.

— Мен нимадан қўрқарканман, умрим бино бўлиб қўрқоқлик нималигини билмаганман. Лекин ўзимни зодагон хоним қилиб кўрсатишни хоҳламайман. У киши боришимни талаб қилибди! Нима бўпти, битта натнинг хотини-да, деган! Пъяри ҳозир полициячининг ўйнаши! Бизга ўзини тенг кўрмайди-да!

— Валақлашни бас қил, нима деяётганингни ўзинг билмайсан.

— Сукхрам, мен бошқа нарсани ўйлаяпман. Сен яна унинг ҳукмига бўйсуняпсан, тўғри эмасми? У яна бека, сен унинг мулоzими, шундайми? Мен эса натни. Лекин ким бўлсам ҳам ҳеч кимнинг мулоzими бўлмайман. Хоҳламаган ишимни зўрлаб қилдириш мумкин.

— Тушунсан-чи, Қажри! Мени розилик беришга муҳаббат мажбур қилди.

— Шунақами ҳали!— Қажрининг ғазаби қайнаб кетди.— Сен уни яхши кўрасан! Шунинг учун ҳам мени унинг ноғорасига ўйнашга мажбур қиляпсан! У менга жуда ажойиб чўри бўлади-да!— Қажри заҳарли жилмайди.

Қандай жавоб қайтариш керак? Ғазабим қайнаб тошди.

— Бошқа ҳеч қанақа гапни эшитмайман,— деб бақирдим, унинг қўлидан маҳкам ушладим.— Борасанми?

— Йўқ.

— Эрга бўйсунишдан бош тортипсанми? Борасанми?

— Йўқ, минг марта йўқ! Сенинг хотинингман, сени ўзим танлаганинман. Буюр, ўзимни очликдан ўлдирай. Ухлаганингда оёқларингни уқалай. Чақир тиканаклар устидан ялангоёқ юрай, қўлларимни ёниб турган оловга тутай... Аммо мендан буларни талаб қилмаяпсан. Сени севишимни хоҳлайсану юрагингни бошқаларга берасан. Сен кундошимни севишимни талаб қиляпсан, мен эса бундай қилолмайман!

Уни жон-жаҳдим билан урдим, бироқ у Пъяридай бўш келмади. Зарб еган жойини ишқалаб бошини мағрур кўтарди.

— Ур, бунга ҳақинг бор. Урганинг — севганинг. Севасан. Севмаганингда, гапингга кирмаганимга бунчалик жаҳлинг чиқмасди? Ахир, сенга бўйин эгишни хоҳламаган дарахтга аччиқланмайсан-ку! Уни калтакламайсан, тўғрими? Мени эса севасан, севасан! Яна бир ур! Муштларинг мендаги жаҳл билан рашкни йўқотолмайди. Мени чалажон қилиб калтакла, баданимни бўлак-бўлак қилиб нимтала, қарға-қузғуларга ташла! Мен финг демайман, ҳаммасига чидайман. Аммо унинг ёнига боришига бујурсанг, ўжарлигим ошади, гапингга мутлақо кирмайман. Иккавимизнинг умримиз ҳам, йўлимиз ҳам, тақдиримиз ҳам битта. Анови зоти паст бузуқи ким бўптики, орамизда тўғаноқ бўлади? Уни кўришга тоб-тоқатим йўқ! Сен эримсан, сенга қалбимни берганман. Кўксимдан юрагимни узиб ол, мутлақ финг демайман. Мени севмай қолган кунинг умримнинг охириги куни бўлади... Бироқ уни севишга мени мажбур қилолмайсан. Шуни билки, итинг оёқларини яласам ялайман, аммо...

— Кажри! Нега бўлмаса уйимга келдинг?— дедим инграгундай бўлиб.— Ёлғизгина яшаётгандим, бахтиёр эдим. Ва ниҳоят сен келдинг. Келдингу садоқатинг, меҳр-муҳаббатинг билан мени мафтун қилдинг. Ҳозирга келиб мени тарк этгинг келмаяпти, Пъяри ҳам мени унтолмаяпти. Нима қилсам экан?

— Йхтиёргинг. Шуни билки, мен билан боғланган арқон билан Пъярига ҳам боғлиқсан. Эҳтимол, менинг бу ердан кетишими хоҳларсан?— Кажри шундай деди-да, ўрнидан туриб, ташқарига йўл олди.

— Тўхта!— дедим қўлидан ушлаб.— Наҳотки сен ҳам шунчалар тошмехр бўлсанг? Нима қиласай, ўзимни ўзим ўлдирами?

Кажри ёнимга ўтириб, мени меҳр билан қучоқлади.

— Мени шундай қилишдан қўрқади деб ўйлайсанми? Юр, икковимиз қучоқлашиб кетаверамиз. Баланд тоғ чўққисига кўтарилиб, ўзимизни пастига ташлаймиз. Ўшанда ҳеч ким бизни

ажрата олмайди. Қайта туғилишда сеники бўламан. Дунёга неча марта келсак ҳамиша шундай бўлади!

Бу гаплардан бошим айланиб, гарангсиб қолдим. Тўсатдан қалъя ёдимга тушиб қолди! Мен унинг эгасиман! Мен тҳакурман!

— Ҳой хотин! — дедим виқор билан. — Сен менини, оёғимдаги кавушимсан. Қажри билан Пъяри — икковинг ҳам хотинимсизлар. Қажри хоҳлаганидек бўлмайди. Пъяри мен билан қолади. Уни даволаб бўлишим биланоқ чодирга олиб келаман. Тушундингми? Иккала ўжар ҳам менинг хотиним бўлиб қолади. Биз натлар ёнидан кетамиз. Сизларни бошқа ўлкаларга олиб бораман. Йкковингни жанжаллаштирумайман. Мен нима десам шундай бўлади.

— Кейин-чи? — ишончсизлик билан сўради Қажри. У гапларимга мутлақо тушунмаганди.

— Қажри, мени озгина бўлса ҳам севсанг, мен билан бирга Пъярининг ёнига борасан. У касал, мени юқумли касалликдан сақлаб қолди. Пъяри ҳеч ёмон аёл эмас. Буни уққин. Борсанг оёғинг қуриб қолмайди ёки оёғимдаги бўёғим кўчиб кетади деб қўрқяпсанми? Пъярига буюрсам янгисини суртиб қўяди<sup>1</sup>. Хўш, борасанми?

Қажри дарҳол жавоб қайтармади. Аввал савол берди:

— Бунга Пъяри рози бўлармикан? Наҳотки у шунчалар итоаткор бўлса?

— Рози бўлади. Ўжарлик қилса эртагаёқ жавобини бераман!

— Ундаи бўлса бораман, — Қажри кескин бош силтади. — Агар Пъяри оғзингдан чиқиши билан гапингга итоат қилса, яrim оғиз гапинг кифоя, айтганингни бажо келтираман. Буюравер! Аммо катта хонадон аёлига қилгандаи муомала қилма, қинғирлик қилмайман. Эркинман, қалбимни кимга хоҳласам ўшанга бераман. Мен натниман. Чинакам натниман! Натнининг қизи, неварасиман!

Мен уни қулоқлаб олдим. У ҳеч қачон менга шунчалик чиройли кўринмаганди.

— Қажри, қулоқ сол, яна бир гап бор.

— Қанақа гап?

— Пъярининг кийимлари қимматбаҳо, ҳар куни совунлаб ювинади. Олтин безаклар тақади. Сен нимани киясан? Унинг олдида ноқулай аҳволга тушиб қолмайсанми?

— Менми? Ҳеч қачон! У ишлаб топган пулни мен ҳам топи-

<sup>1</sup> Янгисини суртиб қўяди — хинд аёллари қўл кафти ва тўпини маҳавар номли маҳсус қизил бўёқ билан бўяшади. Ҳиндларнинг ақидасига кўра, катта хотини кичик хотинининг оёғига бўёқ суртишга мажбур этилса, бундан қабиҳ, паст иш йўқ.

шим мумкин. Фақат унинг харидори эртароқ келиб қолган. Бироқ мени унутиб, ўша безакларни унга сен олиб берганингда кўзингни бақрайтириб туриб унинг кўксига ханжар уриб, қонини ичган бўлардим.

— Алвастি!— деб қичқирдим даҳшатга тушиб.

Кейин икковимиз ҳам хандон ташлаб кулдик. Кажри тирик алвастини кўрган-кўрмаганимни сўради. Бир куни — жаракх<sup>1</sup>га миниб кулаётган аёлни кўрган экан. Ўшанда Кажри жаракх нималигини дарҳол пайқабди. Аммо уларнинг уйида авлиё дарвиш тўхтаганлиги учун у зиён-заҳмат етказмабди.

У уйқуга кетгунча талай мўъжизалар ҳақида интиҳосиз ҳикоя қилди.

Кажри қаттиқ уйқуга кетди, мен унинг ёнида ётиб, узоқ ўй сурдим.

## 11

Сукҳрам ҳикоясини давом эттириди:

— ...Эрталаб мени Кажри уйғотди. Қуёш аллақачон қиздира бошлаганди.

Кўлга бориб чўмилдим, сочиққа ўраниб, чодирга қайтиб келдим. Дхотини<sup>2</sup> қуритиш учун ёйиб, кўкат устига ўтирганимча чека бошладим.

Ёнимга Рамо исмли кампир яқинлашди. Унинг невараси анчадан бери касал эди.

— Неваранг қалай?— деб сўрадим кампирдан.

— Омон қолмаса керак, унга сувчечак чиқибди, безгак азоб беряпти. Кечаси билан ўт ёқиб чиқдим, барибир алаҳсираяпти.

— Табибга кўрсатдингми?

— Олиб бордим. Дори берди, аммо кор қилмаяпти. Қеча афсунгар келиб дам солди, тумор қолдирди. Туморни болага тақиб қўйдим.

— Мен унга,— деди қўшни чодирдан чиқиб келган Рупо,— кхирни дараҳти остида ўтирган авлиёнинг гулхани кулларини болага суртган деб айтдим. Бу бўлса ўжарлик қиласпти.

— Уша ёққа ҳам бордим.

— Хўш?

— Авлиё ўзига яқинлаштиrmади, мени тош отиб ҳайдади.

— Ёлғон, у сенга бир ҳовуч кул берди,— деб гапини давом эттириди Рупо. Ичига ботган кўзлари, юзи жопланди.— Авлиё ҳамма сир-асрорларни тушуниб етган, сени синамоқчи бўлди-ю, бироқ сен синовга бардош беролмадинг. Сенга айтган эдим-ку,

<sup>1</sup> Жаракх — алвасти, девлар миниб учадиган афсонавий мавжудот.

<sup>2</sup> Дхоти — эркаклар кийими; у тўғри бурчакли мато бўлиб, белга айлантириб ўралади, кейин оёқлар орасидан ўтказилиб, уни маҳкамланади ёки тананинг юқори қисмига ўралади.

бир сиқим олсанг, бас, деб. Бола касалликни кўрмагандай бўлиб кетарди.

— Ҳой Сукхрам!— деб чақириб қолди Панчу исмли чол. У чилим чекарди.— Сенинг ҳам табиблидан хабаринг бор-ку.

— Бунақа касалларни даволай олмайман. Мен қавариқ, чипқон, шилинган жой, яраларни, унча-мунча таңосил касалликларини даволашни биламан, холос. Ҳамма касални даволаб бўлармиди? Бу тақдир, пешонамизга ёзилганини кўрамиз.

— Жуда аломат бола эди-да,— деб хўрсинди Панчу. У бир неча бор тамаки тутунини ичига тортди, йўталди, дамини ростлаб олгач, савол берди:— Боланинг онаси қани?

— Шўрлик уч кундан бери киприк қоққаний йўқ,— Рупо қайғу билан бош чайқади,— кеча жонидан тўйганидан, ўлиб қолса ҳам майли, бошқасини туғиб оларман дейишгача бориб етди. Ҳўш, болам деб ўзи ўлиб кетиши керакми?

— Бу гапларни алам устида айтган,— Панчу унча ишонқирамади.

— Кечакунинг авлиё қабрига чироқ қўяётганини ўз кўзим билан кўрдим. Ҳозир у қаерда?

— Биронта эррак билан ухлаб ётгандир?— Рамо жаҳл билан пўнфиллади.— Шу ҳолатда ҳам тиниб-тинчимайди, бу суюқ-оёқ. Ҳов ана, судралиб келяпти.

Боланинг онаси, Рупонинг келини ҳорғин, гандираклаб келарди. Тўрт кун ухламаслик уни адойи тамом қилиб қўйганди. У юриб келаётуб ухлаб қоладиганга ўхшарди. Бизга яқинлашгач, келин Рамога саккиз анна узатди, алам билан хўрсинди:

— Топганим шу бўлди. Дадаси қани?

— Ким билсин, бирон жойда қарта ўйнаётгандир.

— Егулик бирон нарса борми?

— Үзим ҳам очман,— кампир тўнфиллади.— Борган жойингда тўйдиришмадими? Кечаси билан қаёкларда сандироқлаб юрдинг?

— Авлиё қабри устида ибодат қилдим, кейин санқиб юриб оз-моз пул ишладим, яна қабр бошига келдим.

— Оч-наҳор ётиб қолаверасанми?— кампир қўлларини бирбирига урди.— Қўзада озгина нўхат бор. Еб олақол. Үзим ей десам тишим ўтмайди. Үғлингдан бир ҳабар ол.

— Қўйсанг-чи уни! Үлиб қолгани маъқул,— деди у изтироб билан, кейин йиғлаб юборди, секин-аста ерга чўкди-да, шу ернинг ўзида ухлаб қолди.

Мен бир оз турдим-да, чодирга қайтдим.

Кажри. чўмилиб бўпти. Покизагина бўлиб, кўзларига сурма тортиб ўтирибди. Қирсам пул санаётган экан. Сочига безак учун чиройли ёғоч тароқ қадабди.

— Йигирма анна,— деди менга пулларни кўрсатиб.— Буни нима қиласиз.

- Менга бер.
  - Сенгами? Йўқ, бермайман. Бирон корга яратарман.
  - Бу қанақаси?
  - Үзимга кофта сотиб оламан.
  - Кофта?
  - Ҳа, башанг, чиройлигидан.
  - Бунинг сенга қандай зарурати бор?
  - Ахир, сен билан бирга бормайманми?
  - Пъярининг ёнигами?
- У жилмайиб, бош ирғади.
- Ҳеч тушунмайман, ясанишнинг нима кераги бор экан?
  - Кечаси ўзинг айтдинг-ку.— У мағрур кулимсиради.— Ясанниб борсам ажойиб бўлади-да! Майли, Пъярини полициячи ясантирган бўлсин, янги кофталарни кийиб борганимда Пъяри буни сенинг совғанг деб билади. Роса жаҳли чиқади-да! Муҳтарам хонимга: «Мен айтмасам ҳам кофтани Сукхрамнинг ўзи олиб келди!»— дейман, майлими?

Мен унга бакрайиб қараб қолдим.

- Нима бало, у билан жанжаллашгани боряпсанми?
- Йўқ, учрашгани.
- Ҳам жанжаллашгани, а?
- Бас, сенга пул нега зарур бўлиб қолди?
- Энди керак эмас,— дедим қўл силтаб.
- Нега?
- Қўлингда йигирма анна, кофта олмоқчисан. Пул ўзингга ҳам етмайди.
- Омад юришса, яна беш рупия бўлади. Пъяри яна уч кун кутиб туролмайдими?
- У бизни бугун кутяпти. Майли, унта Қажри ясанмоқчи экан деб айтавераман.
- Мен учун бир мартагина ёлғон гапирсанг тилинг қуриб қоладими?
- Бўлмаса касал бўлиб қолди дейинми?
- Пъярининг ўзи касал. Нега мен касал бўларканман? Ҳозирча худойим мендан марҳаматини аягани йўқ!
- Унда нима баҳона қиласман?
- Унга айтгинки... Шундай дегин: «Пъяри, Қажри оёғига бўёқ суркатириш учун ёнингга келаётган эди, йўлда айниб қолди... Яна уч-тўрт кундан кейин бўёққа олиб келиш учун кўндиришга уринаман»...
- Қажри!
- Бўпти, бўпти, ҳазиллашдим,— рози бўлди Қажри.— Бўлмаса оёғига тикан кириб кетибди деб қўя қол. Бироқ сен ҳали саволимга жавоб бермадинг.
- Қайси саволингга?

— Сенга пул нега зарур бўлиб қолди?

— Ҳадеб хирадик қилавермагин!

— Ялинаман! Ҳамма пулимни ол, фақат шу хилда қўл силтама.

— Сенга янги кофта келтирамак, Кажри! Ҳозир менга бир рупия бер.

— Ма.— Кажри кафтимга ўн олти анна қўйди.

Мен унга меҳр билан боқдим. Қажрининг юзлари қизариб кетди.

— Рамонинг невараси оғир ётибди,— дедим.— Қампир билан келиннинг ейишга ҳеч вақоси йўқ. Бу пулга улар овқат олишади, болага дори-дармон келтиришади.

Кажри мени ҳайронликда қолдириб, тўсатдан ўзини оёқларим остига ташлади.

— Қандай эркакка эга бўлибман-а? Уни менга тақдирнинг ўзи рўпара қилди! Пъяри сендан кетишига кетибдию унотолмаяпти. Нега шунаقا бўлаётганини билдим. Сен чинакам эркаксан, бағри кенг кўнгилчан одамсан, Сукхрам. Одамлар бир пайса учун бир-бирини бўғизлашга тайёр, бироқ сен уларга ҳеч ҳам ўхшамайсан. Сен ажойиб одамсан, Сукхрам!

Мен уни ўрнидан турғизиб, меҳр билан бошларини силладим.

— Кажри! Дунёмиз бераҳм, бебақо. Энг оғир азият, кулфатлар нуқул камбағаллар бошига тушишини аллақачонлар фахм-лаганман. Узингни бозорга солиб, танангни сотишинг боисини ҳам биламан.

— Шундай қилмаса тирикчилик ўтмайди! Бунга болалигимдан кўнникканман. Бироқ ҳозир бирон-бир киши менга кўнгил қўйишини, хотиним дейишини хоҳлаб қолдим.

— Сен уйда қолавер, Кажри, қишлоқдаги ярмаркага чиқиб, сенга зарур ҳамма нарсани келтираман. Бир-икки қўл қарта ўйнаб, сенга чети олтин хошияли газламага етарли пул ютиб оламан. Эринг туриб кулфат чекишингга на ҳожат? Ўзим келиб сени ясантираман, кейин Пъярининг ёнига борамиз.

— Йўқ, йўқ, Сукхрам! Мен ҳам ярмаркага бораман. Ашула айтаман, рақсга тушаман. Қўлимдан келганича пул топаман. Аммо ўзимни сотмайман.

Мен уни бағримга босдим. Қажрининг кўзларида ёш йил-тиллади.

— Чинакам эркаксан, Курри бунақа эмасди. Нега сен бунчалик яхшисан, Сукхрам? Сенга ўхшаган одамни карнат<sup>1</sup>лар орасида ҳеч учратмаганман.

— Карнатлар!— деб бақирдим.— Мен уларга бегонаман!

<sup>1</sup> Карнат — натлардан ҳам паст турадиган табақа.

— Сен бизнинг уруғдан эмасмисан? — Кажри ҳайрон қолди.  
— Иўқ, онам натни эди, аммо дадам тҳакур бўлган.  
— Шу холосми! — Кажри кулди. — Бизнинг аёллар бунаقا болаларни кўп туқсан! Сени натни туқсан бўлса сен ҳам натсанда!

— Иўқ, Кажри, бу сен ўйлагандай эмас. Кетдик. — Унинг қўлидан ушлаганимча эргаштириб кетдим. Биз сўқмоқдан тиккасига бораидик. Йўлда Мангуни учратдик.

— Ҳой Мангу! — чақирдим уни. — Мановини ол, бу ерда ўн олти анна... Қария Рамога бер. Невараси касал.

Пулни унинг ҳовучига тўкканимда Мангунинг кўзлари чарақлаб кетди.

— Пулларни кампирнинг ўзига бер, бўлмаса оқибати ёмон бўлади!

Мангум баҳайбат қаддини ростлаб гулдиради:

— Қаёқдаги гапларни айтасан·а, Сукхрам! Бу пулларни ўз номимдан берсам розимисан?

— Бу қанақа майнавозчилик? — Кажрининг ғаши келди. — Бу товламачининг гапини қара.

— Шундай қилишингни нима зарурати бор? — қизиқиб сўрадим.

Мангум хижолат бўлди.

— Хотиним ўлган, буни биласан, — деди у, — қария Рамонинг ўғли хотинини уриб азоб беряпти... Хўш, агар бу пулларни ўша аёлга берсам, эҳтимол, меникига кўчиб келармикан...

— Садағаси кетай, сендақа эркакнинг! Бировнинг пулига хотин олиб келмоқчимисан?

Мангум Кажрига ёмон ўқрайди, кейин кўзимга ялинганинамо бокди.

— Майли, сен айтганча бўлсин, Мангум, — розилик бердим. — Ўша аёлга пулларни ўзимники деб бергин. Эҳтимол, омадинг юришиб кетар. Лекин Мангум, бу пулларни Кажридан олганман. Пулни ўша аёлга беришга чин ваъда қил.

— Онт ичаман! — деди Мангум қатъий.

— Билиб қўй, пулнинг ҳаммаси болага сарфлансин!!!

— Бўпти.

Мангум кетди, Кажри менга тикилиб қолди.

— Авалиёга ўҳшаб кетяпсан! — шивирлади у. — Ҳаққингга дуо қиласман. — Кажри кафтларини қулоқларига қўйиб, бармоқларини қисирлатди, бу қилифи билан мендаги ҳамма дард, баҳтисизликларни ўзига олажагиҳи ишора қилди.

— Бўпти, кетдик, — дедим унга.

Кажри итоаткорлик билан эргашди. Катта-катта қадам ташлаб юрганимдан у менга аранг етиб юрарди. Йўл нотекис, тошшагалли эди. Икки чақирим юргач, Кажри ҳансираб қолди, яна

бир чақиримдан кейин менга етиб олиш учун югурди. Пи-  
çoқдай ўткир мовий тошларга тўла қиялик бошланди, тошлар  
оёқларни тиларди. Кажри тоқат қилолмай ерга ўтириб олди.

— Бир оз нафасимни ростлаб олай,— ялинди у,— қаёқса  
шошиласан?

— Кетдик, кетдик,— дедим, қўлидан ушлаб турғизиб қўйдим.

У яна итоаткорлик билан орқамдан эргашди, ортда қолмас-  
ликка интилди.

— Сен эркак кишисан, қадамларинг катта,— деб жавради  
юриб бораркан,— сенга етиб юролмаяпман.

Ниҳоят қиялик тугади. Тепалик бошланди. Тўғри чўққига  
қараб интилардик. Ярим йўлда Кажри бутунлай ҳолдан тойди.

— Ёлбораман, менга раҳминг келсин!— деб қичқирди у.—  
Тиззаларим чақа бўлиб кетди. Ортиқ юролмайман.

Чўққига яқинлашиб қолдик, энди уни рўй-рост кўраётган-  
дик, бироқ шу пайтда Кажри йиқилиб тушди.

— Юролмайман,— деди йиғлагудай бўлиб,— тоғ кичкина  
деб ўйлагандим, унинг баҳайбатлигини қара! Озгина тўхтаб  
тур! Ҳеч қачон бунақа баландга кўтарилмаганман. Охири кўрин-  
маяпти. Яна кўп юрамизми?

— Кетдик, кетдик.— Уни белидан қучиб турғаздим.

Биз яна баландликка интилдик, аммо тоғ тобора тиклашиб  
бораверди. Кажри менга ёпишиб олди. Рафиқам оғзини катта  
очиб оғир нафас оларди, ниҳоят ортиқ тоқат қилолмай тош ус-  
тига ётиб олди.

— Раҳминг келсин!— ингради у.— Бошқа юролмайман.

— Чарчадингми?— меҳрибонлик билан сўрадим, сўнг атроф-  
га назар ташладим. Манзилга етишга ҳали узоқ әди.

Кажри шишиб кетган товоңларини уқалади.

— Оёқларим қўроғиндай оғирлашиб кетди,— шикоят қил-  
ди у,— шунақаям оғрияптики!

Мен унинг ёнига ўтириб чека бошладим.

— Наҳотки чарчамаган бўлсанг?— ҳайрат билан сўра-  
ди у.

— Тоққа чиқишга азалдан ўрганиб қолганман,— дедим оғ-  
зимдан туғун чиқарив.

Шамол кучайиб, совуқ ўзини сезидирди.

— Сукхрам, қара, бирам чиройлики! Пастга, далаларга қа-  
ра, кичкина, кўм-кўк лахтакларга ўхшайди-я! Ўларнинг кички-  
налигини-е! Пастда ҳаммаси каттага ўхшайди, бу ерда бўлса...  
Сукхрам, сен яхшироқ қарагин! Ҳов қара, қўтос юриб кетяпти,  
жудаям кичкина, қўтос эмас, кучукчага ўхшайди!

— Майли, ўрнингдан тур, гапингни бас қил!

— Оёғимни қимирлатолмаяпман.

— Эҳ, сени қара-я, тағин бу ёшмиш!

— Йўқ, йўқ, йўқ! Мен кампирман, кампирман! Ўзинг кетавер. Мени қаёққа олиб кетяпсан?

— Яна учта тепалик қолди.

— Учта?— хитоб қилди Кажри, сўнг ерга ётиб олди.

— Бўлти! Сени орқамга кўтариб оламан.

— Йўғ-ей,— деди Кажри хижолат бўлиб.— Одамлар кўрса нима дейди.

— Пастдан ҳеч ким қарамайди. Ҳов анови дҳо дарахтига қарагин, пастда жудаям кичкина бўлиб турибди, аслида биздан анча баланд.

Кажри елкамга опичди, оёқларини осилтириб, қўллари билан сочимдан ушлади. Мен секин-аста тепага кўтарила бошладим. Кажри бақувватлигимга ҳайрон қолди.

Биринчи тепаликдан ўтгандан кейин:

— Қани, тоф эчкиси, пастга туш!— деб буюрдим.

У ерга сирғалиб тушди-да, кулиб юборди. Кейин жиддийлашиб, бўйнидаги туморни олиб қўлимга тақиб қўйди.

— Нега унақа қиласпсан?

— Туморни онам ўлеми олдидан берганди. «Ўғлингга тақиб қўй, ёмон кўздан асрайди», деганди. Сукхрам, сен жудаям бақувватсан. Ўлганимда сенга ҳеч кимнинг кўзи тегмасин деб буни сенга тақиб қўйяпман.

Туморни диққат билан кўздан кечирдим.

— Ҳали сенга ўғил бўлиб қопман-да?

— Фарзанд кўрганимда туморни сендан олиб унга тақиб қўяман, болаларни жудаям яхши кўраман,— деди Кажри улкан қоя тош соясига жойлашиб ўтиараркан.

— Яна ўтириб олдингми? Кетдик.

— Энди орқангга кўтартмагин, сенга опичмайман. Энгашганингда худди йиқилиб, оғзи-бурним пачоқ бўлаётгандай бўлиб кетяпман. Юрагим чиқиб кетай дейди.

— Мен майдада қадам ташлаб боряпман. Оёқ қўйишдан олдин оёғим остидаги тошнинг маҳкамлигини синаяпман.

— Барибир орқангга опичмайман.

— Бас, ёпиш орқамга!

Кажри оёқ тираб туриб олди, уни сув тўлдирилган мешкобдай даст кўтариб елкамдан оширдим, қўлим билан оёқларини қучоқлаганимча аста тепага кўтарила бошладим. Бу сафар ҳар иккала тепаликни дам олмай босиб ўтдим.

— Сен инсон зотидан эмассан!— ингради елкамда кетаётган Кажри.— Дам олмасдан қандай юриб боряпсан-а? Эҳтиёт бўл, сирғаниб кетмагин! Мени елкангга қоп кўтаргандай кўтариб олибсан, баданим эса зирқираб оғрияпти.

Энг тепага кўтарилиганимда Кажрини ерга қўйдим.

— Воей, адойи тамом қилдинг мени, тентаквой! Жинни бўпсан.

Мен тош устига ҳорғин ўтирдим.

— Кажри,— дедим нафасимни ростлаб олгач,— онт ичіб айтаманки, тошинг ҳам иккі ярим ман<sup>1</sup> бор экан. Шунча юкни эшакка ортса күтариб кетолмасди. Аммо сиртдан қараганда гулбаргидай нозикка ўшайсан.

Кажрининг кўзларида гоҳ қулги, гоҳ ўқинч аломатлари аёп бўлди.

— Етар! Анови лаънати тошлар оёқларимни яра-чақа қилганида мени кўтариб олдинг! Қанақасига вазмин бўларканман? Яхиси ўзингга боқ: гавданг судхўр савдогарникидан қолишмайди. Мен енгилман, ҳамма шунақа дейди.

— Уни қара-я!

Икковимиз ҳам кулиб юбордик.

Кун яримлади. Тоғда йироқ-йироқлардан чўпонларнинг бақириб-чақиргани эшитилди. Қўшни қирлардà ўтлаб юрган сиғирлар кўзга илинар-илинмас оқ доғларга ўхшаб кўринди. Дарахт тагида болалар ўтирас, кимдир сурнай чаларди.

— Оёқларим шунақаям оғридики, чидолмай қолдим,— Кажри шикоят қилди.

Мен унинг ёнига ўтириб, оёқларини тиззам устига олиб уқалай бошладим.

— Нима қиляпсан?— Кажри ловиллаб кетди.— Ўзинг ҳам чарчагансан.

— Мен дам олиб бўлдим.

— Ишқилиб, сени ёмон кўздан асрасин,— деди Кажри. Кейин оёқларимга қўл тегизиб давом этди.— Нега эркакларнинг кучи бунчалик кўп бўлади?

Мен индамай жилмайдим.

— Шунчалик барваста, кучли бўлганинг билан,— Кажри гапдан тўхтамади,— бирорлар сенга буйруқ беришига йўл қўясан. Нега?

— Нега дейсанми? Мана, ўтириб оёқларингни уқалаяпман. Бошқа ким сенга қулдай бўлиб хизмат қилган?

— Гапинг тўғри,— деди Кажри. Кейин анча ўйлаб туриб қўшиб қўйди.— Йичимдагини топ одамсан. Билинтирмай туриб тўғри юракка зарба берасан. Нега мени буёқларга сув тўла мешдай кўтариб олиб келдинг?

Мен шарақлаб кулдим. Кажри сўзида давом этди:

— Дадам онамга, аёл кишини маҳкам тутган эркаккина ҳақиқий эркак. Унинг иши аёл кишини едириб-ичириш, уни соvuқотириб қўймаслик, аммо ширин гаплар айтишдан худо асрасин, акс ҳолда бошингга чиқиб олади. Аёл зоти бамисоли гугурт, чақдингми, ўша заҳотиёқ ўчир. Бўлмаса олов авж олиб,

<sup>1</sup> Ман — 37, 324 килограммга тенг оғирлик ўлчови.

шунақаям кучаядики, эплай ололмай қоласан, деганди. Нега мени маҳкам тутмайсан?

— Кажри, эҳтимол, онанг ўжарроқ бўлгандин. Бордию итим менга садоқат билан хизмат қилса, мени қўриқласа, чодирга кираверишда занжирга боғланмаган ҳолда ўтиrsa, бегоналарга ҳуриса, уни маҳкам ушлаб нима қиламан?

— Топган гапингни қара-я? Яхшиси, даданг кир юувучи эди, бир дунё кирни ювди, мен эса кирчининг ана шу ювилган кирларини ташийдиган эшагиман, дегин.

Биз яна кулиб юбордик.

— Исила тўғри айтган экан! — дедим.

— Нимани?

— У уришқоқ алвастини гап билан тинчтиб бўлмайди, деб айтган.

— Хўш, нима бўпти?

— Бордию ана шунақа алвастига дуч келгундай бўлсам, овора бўлиб бекорга гап қотиб ўтирумайман!

— Мени урасанми? Бу қилингни ҳозирданоқ бошлайпсан.

— Сенга бармоғимни тегиздимми?

— Гап билан уряпсан. Бадандаги кўкарған жойлар эски ҳолига қайтади, аммо кўнгил яраси узоқ азоб беради.

— Бирам маҳмаданасанки! Тилинг тегирмон тошдақа, айланаверади, айланаверади. Уни калта қилиб қўяман!

— Мени мана шу тоғ тепасидан итариб юбориш ниятинг йўқми ишқилиб? — деди Кажри, аммо менга тикилиб жиддийлашди, сўнг:

— Нега мени бу ёққа олиб келдинг? — деб сўради.

Мен ўзим учун мўътабар бўлган қалъага тикилиб қолдим.

У тушки қуёш нурида ярақлаб турарди.

Кажри менга яқинлашди.

— Ўёқда нимани кўриб қолдинг, Сукхрам?

— Сени атайлаб кўрсатгани олиб келганим — қалъани.

— Илойим ўша қалъанинг гиштлари бошингда ордона қолсин! — деб бақирди Кажри. — Товламачи! Мана шу вайронани кўрсатиши учун суякларимни синдиргудай қилдингми? Шу ниятинги олдинроқ айтсанг бўлмасмиди? Бу қалъани юз мартараб кўрганмән, ҳамма князликларни айланиб чиққанман! Сен бўлсанг манови тошларни кўрсатгани мени осмону фалакка олиб чиқибсан! Ақлдан озганинг йўқми, ишқилиб?

— Кажри, сен ҳақсан. Ана шу қалъа ақлимдан оздиряпти.

— Мен-чи?

— Сени ёқтираман. Қалъани ўйлаганимда ҳолим нима кешишини сенга уқтириб беролмайман.

— Айтишларича, унинг ичиди инс-жинслар яшармиш. Дадам айтган эди, у қалъада бўлган. Унинг ичи тун сингари зими-

тон экан. Үшандада тирикчилигимиз зўрға ўтарди, дадам кўҳна биноларни кавлаштиради, бирон-бир нарса топиб олиш ниятида эди. У билан кўпни кўрган бир неча одамлар бирга эди. Қалъада жуда кўп дур-гавҳар тўла ер ости хазиналари бор деб айтишганди. Бироқ одамлар у ёққа боргани қўрқишилади. Бир куни рожанинг ўзи қалъага борган, аммо унинг мулозимлари қўрқишидан қочиб кетишган. Рожа уларни отиб ташлайман деб қўрқитган. Улар бўлса, «инс-жинс қўлида ўлгандан кўра ўқ еб ўлганимиз маъқулроқ», деб бақиришган.

— Кейин нима бўлган? — сабрсизлик билан сўрадим.

— Үшандада дадам куч-қувватига тўлган йигит эди, ҳеч нарсадан қўрқмасди. У онамга қалъага боражагини, баҳтини синаб кўражагини айтган. Онам: «Улиб қолсанг нима бўлади?» деган. «Бир кун эмас бир кун ҳаммамиз ҳам ўламиш,— деган дадам бепарвогина.— Пешонага ёзилган бўлса бугун ўламан». Дадам ҳеч онамнинг гапига кирмаган, бошқа эркаклар ҳам унга эргашишган. Дадам кейинроқ қалъада саройдай катта-катта жуда кўп хоналар борлигини, аммо ниҳоятда қоронгулигини, гувиллаб шамол эсисб туришини ҳикоя қилиб берган.

Ниҳоят эътибор билан қулоқ солаётганимни пайқаган Кажри янада астойдилроқ ҳикоя қила бошлади:

— Дадам ҳеч вақосиз қайтиб келди. Ҳаммалари қаср ичидагузоқ тентирааб юришса ҳам еости омборига кирадиган эшикни топишолмаган: Дастрлабки рожа суд ўтказадиган залда тамаки тўлдирилган трубкалар турар эмиш. Аммо эрталаб келинса кечаси уларни бирор чекиб қўйгандай бўлармиш! — Кажри кўзларини ола-кула қилиб, сирли товушда давом этди:

— Бир сафар сартарошнинг ўғли хазинагача етиб борибди, қанақа қилиб борганини билмайман. У ўша ерда қимматбаҳо тошлар тўда-тўда бўлиб думалаб ётганини, деворларда совуту аслаҳалар осиғлиқ турганини, деворларга милтиқлар суюб-қўйилганини, бироқ ҳаммаёқда думалаб ётган олгин ём билар жуда катта бўлиб, анча-мунча одам кўтара олмаслигини онт ичиб айтди...

Мен Кажрининг қўлидан маҳкам ушладим. У менга ҳайрат билан боқди: қўлларим ҳаяжондан титрарди.

— Кажри! — дедим овозим ўзгариб.

— Сенга нима бўлди? — қўрқиб сўради у.

— Ушаларнинг ҳаммаси меники!

— Меники дейсанми? — ажабланди у. — Эҳтимол, сеники эмасдир, отангникидир?

Унинг ҳазиллашаётганини пайқамай хитоб қилдим:

— Демак, сен ҳаммасини биларкансан-да? Ҳаммасини биласанми? Тўғри, уларнинг ҳаммаси отамники бўлган!

— Отамники ҳам бўлган дегин?

Шу лаҳзада Кажри мени масхара қилаётганини фаҳмлаб қолдим.

— Кажри, ёлғон гапираётганим йўқ,— дедим қизишиб.— Мен шу қалъанинг ҳақиқий эгалари бўлган тҳакурлар зотиданман. Ҳозир унинг эгаси мен. Дадам, бобом, бобомнинг дадаси, унинг онаси — ҳаммалари қалъага бошқатдан эга бўлишни орзу қилишган, ахир бир вақтлар у бизники эди-да. Ёвуз тақдир ундан бенасиб қилди.

Кажри гапимни охиригача эшитмай шарақлаб кула бошлади. Кулги атрофдаги тоғларда акс-садо берди. Мен қовоғимни, солдим, унинг кулгиси юрагимни тилка-пора қилди.

— Ишонмаяпсанми?

— Ҳеч ҳам!— Кажри «Туя қўтос шоҳида рақс тушганда» деган қувноқ қўшиқни бошлади. У қаҳ-қаҳ уриб кулди, кейин сўзлар ўрнини алмаштириб яна куйлади: «Қўтос туя шоҳида рақс тушганда...»

— Кажри!— ғазаб билан уни қўшиқ айтишдан тўхтатдим.

— Нима буюрадилар?— масхарабозга хос тавозе билан таъзим қилди у.— Улуғ шоҳаншоҳим, чўринг қаршингда тиз чўкиб турибди, буюр, чивиннинг кўзини ўйиб, сенга келтириб бераман.

Дилим оғриди, аммо у ҳамон тинчимасди:

— О, менинг ёғ ташувчи севгилим!<sup>1</sup> Бугун шаҳона зиёфат тайёрладинг!— Кажри яна хурсанд бўлиб кулди, кейин қўшиқ бошлади:— «Сен менинг подшоҳим, мен эса маликанг, сен ҳам чўлоқ, мен ҳам чўлоқ...»— Кажри бир қўшиқни тугатиб, бошқасини бошлади, музикага мос оҳангда бўқсаларини ўйнатиб рақсга тушиб кетди:

Кичик хотин оёғида қўнғироғи жиринглар, 6,5  
Тунда эри бағрида дилим ёқиб ҳиринглар.

Кажри рақс орқали кундоши эри ёнига пусиб боришини ўҳшатиб тасвиirlади, кейин одобдан ташқари хатти-ҳаракатлар қила бошлади. Мен ночор ғазаб алангасида ёниб, ўндан тескари ўгирилиб олдим, лекин у яна кўз олдимда қорин ва бўқсаларини ўйнатиб намоён бўларди. У атрофимда парвонадай айланар, аллақандай шўх, ўйноқи қўшиқларни айтарди.

Менинг кўзларимда ёш филқиллади.

— Йиғлајапсанми?— ўзини йўқотиб ҳайрон бўлиб сўради у. Индамай турганимни кўриб, менга нима бўлганини суриштиришга киришди.

— Ҳеч нима?— дедим секин, кейин тескари ўгирилдим.

<sup>1</sup> О, менинг ёғ ташувчи севгилим— бу ҳинду фольклоридаги персонажлардан бири Тели бўлиб, у ниҳоятда топқир, қувноқ, ғам нималигини билмайдиган одам.

Кажри қўлларимдан ушлаб, кўзларимга меҳр билан тикилди.

— Менга айтганларингнинг ҳаммаси ростми?

— Рост, Кажри.

— Номимни тилга олиб онт ичгин-чи!

— Кажри, онт ичиб айтаманки, рост!

Кажрининг кўзларида қўрқув шарпаси кўринди.

— Демак, сен—рожа!

— Йўқ, мен улар зотиданман.

У индамай ерга ўтириб қолди, бу янгилик уни гангитиб қўйган эди. Мен унга тҳакурани воқеасини оқизмай-томизмай айтиб бердим. Кажри бўлса даҳанини тиззасига қўйганича мендан кўз узмай қулоқ соларди. Ҳикоямни тугатсан ҳам у ҳамон ўша ҳолатда қимиirlамай ўтиради.

— Нега ўй суриб қолдинг?— сўрадим ундан.

— Дунёда нималар бўлмайди — чиндан ҳам рожа бўлиб қолсанг, мени унутиб юборасан.

— Нега бунаقا ўйларга борасан?

— Унда тҳакурани ўрнингни безаб ётади. Сен бўлсанг: «Анови расво натнинг менга нима кераги бор?» дейсан.

— Мен ҳали рожа бўлганим йўқ-ку?— дедим кулиб.— Нега бунчалик қўрқиб кетдинг?

— Одамлар ҳаммасига доим аёллар айбдор дейишади. Ҳамма шундай деб ўйлади. Ким ўз тақдирини билиди дейсан? Қўшини тоғдаги ҳов анови жажжи тўгарак павильонни кўряпсанми?

— Хўш?

— Кимники у?

— Аллақандай авлиё дарвишники.

— Йўқ, бу натни шарафига қурилган павильон.

— Натни дейсанми?

— Ҳа. Ўша аёл икки тоғ оралиғига арқон тортган. Рожа унга: «Арқондан юриб, нариги тоққа ўтсанг яrim бойлигимни бераман», деган.

— Хўш, ўтолганми?

— Натни арқоннинг қоқ ярмига борган, шунда, пул тўлар-канман шекилли, деб рожа қўрқиб кетган. Унинг ишораси билан мулоzимлари арқони кесиб юборишади. Натни қулаб тушган, ўша заҳоти ўлган. Унинг хотирасига шу павильон тикланган.

— Рожа ваъдасини бузибди-я!

— У рожа бўлган-да. Сен ҳам ваъдангни бузишинг мумкин.

— Унингни ўчир, тентак хотин!

— Қозонга яқин юрсанг қораси юқар, ёмонга яқин юрсанг балоси юқар, деб шуни айтадилар-да.

— Ҳар иккала тоғ оралиғи камида икки чақирим келади,— дедим сұхбат мавзусини ўзгартыриш учун.— Шунча узун арқон қаердан топила қолдийкин?

— Ана холос! Топган галини қаранг! Рожанинг ҳузурига сенға ўшаган бир доно үйгит келиб, етти ярусли қудуққа<sup>1</sup> күзи тушибди, кейин савол берібди: «Бу қудуқни қандай кавлашган?» Тұқувчининг хотини: «Қудуқни томдан ҳовли ўртасига тушпришган бўлишса керак», деб жавоб берібди.— Қажри кулди.— Рожа учун иложи йўқ нарса бўлармиди?

Унга нима дейишимни билмай қолдим.

— Сукхрам,— деб чақириди Қажри.

— Нима?

— Рожанинг пули кўп бўлганми?

— Ха, жуда кўп бўлган.

— Бўлмаса, қалъага кетдик. Ер ости уйларига тушамиз. Эҳтимол, хазина топиб олармиз.

Унинг сўзлари бошимни айлантириб қўйди, ўйга толдим. Ким билсин, эҳтимол, парвардигор мени Қажрининг тили билан ўша ёққа чақираётгандир? Бўлмаса нега шунаقا фикр калламга олдинроқ келмаган? Шу заҳотиёқ Хонумонга соғ олтиндан маржон аташга аҳд қилдим, муқаддас волидамиз Қайлavariga<sup>2</sup> қимматбаҳо тошлардан безак назр элтишга, худо Шива ибодатхонасидағи қаландарларга бир қоп ун беришга қасамёд қилдим. Анча енгиллашдим. Тўсатдан чина-камига рожа бўлиб қолгандай бўлдим. Энди қўшин тўплаб, душманларимнинг додини бераман!

— Қажри,— дедим тантанавор.— Сени ҳам, Пъярини ҳам зарга кўмид ташлайман.

— Пъярини ҳам ўзинг билан олиб борасанми?

— Айтгандай, уни кўрарга кўзинг йўқ-а.

— У менинг чўрим бўлишини ўзинг айтгансан-ку. Нега энди икковимизни тенглаштирасан?

Мен кулиб юбордим.

— Бўпти, Қажри, уйга кетайлик, қорним очди.

Пастга туша бошладик. Қажри қоқиниб, пастга сирғаниб кетди. Лекин қўлидан ушлаб қолишга улгурдим.

— Шошилма,— дедим насиҳатомуз.— Қаерга оёқ қўйишингни билиб ол. Бордию тош жилиб кетса, сени ҳам судраб кетади, пастга ундан олдин думалаб тушасан.

<sup>1</sup> Етти ярусли қудуқ — погоналари юқорига кенгайиб борадиган қалъа ичидағи ҳовуз.

<sup>2</sup> Қайлavar — худо Шиванинг хотини, маъбуда Калининг номларидан бири.

Нишоб йўлга икки баравар оз вақт кетди, биз чодиримиз олдидан чиқдик.

Рамо билан унинг келинининг йигисини эшитиб, бола ўлганлигини пайқадик. Бу ҳол бизни донг қотириб қўйди. Бола жудаям шўх, ширин эди, унинг шўхлигию қўнгироқдай кулгиларига кўникиб қолгандик. У севинчи ичига сифмай шовқинсурон билан бароқ Бхурага миниб оларди, унинг ўйинларини завқ билан томоша қилардик. Бхура унга кўп марта ириллаган, аммо у болани ранжитиш мумкин эмаслигини биларди шекилли. Ҳозир Бхура тумшуғини осмонга кўтариб ғингшибувиллар, маъноли кўзларида ёш йилтилларди.

— Ўлиб қолдими? — сўрадим Мангудан.

— Ҳа.

— Пулларни бердингми? — қизиқсинди Қажри.

— Мангуд ёрдам қўлинни чўзди, тўрт анна берди, — деди Рамо. — Бу пуллар бизга жуда асқотди-да.

— Мангуд! — қичқирдим. — Сенга бир рупия бергандим-ку!

Мангуд хижолат бўлди, боланинг жасади ёнида ўтирган иккала аёл сергакланишиди.

— Менга бир рупия қарз бергансан, тўғрими? — деди Мангуд ўзини анча эркин тутиб. — Пулингни қайтариб бераман, уни қанақа қилиб сарфлашим билан ишинг бўлмасин!

— Мангуд! Қабиҳ, ифлос одам экансан! — дедим мен.

— Ўгри мушукка ўҳшаб нега тиржаясан? — Қажри ҳам ҳужумга ўтди. — Боланинг ҳақига хиёнат қилибсан, энди онасининг юзига қандоқ қарайсан?

— Турқинг қурсин, ифлос! — қичқирди боланинг онаси ўрнидан қўзғалиб. — Бизни алдабсан-да! Мана, сенга! — чақа-тангаларни Мангунинг юзига отди.

Мангуд пулларни йиғишириб нари кетди. Фазабим ниҳоятда қайнади. Уни қувиб етиб, елкасидан ушладим.

— Қаёққа кетяпсан, абллаҳ? Пулларни даданг ишлаб топгандай бемалол олиб кетяпсан-а?

Мангуд ўзини зўравонлардан бири деб биларди. У қўлларимни елкасидан силтаб олиб ташлади, кейин нафратланиб гап қотди:

— Йўқ, пулларни дадам эмас, танини сотиб хотининг топган, — у Қажри томон имо қилди.

Қажри ғазабга минган урғочи шердай Мангуга ташланди, унинг юзларига тирноқларини ботириб юмдалади. Мангуд Қажрини бир урган эди, у ерга йиқилди. Шунда дилозорга мен ҳам отилдим. Икковимиз олиша-олиша ерга юмаладик. Рамо билан келини дод солишиди. Эркаклар югуриб кела бошлишиди. Биз эса ҳамон ерда думалашар, бир-бirimизга омонсиз мушт туширас әдик. Фазабдан ақлим туманлашиб ҳеч нарсани тушунмасдим.

Кажри кучимга ишонгани учун ўрнашиброқ ўтириб олиб, Мангуни ҳақорат қила бошлади.

— Манови ярамасни қаранглар! Бу ифлос менга қўл кўтарди! Шошмай тур ҳали! Ҳозир эрим дабдалангни чиқариб ташлайди.

Мангуни онаси қўлларини силкитиб Кажрига ташланди.

— Ановининг хотини, полициячининг ўйнашини орқа қилиб бизга пўписа қиляпсан-да!

— Йўқол қўзимдан, қари алвости!— Кажри тиржайди, шу лаҳзада у жаҳлга миниб бақираётган маймунга ўхшаб кетди.

Шу пайт Мангуд оёғимни маҳкам тишлади. Оғриқ зўридан бақириб юбордим, бор кучимни тўплаб, Мангуни бошим узра баланд кўтариб, ерга урдим. Мангуд инграб ҳушидан кетди. Онаси дод-вой билан ўзини чўзилиб ётган боласи гавдаси устига ташлади.

Кажри чопқиллаб келиб, мени қучоқлаб олди. Кўйлакларим парча-парча бўлиб йиртилиб кетганди. Кажри чанг-чунгимни қоқди. Уни бағримга босганимча чодирга кирдим. Оёғимда Мангунинг тўртта тиши ботган жойдан қон оқарди. Кажри сув келтириб оёқларимни ювди. Чодир ёнида ўсаётган дарахт шоҳларидан синдириб, эзғиладим, ширасини ярамга томиздим, кейин овқатланишга ўтиредим. Кажри ҳам тамадди қила бошлади. Биз индамай овқатландик. Мен чўзилдим. Кажри кираверишга ўтириб олиб соchlарини ёзди, унга ёғ сурта бошлади, мен ўша заҳоти ухлаб қолдим.

Ўйғонганимда оёғимдаги оғриқдан асар ҳам қолмаганди.

— Уни кўтариб, бошинг устида айлантирганингда қўрқиб кетдим,— деди Кажри.— Эй худойим-е! Қараб турғанларнинг кўзи қинидан чиқиб кетай деди. Бу Мангуд дегани ҳамманинг меъдасига текканди. Қишлоқ четида қиморхона очишганидан хабаринг бор. Мангуд ўша ердан полиция бошлиғига чўтал келтириб беради, шу важдан керилиб юради.

— Уни бир ёқлик қиласман!

— Воей, қўрқаман!

— Нимадан қўрқасан?

— Сукхрам, у уччиға чиққан қотил-ку.

— Бўлса, бўлар, унинг бошига етаман.

— Сен ҳам бирорни ўлдира олсанми?— Кажри кулди.

— Ичак-чавағингни ағдариб ташлайман, бузуқи!— деб унинг елкасига шапиллатиб урдим.

Кажрининг кўзлари ёшланди. Аччиқ устида қаттиқроқ уриб қўйдим шекилли.

Кажри ёнидан ханжар чиқарди.

— Қани, сен ҳам ханжарингни чиқар, нимага қодирлигими ни кўрсатиб қўяй.

— Ҳой, хотин, сенга пичоқ кўтарадиган бўлсам жонимдан ташвишим йўқ.

— Бунга ишончинг комилми? Қани, ўзингни ҳимоя қил!

Қажри ханжар отди. Мен ирғиб, аранг чап беришга улгурдим. Ханжар зарб билан, нишонга аниқ отилган эди. Текканда адабимни еган бўлардим.

— Қалай, тушундингми? — Қажри ғолибона сўз қотди.— Эркаклар ҳам маймунлардан кўра яхшироқ иргишлишини кўриб турибман!

Мен уни ушлаб, Мангу сингари бошим узра баланд кўтардим.

— Эй, худойим! — Қажри ёлвора бошлади.— Раҳминг келсин! Сукхрам, оёқларинг остига йиқиламан! Ялинаман! Раҳм қилигин! Итоаткор чўрингман!

Уни ерга қўйдим.

— Қўтоснинг ўзисан-а. Кучинг тўлиб-тошиб ётибди-я!

— Яна тилга кирдингми?

— Қўлларинг бақувват, уларни ишга соляпсан, менинг қуролим — тилим!

Мен яна кулиб юбордим, Қажри жилмайди.

— Эҳтиёт бўл, кечаси Мангу изингдан тушади.

— Дабдаласини чиқариб ташлайман.

— Бордию қоронғидан туриб сенга ханжар отса-чи?

— Мен ҳам чўнтағимда ширин кулча кўтариб юрмасман.

— Оёқларинг тагига йиқилиб ялинаман, қулоқ сол менга.

— Майли, гапир.

У шивирлади:

— Уни турмага қаматтириб қўй. У илгари икки марта қамалган. Полициячиларга айтсанг бас, дарров қамаб қўйишади.

— Йўқ, Қажри, бунаقا йўл тутмайман.

— Бўлмаса ўзим бораман! Сени деб Пъярининг оёқларига йиқиламан. У Мангуни қамашга Рустамхонни кўндиради.

Назаримда ақлдан озайтгандай эдим, ўз қулоқларимга ишонмадим. Қажрини кўтариб қўзларига астойдил тикилдим:

— Қажри! Наҳотки мени шунчалар яхши кўрсанг?

— Мен бўладиган ишни гапиряпман, сен бўлса ёш боладай алланималарни чулдираяпсан. Участкага бориб шу воқеаларни айтиш керак деялман сенга!

— Йўқ, Қажри. Мангу қабиладошимиз. Бизда ким ҳам адашмайди? Хўш, нима бўлти, озгина муштлашдик, бу эркакларнинг кўнгилхуши. Ҳаммаси тинчид кетди. Унга душманлигим йўқ. Мангуни эса уйлантириш керак, унга аёл киши жуда зарур.

Тўсатдан оstonада Мангу пайдо бўлди. У эшик орқасида туриб ҳамма гапларимизни эшитган экан. Қўлида ханжар яр-

қираб турибди. У ханжарни бир четга улоқтириб, оёқларим тагига йиқилди.

Мен уни кўксимга босдим.

— Мангур! — дедим.— Икковимиз ҳам жуда кучлимиз. Аммо муштлашишда кучимизни беҳудага сарфляпмиз.

Кажри ҳайратдан қотиб қолди. Остонада яна бир неча натлар уймаланишиб туришибди. Кимдир ишонқирамай:

— Мангу сендан узр сўрадими? — деб сўради.

Мен чодирдан чиқдим.

— Хўш, у мени ўлдиргани келганмиди?

— Бўлмасам-чи, Мангу сени бир ёқлик қилмоқчийди.

— Эшитяспанми, Кажри? Мангу ҳақиқий йигит! У ҳалол йўл тутди.

Натлар атрофда индамай туришарди.

— Мангу — дўстим,— деб мурожаат қилдим одамларга, унинг қўлини яна бир бор қисдим,— орамизда адоват йўқ.

— Мен у билан орани очиқ қилиш учун келгандим, аммо Сукхрам шер сингари ҳимматли йигит экан. Унинг гапларини умрбод унутмайман. Сукхрам ҳақиқий эркак,— деди Мангу.

Натлар тарқашди, улар билан бирга Мангу ҳам кетди. Кажри билан ёлғиз қолдим. Чодирга кириб каравотга чўзилдим. Кажри кўзани кўтариб сувга кетди. Кўп ўтмай у хурсанд бўлиб билан қўлида сув, билан қўлида бедана кўтариб келди.

## 12

Сукхрам давом этди:

— Эрталаб томоша кўрсатиш учун зарур анжомларни олиб, Кажри ҳамда табордан иккита йигитни эргаштириб, қўшини қишлоқдаги ярмаркага йўл олдик.

Томошабинлар биздан мамнун бўлишди, аммо Кажрининг рақслари томошабинларни бутунлай ром этиб қўйди. У давра бўйлаб бўкса ва қорнини ўйнатиб айланганда томошабинлар завқланганидан анграйиб қолишли. Эркакларнинг қийғос хурсанд бўлиши учун Кажри жат<sup>1</sup> табақаси аёлларининг рақсига ўйнаб берди.

— Бунинг қилиғини қаранг-а? — жатни<sup>2</sup>лардан бири рўмоғининг учидаги юзини шарм-ҳаё билан яшираркан қаҳр билан сўз қотди.— Сендақа мегажинни қара-я!

— Сен бўлса бирордан қолган сарқитсан! — деб гап қайтарди Кажри, кейин яна бир куракда турмайдиган гапни айтганди аёллар уялганидан қизарип кетишли, эркаклар эса хахолаб кулишли. Қишлоқнинг олифта йигитлари қўлларида пул

<sup>1</sup> Жатлар табақаси — Шимолий Хиндистондаги деҳқонлар табақаси бўлиб, ҳарбийларнинг иккинчи гуруҳига мансуб.

<sup>2</sup> Жатни — жатлар табақаси аёли.

билин Кажрини имлаб чақиришарди. Ниҳоят Кажри уларга яқинлашди, қўлларини чўзиб, ашула айтди. Бу шунаقا қўшиқ эдики, ҳатто йигитлар ҳам уялишиб кетишиди. Кажри бамайлихотир уларнинг қўлидаги пулларини олиб, менга келтириб берди.

Томошадан кейин ярмаркани айландик. Кейин дум-думалоқ ёғли булочкалар, нўхат солинган пирожкалар едик.

— Нукти егим келяпти,— деб қолди Кажри.

Топ-тоза, доғ қилинган ёғда қовурилган, хамирдан пиширилган ширин бўғирсоқсимон нуктилардан ҳам едик. Кажри жудаям хурсанд эди.

— Қанча пул ишлабмиз?— шивирлаб сўради у.

— Үн тўрт рупия, Кажри.

— Парвардигор ибодатларимни қабул қилибди.

— Кетдик, сенга янги кийим оламиз.

— Фақат ўзинг танлагин, бўптими?

— Йўқ, дидингга мосини ўзинг танла.

Ердамчиларимга овқатланиш учун бир рупиядан бердим. Улар анжомларимизни йиғишириб, таборга қайтишиди. Кажри икковимиз дўконлар томон юрдик.

— Ҳой савдогар, яхшироқ пешбандларингдан кўрсатгин,— дедим дўкондорга.

У бизни дўконига таклиф қилди, дўконидаги кўк, сариқ, қора рангдаги пешбандларни олдимишга ёзиб ташлади.

Биз сариқ ранглисини танлаб олдик. Кейин чит юбка билан ипакли кофта харид қилдик.

Қош қорайди. Ярмарка ёпилди. Биз қишлоқ майдонини кесиб ўтиб, таборга йўл олдик. Тўсатдан ердан ўсиб чиққандай қаршимизда кўхна қалъя намоён бўлди. Биз донг қотганимизча тўхтаб қолдик, қалъадан кўзимизни узолмадик. Ботаётган қуёш нурида у жуда яқинда тургандай туюлди.

— Кажри!— шивирладим.— Кажри! Кетдик!

Ёпирилиб келаётган оқшом қоронғусида йўлга тушдик. Қалъа ярим вайронга, кўп жойлари қуриб битирилмаган эди. Уни ҳеч ким ҳеч қачон бекитиб қўйишга, охиригача битказишига қўл урмаган. Кажри икковимиз боғдан ўтиб, қалин бутазор ичига кириб қолдик. Йўл кўринмасди, чироқ олмаган эканмиз.

Ярмаркага қайтиб, таниш дўкондордан керосин, машъала учун латта-путта харид қилдик. Сўнг бақувватгина таёқни силлиқладим.

Гугурт олиб, яна йўлга тушдик. Яқин ўргтада кўл шовулларди.

Шунаقاам сукунат тушдик, ҳатто ўзим ҳам қўрқиб кетдим. Аммо қатъиятим зўр, безгак тутаётгандек баданим қизи-

ган эди. Бир қўлимга ханжар, бошқасига ёниб турган машъалани ушлаб олдим.

— Кажри, сен ҳам машъала ушлаб ол.

Кажри машъалани баланд кўтариб юрди, мен унинг белидан қучоқлаб олдим. Бу уни анча дадиллантирди.

— Мана шу ерда ҳовуз бўлиши керак, унинг ёнида ер остига йўл бор. Отам шундай деганди,— шивирлади Кажри.

Биз анчагача буталар орасида адашиб юрдик, ниҳоят жажигина Шива ибодатхонаси орқасидаги ҳовузни топиб олдик. Тарвақайлаб ўсан тамарҳинд дараҳти ҳовузни ҳар томондан қуршаб олган экан. Ҳовузнинг бир томонида пиёдалар ўтадиган кичик кўприк, бошқа томонида пастга тушиб кетган тош зинапоялар бор эди, милтиллаб турган машъала ёруғида чапда турган қаршимиздаги учта эшикка кўзимиз тушди.

— Бу ерда чанқоқ бостирадиган сув шарафига байрам ўтказишади, — уқтириди Кажри.

— Ўзим ҳам биламан,— тўнғилладим мен.

— Аммо отам билгандарининг ҳаммасини билмайсан да.

— У сенга яна нималарни айтган эди?

— Ой тўлганда бу ерга жинлар келаркан.

Мен енгил нафас олдим. Осмонда янги чиққан ой ўроғи сузарди.

— Қудуқнинг ёнгинасида,— деб давом этди Кажри,— махарожа<sup>1</sup>нинг мақбараси бор. У ҳар куни кечаси шу ерга келади. Аммо махарож сенга тегмайди, ахир, у сенинг бобонг-да.

— Тўғри, Кажри. Махарож бизга йўл кўрсатади.

— Анови ерга бўлса қоплонлар келишади,— деб Кажри қўлидаги машъала билан ўрмон томонга ишора қилди.

Унинг ранги оқариб кетганини пайқадим. Уни маҳкам қулоқлаб, юзимни пешоналарига ишқадим. У тинчили, аммо ҳовуз томондан қўнғироқ товуши эшитилди. Икковимиз ҳам сесканиб кетдик, Қоронғилик бу товушга ха-холаб акс-садо берди.

— Уша ёқда кимdir яшириниб ўтирибди. Одамларнинг айтишича, ҳовузга гужорлар табақасидан бир аёл чўкиб кетган экан. Ушандан бери у бу ерларни тарк этмасмиш.— Қўрқувдан Кажрининг товуши қалтираб кетди.

— Қўрқма,— далда бердим унга.— Қўлимизда машъала бор, ҳеч кимдан қўрқмаймиз. Машъалани бер, яна қўрққанингдан ерга ташлаб юбормагин.

Кажрининг қўлидан машъалани олдим, у иккала қўли билан бўйнимга осилиб, менга маҳкамроқ ёпишиб олди.

<sup>1</sup> Махарож—(«Улуроғро жа») зодагон кишиларга ҳурмат юзасидан шундай мурожаат қилинади.

Йўлда давом этдик.

Кажри қоронгуликка астойдил тикилиб туриб тўсатдан ба-  
қириб юборди:

— Ана, қарагин, ана ўша хотин!

Даҳшатдан Кажрининг пешонасидан тер чиқиб кетганини  
ҳис қилдим. Чиндан ҳам устунлар ортидан бизга бир жуфт  
сариқ кўз тикилиб туарди.

Кажри калима ўгира бошлади.

Бироқ кўз ғойиб бўлмади. У ҳамон бизга яқинлашарди. Шу  
лаҳзада устун орқасидаги ўғри мушук қочиб қолди.

— Мушук экан,— деб Кажри енгил нафас олди,— қочиб  
кетди, худога шукур.

Мен охирида сув ялтираб турган зиналардан пастга туша  
бошладим. Яна бола йиглагандай нимадир қулоқни қоматга  
келтириб қичқирди. Кейин баҳайбат қуш тепага кўтарилиди,  
унинг қудратли қанотлари шовқин билан ҳавони кесди. Сўнг  
худди бизга қараб келаётгандай пастга шўнғиди. Кажри қўрқ-  
қанидан чинқириб юборди. Аммо қуш ёнгинамиздан ўтди-да,  
кўздан ғойиб бўлди.

Биз йўлда давом этдик. Кажри менга шунақаям маҳкам  
ёпишиб олдики, юраги қандай ураётганини сезиб туардим. Ур-  
мондан тунги овга чиққан йиртқич ҳайвонлар ўкириги эшишил-  
ди, қишлоқда итлар вовиллаб уларга жавоб қайтарди. Мен  
Кажрининг даҳшатдан олайиб кетган кўзларига қарадим. Унга  
далда бериш керак.

— Мени номаълумлик қўрқитяпти,— деди у.— Сени **нина**  
кутаётганини билсанг унчалик қўрқинчли бўлмайди.

— Кажри, отанг шер сингари қўрқмас, ботир одам эди, на-  
ҳотки қизи отасига муносиб бўлмаса?

Шу пайт йироқдан қоплоннинг ўкириги эшишилди. Кажри  
даҳшатдан ўзини бутунлай йўқотиб қўйди.

— Қоплон узоқда,— тинчлантиридим уни.— Жонивор **кўяга**  
сув ичгани келибди. У йироқда.

Отам қоплонлар билан олишиб ҳалок бўлган. Шу боисдан  
бу йиртқич ҳайвонларни кўргани кўзим йўқ. Отам учун улар-  
дан шунақаям қасд олгим келадики! Юрагим дукиллаб қат-  
тиқ урди, олдинга дадил интилдим. Кажри ҳам бир оз дади-  
лашди. Кўп ўтмай қоронғида зўрга кўриниб турган кичикроқ  
эшикка яқинлашдик. Машъалани кўтардим. Эшик ўргимчак  
уя босган хонага бошларди. Хона ичидан димоқقا бўғиқ **нам**  
ҳаво урилди. Эшикдан эҳтиёткорлик билан қисилиб ўтдим.  
Кажрини ҳам кўтариб олгандим, ҳозир бирон кимсанинг бизга  
кўзи тушса аллақандай тўрт оёқли маҳлуқ ҳаракат қиляти  
деб ўйлаши мумкин. Аммо шуниси қизиқ, фалати эдикি, Каж-  
ри қўрққан сари мен ботирланиб, дадиллашиб борардим. У

муштипар аёл, уни яхши кўраман. Мени шу ерда ушлаб турган кимса Кажри эди. Агар у бўлмаганида мен аллақачон қочиб кетган бўлар эдим.

Хонага қирдик, бошимиз узра бир гала кўршапалаклар чарх урди. Улар устимизда бир оз учгач, дарҳол эшик орқали ташқарига отилишди.

— Бу ер дим экан,— шикоят қилди Кажри.

Биз бир текис плита ётқизилган кейинги хонага қирдик.

— Орқага қайт, бу ерда фақат битта эшик бор экан, нариги ёқقا йўл йўқ,— деди Кажри.

Бироқ мен жойимдан қимиrlамадим, машъалани баландроқ кўтардим. Ёруғда пастга тушиб кетган зинапояга кўзим тушди.

— Кажри!— дедим ҳаяжонланиб.— Кўряпсанми?

— Кўрдим, зинапоя!

— Пастга тушайлик.

— Йўқ, йўқ, орқага, тоза ҳавога чиқайлик. Сукхрам, сенга рожа бўлишнинг нима кераги бор? Натларнинг тирикчилиги ҳам ёмон эмас-ку.

— Жим бўл! Ҳозир авлодларим руҳи мен билан, сен ҳам мен билан.

— Бошим осмонга етганда ҳам натниман, авлодларинг мендан аччиқланишади. Сен бўлса тҳакур.

— Эшитмаганмисан, Ганг дарёси сувида, қуёш нурида ва аёлларда насл-насаб деган нарса бўлмайди. Шу нарсалар ҳаммага тегишилдири. Шу боисдан аёллар ҳамма билан тенг ҳуқуқлидир. Тҳакур учун ер билан аёл ўртасида фарқ йўқ.

Пастга туша бошладик. Зина тобора торайиб борди. Кажри орқамдан келарди. Ниҳоят зинанинг охирги пояси кенг майдончага туташди. Шу пайт Кажри қўрққанидан чинқириб юборди. Қўрқувдан ҳиқиқоқ тутиб, иккала қўли билан менга маҳкам ёпишиб олди. Мен машъалани баландроқ кўтардиму сесканиб кетдим: рўпарамда скелет тебраниб турарди.

— Кимсан?— дедим зўрга.

Скелет индамади, бироқ инсон товуши Кажрини дадиллантириди. Машъалани яқинроқ олиб бордим. Скелет эшик ромига боғланган арқонда осилиб турарди. Кажрига ўгирилдим.

— Қўрқма, бу скелет, инс-жинс эмас,— ханжар билан бир урган эдим, суяклар бўғиқ товуш билан полга тўкилди, ханжар бўлса бўшлиққа қараб кетди. Эҳтимол, скелет бу ерда азалдан осиғлиқ тургандир.

— Қаёққа келиб қолдик,— зорланди Кажри.— Ҳатто дадам ҳам бу зинапоя хусусида ҳеч нима демаганди.

Бу гапларни эшишиб севиниб кетдим, уни ханжар ушлаган

қўлим билан қучоқладим, лабларидан ўпдим. Кажри кулим-сиради.

— Кажри! Демак, даданг хазинагача етиб бормаган эканда? Ҳечқиси йўқ. Биз тўғри йўлдан кетяпмиз.

— Тўғрию, аммо хазинага кирадиган жойни даҳшатли жин қўриқлаб тураркан! Бордию у қурбонлик талаб қилиб қолсанчи?

— Ўзимни қурбон қиласман, Кажри. Авлодларим қонимга ташна бўлса, уни беришга шайман!

— Ўйлаб топган гапингни қара-я! Сен ўзингни қурбон қиласан, мен эса қўрқувдан ўласман. Йўқ, мен ўзимни қурбон қиласман, сен эса рожа бўласан, бу мен учун улуф мукофот!

— Йўқ, Кажри,— дедим тўсатдан.— Менга бунаقا ҳокимлик керак эмас. Рожа бўлишини ҳам хоҳламайман. Менга фақат сенинг ўзинг, ўзинг кераксан!

Кажри қўрқувни бутунлай унугтиб юборди. Биринчи маротаба уятни бир ёққа йиғишириб қўйиб, лабимдан тўйиб қайнок бўса олди.

— Сенга ёқаманми?— нафасини ростлаб сўради.

— Жудаям ёқасан. Пъяридан ҳам ортиқ ёқасан.

Кажрини ҳаяжондан титроқ босди.

— Шу гапларинг ростми?— ўз қулоқларига ишонмай сўради у.

— Рост, Кажри.

— Бу ерда нима қилиб турибмиз?

— Анови суюкларни бир чеккага улоқтири, олдинга интилайлик.

Ҳайратдан ёқа ушладим. Кажрининг дадиллиги мени ром этган эди. Пъяри мени севарди, аммо ҳеч қачон ўз фойдасини унумасди. Кажри эса фақат меникигина эди, бошқа ҳеч нарсани орзу қилмасди. Уларнинг қалби бошқа-бошқа эканлиги-га ҳозир тушуниб етдим.

Арқонинг қолганини ҳам кесиб ташладим, суюкларни четроққа сурдим, йўлда давом этдик. Кўп ўтмай узун коридорга кириб қолдик. Шипдан чакиллаб сув томарди.

— Кажри, тепамизда кўл борга ўхшайди. Сув шовилляяпти, эшитяпсанми?

— Ҳа.

Чапга бурилиб, яна бир эшикка дуч келдик. Ичкарига қадам босишим билан нақд бошимни нишонга олиб турган милтиқча кўзим тушди. Ўзимни орқага олдим, Кажрини ҳам туртиб юбордим, кейин машъалани аста кўтардим: рўпарамда бўйим тенги чорпоя устида милтиқ турарди. Чорпояни суреб, кенг залга кирдик. Чор атрофда бизни кутаётгандай одамлар куймаланишарди.

— О худолар! — хитоб қилди Кажри.

Унинг товуши гумбаз остида янграб, бутун қалъя: «Худолар! Худолар! Худолар!» деб гувиллаб тақрорлагандай бўлди.

Кажри безгак тутгандай қалтиради. Мен яқинроқ келиб, астойдил тикилдим: деворларга қадимий кийим-кечаклар илинганди. Халатлардан бирига қўлимни теккизишим биланоқ чангта айланди-қолди.

— Ҳаммаси чириб кетган экан, Кажри,— дедим афсуслашиб.

У ҳам иккита халатга қўл теккизган эди, улар ҳам тўкилиб тушди.

Шошилиб кейинги залга кирдик. Ҳаммаёққа қурол-аслаҳалар тартибсиз улоқтириб ташланибди. Мен бир қилични, Кажри ҳанжарни олдик. Энди ўзимизни анча дадил тута бошладик.

Кейин аёлларнинг кийим зали бошланди. Кажри кўзларини катта очиб, нигоҳини узмай ялтираб турган зарбоф кийимларга қаради. Деворларда ипак кофталар, гул тикилган юбқалар, қимматбаҳо, вазмин пешбандлар, нақшиндор камарлар илиғлиқ турарди. Аммо улар ҳам сал қўл тегиши билан чангга айланарди. Кажри қайсисига қўл теккизса, чангга айланаверди. Кажри авжга миниб, ҳанжарни ишга солди, мен қиличим билан кўмаклашдим, ҳадемай бу шоҳона кийимлар чанг тепага айланди, чириган латта-пүтталар пол устини қоплади. Кажри улар устида қўлида ҳеч вақосиз турарди.

— Булар минг йиллик бўлса керак,— деди у заҳарханда билан, сўнг залдан чиқиб кетди.

Биз деворларида токчалари бор бошқа хонага кирдик. Шу пайт девор ортида кимдир ноғора чалгандек бўлди. Назаримда ҳаммаёқ қулаги тушиб, тириклиайн ҳаробалар остида қоладигандаймиз. Гап-сўзсиз иккимиз ҳам қоча бошладик. Муёдлишда тепага чиқадиган зинапоя бор эди. Ушандан кўтарилидик. Қўрқув ҳамда тез югуришдан икковимиз ҳам оғир нафас олардик.

— Ким бўлдийкин у? — деди Кажри аранг.

— Кимдир катта ноғорани чалгандай бўлди.

— Сукхрам, ҳазинанинг олдига келиб қолдик.

Тўсатдан кимдир ёнгинамизда ҳахолаб кулди.

Қўрқувдан соchlаримиз тикка бўлиб кетди, орқа-олдимизга қарамай зинадан тепага қараб чопдик. Тепада тўқ-кулранг доф кўриниб турарди. Зинанинг охирги поясига қадам босиб, қалин ўт-ўлан билан қопланган силлиқ, текис том устига чиқдик. У ердан вазмин уҳ-уҳлаб, бойқуш секингина учиб кетди.

— Бу бойқуш экан,— енгил нафас олди Кажри.

— Бойқуш бўлмай нима бўларди? — дадил гап қистирдим мен ҳам.

— Бу ердан кетайлик. Сукхрам. Бошқа ҳеч ҳам пастга тушмайман.

— Кетайлик дейсанми? Қаёққа?

— Ие, пастимиз кўл-ку!— деб хитоб қилди қоронгулика тикилган Кажри.

Шу пайт боғ томондан шовқин эшилди, кейин чопиб келаётган одамлар қораси кўринди. Улар бор овозлари билан бақириб-чақиришарди.

— Сукхрам, улар ким?

— Мен қаёқдан билай?

Оломон кўлнинг қаршидаги соҳилига етиб келди.

— Кетиш керак, Кажри. У ёқда одамлар, улар бизга ҳужум қилишмоқчи. Сен бўлсанг, аёл кишисан.

— Тентаквой, булар одамлар деб ўйлаяпсанми? Улар инженслар. Ҳозир улар бу ерга етиб келишади.

— Кажри, сени орқамга боғлаб оламан.

У пешбандини ечди, мен дҳотим<sup>1</sup>ни ечиб, белга ўрайдиган белбоғим билан қолдим.

— Юбкангни ҳам еч,— буюрдим унга,— дҳоти билан пешбандни бир-бирига боғла, кийимларни эса юбкага туг.— Кажри айтганларимни қилди.— Энди тугунни бошингга боғла.

Кажрини дҳоти билан боғлаб, бўш учини белимга маҳкам қилиб түгдим. Кейин машъалани бир неча марта айлантириб, кўлга улоқтирдим. Машъала сувга тушиб, вошиллади, сўнг ўчди. Қўзим қоронгулика ўргангач, кўлда мильтилаб турган юлдузлар аксими кўрдим. Энди машъаламиз йўқ эди.

— Ханжарингни ташла, Кажри.

Килични тишлаб, қўлимни олдинга чўзиб, сувга сакрашга ҳозирландим.

— Ишқилиб, кўлдан сузиб ўта олгин, жонгинам,— деган Кажрининг товуши эшилди.

Унинг сўзлари менга куч-қувват бағишилади. Пастга бoshim билан сакрадим, сув тубига анча шўнгидим. Сувдан бoshimни чиқарганимда Кажри орқамда маҳкам турганига ишонч ҳосил қилдим. У қўллари билан мени қулоқлаб, орқамда ётар, сёқлари билан дадил сувни уриб сузишга интиларди. Орадан бир неча дақиқа ўтгач, ўт-ўланлар ўсган кўл соҳилига чиқдик.

Соҳилда кийимларимизни ёйдик, улар шилта ҳўл бўлиб кетган эди.

Шу ҳолатда икки соатча ўтиридик. Тун аёзли бўлганидан совуқдан қалтирай бошладик. Ниҳоят совуқقا чидолмай, ҳўл кийимларимизни кийиб уйга отландик.

<sup>1</sup> Дҳот — эркаклар белидан пасти — сағрисига ўрайдиган мато.

Совуқ изғирин шамол эса бошлади. Қажрининг тиши-тишига тегмай такирлadi. Иси ниш учун югурдик. Шу пайт вовиллаганича бир ит орқамиздан қувлади. Унга қилич солиб, тумшуғидан думигача иккига бўлиб ташладим. Орқамизга қарамай чопавердик.

Чодиримизга тонг юлдузлари сўнаётган пайтда етиб келдик. Ечиниб, яна кийим қуритишга тутиндик. Кўрпага ўрандик, гулхан ёқиб, ўтга яқинроқ ўтиридик. Ҳидимни билиб Бхура ёнимга чопиб келди. Итни ўзимга тортиб, орқаларни силай бошладим. Бхура ўзини нимадир ташвишлантираётгандай менга диққат билан тикилди.

— Э-э! Бутунлай унутибман-а! — деб пешонамга урдим. Ўрнимдан туриб отнинг ёнига бордим. Унинг тумшуғига шаппалиладим-да, қулоқларидан ўпдим. У секингина кишинаб қўйди.

— Аччиқланма,— айборларча шивирладим отга.— Кўриб турибсан, сал ушланиб қолдим. Айб қилма, роса қорнинг ҳам очқагандир, жониворгинам?

Отга бир қучоқ ўт келтириб бердим. Қажри тезак ёқди.

— Ўлгудай очман,— деди у,— озгина картошка қайнатай.

Картошка бир зумда пишди. Пўстини арчиб ея бошладик. Кейин сув ичиб ўрнимизга ётдик. Юпқа кўрпа бизни исита олмади, совуқдан қалтирайвердик. Бир-бirimизни баданимиз тафти билан иситдик, аммо ухлай олмадик. Мен бир қучоқ похол олиб келиб, тўшак тагига — каравотга ёйдим.

— Шакарқамиш барғларидан олиб келинганда соз бўларди,— деб орзу қилдим,— бўлмаса бунаقا аёзда музлаб қолиш ҳеч гап эмас.

— Ўчоққа тезак ташлаб қўй,— деди Қажри.

— Чўғ ўзи зўрга милтиллаб турибди.

Қажри ўрнидан туриб ўчиб қолай деган ўтни пуллай бошлади. Кейин икковимиз битта кўрпага ўраниб уйқуга кетдик. Чодирга кираверишда Бхура чўзилди. Биз гулхан ёнидаги соғ ҳавода ухладик, негаки тезак ёқилган чодирдаги гулхан «пис» этиб тез ўчади. Эрталаб бизни қуёшнинг чарақлаган нури ўйғотди, ўзимизни кучга тўлган, яхшигина дам олгандай ҳис этдик.

### 13

Пъярининг ҳузурига борганимда ҳовлидаги зўр шовқин-суроннинг устидан чиқиб қолдим: айвонда Рустамхон ўтиради, унинг икки малайи, қишлоқда ёмонлиги билан ном чиқарган Банке билан Чакхан чамарка<sup>1</sup>, Дхупони қўлидан ушлаб, туфли билан уни омонсиз савалашарди. Ёнларида эса ғазаб-

<sup>1</sup> Чамарка — чамарлар, яъни кўнчилар табақасига мансуб аёл.

га минган қоплон сингари Пъяри турарди. Атрофда бу томошани кўргани келганлар тўпланишган, Дхупо жон-жаҳди билан сўкинарди. Менга кўзлари тушиши билан аёллар шовқин кўтариши.

— Ана, эри ҳам келиб қолди. Қизиқ, ҳозир ҳам бурнини осмонга кўтарармикин?

Мен ҳеч нарсани тушунмадим, Рустамхонга яқинлашиб таъзим қилдим.

— А, Сукхрам! Манови ярамасни қара!— у бармоғи билан Дхупо томонни кўрсатди.

— Нима бўлди ўзи, тақсир?— сўрадим.

Хотинингнинг дўқидан мени қўрқади деб ўйлайсан шекилли?— қичқирди Дхупо.— У киши яна мени ҳақорат қилганига куйиб ўлайми? Унинг арпасини хом ўрибманми?

Ўзимни оёғим ости ўпирилаётгандай ҳис этдим. Банке билан Чакхан Дхупони калтаклашда давом этишди.

— уни ўз ҳолига қўйинглар,— деб қичқирдим ҳар иккала азоб берувчини итариб. Мен улар билан Дхупо ўртасида туриб олдим.

— Ҳа, зодагон тҳакур! Адолат ўрнатгани келдингми?— Пъяри менга ташланди.— Жўна бу ердан!

— Пъяри!— деб бақирдим.— Нима бало, ғазабдан қўзинг кўр бўлиб қолдими? Аёл кишини калтаклашга мажбур қиляпсан-а! Бир бечора чамаркага қўл кўтаришга уялмайсанми?

— Ҳой, раҳмдил, қўрқмас одам, мени ҳимоя қил,— Дхупо оёқларим тагига йиқилип ялинди.

Банке устимга бостириб келаётган эди, қўлидан ушлаб қолдим. Қўлинни тортиб олишга интилганди, куч билан пастга силтадим, у чийиллаб, қоғоз қондай ерга ағанади. Рустамхон ўрнидан туриб, секин-аста уй томон юрди. Мён уни қувиб этдим.

— Тақсир! Дори келтиргандим. Кеча кун бўйи зарур кўкатларни ўрмондан ахтардим.

Пъяри жаҳл билан менга ўгирилди.

— Сен ҳам ҳозироқ хонангга жўна!— деб унга бақириб бердим.

Бақиригим уни бўйсунишга мажбур қилди. Ҳамон жаҳлдан тушмаган Пъяри уйга кирди. Унинг кетидан мен билан Рустамхон икковимиз ҳам кирдик.

— Тақсирим, мана бу ерга ётинг,— дедим Рустамхонга.

Рустамхон итоаткорлик билан каравотга ётди.

— Тақсиримнинг иситмаси бор,— давом этдим,— ўzlари эса кўчада ўтирибдилар! Ҳай-ҳай-ҳай! Чакки иш бўлиби! Ким ҳаётини сақласа у оламни забт этишини тақсирим яхши била-ди-ку.

— Мен ётаман, Сукхрам! Пъяри анови чамарка билан бир оз ғижиллашган эди, ўрнимдан қўзғалишга тўғри келди,— деди Рустамхон ожиз товуш билан.

— Тақсиримнинг кўзига қарадиму шу заҳоти бетоблигини тушундим. Пъяри нечун бунчалик жаҳлга минди?

— Жанжаллашиб қопти,— такрорлади у.

— Тақсирим жанжал боисини билдими?

Менинг ошкора хушомадим ўз кучини кўрсатди. Рустамхон тинчланди. Ҳовлидаги оломон тарқади. Ҷупо кетди, ундан кейин Банке ҳам ҳовлини тарқ этди. Ёлғиз Чакхан қолди. У айвонга ўтиб, бири тутатди. Рустамхонни олиб келган дорими ни ютишга мажбур қилдим, оёқларини ечиб, қайта боғладим. Овқатдан ўзини тортиш ҳақида унинг ваъдасини олдим.

— Тақсири, парҳез сақласангиз яна ёшлигиниз қайтиб келади, ёшлик билан бирга орзу, куҷ-қувватингиз ҳам тикланади. Тақсири, Пъярига ҳам дори беришга ижозат берасизми?

— Майли, майли,— Рустамхон бош иргади.— Унинг ёнига чиқавер, у юқорида.

Пъяри разабдан қизариб-бўзариб каравотда ўтиради.

— Муҳтарама хонимга беҳад саломлар!— унинг оёқлари олдига — ерга ўтиарканман таъзим қилдим.

У йиғлаб юборгундай бўлиб, лаблари бурилди, лекин кўздан йўқолишимни талаб қилиб бақирди.

— Майли, кетавераман,— дедим.

— Ҳозироқ кўзимдан йўқол!

— Ҳозир кетолмайман. Тақсиримнинг ярасини боғлаб дори бердим. Дори кор қилишини билиш учун бир соат кутишим даркор. Кейин кетаман.

Пъяри ҳайрат билан менга тикилиб қолди.

— Тақсирим уйда бемор аёл ҳам борлигини айтди. Манови соққа дорини ютиб юбор, нафи катта бўлади. Ҳеч ҳам аччиқланма. Ӯшанда ҳаммаси жойида бўлади!

— Дорингни ичмайман.

— Қани, тезроқ бўла қол. Манови соққачани ютиб юбор, орқасидан сув ич. Кейин бу ерда қанақа ҳодиса бўлганини айтиб берасан. Сен туфайли азият чекиш пешонамга азалдан ёзилганга ўхшайди.

Мен кружкада сув келтириб, Пъярини кўрпага ағанатдим, оғзини йириб дори солдим, устидан сув қўйдим. Пъяри дорини пуфлаб ташлашга уринди, лекин орқасига бир мушт туширган эдим, итоат қилишга мажбур бўлди. Мен ўтириб кута бошладим. Пъярининг кўзларидан ёш думалади.

— Мени шарманда қилдинг.

— Нечун?

- Дхупони ҳимоя қилдинг. Сен унинг тарафини олдинг, менга қарши бўлдинг.
- Икки ярамас ахир аёл кишини ураётганди-да.
- Негалигини билдингми?
- Жанжилни кўрганим ҳам ётар. Ҳукм ўтказишга интилиш сенда кун сайин кучайиб боряпти. Одамларни унутиб қўяйсан. Энг беозор фақир одам ҳокимиятга эришса одамлар учун офат бўлади деб авлиё дарвиш тўғри айтган. Бунақа одам соҳибли сув остида қолдирадиган, тошқиндан қутурган дарёга ўхшаб қолади. У қуёш ҳаммага баравар нур сочишини унутиб қўяди.
- Мен фақирманми?
- Бўлмаса кимсан? Натни әмасмисан? Бунинг устига карнатни — танини сотадиган аёл! Эринг ўлмай туриб бошқаникига кетиб, ўша билан яшаяйсан! Оллоҳ бизни хор табақа қилиб яратган, ҳамма кулфатларимиз ҳам шундан. Бироқ чўчқа қанча узоқ ювинмасин, у бари бир сигир бўлолмайди, ҳали бунақа мўъжиза юз бермаган.
- Анови манжалақи Дхупо олий насабли экан-да сенингча?
- У эрига садоқатли, ор-номусини бозорга солмайдиган аёл.
- Уларнинг қабиласида, бир хил қонда, бизникида бошқа,— сўзимни бўлди Пъяри.— Ўзимни қанақа қилиб хўрлабман?
- Ҳокимиятга эришиб, одамларни азоблаяпсан. Унинг гуноҳи нима экан?
- Гапимни қайтармасин. Унга лой билан деворни суваб қўй десам: «Тақсирим буюрса қиламан, натнининг гапига кирмайман», деб жавоб қайтарди.
- Пъяри бу гапимга нима дер экан деб маънодор қилиб тикилди. Лекин мен индамадим.
- Ким бўлиб қолибсанки, мени сўроқ қиласан? Бу таги паст манжалақига гапимни қайтармагин десам ҳам ўжарлик қилиб туриб олди. Кейин ярамасни калтаклашни буюрдим.
- Яхши иш қилмабсан, Пъяри.
- Нега энди?
- Деворни суваш ўзингнинг қўлингдан келмасмиди?
- Яхшисл чодирингни суваганим маъқул. Бу ерда мен бекаман.
- Мен кулдим. Пъяри калтак егандай сесканиб кетди.
- Энди сен ҳам менга куляпсанми?— ғамгин савол берди у.— Кеча қаёқда қолиб кетдинг?
- Қажри ёнида.
- Пъярининг ранги ўзгариб кетди.

— Уни олиб келишга ваъда қилгандинг.  
— Тўғри, ваъда қилганман. Қажри индинга келади.  
— Нега?  
— Бугун келолмади.  
— Ахир, ваъда бергандинг-ку!  
— Ваъдамни буздимми? Индинга келади деяпман-ку.  
Хонага Рустамхон кирди.  
— Сукхрам, эшитдингми?— деди у каравотга ёнбошларкан.— Янгиликни эшитдингми? Чала қолган қалъага жинлар учиб кепти.

Мен ҳушёр тортдим.

— Ҳеч нарса билмас экансан! Ярмаркада шу ҳақда дув-дув гап. Ярим кечадан кейин қалъада машъалалар ёнибди. Қалъа бўйлаб юзлаб машъалалар югурибди. Ҳаммаёқ кундуздагайдай ёруғ бўлиб кетибди. Боғбон тўсатдан уларни хуркитиб юборган экан, улар одамни кўриб, машъалларини қўлга улоқтиришибди... Наҳотки шуларни эшитмаган бўлсанг?

— Йўқ, тақсирим, ҳеч нарса эшитганим йўқ. Ажойиб воқеа.

Шу пайт инс-жинс, жин, девлар ҳақидаги воқеаларнинг ҳаммаси уйдирма эмасмикан деган фикр миямга келди.

— Эрталаб одамлар заминдорнинг итини кимдир чопиб кетганини кўришибди,— гапида давом этди Рустамхон.— Шундай чопибдики, бошидан думигача-я! Бир кўрганингда эди, Сукхрам! У инглиз зотидан бўлган жуда катта ит эди, заминдор жаноблари уни Бомбейдан олиб келганди. Бу ит жуда кўп одамни тишлаган! Жуда баджаҳл, қопогич ит эди! Уни иккига бўлиб ташлашибди! Сукхрам, ўша ити кўрганмисан?

— Кўрганман, тақсири. Бир куни бу ит менга ҳам ташланган эди.

— Қилич ҳам қадимий,— деди Рустамхон,— бунаقا қиличларни бундан икки юз йил илгари тақиб юришган.

Нафасим чиқмай қолди.

— Икки юз йил?!— дедим аранг.

— Ҳа, ҳа. Қиличининг сопига «Махарож Житендарсинх» деб ўйиб ёзилган экан. У бундан икки юз йил муқаддам яшаган. Қалъани ҳам ўша қуришга бошлиган.

Кўзим тиниб, бошим айланди, ўзимни ҳарчанд қўлга олай десам ҳам бунинг уддасидан чиқолмадим.

— Пъяри,— дедим,— индинга келаман. Манови дорини олиб қўй. Икковларинг ҳам ҳар куни эрталаб биттадан соққача ичинглар. Манови япроқларни тақсиримнинг ярасига ёпиштириб, оёғини маҳкамроқ боғлайсан. Териси тортишиб оғрийдиган бўлса оёқни парга қўясан. Ним дараҳти баргларидаи қизитиб ярага ёпиштирасан, эҳтиёт бўл, оёқни куйдирив қўйма. Бошқа-бошқа ётасизлар, туз солинмаган нон ейсизлар. Уқдинг-

ми? Бу қасаллик бамисоли оловга ўхшайди, етти пуштинггача күйдириб юборади. Қўшилсанглар болалар бурунсиз туғилади. Тақсир, табиблар буни инглизча касал деб айтишади. Қасалликни бизнинг юртимизга инглиз соҳиблари олиб келган.

Мен кетиш учун қўзғолдим. Пъяри бетоқатлик билан менга тикилди. У мендан Кажри, Дхупо, ўзим ҳақимда, касаллиги, яна кўп нарсалар ҳақида сўраб билгиси келарди. Лекин Рустамхон унга халақит берди.

— Тақсир,— охирги марта Рустамхонга мурожаат қилдим.— Манови дорини йигирма бир кун ичиш керак. Индинга келаман, кейинги уч кунга ҳам дори келтираман. Дори ҳамиша янгилигича туриши лозим.

— Ҳой, Сукхрам, тўхта!— эшик олдига бориб қолганимда Рустамхон дўстона чақириб қолди.

— Хўш, нима гап, тақсирим?

— Бу ёқдан қайтишингда эҳтиёт бўл!

— Нега?

— Анови Банке хавфли одам, бирон-бир жойда пайнингга тушмасин тағин.

— Тақсиримни даволаётганимни билиб туриб шунаقا қилармикин?

— Нима ҳам қилардим, Сукхрам! У инсофи йўқ алдамчи, у қаҷон бўлмасин оллонинг олдида қилмишлари учун жавоб беришини ўйламайди. Мен худонинг олдида жавоб бераман. Мен хавфсирайманки...

— Тақсирим бетоб, фақат шифо топиш ҳақида ўйлаши керак, ўшанда қўрқув азоб бермайди.

Пъяри гапимдаги яширин маънони уқиб, кулимсираб қўйди.

— Банкенинг Дхупога адовати куҷли,— уқтириди Рустамхон.— У Дхупога суюқлик қилган экан, қўлидаги ўроқ билан даф қилибди.

Мен Пъярига қарадим, у эса кўзини ерга қадади.

— Тақсир!— хитоб қилдим.— Ижозат берсангиз бу ярамасни ҳамманинг кўз олдида калтаклайман!

— Йўқ, йўқ, Сукхрам! Бу ишга мени аралаштирма!

— Бугун таборга борма,— илтимос қилди Пъяри.

— Илгари бормаслигим мумкин эди, ҳозир мени Кажри кутяпти.

— Ие! Бошқатдан уйланниб олдингми?— сўради Рустамхон.

— Тақсир, нима қилиш керак, нима қилиш керак эмаслигини биз қаёқдан биламиз? Ҳаммамиз ҳам турмушдан тиргак ахтарамиз, қийин дамларда бизга ғамхўрлик қилиб, ёрдам қўлинни чўзган одамларни излаймиз. Уйландимми ё йўқми — менга барибири. Биз натмиз. Сиз жаноблар эса ҳаётни хотиниз сиз тасаввур қиломайсизлар.

Рустамхон бирон дағал гап әшитиб қолишдан ҳадиксираб мен билан пачакилашиб ўтирмади, Пъярининг афтидан тилни тишлаб ўтириш унга жуда оғирлик қиласётганини пайқадим. унинг ичи ғазабга тўлиб-тошганди. Назаримда мен унинг қўлидан бутунлай сирғаниб чиқиб кетгандай эдим. Акс ҳолда Рустамхон билан бу қадар бепарво оҳангда гаплашмасдим. Яқинда Пъярини қайтариб берган тақдирдагима Рустамхонни даволашимни шарт қилиб қўйгандим, бугун эса бу ҳақда ломмим демадим. Хўрлашларимга Рустамхон ғинг демай туриши мени тобора ажаблантиради. Банке Рустамхонга қиморхонадан чўтал келтириб беришини билардим. Банке ўчига чиққан ярамаслардан бири эди. У ахирлар, яъни чорвадорлар табақасига мансуб эди, бироқ ўзи судхўрлар ҳисобига яшарди. Судхўрлар эса Рустамхондан қўрқиб Банкега индашмасди. Дхупо унинг боллаб адабини берганга ўшайди. Бу ярамас аблахи ана шундай боплаш керак! Рустамхон даволаниб олгунча ҳамма хўрлик-зорликларга бардош бераётганини тушуниб турибман. Бошқа маҳалда аллақачон мендан ўчини оларди.

— Тақсир,— мен Рустамхонга таъзим этдим,— илтимос, мурожаат қилишга ижозат беринг.

— Яна нима дейсан, Сукхрам? Сўрайдиганларинг адоғ бўлганий ўқми?— Рустамхон менга кўз қисди.

— Менга пул керак. Дорилар жуда қиммат туради; тақсир!

— Унга бир рупия бер,— Рустамхон Пъярига буюрди. У каравотга ёнбошлади, бу қилифи билан кетаверишим мумкинлигига ишбра қилди. Мен Пъярини имлаб, пастга тушдим. Ҳовлидаги айвонда Чакхан ётарди. Пъяри менга аста яқинлашиб пул узатди.

— Ўзингда қолаверсин. Сени пастга чақириш учун пулни баҳона қилгандим, холос.

— Пулни олиб келдим, олавер!

— Кажри индинга келади,— қўлидан пулни оларканман, ваъда қилдим.— Унинг оёғига бўёқ суртасан.

— Нима?— хитоб қилди ажабланган Пъяри.

— Айтдим-ку.

Пъяри жаҳл билан лабларини тишлади, кейин юзимга тарсаки туширди.

— Ҳой! Ораларингда нима гап ўтди ўзи!— қичқирди айвондан туриб бизни кузатаётган Чакхан.

— Ҳеч нима,— жавоб қилди Пъяри, кейин менга юзланиб шундай деди:— Бўйти, ярамас! Ҳаммасига чидайман! Сени деб ҳатто ўша мегажиннинг оёқларига бўёқ суртишга ҳам тайёрман!

У юзини қўллари билан яшириб, ўқириб йиғлаб юборди.

Уни тинчлантириш учун устига энгашаётсам Чакхан яна ба-  
қирди.

— Сукхрам, ораларингда нима гап ўтятти?

— Ҳеч вақо бўлгани йўқ, севикли хотиним менга аччиқ  
қиляпти. Бошқа аёлга уйланган эдим.

— Шунаقا дегин!— Чакхан бепарво эснади, кўкат устига  
чўзилиб, кўзини юмди.

— Пъяри, кўнглингни вайрон қилаверма,— дедим астаги-  
на.— Яхшиси гапимга қулоқ сол.

Пъяри тинчланиб, менга савол назари билан қаради.

— Кажри сендан қўрқяпти, шу важдан унга ён бердим.  
Мен унинг бу туйгусини тумандай тарқатмоқчиман. Ҳов ўшан-  
да унинг чўриси бўлишга ҳам тайёрман деб ўзинг айтгансан-ку!

Пъяри ҳеч нима демади: гапларим унга битмас-туганмас азоб  
бераётганини сезиб турардим.

— Мен кетаверайми?— деб секингина сўрадим.

— Кетавер, индинга уни бирга олиб кел. Янги маликангни  
томоша қилмоқчиман.

Мен бурилиб ўйлга тушдим. Чакханинг устида пашшалар  
ғужғон ўйнашар, юзига қўнишарди. У ухлаб қолганди.

Иўлга энди тушганимда айнидим, ҳовлига кириб, Пъярини  
чақирдим, битта таёқ беришини илтимос қилдим.

— Нега энди?— қўрқиб сўради.

— Биронтасининг адабини берарман. Теэроқ келтир.

Пъяри чопқиллаб кириб кетди, сўнг таёқ келтириб берди.

— Бир кор-ҳолга қолмагин!— огоҳлантириди Пъяри.— Сени  
муштлашишдан аранг тўхтатиб турардим, ёлғиз қолдингу  
чинакам натга айландинг.

— Ҳа, қўрқяпсанми?

— Бўлмасам-чи? Сенда бор мушт бошқаларда ҳам бор-да.

— Тишлари ҳам бор,— дедим Мангунинг тиши ўрнини қўр-  
сатиб.

Пъяри ҳайратдан қотиб қолди.

Мен бурилиб, ўйлга тушдим.

## 14

Сукхрам ўйлда бораркан, ўз-ўзини тушуниш учун астойдил  
фирқ юритди. Наҳотки у Кажрининг таъсирида шунчалар ўз-  
гариб кетган бўлса? Буни Пъяри дарҳол фаҳмлади. Кечагина  
итоаткор, кўнгилчан бўлған одам наҳотки бугун ўз мустақил-  
лигини, қадр-қиммат туйгусини тушуниб етган бўлса? Кечаги-  
на у нуқул Пъяри ҳақида ўйларди: унинг нозиккина қомати  
унга баланд, келишган, гўзал бўлиб кўринарди. Ҳозир унга  
нима бўлди? Бугун Пъяри севгилиси устидан ҳукмини йўқо-  
таётганини алам билан бир неча бор пайқади. Қўзларинда

мехр-муҳаббат ўтлари чақнади. Эрига мафтун бўлган буғудай тикилиб қолди. Овчи вина<sup>1</sup>нинг сеҳрли товуши билан уни тез чопиб кетаётган жойида тўхтатиб қўйди, ўзига ром этди, бироқ ўз ғалабасидан фойдаланмай, бепарвогина ўлжасини эркинликка қўйиб юборди... Пъяри уни инсофга чақира олмасди, чунки эндиликда Рустамхоннинг маъшуқасига айланган эди. Сукхрам билан ҳисоблашмай уникига кетиб қолган.

У Кажрининг пайдо бўлишини ўзига тушган ноҳақ зарба деб билди. Нега? Ахир, Пъяри доим бадан кўпларники бўлиши мумкин, аммо юрак, кўнгил фақат бир одамники бўлади дер эди-ку. Чиндан ҳам қўнгилни танадан ажратиш мумкинми? Танага эга бўлиш кўнгил устидан узил-кесил устун чиқишига интилиш билан тугалланмасмикан?

Пъяри бу масалаларнинг замирига етишга ожиз эди. Сукхрамни севишининг ўзи унга етиб ортарди. У дадаси ўлганида бир томчи ҳам кўз ёши тўқмади, онаси билан иҳтиёрий равишда ажрашди. Пъяри ўзи билан ўзи овора эди, ўз атрофида ҳукм ўтказиш доирасини хаёлан чизиши билан машғул эди, тўсатдан ўзининг баҳти қум устига қурилган иморатдек омонатгина эканлигини билиб қолди.

Сукхрамнинг Кажри олдидаги уни таҳқирилаши аламини баттар зўрайтириди.

Сукхрам буни тушунди. Бошини қўйи солди. Бироқ, нима сабабдан ўзига хос «мен»лиги борлигини, қалбida қадр-қиммат туйғусини сақлаётганини айтмади, нега?

Кажри ҳақ гапни айтди. У Сукхрамни жон-дилидан яхши кўриб қолди, эрини ташлаб уникига келди. У орқага чекиниш йўлларини бутунлай йўққа чиқарди. Эндиликда уни ўтмиш билан ҳеч нарса боғламайди, эски вайронасига қайтиб боришига тўғри келиб қолса, бундан фойдаланиб қолишга арзийдиган ҳеч қандай шартни ҳам қўймади. Унинг ёрдам сўрайдиган ҳеч кими йўқ, лекин ҳеч кимдан қарздор ҳам эмас. Кажри бирданига, шарт-писандасиз ён бериб қўя қолди, унинг устун келишининг бутун улуғворлиги ҳам шунда эди, чунки у бор-бисотини берди, ўзида Сукхрамни севиши ҳуқуқини қолдирди, холос.

Кажрининг Пъяри ёнига боришига тўғри келяпти. Дилида хижолатдан ўлиб қолай деса ҳам ўзини мағрур, виқорли тутишга ҳаракат қиласди. Нега Сукхрам уни боришига мажбур қиляпти? Эҳтимол, ҳозиргача Пъярини унутолмаётгани учундир! Бу унинг қалбига қанчадан-қанча гулу солади! Унинг катта хотини олдидаги бош эгиб таъзим қилишга тўғри келади. Энг муҳими шуми? Кейин нима бўлади.

<sup>1</sup> В и на — ташқи кўриниши удни эслатадиган, Ҳиндистонда кенг тарқалган, ноҳин билан чертиб чалинадиган музика асбоби.

Пъяри унинг оёғига бўёқ суркайди. Қажри каравотга ўтиради, Пъяри аввало унинг оёқларини ювади. Булар шунақаям ғалатики! Қажри чидаб ўтира олармикан? Наҳотки у шунчалар мағрур, ёвуз бўлса?

Сукхрам-чи? Бепарво томошагўйлигича қолармикан? Пъярининг қўллари Қажрининг оёқларига текканда у нима қиларкин?

Йўқ, Сукхрам бунга рози бўлганида буларни ўйламаган эди!

Бу Пъяри учун нақадар оғир хўрлик, ҳақорат! У бунга бардош бера олармикин? Айниқса полициячининг ўйнаши бўлиб турган ҳозирги дамда! Ахир, у Пъяри учун қудрат, бойликнинг гавдаланиши-ку. Нега энди у бунга учди? Эндиликда ўз гуноҳини ўзи ювади!

Ким учун?

Сукхрам учун.

У унга ким ўзи?

У унинг севгилиси.

Бордию Пъяри Сукхрамга бўйсунишдан бош тортса-чи?

Сукхрам кетганидан кейин Пъяри ўзини қўярга жой тополмай қолди. Ўзини ўзи койиди. Наҳотки Сукхрам уни Қажри олдида бўйин эгишга мажбур қиласа? Аммо Қажрининг айби нима? Пъярининг ўрнида Қажри бўлганида у Сукхрамдан кетиб қолармиди?

...Бадбахт Рустамхон каравотда noctor ётибди. Унинг димордорлиги қаёққа йўқолди? У қанчадан-қанча азоб-уқубатларни тортиши керак! Бузуқлигидан эти чириб боряпти. Олло таоло буни яхши ўйлаб топган: бирорларнинг хотини билан бузуқлик қилдингми, тиригингда чирийвер. Агар Сукхрам бўлмаганида у итдай ўлиб кетарди. Унда Пъяри Рустамхондан нафрат билан юз ўғирар, қочиб кетган бўларди.

Умуман, нима учун Пъяри уникига келди? Қачон у Пъярига қудратли одам бўлиб кўрина қолди? Солдатларники сингари қаттиқ товуш билан гапиргани, ўз хоҳиши билан истаган натни участкага олиб келишга қодирлиги учун шундай бўлдими? У полициячини ўз измида тутаман, жамоани ҳурмат қилишга мажбур этаман деб ўйлаганди. Фақат шу фикргина Пъярини унинг уйига боришга мажбур қилдими?

...Пъяри Рустамхонга бениҳоя нафрати ҳисси билан қарай бошлади. У нақадар жирканч, пасткаш, Сукхрам эса нақадар гўзал!

Пъяри чуқур хўрсинди.

Пъяри чодирлари олдида, очиқ ҳавода севгилисининг қучоғида ўтказган сеҳрли тунларни хотирлади. Эркинлик — қудратли куч. Уни йўқотгандан кейин ҳеч нарса ўрнини босолмай-

**ди.** Пъяри қандай баҳтиёр эди! Қажри ҳам, азоб берадиган ташвишлар ҳам йўқ эди. У Сукхрам билан ёнма-ён ётиб ухлар, эрталаб ўринидан туарди. Сукхрам кечаси ҳам, кундузи ҳам ўзиники эди.

Нега Сукхрам унинг кетишига йўл қўйди?

Пъяри муҳтожлик азобини тортмасин учун шундай қилдими?

Йўқ!

Бўлмаса нега?

Чунки ўшанда Сукхрам ўзини ожиз, итоаткор, ювош, қашшоқ йигит деб биларди, полициячининг қаршисида дадил бош кўтара олмасди. Нима сабабдан ҳозир бунчалик ўзгариб кетдийкин?

Ўшанда у ҳозиргидақа қатъият билан гапиришга журъат этолмасди. Сукхрам келиб, Рустамхон олдида бошини эгиб тураверарди. Ҳозир бўлса Сукхрамнинг қаршисида даҳшатли шерга ўхшаб гердайиб ўтирган ўша Рустамхон бугун эса қўрқоқ чиябўридай думини ликилатяпти. Чунки Сукхрам ҳамиша ҳақиқий шер бўлган.

Пъяри машъум хатога йўл қўйди. У ҳаёт денгизида ўзи сузиб юрган қайиқни кичкина ҳисоблаб, кемага чиқиб олди, қайиқни унга боғлаб қўйди. Аммо каламушлар кема тубини кемириб тешиб қўйди, кема чўка бошлади. Эндиликда Пъяри ўз қайигига ўтириб, соҳилга сузиб бормоқчи, лекин қайиқ унга бўйсунмаяпти!

Сукхрам шундай дадиллашдики, ҳатто полициячининг қўлини ҳам таваккал қилиб қайтарди!

Буни ҳамманинг кўзи олдида қилди-я! Азамат! Ҳеч кимдан қўрқмайдигандай бошини баланд, мағрур тутиб турди!

Пъяри Сукхрамни биринчи маротаба ана шундай қаёфада қўриши.

Ўша лаҳзада ундан нафрatalанди ҳам, ғуурланди ҳам. Қалбида бир-бирига зид туйғулар тўқнашди.

У ўринидан туриб сув ичди. Бир оз тинчланиб, ҳорғин эснади. Кейин каравотга ётиб, юзини кафтлари орасига олди. Ҳеч нарсанни ўйлагиси келмади, лекин фикрлар миясига сурлик билан кириб келаверди. Ўзи эса чарчади, чарчаганда ҳам ўлгидай чарчади.

Сукхрам уни шарманда қиляпти. Лекин нечун?

Ҳозир Қажрининг эри бўлгани учун шундай қиляпти. Сукхрам кўпроқ хотинининг гапларига киради. Шу важдан йигит мағрур, виқорли бўлиб қолди.

Лекин нимага, нима сабабли? Чунки ёш хотин уйга кириб келгандан кейин ўғил онанинг гапига кирмай қолади. Она бечора уни боқиб катта қилади, бешиги ёнида тунларни бедор

ўтказади, бошқа аёл эса тайёр ошга баковул бўлиб келади, ҳузур-ҳаловатда яшайверади! Лекин у ҳам бир кун она бўлгач, шундай қисматга дуч келади.

Оҳ, пуллар, пуллар, алам билан ўй сурди Пъяри. Қачонлардир менинг ҳам пулим бўлган. Ҳозир пуллар уники. Лекин у кимнинг пуллари? Пъяри ёки Кажри эмас, балки пулларнинг ўзи харид қиласди. Пуллар ўз баҳосини билмайди, буни савдор гар билади. Бу ерда пуллар савдогарни сотмоқда. Ҳаммаси тескари!

Пъяри яна ўйга толди. У бойликка интилдими ёки бунга уни ҳамиша оч, совуққотиб тентираш, доим соядай эргашиб юрадиган қашшоқлик мажбур қилдими?

Кажрини ҳам Сукхрамнинг қучогига шу сабаблар шариб киритган бўлмасин?

Пъяри кўзини юмиб ётганича худога нола қилди: «Ҳаёт гулимни сўлдира қол, ортиқ тоқат қиломайман! Бошимга кетма-кет кулфату баҳтсизликларни соляпсану жонимни олмаяпсан. Гуноҳим нима? Бегона эрқаклар билан тунни бирга ўтказишимми? Аммо қабиламни ҳамма ҳуқуқлардан маҳрум қилиб, шу кўйга солган ўзингсан-ку. Нега мени аёл қилиб яратдинг? Шу важдан азоб чекмаяпманникан ҳозир?»

Қаердадир, ёнгинасида Рустамхон ҳам ўз худосига илтижо қилди: «Эй парвардигори олам, гуноҳларимни кечир! Мен кўплаб ифлос, ярамас ишларни қилдим, гуноҳкорман, тавба қиласман, ҳақ йўлга кираман!»

Пъяри қулоқ солади. Рустамхоннинг товушида ташвиш оҳанги жааранглайди. У бўғиляпти, товушлар ҳам дўзахдан чиқиб келаётгандай. Пишиб етилган чипқон ёрилди, ундан қўланса пасод оқди.

Пъяри ў ёнбошидан бу ёнбошига ағдарилаверар экан, шу ёнверда ётган Рустамхон минфирилаб худога нола қилди: «О, оллоҳ, нақадар омонсиз зарба бердинг! Бунга лойиқ эмаслигими ни наҳотки тушунмасанг. О, мен баҳти қора одамман!»

«У чуқур хўрсинди. Унинг хўрсинишлари Пъярининг қулоқларига чивин ғинғиллашибай туюлди, аёлнинг уни кўришга тоқати қолмаганди. Пъярининг бир лаҳза бўлсин ором олишига йўл қўймаяпти.

Пъярининг танаси безгак тутгандай ёняпти, титраб-қақшяпти, у чойшабни даҳанига қадар тортди. Үраниб ётиш қандай яхши, ёқимли. Индамай, тинч ётасан киши. Оёқни ҳам, қўлни ҳам қимирлатгинг келмаганида ўраниб ётиш ҳузур. Пъяри бемор. Рустамхоннинг азоб чекишлари уни хурсанд қилмоқда. Ана шу азоб чекишлар Пъярининг гуноҳлари, шармандаликларини юваб кетаётгандай эди.

Рустамхон ҳамон инграб, қайгули товушда, умидсизликка тушиб худога ёлборади:

«Эй парвардигори олам, ўзинг ҳомийсан! Шафқатлисан! Гуноҳларимни тан оламан, тўғри, ўз ихтиёrim билан гуноҳ қилдим, бунга ҳеч ким мени мажбур қилгани йўқ. Аммо сен мўминларга шафқатлисан, мени кулфатда қолдирмайсан. Ҳар куни беш вақт намозимда қилмишларимга тавба-тазарру қиласман!»

Пъярига ҳаёт уни тарк этаётгандай туюлди. У ҳозир ерга михлаб қўйилгандай ётибди.

Нега у ҳам гуноҳларини кечиши худодан сўраб илтижо қилмайди?

Эҳтимол, Рустамхондай ашаддий гуноҳкорнинг оллога қиласётган нолаларини эшишиб хижолатдадир. Пъяри ҳам ўзини катта гуноҳкор деб билади.

Нега?

Чунки у Сукхрамни ташлаб кетди. Пъяри девор томонга ўгирилиб, ғужанак бўлиб олди, тиззаларини қучоқлаб, оз-моз исина бошлади. Ҳарорат осойишталик келтиради.

Ҳозир аҳволи яхши. Пъяри бошини ҳам ўраб олди, нафасининг ҳарорати кўрпа остидаги ҳавони иситяпти, бадани бўйлаб ёқимли илиқлик таралмоқда.

Дори таъсир қилди. Сукхрам дори безгак тутгандай титратиши мумкин, титраб-қақшаш қанча кучли бўлса, шунча яхши деганди.

Наҳотки тузалиб кетиб, яна соғлом бўлса? Унда полициячиникидан қочиб, Сукхрамнинг ёнига боради. Ўшанда нақадар баҳтиёр бўларди? Қалбига яна шодлик, қувонч қайтади!

«Нега энди Сукхрам ёнига бўларканман?— деб ўйлади Пъяри.— Бу ерда аҳволим ёмонми? Қўналғада мени нуқул баҳт-саодат кутармиди? Бу ерда бекаман. Қўрада-чи? Ҳамиша полициячилар бостириб келиб қолармикин деган ташвишда яшайсан, аёллар қорнини тўйғазиш учун бегона эркакларни пойлашади. Уларни нима кутяпти? Фақат азоб-уқубат, қашшоқлик холос».

Бироқ Сукхрам ҳам ўша ёқда-ку! Шунинг учун ҳам Пъяри ўша ёққа интиляпти. У Сукхрам билан бирга бўлмоқчи... Дунёда кўплаб одамлар яшайди. Лекин биз ҳузуримизда ўзимиз учун яккаю-ягона бўлган одамни ушлаб туришга интиламиз. Пъяри ҳам ҳамма учун умумий бўлган овқат тўла идишдан ўзи учун мазали бўлган бўлакни олмоқчи. Ўша яккаю ягона одамни кўрганда нега боши айланади, нега кўнгил нуқул ўшанга талпинади, нега бошқа одам эмасу ўшанинг ўзи қалбингда ўчмас из қолдиради?

У Сукхрамнинг қучоғида ўтказган биринчи, иккинчи, учинчи тунларни хотирлади. Бунақа оқшомлар қанчаю! Юлдузларни санай-санай чарчаган уйқусиз қоронги тунлар, ой нури ёритиб турган севгилинг юзига тикилиб туриб мулойим кулгидан ўзингни тиёлмаган ойдинли кечалар, осмон момақалдириқдан парчаланиб, гулдираган, чодир ташқарисида қутурган ёмғирли уйқусиз тунлар, бир-бирингнинг пинжингга тиқилиб, ҳаётбахш оловдан баҳраманд бўлиб гулхан ёнида ўтирган аёзли уйқусиз кутилган тонглар. Ўшанда улар дунёдаги бор нарсани унутишарди. Уларнинг қалби бегалва осойишталиқдан ҳузур қиласди. Кўзлар юмилиб, уйқу ўз ҳукмини ўтказарди.

Улар ўтказган биринчи кечани унутиб бўладими?

Пъярининг юраги дукиллаб ура бошлади. У ўша тунда ичган виноси таъсирида гандираклай-гандираклай уйга кеч қайтди. Чодирда Исила билан Сауно уйғоқ эди. Чодир ёнида эса уни Сукхрам кутарди. Пъяри Сукхрамни меҳрибонлик билан бағрига босди. Совуқ туман пардаси ерга тушди, бу туннинг ниҳояси йўқдай бўлиб туюлди. Пъяри эркаклар эркалатишининг мазасини аллақачон тушуниб қолганди, лекин ўша тундаги ҳузурбахш такрорланмас ҳаяжонни илк дафъя туйди. Ўша тунда унинг эри бўлиб қолган, болаликдаги ўзи қўмсаган садоқатли дўсти Сукхрамга бўлган илк, яккаю ягона севгиси ана шундай бошланган эди.

Пъяри бошқа томонга ёнбошлади, фикрлари чувалашиб кетди, бири бошқасини яксон қилди.

Ҳаёт ўйлингда қандай синовлардан ўтмайсан киши! Кўнглингга яқин нарсани топмагунча ҳаловат кўрмайсан, дунёни тушуниб етмайсан. Тажрибали, кўпни кўрган одамлар ана шундай дейди. Кишининг ёлғиз эмаслигини билишгандагина унга ишонадилар.

Пъяри чордона қуриб, даҳанини кафтига қўйиб каравотда ўтирили, шу ҳолатда қимирламай қолди.

Чошгоҳ қуёши фарбга оға бошлади, кимсасиз йўлларда дарахт ва буталар сояси ўрмалади, ер усти оқ ва қора ямоқлар билан қоплангандай тус олди. Қушининг ёлғиз товуши жаранглади, қуш чошгоҳнинг уйқули сукунатини қўрқитмоқчидай бўлди, аммо бунга қодир эмаслигини пайқаб яна жимиб қолди.

Пъяри яна ётди. У мамнун. Сукхрам уни ўйлаётгани, ғамхўрлик қилаётгани ҳақидаги фикр Пъярини деярли баҳтиёр қилди. Эркак киши уйга иккинчи хотинни олиб келса, биринчисига қарамай қўйиши ҳаммага маълум. Лекин Сукхрам унақа эмас.

Пъяри яна устига чойшаб тортди. У бошқа ҳеч нарса ҳақида ўйлашни хоҳламасди. Боши ёстиққа тегиши билан миясига

оир, аламли ўйлар суқулиб кираверди. Бундоқ ўйлаб қараса, ўзига таскин берадиган хотиралардан бошқа нарсаси ҳам қолмабди.

— Ҳеч нарса!

Пъяри яна хотираларга берилди.

Тошмехр Сукхрам, ўзи билан олиб кетиши хусусида ломмим демади.

Кажри кўнглидан маҳкам ўрин олганга ўхшайди...

Рустамхон ингради.

Пъяри сесканиб кетди. У уйда ёлғиз әмаслигини унутиб қўйганди. Рустамхоннинг овозидан қалтираб кетди, наҳотки бедаво ҳамон тирик бўлса?

Наҳотки Пъяри мана шу пасткаш билан қолиб кетса?

Пъяри умидсизликка тушди. Ўзини олтин қафасдан эркинликка интилаётіан тўтиқушга ўхшатди. Қуш ожизгина жон талвасасида қанотларини қоқади, тумшуқлари билан қафас симларини чўқийди, симларга ҳеч қандай зиён-заҳмат етказмайди.

— Пъяри! — деб чақирди Рустамхон.

Пъяри индамайди.

— Пъяри, нима бало, ухлаб қолдингми?

Пъяри жавоб бермайди.

— Чиндан ҳам ухлаб қолганга ўхшайди,— деб пўнғиллади Рустамхон.

— Нима бўлди? — уйқули товуш билан сўради Пъяри.— Мени чақирдингми?

— Ҳа.

— Нега?

— Ухляйпсанми?

— Йўқ.

— Ахир, сени икки марта чақирдим-ку.

— Эҳтимол, сал кўзим илингандир.

Рустамхон индамай пишиллади.

— Сенга нима керак ўзи? — бетоқатланиб сўради Пъяри.

— Шундоқ ўзим.

— Ахир, мени тинч қўйгин! — аччиқланди Пъяри.— Бирор кор-ҳол бўлди деб ўйлабман.

— Қўрқмаяпсанми?

— Йўқ.

— Пъяри, сендан бир нарсани сўрамоқчиман.

— Сўрайвер.

— Бордию ўлиб қолсам, унда...

— Унда нима?

— Унда сен нима қиласан?

Пъяри: «Бу ердан қочиб кетаман», демоқчи бўлдию, лекин Рустамхонни тинчлантириди:

— Сен ўлмайсан. Узоқ умр кўрасан.

— Оллоҳ сенинг ҳам умрингни зиёда қилсин.

— Бунинг кимга кераги бор? Аёл киши ёш умри ўтгунгача яшами керак, кейин унинг ҳеч кимга кераги бўлмай қолади.

Рустамхон ҳеч қандай жавоб қилмайди. Унинг баҳслашишга тоб-тоқати йўқ. Пъяри эса яна юлдузларга маҳлиё бўлиб, очиқ ҳавода ухлаш ҳақида ўй суро бошлайди. Кимдир унинг сочларини меҳр билан ёяди, Пъяри эса астагина, баҳтиёр қиқирилайди.

Бироқ унинг ширин хаёллари оламига Рустамхон шафқатсизларча бостириб киради.

— Пъяри! — чақириди Рустамхон.— Сукхрамнинг дориси таъсир қилаётганга ўхшайди.

Лекин Пъяри эшитмайди. У хаёл оғушида. Гўё Пъяри ҳамон ёш, келишган йигитнинг оғушида ётибди. Пъяри хаёлидаги йигитни шунақаям соғинганки! Пъярининг баҳт ҳақидаги орзуларида албатта эркак қиши бўлади. Унинг қалбида табиат овозига зид нарсаларга ўрин йўқ. Пъяри олий материяни тушуммайди, чунки у аёл, бор-йўғи аёл, холос.

О, Сукхрам! Ахир, у кўзлари катта-катта, чиройли йигит! Яна Рустамхон инграйди.

— Нима, нима дейсан? — сўрайди Пъяри.

— Даҳшат, баданим ловиллаб ёняпти. Сув!

Пъярининг жаҳли чиқади. Ахир ўзининг ҳам истимаси бор. «Туриб, ўзинг ичиб кела қол», дегиси келадиу бундай қиломайди, юраги дов бермайди.

Пъяри каравотдан тушади. Ҳар қимирлаши чидаб бўлмас азоб беради. Бесида қўнгироқ жаранглаётгандай. У тер босгани пешонасига қўлини қўяди. Кейин кўзини очади, шу заҳоти яна юмиб олади: кўз олдида ҳамма нарса айланади, сузади, хира чайқалиб турған ёруғликда катта қизил доиралар ҳосил бўлади.

Пъяри гандираклаганича столга яқинлашади, стаканга тўлдириб сув қуяди.

— Ма, ич,— дейди жувон Рустамхоннинг ҳузурига кириб.

— Қаердасан? — аянчли овозда сўрайди баттол, сўнг тирсагига суюниб қаддини кўтаради. Оғриқдан унинг юзи бужмайиб кетади, лекин Пъярининг унга раҳми келмайди. Бу жуни тўқилган, ифлос терили қабиҳ, ориқ ит тишини кўрсатиб ирилламаянти, жилланглаб думини ликиллатяпти.

Рустамхон сувни ичиб, ўзини беҳол қаравотга ташлайди.

Пъяри ўз хонасига қайтиб, у ҳам ётади.

Аёл беҳад ҳориганки! Боши ҳам аллатарзи айланяпти!  
Пъяри йиғлайди.  
Нимага?

Унинг ўзи ҳам билмаяпти: назарида уни тубсиз чоҳга итариб юборишган, эндиликда унга жаханнамдай чиқишнинг иложи йўқдай. У ожиз. Яқиндагинада меҳрдан хурсанд бўлиб чарақлаб турган кўзларидан тинимсиз умидсизлик ёшлари думаламоқда. Ичидан келган бир нидо: «Йиғлайвер, йиғлайвер. Куладиган пайтинг ҳали-бери келмайди!»— деб шивирляяпти.

— Пъяри!— яна Рустамхон чақириб қолди.

Пъяри жим.

— Йиғлайсанми?

— Йўқ.

Пъяри кўз ёшларини артади, қизарган кўзлари билан атрофга аланглайди. Пастки лаби титраяпти, босиши учун лабини тишлашга ҳаракат қиласди.

— Сенга нима бўлди?— Рустамхон тек турмайди.

— Ҳаммаёғим оғрияни.

— Йиғлама, Пъяри, ҳаммаси яхши бўлади.

Ачинишини қаранг! Рустамхон соғлом бўлган пайларида бу хил ачиниш қаёқда эди? Ҳозир эса бу гапни касбдошига бойлик ваъда қилаётган ожиз қашшоқ гапиряпти.

— Эй худойим!— жаврашга тушди Рустамхон.— Бу аёл энг хор табақага мансуб, бироқ Пъярини ўзинг шундай қилиб яратгансан. У мен туфайли шундай азобларга қолди. Уни шу оғриқлардан халос эт. Гўзал жувон дардларини енгиллаштири! У айбдор эмас.— Рустамхоннинг кўзларидан тинимсиз ёш оқди.— Шундай азиатларга индамай чидаётган бу аёл нақадар кўркам, чиройли!— унинг овози бўғилиб қолди.

Пъярининг ҳайрати ошди. Наҳотки шу ҳайвон ҳам одам қаторига қўшилса?

«Касаллик уни не кўйларга солди-я,— деб ўйлади Пъяри.— Тузалганида ҳам шундайлигича қолармикан?»

Пъяри унинг илтижоларига заррача бўлсин ишонмади. Унинг оҳ-воҳ чекишли, худога ёлворишларига қулоқ солса, ҳаммаси ёлғон, мунофиқлик.

Пъяри келиб унинг каравотига оҳиста ўтиради.

— Менга қара, Рустамхон,— гап бошлиди у.

— Нима дейсан, Пъяри?— Рустамхон жимиб қолди.

— Нега оби-дийда қиласан?

— Катта гуноҳкорман.

Пъяри тоқат қилолмади. У ўрнидан туриб, бошини ушлаганича ундан узоқроқ бўлиш ниятида қўшни хонага ўтиб кетди.

Хонада нимқоронғулик ҳукмрон. Деразанинг қалин панжасидан ичкарига сизиб кираётган ёруғлик қоронғилик билан жанг қилаётгандай ўзининг ярқироқ қиличларини санчади.

Намунча чўзилмаса бу кун!

Агар у ҳозир чодирда ётганида, ёнида Сукхрам ўтирганида кўнгли осойишта, бегалва бўларди. Нима учун у ёнида бўлганида ўзини ҳамиша хурсанд, тинч ҳис қиласди? Қачон бўлмасин, бу ҳақда ҳеч ўйлаб кўрганмиди?

Йўқ, илгари бунақа фикр миясига келмаган. Болалар учирган варрак или чўзилгани сингари кунлар кетидан ҳафталар ўтаверган. Кунларни дум-думалоқ тўпга ўхшатса ҳам бўлади: думалайверади, унинг бошланиши ҳам, охири ҳам ўйқ.

Пъяри болалигини хотирлади. Бугун биринчи маротаба онасини, Исилани, уларнинг ўзини жону дилидан севишини эслади. Буларнинг ҳаммаси қаёққа йўқолди. Эҳ, ўшанда қандай қувноқ яшарди! У қизил гулни узиб, соқчиларга қадарди-да, юбкасини баланд кўтарганича рақс гирдобида чарх уради. Саuno унга қиём суртилган, тариқ унidan пиширилган ион берар, у бўлса Бхура билан бирга ўтириб, ўзи ҳам ер, итни ҳам боқарди. Бир куни югуриб келиб эгарланмаган отнинг белига сакраганда, тинчгина ўтлаб юрган от чўчиб қочиб кетган, ўшанда Пъяри қулаб тушган эди. Лекин тариқча ҳам кўрқмаганди. Қани ўша кунлар?

Жамоада бошқа натнилар ҳам яшаяпти, эҳтимол улар баҳтиёрдир.

Илгари Пъяри бошқалар ҳақида ўйламаганди. Ҳа, улар баҳтили, Пъяри билан эса ишлари ўйқ.

Нима учун Пъяри келажак ҳақида ўйлаб кўрмади? Таборда одамлар яшаяпти, бир-бирларини севишаپти, бола туфишяпти, муштлашишяпти, қувноқ ҳазил қилишяпти. У нима учун бу ёққа келди? Ўч олиш учунми? Ёлғиз ҳолда кўп нарсага эришиш мумкинми? Нега Пъяри шунча одамларни ўзининг душманига айлантириб қўйди?

У ҳокимиятга интилди, лекин кишанга эга бўлди, унга, кишанга тушган асирининг начор ғазабланиши қолди, холос... Пъяри яна хотиралар дарёсига шўнгиди. Ёш чоғларида у канжарларга бораради. Пъяри винони, лаззатли таомларни яхши кўрарди. Ўша одамларга ўғирлик қилишда унинг қанчадан-қанча ёрдами теккан!.. У ёшгина канжар аёлни эслади, бу жувон Пъярига даҳицатга соладиган кўпгина воқеаларни ҳикоя қилиб берганди, унда Пъяри ёш қизча эди.

Умрида биринчи марта бирга вино ичишган жазманини хотирлади. Ўшанда икковлари ҳам тезда маст бўлиб қөлишганди, Пъяри кейин ҳеч нимани эслай олмай қолди.

Уша йигит орқасидан кўп эргашиб юрди. Пъяри уни ўзи ташлаб кетди. Йигит эса қизни севарди.

Борди-ю, унинг ёнига қайтиб борса-чи? «Энди мен ёлғизман», деб дадил айтса-чи?

«Сукхрам қани,— деб сўрайди у,— сени ташлаб кётдими? Ушанда сен мени ташлаб кетгандай қилиб-а?»

Уша йигит Пъярини танирмикан? Танир, яна ким билсин. У илжайиб туриб одамларни пичноқлаб қўярди, бу унга одат бўлиб қолганди. Тушмагур шунақаям завқланиб кулардики! Елғонни ҳам қотирарди, буни таърифлашга тил ожиз. Бироқ полициячига кўзи тушиши биланоқ эгасини кўрган итдай жилпонгларди. Унинг турган-битгани қаллоблик. Бунақа одамнинг олдига бормайди!

Қизиқ, унинг хотини бормикан? Ҳозирга келиб ўша хавфхатарларга тўла, қашшоқ ҳаёт Пъярини ўзига тортмоқда. Ушанда у қўл-оёғи боғлиқ эмасди. Эркин қуш эди. Манови касаллик ҳам йўқ эди, оғриқдан тиришиб-бурушмасди. Уша кунларда ҳеч нарсани ўйламай, осуда, тинч яшарди. Виноичарди, рақсга тушарди, ҳар бир хатти-ҳаракатида фақат бир нарсага — баҳт олишга, ҳеч бўлмаса ундан озгина ўғирлашга интилган...

Сукхрам уни ташлади. Меҳр қўйгани бошқа аёлнинг олдига кетди. Бир марта бошига қўнган баҳт қуши энди Қажриники...

Нега?

Чунки бу баҳт илдизига унинг ўзи болта урди.

Қулоқларига яна Рустамхоннинг: «Оллоҳ! Раҳминг келсин!»— деган ингроқ товуши чалинди.

Раҳми келармикан? Раҳми келармикан?!

Кимга раҳми келади? Манови қўтириштагами?

Э худо! Ҳеч вақт! Ҳеч қачон раҳминг келмасин!

Баҳтга қониқмаган чанқоқ унинг юрагини кўйдиряпти. У қалб осойишталигини, камалак рангида товланиб турган гўзаллигини йўқотди.

Ҳаммаси тамом бўлди.

Энди у яккаю ёлғиз! Ожиз, ҳимоясиз, юпанч нималигини билмайди! Ёнида ҳеч кими йўқ!

Пъярига алам ва умидсизлик ғолиб келиб, бошини каравотнинг темир пояснага уриб олди.

Сукхрам ҳаяжонли, жўнгли хира ҳолда йўлда борарди, унинг орқага қайтгиси келди. Пъяри билан қўпол муомалада бўлғанлигини эсласа мутлақо тинчлиги йўқолар эди. Нега унга ҳаммасини силлиққина тушунтирмади? Бир-бирларига аччиқ

қилиб нима дейишган бўлсалар, бунга ҳозир ўзини айбдор ҳисоблайди. У ҳеч қачон Пъярига қўпол гапирмаган эди. Айбдорлик ҳисси Сукхрамнинг оромини бузди. Унинг орқага, Пъяри ёнига қайтгиси келди. Собиқ хотини Пъяри касал. Унинг ёнида ўтириб кўнглини кўтариш керак.

Ҳатто ўзи билан бирга олиб кетишини ҳам айтмади. Наҳотки у тушуниб туриб, бу ҳақда индамаса? Наҳотки Пъяри Сукхрамга ортиқ керак бўлмаса? Даҳшатли фикр! Сукхрам сесканиб кетди. Кажри Пъярининг ўрнини эгаллаганлигини айтиб, жувонга омонсиз зарба беришга юраги дов берармikan? Бордию Пъяри Рустамхоннинг ёнида қолса-чи? Сукхрам уларнинг касалини тузатади. Унда кейин қандай яшаш хусусида бош қотиришга ҳожат қолмайди, ҳаммаси ўз изига тушади. Лекин шу заҳоти Пъярининг қиёфаси янги куч билан Сукхрамнинг онгини эгаллаб олди.

Бир вақтлар у Пъярининг ҳар қандай инжиқликларини кўтарарди. Нега? Сукхрамнинг хотирасида ҳам дадаси, ҳам онасидан жудо бўлган даҳшатли кун тирилди. Ўшанда Пъяридан бошқа ҳеч ким унга ёрдам қўйини чўзмаган эди. Ўшандан бўён жувон ўзини Сукхрамнинг ҳомийси деб ҳисоблаб юрса керак.

Сукхрам Кажри билан Пъярини таққослади.

Ҳа, у Кажрининг хўжаси ва эри.

Пъяри бўлса гоҳ-гоҳидагина уни эрим деб ҳисоблайди, бироқ ҳеч қачон хўжам демайди, унинг ўз ҳимоясига муҳтож эканлигига ишончи комил. Унинг кўнглида Сукхрам ҳали ҳам чодирларига қабул қилинган боланинг ўзи!

«Иккови ҳам бебаҳо хотинлар, аммо феъл-атворлари бошқача», деган хуносага келди Сукхрам.

Сукхрам чекди. Тамаки тутунини бир неча марта ичига чуқур тортса ҳам кўнгли таскин топмади. У қанча ўйга толмасин туйғулари чигал ипларига тобора ўралашаверади.

Унинг кўз олдидаго гоҳ Пъярининг ташвиши, илтижоли қиёфаси гавдаланар, гоҳ Кажрининг меҳр, садоқат тўла қувноқ, баҳтиёр, кулиб турган кўзлари чаракларди.

Сукхрамнинг қалбига нотинч шубҳалар ўрмалаб кирди. У чиндан ҳам ҳар икки аёлни севадими? Уларни алдамаятпимикн?

Сукхрам Рустамхонни эслади. У аянчли қиёфада қўрқиб, инграб худога илтижо қилиб ётибди... Кўпдан бу малъун шундай бўлиб қолдими? Иёқ! Рустамхон бирорвга муте эканлигини сезиз туриби. Аслида ўзи юраксиз, қўрқоқ жон!

Сукхрамнинг миясига, полиция нега бойлар ва зодагонларнигина ҳимоя қиласи? Қимдан? Ўфи, дайдиларданми? Нечун йисон ўгри ё дайди бўлиб қолади? Фақат камбагал бўлгани

учун-да. Уларни ким бу аҳволга солди? Табақа, деган фикр келди кўнглига.

«Мен ҳам хор табақага мансубман,— деб ўйлади Сукхрам.— Оламда полиция билан солдатлар бўлмаса, наҳотки хор табақа ҳокимиятни эгаллаб олади? Ҳокимият бизга нима учун керак? Наҳотки ҳокимиятни шунчалар хоҳласа?» Сукхрам ўзи билгани ҳамма натларни қишлоқ судхўрлари ҳамда браҳманлари билан тақослаб чиқди, фақат тҳакурларгина натлар билан тенг келиши мумкин деган фикрга келди. Юқори табақа одамлари ичида ҳам олижаноблари бўлиши мумкин. Уларда ақл-заковат бор. Натлар эса ёввойи, саводсиз, шаробхўр, бузуқлик кўчасига кирган, каллакесар одамлар.

Демак ҳар ҳолда бизни итоатда сақлаш учун полиция, қурол-яроғ керак экан-да? Бироқ биз шунча, биз бутун армия талаб қиласидиган даражада қўрқинчли одамлармизми?

Сукхрам оддий бир саводсиз одам эди, ҳозирги замон жамиятида адолатсизликни келтириб чиқараётган сабабни тушуниб етолмасди. «Катта одамлар бир-бири билан уришмайди. Нега биз бўлар-бўлмасга пичоқбозлиқ қиласиз, улар қўрқоқ экан-да! Ундай бўлса нега фақатгина ҳокимиятни улар эгаллаб олишган?! Қандай қилиб? Уларнинг олдида Сукхрам деган кимса ким бўпти? Ахир уларнинг қўлида ҳокимият бор!»

Сукхрам ўзи гувоҳ бўлган натларнинг жанжал, муштлашувларини эслади. Улар ўғирлик, мол, аёлларни деб муштлашади. Нега Сукхрам улардақа эмас? У ҳеч қачон уларнинг урфодатлари, ӯдумларига тақлид қилиб ўрганмайди, ҳеч қачон уларнинг ҳақиқий ўртоғи бўлмайди.

Натлар? Шу пайт Сукхрамдаги тҳакурлик нидо берди. Нега у бу қадар тубанлашиб кетди? Нега ҳозиргача хор табақа орасидан кетолмади? Сукхрам тҳакур-куй Тҳакур!

«Ундай бўлса нега ҳар бир полициячининг мени қамаб қўйишга ҳақи бор?»— сўради Сукхрам.

Унга ҳеч ким жавоб бермади.

«Бизни ҳеч ким ҳурмат қилмайди,— Сукхрам ўз-ўзи билан таплаша бошлиди.— Ҳаётда таянчимиз йўқ, ҳеч ким бизга ёрдам қилмайди, ҳеч кимнинг биз билан иши йўқ. Худо меҳрибонми? Аммо у негадир тақдиришимизга аралашмайди. Ҳатто Рустамхоннинг касали худонинг иродаси деб тахмин қилинадиган бўлса, шу билан зўравонлик барҳам топармиди? Топмайди! Парвардигор Пъярини нечун бунчалик омонсиз жазолайди?..

Бизнинг еримиз йўқ, ҳеч вақомиз йўқ.

Биз очиқ ҳавода ухлаймиз, ер қадрдан уйимиз.

Биз оламда бегона ўтдай пайдо бўламиз, худди шундай аёвсиз топталамиз.

Полициячилар ўзларида аёлларимизга эгалик қилиш ҳукуқи бор деб ҳисоблашади, ўз ҳокимликларидан виждонсизларча фойдаланишади. Бизга нима ҳам қоларди?

Ҳеч нима!»

Сукхрамнинг фикрлари тўхтаб, олдинги бошланган жойинга қайтди. У ҳаётнинг аччиқ ҳақиқатини тушунди, лекин бу нотавонликдан қутулиш йўлини билмасди. Қандай қилиб билсин? Фикрлар гангиган миясида чарх урас, онгини тинимсиз галаёнга келтирас, лекин буларнинг замирига етиш ҳолатида эмасди. У фақат ўй сурарди, холос.

«Лнови Банке нақадар ярамас одам!»— деган фикр миясида ярқ этди.

Сукхрам уни эслashi биланоқ виждони қийналиб кетди. Бу ярамас қўрқоқнинг Сукхрамга жавоб қайтаришга ҳадди сифмади. «Кучимни ҳали у билганича йўқ,— деб ўйлади Сукхрам.— Ифлос, ҳайвон!— жирканганидан Сукхрамнинг афти бужмайиб кетди, нафрат билан тупурди.— Ўзини катта одам деб билади!— лекин Сукхрам унга бош эгиш у ёқда турсин адабини ҳам бериб қўяди.— Пъяри бу ярамасни қандай қилиб ёрдамга чақирибди? Нега ўша ернинг ўзида. Пъярининг кўзи олдида Банкенинг пачоғини чиқариб ташламадим?— Сукхрам афсусланиб хўрсинди.— Аблаҳ, ипакдай мулойим бўлиб қоларди!»

Лекин Банке ёлғиз эмас-ку. Рустамхоннинг қўллашини билиб туриб ўзини шундай тутяпти, полициячининг қартадаги ифлос қаллобликларига шерик бўлиб қолди. Рустамхоннинг ортида ҳукумат турибди. Бу фикрдан Сукхрам аллақандай бўлиб кетди.

Ўз ўйларига чўмган Сукхрам чамарлар қишлоғига бориб қолди.

У жой қишлоқнинг ортида. Яқинроқда вилоятга қўшни бўлиб жойлашган бҳангиг<sup>1</sup>ларнинг чўчқалар подаси юрибди. Гарчи ҳамма чамарларни энг паст табақа одамлари деб ҳисоблашса ҳам улар олижаноб кишилар сингаре бҳангиларга худди бошқалардай паст назар билан қарашибади. Улар кўпчилик вақтларини тасодифий ишлар билан ўтказишар, баъзилари қўшни далаларга батраклик қилгани кетишарди.

Чамарларнинг уйлари кичкина-кичкина, атрофлари гувала деворлар билан ўралган. Вақт ўтиши билан қорайиб кетган томлари уларнинг қашшоқликда ҳаёт кечиришидан далолат бериб турибди. Қоринлари шишган яланғоч болалар йўл чангига ўтириб ўйнашяпти. Чамар аёллар дағал зигир газламадан

<sup>1</sup> Бҳангиг — энг қуйи табақа — фаррошлар ва ахлат тўпловчилар табакаси вакили.

юбкалар кийишиб, бошларига қалин, пишиқина, оғир ёпинчиқ ёпинишади.

Сукхрам қуннинг шу пайтида кимсасиз бўлиб қоладиган қишлоққа кирди. Ўўл четларида иссиқдан беҳузур, лоҳас итлар ётибди. Тунги югуриб-елишдан кейин улар ҳозир ором олишяпти. Улар ҳам одамларга ўхшаб табақа тафовутларига амал қилишади, бу ерга бегона итларни қўйишмайди.

Кичкина ибодатхонага кираверишдаги ярим чирик ёғоч кравотда кўзи ожиз кекса чамар ётибди. Унинг териси буришиб, осилиб қолган, бўйнида оғир маржонлар осиглиқ. Эски, йиртиқ дҳоти сонларини аранг ёпиб турибди. Каравот ёнида коқос ёнғори. Ним дараҳтининг сояси чолни жазирама офтобдан сақлаб турибди, у мудраб бир мезерда пишиллар эди.

Чошгоҳ жазирамаси табиатни жиловлаб қўйгандай. Улкан дараҳтнинг япроқлари шивирламайди, унда сукунат ҳукмрон, ана шу сукунат дараҳтдан тушиб, деворларига сариқ бўёқлар билан жасур қаҳрамонлар ва муқаддас анжир дараҳти ёнида турган фил сурати туширилган кулбалар ичкарисига ҳам кириб олгандай.

Ҳар ер-ҳар ерда тезак уюмлари, уларни бирор ўғирлаб кетмаслиги учун ҳафсала билан шакл бериб терилган. Тиканли буталар билан ўралган ахлат чуқурлари ҳеч қачон тозаланмайди. Кулбаларнинг деразалари орқали ичкаридаги бор биссотни, лой билан сувалган пол ҳамда қора деворларни кўриш мумкин. Уй анжомлари йўқ. Чамарларнинг умри ана шундай кулбаларда ўтади, улар қачон бўлмасин ўз маконларидан чиқишини орзу қилишмайди ҳам. Уларга бундай турмуш одат бўлиб қолган. Шунинг учун ҳам олий табақа одамлари истаган ташландиқ ифлос жойни «чамархона» деб атайди.

Қишлоқ марказида каттароқ ва озодароқ уй турибди. Бу қишлоқларда тез-тез чақирилиб туриладиган панчаят<sup>1</sup> йифини учун мўлжалланган: чамарлар кенгашига келганлар уйларидан ёғоч сўрилар олиб чиқишиади, унга панчаят аъзоларини ўтқазишади, ўзлари эса рўпарага ўтириб олишиб, тамаки туташади, уларнинг орқасида юзларини бегоналардан ёпинчиғи билан яшириб хотинлари ўтиришади ё тик туришади. Аёллар кенгашда нима гап ўтаётганини эшитмагандай бир-бирлари билан ўзаро аста шивирлашишади, панчаят тугади дегунча бор овозлари билан ҳақоратли сўзларни айтишади, иш юмдалашишгacha бориб етади, эркакларнинг болохонадор сўқинишлари ҳам бунга қўшилиб кетади. Болалар фурсатдан фойдаланишиб қаттиқ шовқин кўтаришади. Бундай пайтларда бир чеккада тинчгина мудраб ўтирган қариялар ҳам жанжалга

<sup>1</sup> Панчаят — оқсоқолларнинг жамоа кенгashi.

аралашадилар. Улар сўкинишаётган ва уришаётганларни уялтиришади, шунда бутун қишлоқ тўс-тўполон, жанжал уясига айланади. Бу ер кундузи осойишта бўлади. Даладан эркакларнинг қайтиши билан ҳаммаёқ гавжумлашади. Уларнинг йўқлигигда эса аёллар бир-бирлари билан тинчгина суҳбатлашиб ўтиришади.

...Сукхрамга кўзлари тушган аёллар уни бармоқлари билан кўрсатишиб, шивирлаша бошлашдилар. Ёш жувонлар юзларини яширишди, қизчалар эса беркитишмади.

— Ҳой ака, бу ёққа қара,— деб чақиришди улар.— Бу ёққа кел.

Сукхрам жойидан қимирламади.

— Қўрқма, еб қўймаймиз.

— Дхупони қутқарган шу-да!— деди аёллардан бири ба-ланд овозда.

Ҳамма Сукхрамга тикилиб қолди. Одатда уларга ҳеч ким эътибор бермаса ҳам бегона эркаклар турган жойда чамар аёллари ўзини уялиб тургандай тутади.

— Нима деяпсизлар?— сўради Сукхрам.

Лекин унга ҳеч ким жавоб қайтармади. Аёллар ўзаро гап-га тушиб кетишилар.

— Полициячи Дхупони роса хўрлагандир?

— Банке уни урди.

— У йигитга нима, Дхупонинг кими экан?

— Қамбағал камбағалга қайишиши керак.

— Бўлмаган гап! Бекордан-бекорга ҳамма қайишавермайди!

Уларнинг гапига қулоқ солиш Сукхрамнинг меъдасига тегди.

— Ҳой!— қичқирди у.— Валақлашни бас қилинглар! Нега чақириларинг?

Сукхрам бурилиши билан ўзидан бир неча қадам нарида турган Дхупони кўрди.

— Сен?

— Мен. Қўрқиб кетдинг шекилли?

— Нимадан қўрқарканман?

Аёллар Сукхрамга қизиқсиниб кўз тикишди. Нима бўлганда ҳам Дхупо бева аёл. Ким билсин, бу суҳбат нима билан тамом бўлади?

— Опа-сингиллар!— Дхупо аёлларга мурожаат қилди.— Бугун карнат ёнимни олди.

— Э-э, у ҳали карнат экан-да!— деди аёллардан бири жирканиб.

— Ҳа, шунаقا!— Дхупо унинг гапини бўлди. У Сукхрамга миннатдорлик билан тикилди, бир лаҳза иккиланиб туриб ёнига дадил яқинлашди.

— Уяting йўқми дейман? — деди Сукхрам ҳижолат тортиб.  
— Нега уялар эканман? — унинг товушида эътиroz оҳангигянгради.

Сукхрам нима дейишини билмай қолди.

— Сендан баъзи нарсаларни сўраб олмоқчиман,— деди Дхупо.

— Хўш,— деди Сукхрам қатъиятсизлик билан.

— У хотинингми?

— Ким? — қизиқсинди аёллардан бири.

— Пъярида.

— А, Пъяри! У кимнинг пъяриси?<sup>1</sup> — бошқа бир аёл ачитиб чўзид гапирган эди, ҳамма аёллар кулиб юборди.— Илгари уники эди, энди полициячиники.

— Бунақа расво аёлни ер қандай кўтариб юрибди экан-а?

— Наҳотки хотинингдан номус қилмасанг? — сўради Дхупо Сукхрамга астойдил тикилиб.

Сукхрам яна индамади. Нима ҳам дерди: урф-одат, анъана-га кўра, аёл — эркак кишининг мулки.

— Хотини уни писанд ҳам қилмайди,— деди аёллардан бири. Ҳамма аёллар шарақлаб кулишди.

— Эркак киши бўштоблик қилса, хотини учраган одам билан дон олишаверади. У бошқа нима билан ҳам шуғулла-нарди?

— У нимага индамаяпти?

— Нима ҳам дердинг? Бу уларнинг одатдаги касби.

— Наҳотки натларда ор-номус бўлмаса?

— Уларнинг хотини хусусида гап кетганда ор-номус ҳақида қанақа гап бўлиши мумкин? Натни аёлларда ор-номус нима қилсин?

— Натлар энг паст одамлар.

— Ким паст, ким юқори эканлигимизни ҳеч ким билмайди,— деди Сукхрам виқор билан.— Инсон паст бўлиб туғилмайди. Ярамас хатти-ҳаракатлар уни паст қилиб қўяди. Оламда ҳамма тенг. Ҳамма қачондир оламга келади, қачондир уни тарқ қиласди.

— Ҳой, одамлар, бунинг гапига қаранглар,— деди Дхупо қўлларини бир-бирига уриб.— У чинакам пандитнинг ўзи! Хотини бошқаларнинг қўйнига солиб қўйиб, ёнимизга эртак айтгани келибди.

Ҳамма кула-кула қотди.

— Мен бу гапни олам сизларни ҳам паст одам деб ҳисоблагани учун айтдим,— деди Сукхрам ҳижолат бўлиб.

<sup>1</sup> Пъяри — сўз ўйини. «Пъяри» ҳинд тилида исмдан ташқари «маъшуқа», «севикли» маъноларини ҳам билдиради.

— Ҳой карнат, бизлар паст одамлардан эмасмиз,— унинг гапини бўлди қиз неварасини кўтариб олган бир қария. Қизча қаттиқ шамоллаган бўлиб, бурнидан тинимсиз сув оқар, яқинда йиғлагани учун кўз ёшлари изидан юзи кир, кўримсиз бўлиб қолганди.— Биз паст табақа одамларимиз. Ҳудо бизни шундай қилиб яратган. Ҳаммаси олдинги умримиздаги қилмишларимизга боғлиқ. Кишининг гуноҳи қанча оз бўлса, кейинги туғилишида унинг табақаси шунча юқори бўлади, олий табақага етгунга қадар шундай бўлаверади...

Сукхрам унинг гапларига ўйчан қулоқ солди.

— Етар валақлаганимиз!— Ҷхупо аёлларни койиди.— Бу одам бор гапни айтяпти.

— Үндай бўлса уни уйингга олиб кириб нон пишириб бер!— аёллардан бири Ҷхупога гап қистирди.

— Мендан аччиққина қайла олишни ҳам унумта!— деди яна бир бошқаси.

— Ўзингдан қайла тайёрлаб қўймайин,— Ҷхупо унга пўписа қилди.— Тилингни тийиб ўтири, бу яхши одам.

— Кўриниб турибди. Хотини бўйсунмаганидан кейин киши нима ҳам қила оларди?

— Бордию биронтаси билан илакишиб қолсанг эринг нима қиласди?— деди Ҷхупо ачитиб.

— Ҳеч нарса қилмайди,— деди аёл.— Ахир, сенинг эринг йўқ, қўрқадиган жойинг ҳам йўқ.

Дхупо жимиб қолди. Бир оз жим тургач, шундай деди:

— Мен ҳақимда гапириб нима қилардинг? Даврим ўтган.

— Давринг ўтган-ўтмаганлигини Банкедан сўра,— деди яна бир аёл оловга ёғ қуиб.

— Ҳой жигарим,— Сукхрамга мурожаат қилди аёллардан бири,— нега энди Ҷхупонинг ёнини олдинг?

— Ҷхупо — синглим,— деди Сукхрам жиддий тусда.— Ҳаммамиз бир осмон тагида яшаймиз, у дини билан менга ҳам сингил, ҳам дўст. Кимки мени ўз манфаати йўлида унинг ёнини олди деб айтса, уни омон қўймайман! Биз натмиз, паст табақаданмиз, кўп ҳолларда гуноҳ қилиб қўямиз, аммо ҳозир ҳеч қанақа гуноҳим йўқ.

— Нақд авлиёнинг ўзи экан!— деб хитоб қилди бир аёл.— Ҳудо қурбонлик талаб қилганди, у хотиннинг баҳридан кечиб ён бериб қўя қолди.

Ҳамма кулиб юборди.

Сукхрамнинг жаҳли чиқди, лекин индамади. Ҳозир натларнинг урф-одат, қонунлари бошқачалигини буларга тушунтириб бўлармиди! Гап бунда ҳам эмас.

— Ҷхупонинг жазмани йўқ эди, карнатии топиб олибди.

— Кимнинг омади шунчалик юришади!

— Дхупо, энди кўнглинг ўрнига тушгандир?

— Ҳали шошмай туринглар, бир адабларингни бериб қўяй!— аччиқланди Дхупо.— Нима десаларинг ҳам Сукхрам менинг дўстим! У мени ҳимоя қилди! Унинг табақаси билан нима ишим бор?

— Ахир, нега уни уйинга олиб кирмайсан? Ҳимоячингни зиёфат қилгин-да!

— Уша гапнингни яна бир қайтар!— чинакамига жаҳли чиқди Дхупонинг.— Оғзингга қараб гапир. Сенга ҳам, анови Пъярига ҳам яраша ўткир пиçoқ топилиб қолади.

— Афв этишни билмайсанми?— сўради Сукхрам.

— О парвардигори олам, ахир, у мени уришга буюрди-ку!

— Унинг ақлини киргизиб қўяман.

Аёллар пиқиллаб кулишди.

— Ҳой почча! Маслаҳатларинг жудаям керак-да. У шунақа маслаҳатни жон-жон деб кутяпти,— қичқирди аёллардан бири.

— Дхупо, уни кечиргин,— деди Сукхрам ғамгин.— Пъярини кечиргин.

— Нега энди?

— Унинг бола сингари эси йўқ...

— У киши ҳали болами?

— Болани қаранг-а, ўз ноғорасига иккита маймунни ўйнашга мажбур қиласпти!— деб аёллардан бири кулаётган эди, кек-сароғи уни тўхтатиб қўйди:

— Аёлларнинг ақли бор дейсанми? Сен жуда тўғри айтдинг,— деди.

Сукхрам ўша аёлга миннатдорчилик билан боқди. Бошқа ҳеч ким кулишга журъат этолмади.

— Аёлнинг ахлоқи ўзи ётган кўрпага боғлиқ,— давом этди ўша аёл.— Пъярида нима айб? Ҳамма ҳам яхши бўлавермайди. Ҳар бир киши ўз қилмишига жавоб беради.

Яна ҳеч ким унга эътиroz билдирумади. Ҳамма сув қўйган-дай жимиб қолди.

— Тўғрисини айт, синглим,— Сукхрам Дхупога мурожаат қилди.— Пъярини кечирдинг-а? Яна кимда аламинг бор?

— Банкеда.

— Лекин...

— Нима? Қўрқяпсанми?

— Йўқ, лекин полициячи унинг суюнчиғи-ку.

— Эсиз одам!— жизиллади Дхупо.— Оламда яккаю-ёлғиз эканлигимни фақат худонинг ўзи билади, менинг ҳимоячим йўқ!

— Майли,— бош силкитди Сукхрам.— Сен айтганча бўлсин.

Унинг терисини шилиб оламан.

— Мен эса уни майдо-майдо нимталаб ташлайман,— деди Дхупо ва ерга қаҳр билан тупурди.

Шу пайт аёллар бозордан қайтаётган Гиллан чолни кўриб қолишиди, ёшроқ жувонлар уй-уйларга тарқалиб кетишиди.

— Нима бўлди, бў ерларда нима қилиб юрибсан?— чол Сукхрамга савол берди.

— Ҳеч нарса бўлгани йўқ,— юзини рўмоли билан яшириб Сукхрамнинг ўрнига жавоб қилди Дхупо.

— Бугун Банке Дхупони урди,— деди Сукхрам ва чолга бўлгани воқеани батафсил ҳикоя қилиб берди.

— Бутунлай каллангни йўқотиб қўйибсан,— деди чол бесаранжом бўлиб.— Олишган одамингни қара-я! Нима қилганингни тушунмаяпсанми? Бай-бай-бай! Ёшлигимда эртадан кечгача заминдорнинг қўлида ишлардик, финг дегани ҳаддимиз сифмасди. Сизлар бўлса сал нарсага дарҳол бош кўтарасизлар.

— Ҳўш, бўлмаса, биз ишлайлигу бошқалар пулини олсинми?

— Ўғлим, парвардигор туғилишдан сени паст одам қилиб яратган.

— Нега паст бўларканман? Бемаъни ишларни қиляпманми?

— Нега бҳангилар паст одамлар?

— Чунки улар ахлат, нажасларни тозалайди,— деди уларга яқинлашган ёшгица Қачера исмли йигит.

— Сен ўлган ҳайвонларнинг терисини шилиб олмаяпсанми?

— Шундай қилмасак браҳманлар билан тҳакурлар сувларини нимада сақлашади? Ахир, улар сувларини чарм мешкобларда сақлашади-ку! Одамлар оёқларига нима кияди? Биз тиккан чарм туфлиларни киймай нимани кийишади?

— Бҳангилар ахлат билан нажасларни тозаламаса ҳаммамиз бадбўй ҳидлардан бўғилиб ўламиз,— деди чол.

Қачера нима дейишини билмай қолди.

— Бу бошқа гап,— дея олди холос.

— Нега энди?— Гиллан чол тетикикланди. Қалин киприклари орасида ярим юмуқ нурсиз кўзлари бир лаҳзага равшанлашгандай бўлди.— Ҳозир оламда олдинги баҳтдан асар йўқ,— давом этди у,— одамлар ҳаётга бошқача ният билан қарайяпти. Ҳозир жамоада ҳамма пулга сажда қиляпти, илгари барча бирбирига дўст эди. Ҳозир катта одамларни аҳмоққа чиқариб қўймоқдасизлар, илгари эса уларнинг ҳурмати жойига қўйилярди.

— Менга қара, дада. Биз улар учун кечаю кундуз ишлаймиз, улар бўлса аёлларимизга шилқимлик қилишади. Ишлашдан бўйин товламаймиз, аммо аёлларимизнинг номусини булғашларига тоқат қилолмаймиз. Зўравонлар ҳамиша ожизларни дўппослайди. Қария, ўзинг эслаб кўр! Бойларнинг ҳуқуқи катта эди, теримизни шилишарди. Бормасак уришарди. Бироқ замон ўзгариб туради.

— Тўғри, тўғри,— маъқуллади чол.— Ўша улуғ одамлар ҳозир қани? Болалигимда заминдоримиз ўз қўлида юздан ортиқ аскар, мулозимлар сақларди. Ҳаммаси унинг ҳисобидан еб-ичишарди, маст бўлгунча шаробхўрлик қилишарди, ойига саккиз аннадан маош ҳам олишарди. Улар заминдор учун жонини беришга тайёр туришарди. Ҳозирги заминдорлар эса тирикчилигини зўрга ўтказяпти, мулозимлари ҳам ўттизтадан ошмайди. Илгари заминдор уйқудан турганда нофоралар чалинарди. Ҳозир-чи? Ўша дабдабалар қани? Илгари заминдор таҳтда ўтирарди, одамлар етти ёқдан назр-ниёзлар келтиришарди. Буларнинг ҳаммаси қаёққа кетди?

Сукхрам бу гапларга қулоқ солмай ўйлга тушди. Унинг миясида: «Ҳаётда ҳамма нарса ўзгариб кетяптими? Шундай бўлган, бундан кейин ҳам шу такрорланади, унда рожалар ҳам йўқолиб кетадими? Унда кўхна қалъанинг эгаси бўлолмай қолади-ку! Айтишларича, ҳукуматда энди рожалар йўқмиш, уни билимдон одамлар бошқараётганмиш».

Сукхрам муюлишда Банкега дуч келди. Қишлоқ тамом бўлган жойдаги девор ёнида унинг рақиби турарди. Сукхрам оғзидаги сигаретани ерга туфлади. Банкега савол назари билан тикилди. У ҳамлага ҳозирланган ўйлбарсдай шай турарди. Сукхрамнинг қўлида вазмингина таёқ бор эди. У Банкега қараб кулимсиради. Банкенинг эса ғазаби қайнаб-тошди.

— Мен билан учрашишга олдиндан ҳозирланганга ўҳшайсан, қўлингга таёқ ушлаб олибсан?— сўради Банке қаҳр билан.

— Қўрқоқ орқаворотдан ҳамла қиласди,— заҳарханда билан жавоб қайтарди Сукхрам.— Таёқни эса ит, шоқол қўтосларни ҳайдаш учун кўтариб юрадилар.

— Э-ҳа, демак мен ит эканман-да?

— Буни ўзинг айтдинг.

— Ҳозир бошқача ғапириб қоласан!

Банке Сукхрам томон юрди.

— Эҳтиёт бўл, Банке!— огоҳлантириди Сукхрам қўлидаги таёқни маҳкам ушлаб.

Банке таёқ урди, лекин Сукхрам унинг зарбасини қайтарди. Улар бир-бирига бир неча бор ҳамла қилишди.

— Бу ердан қанақасига қочиб кетаркансан, кўрамиз ҳали!— Банке дағдаға қилди.

— Сени у дунёга жўнатмагунимча кетмасам керак!— Сукхрам пичинг қилди, сўнг хужумга ўтди.

Банке ўзини йўқотиб, орқага тисарилди, шу пайт девор устидан яна бир барзангидек йигит сакраб тушди.

— Орқасига ўт!— қичқирди Банке, девордан тушган йигитга.

Банкенинг шериги бўкирганича Сукхрамга ташланди. Сукхрам ҳужум усулини ўзгартириб, ўзини четга олди.

— Йкковинг ҳам пасткаш қўрқоқлар сингари жанг қиляпсан. Нега яккама-якка чиқишмаяпсанлар?

— Нега рожа атрофига бутун бир қўшинни тўплайди?

— О, ҳали рожаликни ҳам даъво қиляпсан шекилли сен ит?

— Қани, эҳтиёtingни қил!

Банке таёфини ўйнатиб яна ҳужумга ўтди. Сукхрам пайт пойлаб, шеригини итариб, Банке зарбига рўпара қилди. У ерга йиқилди. Сукхрам кулди. Шу аснода девор ортидан аёл киши мўралади.

— Ёрдам беринглар! Ёрдам беринглар!— деб қичқирди бўлаётган воқеани кўриб.— Бир одамга икки киши ҳужум қиляпти! Ёрдам беринглар! Ўлдириб қўйишади!

Аёлнинг овозига одамлар чопиб келишди.

Ҳавода яна таёқ айланди, бу сафар Банке чап беролмади, Сукхрамнинг зарби билан ерга йиқилди. Шунда бурчакда таёқ билан қуролланган яна тўрт киши пайдо бўлди. Сукхрам тўртталаси билан олиша бошлади.

Шармандаси чиққан Банке тобора авж олаётган жангни қаҳр билан кузата бошлади. Куч тўплаб ўрнидан туришга уринди.

— Ҳой, шошилма!— деди дастлаб рўпара келган боғбон хотин ачитиб.— Олдин иштонингни кўтариб ол!— Аёллар кулиб юборишли. Банке қўлида таёқ билан яна Сукхрамга ташланди, лекин Сукхрам шунақаям зарб билан урдики, унинг таёфи икки бўлиниб кетди. Банке ўзини четга олди, лекин унинг ўрнида таёқ ушлаган етти йигит пайдо бўлди. Банке аламига чидомлай лабларини тишлади. Сукхрамни еттовлон ўраб олди. У танг аҳволда қолди. Рақибларининг зарбасини қайтаришга аранг улгуар, ўзи эса ғазабланган йўлбарсдай у ёқ-бу ёққа ташланарди. У эпчилик билан рақибларининг иккитасининг қорнига тепиб қулатди. Учинчисининг бошига зарб билан таёқ туширди, аёлларнинг ҳаваси келиб, ҳаммаси унинг томонига ўтди. Улар кўз узмай жанг боришини кузата бошлашди. Натнинг ҳаракатларидаги эпчилик ва чаққонлик аёлларнинг завқини келтирди, унинг енгишини тилаб қолишли: бу қадар қўрқоқлик қилган Банкени эса масхара қилиб кулиши. Қолган тўртта йигит Сукхрамнинг белидан пастига таёқ тушириш пайига тушиб қолиши. Сукхрам таёфини ўзи атрофида айлантирди. Рақиблардан бирининг таёфини уриб синдириди, уни оёғи билан босиб, сафдан чиқарди, бошқасининг таёфини уриб, қўлидан учириб юборди, таёқсиз қолган йигит оёқ устида туромлай йиқилиб тушди. Энди Сукхрамнинг рўпарасида икки киши қолганди.

— Ана буни эркак деса бўлади! — завқланиб қичқирди боғон хотин. — Бунақа йигитни севиш ҳам гуноҳ эмас. Мен унинг дуюй жонини қиласман! — у тилини такиллатди. — Нақадар зўр йигит! Бешта ярамасга бас келиб, уларнинг пачоғини чиқарди!

— Қаёққа! Тўхта, ҳеч қаёққа қочма! — қичқирди Банке ўз одамларига. — Уни ўраб олинглар! — У ердач тағини олди. — Бироитанг қочиб кўргин-чи! — дағдаға қилди у.

— Ярамаслар! — ув тортиб йиглади боғон хотин. — Еттовори бир кишига ташланиб яна қўрқишияпти! У ҳозир адабларингни беради!

Сукхрам қулочкашлаб Банкенинг орқасига таёқ туширди. У инграб йўлдаги тупроқ устига ўтириб қолди.

— Мановини зарба деса бўлади! — бир неча аёл бараварига хитоб қилди.

Бу орада Банкенинг шериклари бир оз ўзига кела бошлишди. Баъзиларни ўрнидан турди ҳам. Бири ёрдамга одам олиб келгани кетди. Сукхрам қутулар эканман-да, деб турганда ўзи томон чопиб келаётган беш кишини кўриб қолди. Сукхрам бир лаҳзага гангиди қолди.

— Ҳой, ҳаромилар! — қичқирди аёлардан бири, — уятларинг ҳам йўқ экан! Авлод-аждодларинг билан келган экансандар-да!

— Буни қара-я, онасининг ўйнашларини ҳам йигиб келибди, — сўқинди боғон хотин. — Биттасини ҳам қолдирмапти-я!

— Ҳой, Банке, ҳаммасининг худойисини бир йўла қиласанми?

Аммо аёлларнинг товушида ташвиш оҳанги ҳам йўқ эмасди. Сукхрам ҳаммасига бас кела олармикан? Лекин аёлларнинг қўллаб-қувватлаши Сукхрамга куч-қувват бағишилади. У шунақаям астойдил уриша бошладики, Банкенинг ҳайратдан кўзлари олайиб кетди. Аёллар уришатганлар атрофида ўралашиб юрган болани имлаб чақиришди, қулоғига бир нималарни шивирлашди, бола чамарлар қишлоғига қараб чопиб кетди.

Банке ҳам ишора қилди, шериклардан учтаси Сукхрамнинг орқасига ўтишди.

— Эҳтиёт бўл, ботир йигит! — аёллардан бири қичқириб уни огоҳлантириди. — Учта шоқол орқангдан келяпти!

Сукхрам яшин тезлигига орқасига ўгирилди ва уларга ташланди, улар жуфтакни ростлаб қолишли. Банкенинг аёллар олдида ҳурмати бир пул бўлди.

— Минг лаънат ҳамманга! — шерикларига ёпишли Банке. — Битта йигитни бир ёқлик қилолмайсанлар! Ҳеч бўлмаса бирор марта таёқ тушира олмадинглар.

— Ҳа, гўдак, йифи бошладингми? — деб Сукхрам кулди.

Шу пайт бурчакдан чамарлар қораси кўринди. Банке тарафдорлари орасида саросималик бошланди, унинг ўзи ҳам жуда қўрқиб кетди. Сукхрам олдинга ташланиб, Банкенинг таёгини уриб туширди. Таёксиз қолган Банке ялинди:

— Раҳминг келсин! Бундан кейин мулозиминг, қулинг бўламан!

Чамарлар тобора яқинлашиб келишди.

— Етиб келишди!— хурсандлигидан бақириб юборди боғбон хотин.— Сукхрамнинг одамлари келишди! Унинг дўстлари келишди!

Сукхрам сесканиб кетди, рақибларини эътибордан қочирди. Банке қўрқувдан капалаги учиб кетган шерикларига ишора қилди, улар ҳам бунаقا қулай фурсат бўймаслигига ақллари етди. Еттовлари бараварига Сукхрамга ташланишди, етти таёқ унинг боши ва орқасига бараварига тушди.

Сукхрам йиқилди. Банке билан шериклари қочиб кетишаётган эди, чамарлар етиб келишди. Яна таёқбозлик бошланди. Банкенинг тарафдорлари олазарак бўлиб атрофга боқишар, лекин қутулишнинг иложи йўқ эди.

— Ҳа-ҳа, қўрқоқлар! Қочиб қолмоқчимисанлар?— деди бор овоз билан боғбон хотин.

Чамарлар билан бирга Дхупо ҳам чопиб келди.

— Уларни қуршаб олинглар!— қичқирди Дхупо.— Улар акамни ўлдириб қўйишибди!!! У мени қутқарип қолганди! Менинг ор-номусим — сизнинг ҳам ор-номусингиз!

— Уларни қуршаб олинглар, қуршаб!— қувватлашди чамарлар ҳам.

Бақириқ-чақириқлар борган сайин кучая борди.

Ниҳоят чамарлар Банке билан унинг шерикларини қалин девор бўлиб қуршаб олишди. Ҳар томондан қисилиб, тор ҳалқа ичида қолганниклари учун улар таёқларини ишга солиша олмади.

— Акам ўлдирилибди! Улар уни ўлдиришибди! Ёрдам беринглар! Ёрдам беринглар!— Дхупо тинимсиз бақира бошлиди.

Чамарлар бунингсиз ҳам Банкени кўргани кўзлари йўқ эди. Улар уни аёвсиз савалай бошлашди. Шериклари ҳам қуруқ қолишмади. Банкени лойга булғашди. Ҳар ким унга таёқ туширишни ўзининг бурчи деб билди. Банке доддлаб йиғлади. Ниҳоят чамарлар калтакланган, қонга беланган Банкенинг шерикларини қочиб кетишига имкон беришди, ўзини ушлаб қолиши. Дхупо эркакларга яқинлашди.

— Унинг оғзига лой тиқинглар!— деб буюрди.

Чамарлар Банкенинг оғзига лой тиқиб тўлдиришибди. Дхупо эса унинг башарасига бир тепди.

— Қаранглар, у қўлини ҳам қимирлатяпти,— ажабланди чамарлардан бири.

— Бу ифлоснинг қўлини кесиб ташлаш керак!— таклиф қилди кимдир.

Қҳачера силтаб Банкенинг қўлини орқасига тортди. Банке эса оғриқдан ингради.

— Дхупонинг оёқларига йиқилиб, кечирим сўра!— қичқиришди чамарлар.

Лекин Банке қимирламади. Шунда чамарлардан бири унинг орқасига бор кучи билан тепди. Яна бир тепки Банкенинг кўзи тагига тушди. У шалпайиб жимиб қолди. Уни Дхупонинг оёқлари остига ташлашди.

Чамарлар бир оз совуб ҳовурларидан тушишди.

— Сукхрамни бутунлай унугиб қўйибмиз-ку!— қичқирди боғбон хотин.

Дхупо Сукхрамнинг у ёқ-бу ёғини кўздан кечирди. Унинг ёрилган бошидан қон оқарди.

— Оҳ, акажоним!— у кийим-бошларини олиб ҳўнграб юборди.

— Нега йиглайсан?— Гиллан чол унга ўшқириб берди.— Тирик одамга аза очиладими?

Бу орада қария Сүгго ҳам инқиллаб-синқиллаб етиб келди. Бу аёл фавқулодда ҳодиса юз берган жойда тўсатдан пайдо бўлиб қолиш одати билан маълум-машхур эди. У соchlарини ёзib афсун ўқишига тушиб кетди.

— Ў ўлгани йўқ,— деди Сукхрамни кўздан кечириб.

— Тирик қоладими?

— Ҳа.

— Каравот келтиринглар!— бақирди кимдир.

Каравот келтириб, унга Сукхрамни ётқизиши. Одамлар уни кўтариб йўлга тушиши. Сукхрамни таёқлар билан ҳуролланган эллик ҷоғлик чамарлар кузатиб бориши.

Банке ўзига келиб аста чеккароққа қараб ўрмалади. Ҳеч ким унга эътибор бермади. Шунда у ўрнидан туриб, туртила-суртила қоча бошлади.

— Ҳой, анови илон қимирлаб қолдй!— Қичқирди боғбон хотин.— Яна чақиб олмасин!

— Ҷақишига уриниб кўрсинг-чи!— жаҳл билан хитоб қилди Қҳачера.— Уни тириклайн куйдириб ташлаймиз!

Қҳачера унча ақлли эмасди, лекин ёш, бақувват, одамшаванда эди. Унинг ана шу хислатларидан фойдаланган ақлли, муғамбир қишлоқ оқсоқоллари уни ибодатхона тўрига ўтқазишиб, ҳурматини жойига қўйишар, кейин қишлоқдаги сон-саноқсиз жанжалли баҳслашувларга аралаштиришарди. У ўз жамоасидагилар билан ҳам, бошқалар билан ҳам тўқнашар,

уларни ҳақоратлар, пул жарималарини тўлашга мажбур қиласди. Бу қишлоқ оқсоқолларига қўл келар, пулни ўмариб қолишарди. Бироқ аслида Қҳачера ёмон йигит эмасди.

Йўлда кимдир гап қотди:

— Сукхрамни уйига етказгунча анча қон кетади. Жароҳатини боғлаб қўйсакмикан.

— Бир парча шойини куйдириб, ярасига босиш керак.

Ёшгина бир жувон ёпинчигини узатди. Ёпинчиғи янгигина экан.

— Панчаят ҳимматингга яраша ҳақ тўлайди,— деган овозлар эшитилди.

— Кўйсанглар-чи, кераги йўқ. Дхупо ҳам менга ўхшаган аёл. У менинг опамдек бўлиб қолган. Унинг ор-номуси — менинг ор-номусим. Ёпинчиқни эса бошимдаги соҳибим олиб берар.

— Тўғри, тўғри,— деб ваъда қилди эри бир оз иккиланиб тургач.

Ёпинчиқни куйдиришди. Ёнаётган шойидан атрофга нафасни қайтарадиган тутун тарқади.

— Э-э, шойи қалбакига ўхшайди,— кимдир шубҳа билдириди.

— Бизда асл шойи қаёқдан бўлсин!— деди ёпинчиқ берган аёлнинг эри хўрсиниб.

Чала куйган матони кули билан ярага босишли.

Қаравотни кўтариб, яна йўлда давом этишди. Эллик киши қўлларида таёқ билан Сукхрамни зич ҳалқа бўлиб қуршаб, ёнма-ён кетаверишди.

Аёллар ҳаккадай шовқин кўтариб боришиди. Богбон хотин ҳаммани оғзига қаратди. Сукхрамнинг беқиёс ботирлиги ҳақидаги ҳикояларини эшитиб, ҳайратдан одамларнинг оғзи ланг очилиб қолди. Эрракларнинг кўзларида ҳатто ҳасад маъноларини кўриш мумкин эди, бироқ улар юраги билан Сукхрамни ёқлашди. Улар таёқлар билан қуролланган бир тўда ярамасларга бас келиш осон эмаслигини тушунишарди.

Богбон хотин тинимсиз жаврарди.

Бу янгилик яшин тезлигига атрофга тарқади. Бу пайт бозорда ов қилиб юрган Мангу ҳам бундан хабардор бўлди. Унинг ёнида тўрт нафар нат бор эди.

— Ким, Сукхрамми?— қайта сўради у.

— Ҳа-ҳа, у ярадор.

— Ким уни яралади?— сўради Мангу, аммо жавоб кутиб ўтирмай чамарлар қишлоғи томон югуриб кетди. Йўлда Сукхрамни кўтариб келаётган одамларга дуч келди.

— Тўхтанглар, оғайнилар! Буёғига ўзимиз кўтариб кетамиз.

- О, бу Мангу-ку! — деди кимдир.
- Эшитяпсизларми, унинг қабиласидан одамлар келишиди.
- Каравотни аста ерга қўйинглар!
- Эй, Мангу, эҳтиёт бўл, у кўпгина қон йўқотди.
- Ҳечқиси йўқ, кўтариб кетамиз.
- Чамарлар орқага қайтишди.
- У шердай олишди! — деди Қҳачера хайрлашаётib.
- Биламан, — деди Мангу. — У ҳамма натларнинг фахри.
- У умрида бир марта ҳам ўғирлик қилмаган, — деди бошқа бир нат гапга қўшилиб.
- Яхши одам, — деди учинчи нат.
- Эркакларнинг кўзи намланди, кўз ёшларини яшириш учун тескари ўғирилиб олишди. Қҳачера чамарларга етиб олиш учун чопди. Мангу билан шериклари каравотни кўтаришди.
- Ишқилиб тирик етказиб борайлик-да.
- Ҳаммаси оллонинг қўлида.
- Охирги умид — унга ишониш.
- Натлар ўзаро суҳбатлашиб каравотни кўтариб боришиди.
- Сукхрам ҳануз ўзига келмасди.
- Ишқилиб, Банкенинг одамлари бизга ҳужум қилиб қолмасин-да, улар ўн кишича бор экан.
- Унда у ёлғиз эди, ҳозир тўрттамиз, — уларни руҳлантириди Мангу.
- Охирги нафасгача олишамиз!
- Сукхрамнинг устига ёпилган мато қон доғидан қизариб кетди.
- Боғбон хотин Сукхрамнинг фурсатни бой бериб қўйганини айтди. Орқага ўғирилиб, Банкени унутиб қўйибди.
- Ҳақиқий йўлбарс! Бир марта унинг олдида бош эгган эдим, — деди Мангу завқ билан. — Унинг қалби ҳам кенг. Фақат унинг шарофати билангина Рамонинг келини хотиним бўлди, бўлмаса сўққабош бўлиб ўтиб кетардим.
- Улар таборга кириб боришганда Кажри чодирда юбка тикиб ўтиради.
- Кажри бугун ўта баҳтиёр эди. Янги кийимларни кўрган са-ри севинчдан юраги дук-дук уради. Ниҳоят бошидаги соҳиби — эри олиб берган янги кийимларни киядиган бўлди.
- Чиндан ҳам муҳаббат рамзи сифатида эр янги кўйлак ха-рид қилса аёл киши ўзини баҳтиёр деб билади ва бундай буюмларнинг ҳар бири баҳоси билан эмас, балки эрининг муҳабба-ти билан азиз, мўътабар бўлади.
- «Суюкли эри олиб берган янги саруполарни эгнимда кўриб Пъяри нималар дер экан! — деб ўйлади Кажри. — Аммо у алвасти жуда муғамбир! Сукхрамнинг кўнглини юмшатиш учун ийғлайди. Ўшандада унга кўрсатиб қўяман!»

Кажри мамнун жилмайди. Ўз отининг бир ўзи чаққон чопиб кетаётганини кўриш бошқа, лекин бошқа отларни қувиб ўтиб мэррага энг олдин келишини кўриш — бу бутунлай бошқа масала.

Кажри ўз уйининг чинакам бекаси бўлгандан ғуурланиб кетди. Чунки эгнида гуноҳга ботиб топган пулига эмас, эрининг пулига харид қилинган кийим яшнаб турибди.

«Сукхрам қайтиб келса,— деб ўйлади Кажри,— янги саруполаримни яшириб қўяман. Вақтидан илгари кўрсатмайман, Пъярининг ёнига борадиган куним янги кийимларимни кияман. У роса куяди-да! Майли! Ҳасаддан ёрилиб ўлсин! Ундан қўрқадиган жойим борми?»

Кажри кўзларини юмиб хаёлга бефилди. Сукхрам! Ҳақиқий эр йигит! У ботир, қўрқмас! Унинг қаршисида бош эгади, Сукхрам уни кафтида кўтаради. Кажри хўрсинди.

Худди шу пайт ташқарida шовқин эшитилди.

## 16

Мангубилан шериклари каравотни чодирга киравериш жоийига қўйишди.

— Ҳой, Кажри! — чақирди Мангуб.

— Ким у? — сўради Кажри.

— Бу ёққа — ҳузуримизга чиқ,— деди Мангуб бўғиқ товуш билан.

— Нима керак ўзи, гапиравер. Мен бандман. Янги юбка тикияпман.

— Ҳар бир дам ғанимат,— Мангунинг товушидан ташвишланётгани баралла сезилди,— чиқ бу ёққа.

Кажри чодирдан чопиб чиқди. Унинг рўпарасида тўрт киши турарди.

— Нима гап ўзи?

Эркаклар тўсиб тургани учун у каравотни кўрмади.

— Нимага индамай турибсизлар? — Кажри ҳайрон бўлиб сўради.

Мангубўстлари билан кўз уриштириб олди. Улар ерга қарашди.

— Нима бало, оғзиларингга талқон солиб олганмисизлар? — Кажри ачиқлана бошлади. — Ё гапиролмайдиган қилиб оғзиларингни тикиб қўйишганми? Отаси ўлган одамдай бошларингни эгиб турибсизлар?

Шунда Мангубўзини ён томонга олди. Кажри эркакларни итариб каравотда ётган, устига чайшаб ёпилган одамни кўрди. Чойшаб қондан қизариб кетибди. Кўнглига келган даҳшатли ҳисдан юраги эзилиб кетди. Эри!!!

У чойшабни тортди. Сукхрам! У ҳали ҳушига келмаганди, унинг ярасига кул қўйиб, каравотга ётқизилган пайтдаги сингари ранги оқ эмас эди. Кажри қотиб қолди, лекин ўша заҳоти ўзини қўлга олди. Кажри қўлини эрининг оғзиға олиб борди, билинчар-билинмас нафас олаётганини сезди, унинг кўзини очиб, Сукхрамнинг тириклигига батамом ишончи комил бўлди.

— Уни ким шу қўйга солди? — бўғиқ овозда сўради у.

— Ташвишиланма, синглим,— деди унга Мангу.

Лекин Кажри қулоқ солмади.

— Ким деб сўраяпман? — Кажри унинг гапини бўлди.

— Сенга ҳаммасини оқизмай-томизмай айтиб бераман,— Мангу шошиб қолди.

— Айтишга кейинроқ улгурасан,— гапга аралашди натлардан бири.

— Ҳой, Найкас, югур, Чандонни бу ёққа айтиб кел. Ҳозироқ унинг ярасини боғлаш керак.

— Тўғри айтдинг,— уни бошқа бир нат қувватлади.— Аёл киши бир йиғига тушса тўхтатиб бўлмайди. Бунақа пайтнинг нозиклигини улар билишармиди!

Найкас чопиб кетди.

— Бу Банке билан унинг шерикларининг иши, Кажри,— деди Мангу.

— Ҳа, уларнинг иши,— бош қимирлатиб, тасдиқлади бошқа нат.

— Галинг ростми?

— Ҳой, хотин, мени аҳмоққа чиқарма!

— Нега унга ёрдамлашмадинг?

— Мен бозорда эдим.

— Демак, Банке! — Кажрининг кўzlари совуқ чақнади.

— Унинг ёнида камида ўн киши бор эди,— деб қўшиб қўйиди бошқа бир нат.

— Банке! — деди Кажри яна.

— Нега «Банке, Банке» деб такрорлайверасан? — Мангунинг жаҳли чиқди.— Яхшиси Сукхрамга қарасанг-чи.

Кажри уйқудан уйғотилгандай чўчиб кетди. У титроқ қўллари билан Сукхрамнинг юзларини силади, яна карахт бўлиб қотиб қолди. Даҳшатдан танаси ҳиссиз бўлиб, кўзларини катта очганича Сукхрамга тикилди.

— Қўлларнга ҳам қара! — деди Мангу.

Кажри яна ўзига келди. У эрининг кафтларини ёзиб қаради.

— Жуда кўп қон кетибди! — деди Кажри, сўнг ҳўнграб йиғлаб юборди.— Сукхрамгинам.

Мангу ҳам ўзини йиғидан аранг тутиб турди. Кажри кўзиға шунақаям ожиз, муштипар кўриниб кетдики! Фақат кўз

олдида ини ва полапонлари бўлган дарахтни кесиб юборишганда она қуш ана шундай аянчли қичқириши мумкин.

— Йиглама, Қажрӣ,— натлар уни юпата бошлашди.

— Йиглайвер, анча енгил тортасан,— деди бу ерга етиб келган Мангунинг хотини.

Чодир ёнида бутун жамоа тўпланди.

— Банке билан ҳали ҳисоб-китоб қиласиз!— деб қичқириди кимдир.

Меҳтарлар<sup>1</sup> табақасидан Чандон етиб келди. У воқеадан хабардор эди. Қажри Сукхрам устидан қаддини кўтарди, Чандонга илтижо умидсизлик билан тикилди, оёқларига қўл тегизди.

— Жон отажон! Ялинаман, уни, менинг баҳтимни қутқариб қолгин!— Қажри яна йигига тушди.

— Куйинма, қизим! Қани, мен уни бир кўрай-чи!

Мангунинг хотини Қажрини Сукхрам ёнидан нарига олиб кетди. Чандон ярадорни диққат билан кўздан кечирди, томир уришини аниқлади.

— Ҳечқиси йўқ. Яшайди,— деди у.

Шунда Қажри яна ўзини унинг оёқлари остига ташлади, кейин ўрнидан сапчиб туриб, чодир ичига чопқиллаганича кириб кетди. Ҳамма пулларини йиғиб, икки рупияни санаб Чандонга олиб чиқди.

— Отажон, миннатдорчилигимни қандай изҳор қиласам экан? Кейинги ҳамма туғилишларда чўринг бўлсан ҳам<sup>2</sup> сендан ажралмайман. Ҳозирча манови пулларни ол, эрим тузалгандан кейин уйингга шириналклар ҳам олиб бораман.

— Ташвиш тортма, қизим, ўрнингдан тур, яхиси, унинг ярасини қайта боғлаб қўяй.

Чандон ўз иши билан банд бўлди. Қажри Сукхрамнинг кийимларни алмаштириди, тозагина ўринга ётқизди. Кейин Сукхрамни солиб келинган карвотни яхшилаб ювиб, чамарлар қишлиғига жўнатиб юборди.

Чандон ҳамма зарур ишларни қилиб уйига кетди. Тўпланган натлар ҳам уй-уйларига тарқашди. Сукхрам сал қимирилаб ингради. Мангунинг хотини Сукхрамга сув ичирди, у яна ухлаб қолди.

Қажри енгил нафас олди.

<sup>1</sup> Меҳтар — баҳнги табақасидагиларнинг иккинчи номи.

<sup>2</sup> Кейинги ҳамма туғилишларда чўринг бўлсан ҳам — Индуизм диний тасаввуринга кўра, барча тирик жонзорлар ҳадсиз қайта туғилиш занжирига боғлиқ бўлиб, ҳеч қачон мавжудот айланаб туришдан тушиб қолмайди. Кейинги туғилишда киши қиласан яхшилиги ё ёмонлигига қараб турли хил қиёфада, чинончи инсон, ҳайвон, ҳашарот бўлиб дунёга келиши мумкин.

- Улар күпчиликмиди? — сўради Кажри.
- Ўн кишидан кам эмасди.
- Раҳмат сенга, Мангу,— Кажри миннатдорлик билан эгилаб, унинг оёқларига қўл тегизди. Сукхрамни деб у бутун жамоанинг оёғига йиқилишга ҳам тайёр эди.
- Нималар қиляпсан? — Мангу хижолат бўлди.— Мен эринг эмасман-ку. Сукхрамнинг олдида эса қарздорман.— Мангу чекди.— Кажри,— завқ билан хитоб қилди у,— Сукхрам ҳақиқий эркак!
- Бўлмасам-чи! — Кажри хурсандчилигини яширолмай беихтиёр жилмайди.
- Энди участкага шикоят билан мурожаат қилишинг керак,— деди Мангунинг хотини.
- Шикоят қилишга арзийдими? — бу ишдан ҳеч нарса чиқмайди деган маънода Мангу қўл силтади.
- Хўш, Кажри индамай қолаверсингми? — деди хотини ўзини қўярга жой тополмай.
- Полиция Банке томонида. Наҳотки буни билмасанг?
- Ахир, у ярадор-ку! — аччиқланди Кажри.
- Банке ҳам ярадор!
- Тўғри,— маъқуллади Мангунинг хотини.
- Банке аллақачон участкада ҳам бўлгандир,— деди Мангу.— Рустамхон у томон, шунинг учун ҳам шунчалик сурбетлашиб кетган.
- Мангунинг гаплари Кажрининг жаҳлини баттар авж олдирди.
- Шикоят қилиш учун,— деди Мангу,— врачдан қофоз керак, врач эса пора талаб қилади. Врачга пул йиққунингча Сукхрам пут қоқади.
- Тилингга куйдирги чиқсин, бадбахт! — қичқирди Кажри.
- Доктор борини ззиб беришига ишонса бўладими? Унга фақат пул керак. Будхува воқеаси эсингдами?
- Унутиб бўлармиди уни! Шикоят қилиш камбағалларнинг иши эмас.
- Демак, ҳеч қанақа илож йўқ экан-да?
- Ҳозирча йўқ.
- Кейин-чи?
- Ишлар бости-бости бўлсин!
- Унда нима бўлади?
- Ҳой аёл, ўшанда мени ҳам натни туққанини билдириб қўйман,— деди Мангу маънодор қилиб.
- Ташиб қилма, Қажри! — Мангунинг хотини унинг бoshини силади.— Ёлғиз эмассан. Бунинг учун ўч олиш керак, тўғрими? Лекин аввал эринг тузалсин. Ўшанда ўч оловчилар икки киши бўлади. Иккита-я! Кейин сен билан мен ҳам бормиз.

— Банке ҳам қилмишига яраша жазо олади! — деди Мангу, қўлини Банкега пичоқ сукқандай қилиб силтаб қўйди.

— Эрим ҳам бўш келмайди, — деди гуурланиб Мангунинг хотини. — Озгина сабр қил, ҳаммаси кўнгилдагидек бўлади.

— Кутиб ўтиришга вақтим йўқ! — деди Қажри кескин.

— Нима қилмоқчисан? — Мангу безовталанди. — Участкага бормассан ҳар қалай?

— Мангу, менга бир яхшилик қил!

— Олдин саволимга жавоб бер, кейин иш ҳақида гаплашайлик. Ҳозир участкага борма. У ерда сени калтакдан бошқа ҳеч нарса кутмайди. Полициячи сени савалашга буюради, қамаб қўяди. Бунинг устига ёш аёлсан. Ундан осонликча қутулмайсан. Кейин кимга шикоят қилиб борасан? Уларнинг бўшлиғи ким ўзи?

— Ҳой, Мангу, бир оғиз гапирай!

— Қулоқ солайлик-чи, нима деркин! — гап қистирди Мангунинг хотини.

— Майли, гапирсин.

— Меи кетаман.

— Қаёққа?

— Кейин биласан.

— Қайтмасанг сени қаердан ахтарамиз?

— Қўрқманглар, ўзим қайтиб келаман, — шундай деб Қажри ўрнидан қўзғолди, ердаги ханжарни олиб, юбкасининг қатига яширди. Үнинг хатти-ҳаракатларида осойишта қатъият бор эди. У остоная боргандা орқасига ўгирилди. — Ҳой опа, орқамдан эргашма, Сукхрамнинг ёнида ўтири. Тезда қайтиб келаман.

— Қаёққа кетяпсан? — Мангу гапга аралашди.

— Бирорнинг ишига аралашма. Қаёққа бўларди? Ҳеч кимдан қўрқмайдиган жойга кетяпман.

— Бунга ишончининг комилми? — сўради Мангунинг хотини.

— Ҳа, — деди Қажри қатъий қилиб.

— Ихтиёринг, — Мангу қўл силтади, норозилик билан бош чайқаб қўйди.

Қажри кетди.

Кеч кира бошлади. Пода қайтиди, йўл чанги ҳаракатсиз ҳавода айланана-айланана, аста-секин йўлга қўнди. Атрофдаги ибодатхоналардан қўнғироқлар товуши тараалди. Паркнинг қалин яшиллигида мудраётган қоронғулик уйғона бошлади, унинг дастлабки элчилари — қора соялар йўл бўйлаб тез суз заверди. Қажри оқ қасрга етгандан кейин катта йўлкага бурилди.

Бир неча лаҳзадан сўнг у Рустамхоннинг уйи олдида пайдо бўлди.

Даставвал Қажри қўрқувга тушди, лекин тезда ўзини ўнглаб олди ва ҳовлига кирди.

Пъяри уни дарвозадан кираётганидаёқ пайқаганди, кечки қоронғиликдаги аёл қорасини қўрганди. «Бу ким бўлдийкин?— ҳайратга тушди у.— Наҳотки Рустамхон бошқа бир аёлни топиб олган бўлса?» Пъяри ташвишланди. Номаълум аёл ҳамон яқинлашиб келарди.

Пъярининг чакка томирлари лўқиллай бошлади. Натни!

— Қимсан?— сўради у.

— Ислим Қажри.

— Қажри!!!— хитоб қилди Пъяри.— Бу ерда нима қилиб юрибсан?

— Қўрқиб кетдингми?

— Сендан қўрқиб зарур кептими?— Пъяри нафрат билан сўз қотди.

— Албатта қўрқмайсан! Эндиликда сен зодагон хонимсан!

— Тилингни тий!— унинг сўзини кесди Пъяри.— Гапир, нега келдинг?

— Айтаман, албатта, айтаман, улуғ маликам. Фақат марҳамат қилиб, ўзингни босиб тур.

— Нима гап ўзи?

Қажри аччиқлана бошлади. Бу ёқقا келиш осон бўлибдими, бунинг устига бу аёл ғашини келтиряпти! Қажри ғазаби тошганидан чўғ бўлиб ёнди.

«Чиройли экан»,— деб ўйлади кундошига диққат билан назар ташлаган Пъяри.

«Бу истаган эркакнинг бошини айлантиради, худо уни ҳуснidan камситмабди»,— деб ўйлади Қажри Пъярига боқиб:

Ҳар иккала аёлнинг кўзлари ғазабдан чақнай бошлади. Қажрининг кўзи фақат момақалдироқдангина дарак берәётган бўлса, Пъярининг кўзида чақмоқ чақмоқда эди. Ҳар икковининг қайноқ нигоҳлари тўқнашди, бир-бирига тикилиб турган ҳар икки аёл фақат бир кишини— Сукхрамни ўйлашарди.

— Сенинг ҳусусингда нима эшитган бўлсам, шуни кўрдим,— деди Қажри ачитиб.

— Гапир, нимага келдинг?— деб талаб қилди Пъяри ғазабдан ранги оқариб.

— Нима қилиб қўйганингни томоша қилгани келдим!

— Нималарни вайсаяпсан?

— Ҳеч вақо билмагандай ўзингни гўлликка солма. Мен сенга ишонибман-а! Дхупони калтаклашга Банкени мажбур қилган сен эмасми? Сукхрам эса Дхупони ҳимоя қилди. Демак, сен эрингдан қасос олмоқчи бўлдинг, шундайми?

— Мен-а? Қасос оларканманими? Ялинаман, гапир, ўзи нима гап?— титроқ овоз билан сўради Пъяри.

— Банке билан унинг ўнта шериги Сукхрамга ҳужум қилишган. У шердай олишган, бироқ бир киши ўн кишига бас кела олармиди? Улар уни оғир ярадор қилишган. У ҳанузгача ҳушига келгани йўқ. Энди нима қилишимни, қаёққа боришими билмайман!— Кажри аламига чидолмай йиғлаб юборди. Пъяри пастки лабини қони чиққундай қаттиқ тишлади. У ҳўнграб юборишдан ўзини аранг тутиб қолди.

— Гапларинг ростми?— сўради у.

— Ҳаммаси тўғри.

— Қонини тўхтатдиларингми?

— Ҳа, Чандонни чақиририб келдим,— Кажри пиқиллаб жавоб қайтарди.

— Кўп қон кетдими?— кўрқиб сўради Пъяри.

— Ҳа.

Пъяри Кажридан кўзини узмай қотиб қолди.

— Аввалига жуда қўрқиб кетдим,— гапида давом этди Кажри, аммо унинг гаплари Пъярининг қулоғига кирмаётгандай эди.— Ҳаммаси тамом бўлди, Сукхрам ўлди деб ўйлагандим. Лекин у тирик қолди. Парвардигор дуоларимизни иnobatga олди.

Кажри аъзойи бадани титраб-қақшаб йиғлади. Уни умидсизлик қамраб олди. Кажри алами, ҳасратини тўкиб соладиган одамни ахтарганди, мана, топди ҳам.

— Пъяри, нега шундай қилдинг?— йифи аралаш сўради Кажри.— Ахир у эринг-ку! Бирордан қасдингни олиб, ғазабингни совутмоқчи экансан, ўрнига мени ўлдириб қўйсанг бўлмасмиди? Сукхрам шунақаям яхши, кўнгилчангки! Сенинг бўлса унга раҳминг келмади!

Пъяри эшикнинг пешбурунига бошини ура бошлади. Кажри ҳайрат билан тикилиб қолди, ҳатто йиғисини ҳам бас қилди. Пъярининг боши эса ҳамон гурс-гурс эшик пешбурунига уриларди.

Кажри Пъярини қучоқлаб, эшикдан нарига олиб кетди, у эса Кажрининг қучоғидан чиқишига уринарди.

— Қўй, мен ўлишим керак!— Пъяри эшик томон ташланди.— Мен золим, тошмехр! У ҳам мени шундай деб ўйлайди-ку! Шундай экан, яшаб нима қиласман? Улгим келяпти. Ҳеч бўлмаса ўлишим унга озгина енгиллик бағишлар. Кажри, қўйиб юбор мени.— Пъярининг кўзларида ёш йилтиллади, у Кажрига гамгин, ожиз назар ташлади.— Қўйиб юбор, мен ўлишим керак, шунақа гуноҳкор бандаман!

Лекин Кажри уни маҳкам ушлаб турарди.

— Яхшиси ўтирайлик,— деди у.

Пъяри итоаткорлик билан ўтирди, Кажри унинг ёнига чўкди. Улар бошларини ҳам қилиб қолишли.

— Кажри,— дея Пъяри ниҳоят жимликни бузди,— менга ҳеч қанақа гап тайинламадими?

— Ийүк.

— Нима ҳам қиласадим?— ўз-ўзига гапиргандай савол берди Пъяри. Йироқ-йироқларга ҳорғин, маъносиз нигоҳ ташлади, тўсатдан кўзларида умид учқунлари чақнади, юзи ёришди. Қўлини Кажрининг елкасига қўйиб, астагина гап қотди:— Кажри, сен кетавер.

Кажри ҳеч нарса тушунмади.

— Кетармишман!— аччиқланди у.— Ҳой полициячининг ўйнаши, эринг учун ҳеч нарса қилмайсанми?— Кажри Пъярини қаҳри қаттиқ деб ўйлади, эрининг бошига тушган кулфатларни эшитган аёл бу қадар хотиржам бўлмайди. Шу ҳам эрга бўлган муҳаббатми?

Тўсатдан Пъяри Кажрига қулочкашлаб шапалоқ тортиб юборди. Бу қандай юз берганини ўзи ҳам тушумай қолди. Кажрининг сўнгги сўzlари бунга сабабчи эди. Бунақа гапларни айтишга унинг қандай ҳақи бор? Нечун у бунчалик ҳаддидан ошади?

Кажри бунга жавобан унинг юзига тирноқларини ботирди. Бир-бирини ёмон кўриш учун ҳар икковида ҳам асос бор эди. Эрини эгаллаб олиб, унинг ҳамма умидларини йўққа чиқарган аёл рўпарасида турганлиги ҳақидаги ўй Пъярининг ғазабини қўзгатиб, омонсиз зарба берарди. Кажри эса Пъяри тимсолида пасткаш ва ярамас, уятсиз ва виждонсиз, барча инсоний тўйгулардан маҳрум бўлган, тубанлашган аёлни кўради.

Кажри яқинда безгакдан тузалган Пъярига қараганда анча кучли эди. У Пъярини йиқитиб, ерга ниқтади. Аммо нафрат ҳисси Пъярига қувват бағишлади, у эпчиллик қилиб, Кажрининг соchlарига чанг солди. Шовқинни эшитиб, уйдан Рустамхон югуриб чиқди.

Даставвал нима бўлаётганига тушунмади, лекин ерда чўзилиб ётган Пъярини кўргач, қутуриб кетди.

— Ҳой, анови ярамасни ушланглар!— бўкирди у.

Кажри чўчиб кетди. Пъяри кучга кириб, сакраб ўрнидан турди, лекин ўша заҳоти Кажрининг қўлидан ушлаб, уни орқасига яширди.

— Яқинлашма!— деб қичқирди у Рустамхонга.

Рустамхон бехосдан ўзини орқага ташлади. Кажри баттар қўрқди.

— Ўнга қўлингни теккиза кўрма!— пўписа қилди Пъяри.

— Бу ерда нима бўляпти ўзи?— Рустамхон ҳамон нима қилишини билмасди.

— Нима ишинг бор?— нафасини аранг ростлаб қичқирди Пъяри.

Ҳовлида қизиқувчи одамлар тўплана бошлади.

— Эсипаст! — жаҳли чиқди Рустамхоннинг.— Анови сени урди-ку!

— Бу менинг ишим! Хотинларнинг ишига аралашма!  
Тўплангандар ҳайратдан донг қотиб қолишиди.

— Дхупони жазолашга буюрганингда хотинларнинг иши  
хаёл-хотирингга келмаган эди-ку.

— Бу ҳам ўзимнинг ишим. Дхупо чамар аёл, бу эса ўз  
қабиламдан. У билан ўз ишимиз, ҳисоб-китобларимиз бор.

Рустамхон эътиroz билдириши ҳам билмай қолди. Чунки  
қишлоқ аҳлининг мантиқини шаҳарликлар тушунмайди.

— У тўғри айтяпти,— деб оломон шов-шув кўтарди.

Кажри ҳеч нимани тушунмади.

Рустамхон қўл силтаб, уйга кириб кетди. Одамлар эса тар-  
қалишмади.

— Ҳой, етар анграйиб турганларинг! — деб қичқирди Каж-  
ри уларга.— Бошқа томоша бўлмайди!

Иккала аёл ҳам кулиб юборди. Одамлар бир-бирларига  
ҳайрон бўлиб қарашди. Фалати воқеалар бўляпти-да!

Кажрини одамлар кўзидан панароқ бурчакка етаклаб бо-  
риб Пъяри шундай деди:

— Сукхрамнинг ёнига бор. Банкени ўзим бир ёқлик қила-  
ман.

— Қандай қилиб?

— Ўз билганимча.

— Негадир шубҳаланяпман.

— Кучимгами ё истагимгами?

— Кучингга.

— Нимага қодирлигимни ҳозир кўрмадингми?

— Сен опамсан, оёғингга бош эгаман,— деди Кажри итоат-  
корлик билан.

— Сен эса синглимсан,— Пъяри севиниб кетди.— Жанжал-  
лашсак ҳам сенга ёмонликни раво кўрармидим?

— Сенга кўтарган қўлларим қуриб қолсин! Нафрат билан  
боққан кўзларим оқиб тушсин! Эримни мафтун этганлигинг, у  
эса гапингдан чиқмаслиги боисини энди тушундим. Опа,  
ажойиб аёл экансан! Сен билан тенглашиб бўпман! — деди  
Кажри завқ ва меҳр билан.

Пъяри уни бағрига босди. Иккови ҳам бир-биридан кўз уз-  
май қолишиди. Пъяри Кажрининг қўлини меҳр билан ушлади.

— Энди уйингга бор, синглим. Уни парваришлаб, оёққа тур-  
ғиз. Яхшигина парвариш қил, бўлмаса терингни шилиб ола-  
ман,— ҳазиллашди у охирида.

Пъяри бу гапни юрагидан чиқариб айтганини Кажри ту-  
шунди, аммо ўзи устидан буйруқ қилиб, ҳукмини ўтказишини

сингдира олмади. Пъярининг сўзлари Қажрининг ҳеч нарсаси йўқ, Сукхрамнинг уйида унга ҳеч нарса тегишли эмас, у эрини парваришлаш учунгина яратилган, ўйнинг эгаси эса Пъяри деган маънени билдиради. У Пъярига норозилик билан бокиб деди:

— Э-э, йўқ, опажон, уни парваришлаш сенинг ишинг бўлиши керак эди, сен бўлсанг ташлаб кетгансан.

Пъяри отіан ўқи нишонга текканини пайқади.

— Ҳўш, нима бўлти?

— Уни ўйлаганингда эди, ташлаб кетмас эдинг! Уни бирон марта ҳам эркалатиб сўймадинг.

— Мен ташлаб кетмаганимда ҳеч қачон унга теголмасдинг!— деди Пъяри.

Қажри баҳслашиб ўтиради. Пъяри ҳақ эди. У ҳамон Сукхрамнинг қалбида яшапти, Қажри уни Сукхрамнинг кўнгил уйидан ҳайдаб чиқаролгани йўқ. Қажри ўз мағлубиятини тан олгандай бўлиб:

— Унинг пешонасига нима ёзилганини ким билсин?— деди.

Пъяри устунликка эришганини англади.

— Сукхрамнинг ёнига келиш пешонангта ёзилганмиди?

— Сен тақдирдан ҳам кучлимисан?

— Йўқ албатта, бироқ ҳозирга келиб тақдиримга шубҳа билан қарай бошладим.

— Бахтиёргимни кўролмаяпсанми?

— Наҳотки шунчалар бахтиёр бўлсанг?

Эндигина совуган адоват яна авж олди. Ҳозиргина уларнинг қалби меҳр-муҳаббатга тўлиқ эди, энди унинг ўрнини ғараз ғалллади. Лекин бу бир лаҳзалик ёниш эди, холос. Қалбларининг тўрида бир-бирларини ёқтириб қолишганди.

— Менинг эримга қарагину ўзингнига солишитиргин,— деди Қажри пичинг билан.

Қажрининг сўзлари Пъярига оғир ботди. Уялганидан лоладай қизарип кетди.

— Бу эрим эмас, жирканч бир маймуннинг ўзи,— дея олди холос у.

— Ана холос!— масхара қилишда давом этди Қажри.— У билан яшаб ўзинг ҳам маймунга айланиб қолмадингми ишқилиб?

Пъяри йиглаб юборди. Чунки бу ярамас аёл гўё қизиган темирни аёвсиз унинг ярасига босаётгандай эди.

— Нега йиглайпсан?— сўради Қажри.

— Йиғлаётганим йўқ.— Пъярининг товушидан дил алами баралла сезилди.— Кичик хотинсан, сендан гина қилмайман, сени кечираман.

Кажри Пъярининг сўзларида нима яширинганини — меҳрми ё рашкми, устунликми ё нафратми — билолмай қолди. Лекин кўз ёши — ожизлик аломати. Бу — энг тошюрак эркаклар кўнглини симобдай эритадиган, бошқа аёллар учун устунликни билдирадиган ўша кўз ёшлари. Буни аёллардан бошқа ким ҳам тушунарди? Угирилишга улгурмасингдан кўз ёшлар қиличига айланаб юз қуёшида ярқираб қолади! Кажри ўзини ўта бахтиёр деб билди.

— Бўлмаса, мени қозикқа ўтиргизишга буюрармидинг? — хитоб қилди Кажри ичиқоралик билан.

— Бўпти, етар, илтимос, кета қол энди! — Пъяри Кажридан ҳорғин юз ўғирди.

— Кетамаң, — деб Кажри жилмайди. — Мени жўнатяпсанку, нега йиги-сифи қиляпсан? Сукхрам келади, унга шикоят қиласан. Мени калтаклашга буюрасан, шундайми?

Пъяри кулимсиради.

— Жудаям айёр аёлсан! — деди Пъяри меҳрибонлик билан, кейин қўшиб қўйди: — Эҳтиёт бўл, қоронғи тушиб қолянти. Кетишга шошил!

— Кетаман, — деди Кажри, кейин савол бериб қолди: — Йўлда биронтаси менга шилқимлик қилиб қолса-чи?

— Кўрқасанми?

— Бўлмасам-чи, сенга ўхшаб мен ҳам ёшман-да. Тўсатдан биронта полициячи мени кўз тагига олиб қолса нима қиласман?

Ўқ нишонга тегди.

— Ҳой ярамас хотин, кетасанми ё йўқми?

— Опажон, ўз бошимдан қўрқаётганим йўқ. Менга бир ба-ло бўлса унинг ёнида ким ўтиради?

— Е сен билан бирга борайми? — қўрқа-писа сўради Пъяри.

— Унга қанақа ёрдаминг тегарди? Банкени унутдингми?

— Эсимда турибди. Уни эслатишнинг ҳожати йўқ! — деди Пъяри керилиб.

Унинг кўзлари ёмон чақнади, Кажри ҳатто қўрқиб ҳам кетди. У бошини эгиг ҳовлидан чиқди.

Кажрининг қалби севинчга тўлиб-тошди. У Сукхрамнинг биринчи хотини билан танишиб олди! Узига бино қўйган хотин экан. Ҳечқиси йўқ. Мавҳумлик олдидаги қўрқинч зўр! У Пъяри билан учрашишдан жуда-жуда қўрқарди, энди бўлса қўрқишига ҳеч қандай сабаб ҳам йўқ.

Йўл чамарлар қишлоғи ёнидан ўтарди. Кажри қишлоққа яқинлашганда қулоғига аёлларнинг товуши чалинди. Баъзида улар бараварига гап бошлашар, шунда улар нима деяётганини тушуниб бўлмасди. Уларнинг қичқириқлари қарғаларнинг қа-

Риллашига ўхшаб кетарди. Лекин аёллар бир неча марта Сукхрамнинг номини тилга олишгандаи бўлишди. Кажри тўхтаб қолди. Аёллар Сукхрам ҳақида, унинг жасурлиги хусусида бир-бўрларига гап бермай жаврашарди. Кажрининг қалби севгисидан беҳад фаҳрланиш туйғуларига тўлиб кетди: ана шу туйғу ўсиб, мустаҳкамланиб, унинг бутун умрини янгича мазмун билан бойитди.

Кажри қанот пайдо қилиб уйига елиб борди.

У чодир олдига чопиб келганида қоронғи тушиб қолганди. Кажрининг юраги ташвиш билан дукиллаб ура бошлади. Мангуниң хотини қаёққадир кетган, чодир ичидан ҳеч қандай товуш эшитилмасди. Кажри ичкарига киришга юраги дов бермай остоида тўхтаб қолди, кейин дадилланиб, ичкарига кирди. Унинг енгил қадамларини эшитган Сукхрам қимиirlади. Кажри қоронғида ҳеч нарсани кўрмади. Қулоғига нимжон, лекин қатъий оҳангдаги:

— Ким у? — деган товуш чалинди.

Кажри севинчдан қотиб қолдай. Демак, Сукхрам ҳушига келибди! Кажрининг юраги қаттиқ ура бошлади! Жони омонатгина бўлиб турган кишинг тузалиб, қаддини ростлай бошласа бутун олам нақадар мулојим жилмаяди!

— Бу мен, — меҳр ва шафқатга тўла овоз билан аста жавоб берди эри. Кажри яна шу мўътабар кишиси устидан ҳукмини ўтказгиси, уни меҳр иплари билан чулғаб боғлагиси келиб кетди.

— Келдингми? — деди Сукхрам ҳазин овозда. — Ёнимга кел, яқинроқ кел, Кажригинам.

Кажри ўкириб йиғлаганича эрининг оёқларига ёпишди. Сукхрам унинг соchlарини меҳр билан силади.

— Йиғлама, Кажри, йиғлама.

— Йиғламайман, — ваъда қилди Кажри, лекин кўз ёшлари юзини ювиб тушаверди.

— Мендан жуда хавотирландингми?

— Жудаям.

— Мени ўлиб қолади деб ўйладингми?

У кўли билан эрининг оғзини ёпди.

— Нега мени йиғлашга мажбур қиласан?

— Аёлларга йиғи бўлса бас. Сен ҳам йиғлоқи чиқиб қолдинг.

— Фақат сени деб кўз ёши қиламан, бошқаларга бир томчи бўлсин кўз ёши тўкмайман. Сенинг ёнингда бўлсам кўнглимда шунақаям ғалати, ўзим маъносини тушуниб етмайдиган туйғулар түғён урадики!

— Ҳозир нималарни ҳис қилиб турибсан?

— Сени тезда тузалишингни ҳис қилиб турибман, — деди

Кажри дадил, кейин гүё шарм-ҳаёни унутиб қўйгандай.— Жонгинам!— деб юборди.

Бу сўзда қанчадан-қанча меҳр мужассамлашган. Сукхрам хотинининг айтганини уқишдан кўра тезроқ пайқади; бутун вужудини маст-аласт қилувчи севинч денгизи қирғоқларидан тўлиб-тошиб қолгандай бўлди, бутун олам кўзига ажиб, кўркам бўлиб кўринди.

— О, Кажри. Сен ёнимда экансан, ўлмайман!— шивирлади у хотинининг бошини силаркан.

Кажрига Сукхрам оддийгина сўзларни эмас, балки тошга ўйиб ёзилган қадими ҳикматли гаплардай абадий яшайдиган қандайдир улуғ, муҳим ҳақиқатни айтгандай бўлиб туюлди. Қишилар кўпинча бунга ҳуқуқи бор-йўқлигини билмай онт ичадилар. Ачиниш, раҳм-шафқат, ошиқ-маъшуқликка муҳтож ана шу ошиқ-маъшуқликкина уларга ишонч, куч-қувват бағишлийди.

— Мен ҳам сенсиз яшай олармидим?— деди Кажри Сукхрамининг кўксига бошини қўйиб. Бир неча лаҳза у ана шундай ҳолатда жим қолди, кейин тўсатдан ўрнидан турди ва қўллари ни осмонга чўзди.— О парвардигори олам!— астойдил шивирлади у.— Мени хор табақа аёли қилиб яратдинг, сендан ҳеч нарсани илтижо қилиб сўрамагандим — бу ўтмишдаги гуноҳларим учун ўч олиш бўляпти. Сендан фақат бир нарсани ўтиниб сўрайман: эримдан мени жудо қилмагин! Яхшиси жонимни ола қол! Мен дафи гулханида ҳам ёнишга тайёрман, фақат севгилим тирик қолса бас. Унингиз ер юзида менинг учун ҳаёт йўқ!

— Нималар деяпсан, Кажри!— деди Сукхрам хижолат бўлиб, сўнг гапида давом этмаслиги учун савол ташлади.— Ҳамма гапдан хабаринг борми?

— Менга Мангур айтиб берди.

## 17

Қоронғи тушди. Шамол турди, ўрмон чакалакзорлари, даражатлари совуқ шамолдан ўзларини қутқаргандай майнин, ёпишқоқ япроқли шохновдаларини қимирлатишиди. Юксак осмонда юлдузлар милтиради. Йироқ-йироқлардан шоқолларнинг узуқ-юлуқ увлашлари эшитилди. Бухура бир неча бор уларга жавоб тариқасида вовиллаб қўйди. От жаҳл билан туёқларини ерга урди. Атрофдаги ҳамма нарсалар қоронғилик бағрига сингиб кетди. Ҳатто чодир ҳам юлдузли осмон фонида қора доғга ўхшаб қолди.

— Кажри!— деб чақирди Сукхрам.

Кажри кўзини юмаб ётганди, лекин уйроқ эди. Сукхрам-нинг овозини эшитиб, ўрнидан дик этиб турди.

— Нима? Сув келтирайми?

— Керак эмас, яхшиси ёнимга кел.

Бу сўзлар Кажрининг вужудини титратиб юборди. Эрининг ёнига чақиргани уйқусини қочирди.

— Мен ҳамиша ёнингда эдим, — деди Кажри унга яқинлашиб, — ухлаётган бўлсанг керак деб, уйғотиб юборишдан қўрқандим.— Кажри уни юпатишга шошилди. Жувон эрини ёлғиз қолдирамиди? — Мени чақирдинг, нима гапинг бор эди? — сўради Кажри.

— Шундоқ ўзим!

Бу сўзларда меҳр яширганди.

— Аҳволинг тузукми?

— Ҳа, анча тузукман, Кажри.

Ташқаридаги оёқ товуши эшитилди. Кажри чодирдан чиқди. Сукхрам кираверишда икки кишининг суҳбатини эшитди, лекин нима ҳақда гаплашишаётганини билолмади, чунки улар шивирлашиб гаплашишарди.

— Ким у? — сўради Сукхрам.

— Ва ниҳоят келишди, — деди Кажри. — Бу Мангунинг хотини.

Сукхрамнинг кўнгли ўрнига тушди.

— Гўшт келтиргандим. Уни гўшт билан парвариш қил, қон бўлади, — деган сўзларни эшитди Сукхрам.

Кажри қоронфида аёлнинг юзларини меҳр билан силади, бу қилиги билан унга ўз миннатдорчилигини билдириди. Тун қоронғисида ўрмонда бедана ўлдириш осон иш эмас. Мангунинг хотини илгари ҳам Кажрига ёқарди. Тўлқинланиб кетганидан Кажрининг кўзида ёш кўринди.

У чодирга кириб, беданани яхшилаб қовурди, кейин Сукхрамга едириди. Эри овқат еб ўтирганида Кажри Мангунинг хотинини оғзидан бол томиб мақтади. Сукхрам унинг гапларини маъқуллаб бош иргаб ўтириди.

Кажри ўйланиб қолди.

— Ҳа, хаёл суриб қолдинг? — сўради Сукхрам.

— Кўнглим ғаш, — хўрсинди Кажри.

— Анави Банкенинг бошига етаман! — деди Сукхрам қатъий оҳангда.

— Дорга осишларини хоҳляяпсанми?

— Сенингча, ранж-аламларга чидаб ўтиравериш керакми?

— Сени қамаб қўйишса ҳолим нима кечади?

Сукхрам чуқур ўйга толди. Кажрига бўлган муҳаббати унинг қўл-оғенини боғлаб қўйганди! Кишининг баҳти нимада ўзи? Бузук ниятларини енгишидами?

Сукхрам, ёдингда бўлсин, сен ёлғиз эмас, дўстларинг ёрдамлашади.

- Аммо Банкени бир ёқлик қилиш ҳам осон иш эмас.
- Мангуда оз кутиш керак деяпти, — Кажри гапини түхтатиб жим қолди.
- Йўқ, Кажри. Эндиликда Банке ашаддий душманим эканлигини ким билмайди? Полиция ҳаммани қамоқقا олади! Сенинг ҳам шармандангни чиқаришади!
- Менда шарм нима қилсан! Ким ҳам мени одам қаторига қўшарди? Мен ахлоқи бузуқ, расво аёлман, бошқача номим йўқ! Ёлғиз сен ҳурматимни жойига қўйяпсан, чунки сен саховатли одамсан.
- Кишининг гуноҳи дилида яширинган бўлади, инсон дили билан гуноҳ қиласди, сенинг эса дилинг пок!
- Йўқ, Сукхрам. Менга ўхшаган аёллар ҳеч қачон кечиришга лойиқ эмас.
- Икковлари ҳам жим қолишиди. Бироқ гаплари тугаб қолганидан жим бўлишгани йўқ. Ўз фикр, туйғуларини ифодалаш учун зарур сўзларни топишолмай қолишиди, холос.
- Сен ухлаб ётганингда... — мужмалгина гап бошлади Кажри, сўзлари унга қандай таъсир қилишини билиш учун Сукхрамга астойдил тикилди, — мен кетган эдим.
- Сукхрам сергакланди.
- Қаёқقا? — аста сўради у.
- Кажрининг юзида маккорона ифода пайдо бўлди.
- Рустамхоннинг жазмани ёнига, — деди Кажри бамайлихотир.
- Сукхрамнинг назарида оёғи остидаги ер чўкиб кетаётгандай бўлди.
- Кажри! — хитоб қилди у.
- Нега бақирасан? Ёнингда ўтирибман-ку, қулоғим карэмас, — кулиб қўйди Кажри.
- Унинг ёнида бўлдингми? Бунга қачон улгурдинг? — деди ишонқирамай.
- Сен беҳуш ётганингда.
- Ростдан-а? — У хотинининг қалбига кириб олишга интилгандай, кўзларига узоқ ва астойдил тикилди. — Кажри! — деди бўғиқ овоз билан, индамай унинг қўлларидан ушлади. — Мени алдамаясанми?
- У истар-истамас ўз ҳикоясини бошлади, унинг ўзига ҳам кўп нарсалар қоронғи эди.
- Аввалига Пъяри қўрқиб кетди, кейин мени сўка бошлади. Мен ҳам бўш келмадим. Уни сен туфайли яралашди, дедим. Пъяри бошини эшикларга урди. Мен эса бундан кўра, Банкедан қандай ўч олиш йўлларини ўйласанг яхши бўларди, дедим. У қўлимдан келмайди деб жавоб қайтарди. Мен кундошимни ҳақорат қилдим, Пъяри менга мушт дўлайди. Шу пайт полициячиси

чопиб келди, лекин Пъярининг ўзи яна менинг тарафимни олиб, полициячини ҳайдаб юборди... Сўнг мен ҳам кетдим.

— Иноқлашиб кетибсизлар-да.

— Яхшиси сен билан иноқлашай, — деди Қажри. — Отинг, Бхура деган итинг бор. Майли, Пъяри ҳам сен билан яшасин! Менга нима? Мен эса итингни боқаман, отингга ем ташлайман, Пъярига ҳам нафим тегиб қолар.

— Тошюраксан, — деди Сукхрам. — Мени қўзини очмаган мушук бола, ҳеч нарсани кўрмайди, тушунмайди деб ўйлайсанда. Йўқ, хотин, нега обидийда қилганингни тушуниб турибман! Мен ҳақимда ким бош қотиради? Ҳолатим қанақалигини яхши тушунади? Бошқа түянинг думига боғлаб қўйилган карвондаги тута ҳам йўл-йўлакай учраган янтоқ билан ўт-ўланни чимчилаб кетишга интилади. Аммо мен ўзим ҳақимда ўйлашга журъат этолмайман, бунга ҳаққим йўқ! Боравер, фақат тўғриға қараб боравер, атрофингга қарама, акс ҳолда сўймас дугонанг ғам чекавериб кўз ёши дарёсига гарқ бўлиб кетади.

Қажри чодирни тўлдириб шодон кулди.

Эр-хотин ярашишди. Ҳеч қандай жанжал юз бермагандай бўлди. Чодир ташқарисида қоронгилик қуюқлашди, совуқ шамол эсади, қуруқ япроқлар шитирлади, чодирда яраш ва иноқлик ҳукмрон бўлди.

— Оғрияптими? — меҳрибонлик билан сўради Қажри ва Сукхрамнинг соchlарини силади.

— Бошим оғримаяпти.

— Чандон ажойиб табиб.

— У доривор ўсимликлар сирини билади.

— Елканг зирқирайптими?

— Оз-моз.

— Озгина ухлаб олсанг бўларди.

— Йўқ, кечқурун уйқуга тўйдим. Энди гаплашиб ўтирасак ҳам бўлаверади.

— Кўп гапиришинг мумкин эмас, — деди Қажри насиҳатомуз, лекин ўша заҳотиёқ сабри чидамай савол берди: — Сен билан беш киши уришгани тўғрими?

— Қанча бўлса ҳам барнибир эмасми?

— Банке сенга тиши қайраганидан хабаринг йўқмиди?

— Йўқ. Лекин оз-моз гумонларим бор эди, шу важдан таёқ кўтариб олгандим.

— Гумонинг бўлса, нега ўзингни балога гирифтор қилдинг? Қўрқоқликда айлашади деб қўрқдингми?

— Қажри, бунга аёлларнинг ақли етмайди.

— Менинг эса эрта кунда!

Бўлиб ўтган воқеани аслашга Сукхрамнинг юраги безилларди. У суҳбат йўналишини ўзгартиришга интилди, бироқ

Қажри бошқа гапни әшитишни хоҳламасди. Сукхрам Пъяри ҳамда Рустамхон билан нималар ҳақида сұхбатлашганини айтиб беришга мажбур бўлди. Қажри диққат билан қулоқ солди.

— Сукхрам, бир илтимосим бор, бажаришга ваъда бер.

— Яна нима?

— Йўқ, олдин ваъда бер.

— Гапиравер.

— Сени қара-я, ваъдани ҳам ўйлаброқ беряпсан. Менга мутлақо ишонмай қўйдинг. Сенга ҳеч нима демайман!

— Қажри! Биз хўрланган одамлармиз. Кучлиларга қарши нима ҳам қила олардик? Улар бор-будимизни олиб қўйишган. Ахир мен кўхна қалъя эгасиман...

— Эҳтимол сен хўрланганлардандирсаң, — эътиroz билдири Қажри унинг сўнгги сўзларига парво қилмай. — Мен — унка эмас.

— Қажри, «унақа эмас»лигинг иш бермайди. Бир назар ташла, қишлоқда нималар бўляпти: деҳқон — қашшоқ, оч-яланғач, лекин судхўр унга қарз беради, ишонади. Биз эса ҳаммасидан паст турнимиз, қишлоқ итидан ҳам харобмиз. Қажри, нега энди икковимиз натмиз?

— Чунки бизни натни туққан.

— Нега бизни олий табақалик аёл туғмаган?

— Тақдир шу бўлса керак.

— Аммо биз ҳам уларга ўҳшаган одамлармиз-ку, нега ҳаммаси бизга жабр ўтказишади?

— Бу дунёда ким жабр кўрмаяпти? Полиция, судхўр, ҳатто заминдор ҳам бундан қуруқ қолаётгани йўқ! Бошқалари осойишталик нималигини биляптими? Ким зулм ўтказаётган бўлса, буни қорнимни тўйғазищ, бола-чақамни боқиши учун қиляпман дейди... Сукхрам, бу дунёда инсоннинг нафси ҳукмронлик қиляпти. Шунинг учун кишилар жабр тортяпти. Қорнингга озгина луқма ютгин-да, қарабсанки, баданинг қизийди, вақтинг чоғ бўлади, қанот пайдо қилиб учгинг келади. Ҳаёт қандай бўлса, унга шундай қарайман. Илгари ҳам шундай бўлган, кейин ҳам шундай бўлади. Нега шунақа бўләётганини тушуниб бўлмайди. Барibir эмасми? Яшаш пешонамиизда бор экан, яшайверамиз. Эркак кишига ҳаётда ҳамма йўллар очиқ, аёл киши ундан ортда қолармиди? Сукхрам, тузалиб олсанг бўлди. Бу ердан бошқа ёқларга кетамиз. Янгича ҳаёт кечирамиз, ҳозиргиси меъдамга тегди. Яқинда Куррини учратиб қолдим. У мени кўрди-ю, кулиб гап қотди: «Қажри, менга хотин бўлган пайтларингда ҳеч қаочон бунақа йиртиқ ковуш киймагандинг. Уят эмасми?» Мен унга: «Илгари ҳеч қаочон уят нималигини эсга олмагандинг», деб жавоб қайтардим. Шунда у: «Худойим ўрмонга илон, чаён, қоп-

лонларни қўйиб юборган; биз ҳам ўрмонмиз, Кажри...» деди.  
Мен эса бурилиб, нари кетдим.

Кажри ўрнидан турди, кўзага яқинлашиб, ичига қўлини тиқди ва сигарета олди.

— Ма. — У Сукхрамга сигарета узатди, биттасини ўзи олди.  
Икковлари ҳам чекишиди.

— Сен билан ўтказган дастлабки кечада ҳам шунаقا сигарета билан сийлагандинг.

Кажри қизарди.

— Ҳаммаси эсингда, — деди хурсанд бўлиб. — Ҳамма вақт сени тўтиқуш атаб келганман.

Ҳар икковларининг ҳам кайфиятлари яхшиланди.

— Энди ухлагин! — буюрди Кажри.

Сукхрам пинакка кетди. Кажри ундан кўзини узмай узоқ тикилиб ўтиради. Сукхрамниң қўлида сигарета тутарди. Бугун азамат ҳузур қилиб чекарди. Кажри тутунни ичига чуқур тортиб, оғзидан паға-паға қилиб чиқарди. Сукхрам чуқур ва бир текис нафас оларди. Чодирга Бхура яқинлашди, Кажрига тикилганича оstonага ўтиради. У сидқидилдан хизматини бажарар, кўз юммасди. Кажри каравот поясига суюнганича чекишида давом этди. От ухлади, унинг шарпаси эшитилмай қолди. Кажрининг қулоғига тун шивири чалинарди, холос. Кимdir чодир четига ишқаланаётганга ўхшайди. Шамол аста-секин пасая бошлади...

Сукхрам кўзини очганда аллақачон тонг ёришган эди. Даражат тепасида қушлар шодон чуғурлашарди. Чодир оstonасида тунги сергаклигини бас қилиб Бхура ухларди, чодир ташқарисида от тепинар, бошини силкитарди, чунки ундан олдин пашшалар уйғонганди-да.

Сукхрам ўзини анча тетик, бардам ҳис қилди. У иккинчи ёнбошига ағдарилди-ю, ҳайратдан қотиб қолди.

Кажри каравот поясига бошини қўйганича ухларди. Унинг ўтирган жойида кўзи уйқуга кетибди. Сукхрам уни уйғотмасликка аҳд қилди.

• Худди шундай ҳолатда ухлаб қолиш учун киши нийҳоятда чарчаган бўлиши керак. Бироқ Кажрининг ўзи уйғониб кетди. Ёнида ётган боласи сал қимиirlаса уйғониб кетган онадай, Кажри ҳам уйғонди.

У овозини чиқариб узоқ эснади, кейин уйқуни бутунлай ҳайдаш учун силкиниб сергакланди, кўзларини ишқалади, бошига рўмол ташлаб кўрпа устига ўтиради. Сўнг Сукхрам эсига тушгандай маъшуғига тикилди ва кулимсиради.

— Ухлаб қолибман. Шунақаям ширин ухлабманки, — дедиую чодирни тўлдириб қаттиқ кулди, шундай кулдики, ҳатто Сукхрам ўз ярасини ҳам унутиб қўйди.

Баданига янги куч-қувват киргандек бўлди. Бир жойда қимрламай ётса ҳам, бу кеча Қажри бошида ухламай ўтириб-чиққанида, Сукхрам уйқусида ҳаёт қаерда яширинишини, мұхаббат билан садоқат қаерда хукмронлик қилишини билиб-олди.

Қажри тўхтамай кулаверди. У жуда баҳтиёр эди, чарчоқдан кўзлари юмилаётган бўлса ҳам у кулар, чарақларди. У ким учун яшаётганини биларди.

— Қажри, жуда баҳтиёрман, — деди Сукхрам тўлқинланиб, кейин жимиб қолди, индаса баҳти қочиб, кетадигандай бўлиб туюлди.

— Нимага энди бирдан шу гапларни айтиб қолдинг? — сўради Қажри.

— Билмайман, сенга қандай тушунтиурсам экан, — деди Сукхрам жиддийлашиб. — Билмайман. Фақат мен учун сен борсан. Вассалом, бошқа менга ҳеч нарса керак эмас.

Қажри кетди. Сукхрам сал қўзголиб, каравотга ўтирди, кейин қўрқа-писа тикка турди, бир неча қадам юрди, оёқда bemalol туроётганини кўриб ўзи ҳам ҳайрон бўлди.

## 18

Февралнинг иккинчи ярми. Пхагун<sup>1</sup> ойи кирди, яна жонга роҳат бағишлийдиган илиқ кунлар бошланди. Қаёққа қараманг ҳаммаёқда янги ҳаёт уйғонди. Илиқ, шиддатли, баъзан эса бўронга айланувчи шамоллар эсди, анжир дараҳтлари қип-қизил гулга кўмилди, ер бағирлаб юргурган шамол қўкка интилди, ўзи билан хазон бўлган япроқларни учириб кетди.

Баҳор ўзи билан қанчадан-қанча сеҳрли жозиба олиб келади! У ўзининг иссиқ нафаси билан ер бағрини иситади. Ҳатто ярми қуриб қолган қари дараҳтлар ҳам ёшариб кетади, баҳор шамоли билан ўйнашиб, алланималар ҳақида шўх шивирлашадиган майн зумрад япроқлар билан қопланади. Буюқларга қора қарғалар эмас, балки тўқ яшил япроқларга монанд тўтиқушлар қувноқ чағир-чуғурлашади, кейин тўсатдан қулоқни қоматга келтирадиган қичқириқ билан гала-гала бўлиб осмонга кўтарилишади, дараҳтлар устида доира ясадбай айланишади, яна дараҳтларга қўнишиб, кўм-кўк япроқларга сингиб кетишади.

Болалар катта сариқ қоринли ариларни қувишиади.

Асаларилар ҳам уйғонди, ўрмон ва ялангликлар асалариларнинг нозик товушига тўлди. Асаларилар бир-бирларини қувишиб, олдинга, орқага югуришиади, улкан дараҳтлар гулидан ши-

<sup>1</sup> Пхагун — ҳинд календарининг охирги ойи, февраль-маргта тўғри келади. Ҳиндистонда Янги йил март ойидан бошланади.

ра сўришади, уя қуришади. Асаларилар ёнида гулдор қанотларини қоқиб, гулларга йўл кўрсатиб енгил капалаклар учади.

Кечалари қишлоқдан ноғоралар гумбури эшитилади. Қишлоқ аҳли бир жойга тўпланиб, баҳор қўшиқларини куйладилар. Ҳар бир банддан кейин «Хей-эй!», «Хей-эй!» деган ҳайқириқлар янграйди, банд кетидан банд айтилаверади. Қўшиқ эса оғир юк қўкланган қайиқдай товушлар дарёсида бир меъёрда шовиллаб сузади, кейин эса энг юқори пардада қотиб қолади.

Далаларда буғдой бошоқ чиқарди. Фаллазорлар нозик чайқалди. Майнин ипаксимон арпа сарфайган. Буғдойзорлар одам бўйи билан тенглашди, бошоқлар олтин бош товлайди. Фақат канс ўсимлигигина етим қўзидаи бўзрайиб, йўл чангига беланиб турарди.

Қишлоқда ишлар қишиб кетиб, ҳарорат кучайди, ҳосилни йиғишириш вақти келди. Қоровулларнинг назорати кўпайди. Кун сайин ўғирлик, экинларни пайхон қилиш авж олди. Бунинг устига тўйлар ҳам бошланиб кетди, худолар мудрамай севишганларни қовуштиридилар. Баҳор завқидан маст-аласт бўлган эрли аёллар туни билан қўшиқлар айтиб чиқишиди. Йигитлар қўксини кериб, йўлларда виқор билан юришарди, чиройли қизларга қайноқ нигоҳ ташлашар, қизлар ҳам бўш келишмасди. Қизларга нигоҳ ташлаган йигитлар исми тез-тез улар тилида тақорланиб турарди. Үрмонлар маст бўлди, боғлар яшнаб силкинди, тунлари юлдузлар бир-бирларига ошиқона шивирлашди.

Сукхрам билан уришган кунининг эртасига яширин бир ҳолатда уқувсиз аёл қўли билан урилган ханжар туфайли яралангандан Банке тузалди. Рустамхон билан Пъяри ҳам соғайишиди. Улар ўзлари ишонмаган ҳолда иккинчи бор ҳаётни совға қилиб олишиди.

Пъяри олдингидан ҳам гул-гул очилиб кетди. Лекин ним дарахтида мевалар пишиб етилиши биланоқ у яна Сукхрамни соғиниб қолди. Осмонда қордай оппоқ улкан булутлар сузди, иссиқни ҳайдаган муздек шамол шиддати дилларга ором бағишилади, аммо Сукхрамнинг дийдорини кўриш орзуси кун сайин кучайиб борди. Пъярида касалликдан асар ҳам қолмади.

У бутунлай соғайди. Эҳтимол эри ҳам тузалгандир. Лекин Сукхрам беморлигини баҳона қилиб ҳамон келмаяпти. Нуқул баҳона қиласди, холос. Атайлаб келмаяпти. Эҳтимол, Қажри уни бу ёққа қўймаётгандир! Уй томидан минг хил товланиб, чиройини кўз-кўз қилаётган баҳор латофатига тикилиб қолган Пъяри бу гулга кўмилган ер эмас, балки ўзини қонга белангандан ёки олов қамраб ёнаётган жойдай ҳис қиласар, бу фикрни миясидан нари қуволмасди. Кечалари у юлдузли осмонга тикиломас, ўтмиш хотиралари уни омонсиз азобларди. Майнин баҳор шамоли Пъяри қалбига кириб боргандай бўлар, шунда у ўзини янада ёлғиз ҳис қиласди. Димоғига ясмининг хушбўй ҳиди урилганида

нафас ололмай қоларди. Кечаси уни тубероза ўсимлиги ҳиди уйғотиб юборарди, анчагача кўзини очиб ётар, узоқ вақт уйқуси қочарди, эрталаб гул баргларига қўниб, қуёш нурларида ялтираб турган шудринг доналарини кўрганида кўз ёшдарини тийиб сломласди. Шудрингмисол Пъярининг кўзидағи ёши қуримасди. Шўх, чиройли товланган кўкаламзор унинг кўзини тиндирар, у ана шу кўм-кўк ўтларни тоptаб, юлиб, йўқ қилиб ташлагиси, йироқ-йироқларга, осмону фалакка қанот пайдо қилиб учиб кетгиси келарди...

Ёш аёлларнинг ҳазил-мутойиба, кулгилари тинди, билакузуклар гоҳ-гоҳидагина шилдираб қолди. Эрта баҳорнинг ҳаяжонли, даъваткор рақсларида ўзини барадла намоён этган интиқ бўлиб кутишлар висол билан тугалланди. Қўшиқлар ҳам секинроқ янграйдиган бўлиб қолди, эндиликда ашулачилар паст овозда куйлашарди, Сукхрамдан ҳамон дарак йўқ.

Чакхан ҳамиша ундан дори олиб турди. Пъяри билан Рустамхон дориларни ўз вақтида ичишди. Чакхан, Сукхрам юрганда оёғи сал оғрияпти дерди. Пъяри Чакханнинг гапларини эшитар, аламини ичига ютарди. Севишганларнинг суҳбати унинг қалбини яраларди. У бутун иродасини ишга солиб кулишга интилар, аммо бу қўлидан келмасди. Илғари Пъяри Кажрига ҳозиргидай рашқ қилмасди, у Сукхрамдан жудо бўлганидан, касаллигидан азоб чекарди.

Илғари ҳам дили, ҳам танаси азобланарди, ҳозир танасидан кўра дили қўпроқ азоб чекяпти.

Пъяри бутун кунларини чуқур ўйчанлиқда ўтказди. Энди уни Рустамхонницида ҳеч нима тутиб турмасди. Пъяри Рустамхондан жирканар, ҳаммасига Сукхрам айбдор деб биларди. Нега у Пъярини бу ердан олиб кетмаяпти? Рустамхон яна вино ичишга ружу қўйди. У участкадан қайтганида Пъяри ўзини касалга солиб оларди. Банке яна Рустамхоннинг ёнига келадиган бўлиб қолди, улар анча вақтгача алланималар ҳақида кенгашишарди.

Бир куни Рустамхон билан Банке одатдагидай суҳбатлашиб ўтиришганда Пъяри пастга тушиб уларнинг суҳбатига қулоқ сола бошлади.

- ... Энди бутунлай соғайиб кетдинг.
- Соғайганга ўхшаяпман.
- Аnavи жазманинг ҳам соғайдими?
- У манжалақи ҳам соғайди.
- Негадир унинг ҳақида ширин гапларни айтмаяпсан.
- Улардан ниҳма наф кўрардинг, уларнинг ҳаммаси бир гўр.
- Бу ҳақда илғари ҳам сенга гапиргандим. Ахир у натни. Уларга ишониб бўладими? Сен бўлса Пъярини уйингга келтириб олдинг. Энди ҳайдаб юборсанг керак?

— Йўқ, Банке, унинг аллақандай оҳанрабоси бор, жонон, менга керак! Аввал анави ишни бир ёқлик қил!

— Мен тайёр.

— Йўқ, йўқ, — Рустамхон огоҳлантирувчи имо-ишора қилганини Пъяри кўргандай бўлди, — бир оз сабр қил.

— Нега?

— Олдин Дхупони саранжом қил, аммо ҳеч ким ҳеч нарса билмасин!

— Хотиржам бўл.

— Бу ишлар менга ёқмаяпти-да.

— Нима ёқмаяпти?

— Қара-чи, Пъяри қаерда экан, у тепадамикан? Ундан хавфсираб қолдим.

Пъяри девор токчасига қапиши. «Дхупо!!— деб ўйлади у.— Бошига кулфат тушади. Лекин Дхупога қандай ёрдам қиласман? Сукхрам йўқ. Борди-ю, у келиб қолса, бу ҳақда унга қандай қилиб гапираман? Яна бирон бир ёмонроқ воқеа содир бўлади! Оламда юзлаб эркагу, юзлаб аёллар бор. Ҳаммасини эҳтиётлашим шарт эмас».

Чошгоҳ пайтида қуёш шунақаям қиздирдики, осмонни ёндиригудай бўлди. Пъяри хонасида ёлғиз хаёл сурарди. Ҳовлида, деразадан унча узоқ бўлмаган жойда Чакхан ўтиради. Тўсатдан Пъярининг қулоғига таниш овоз чалинди.

— ... Яхши, оғайни, энди кўрмагандай бўлиб кетдим.

Пъяри жонҳолатда ўзини деразага урди. Ҳовлида Сукхрам, унинг орқасида Кажри турарди.

Ҳар ҳолда у хотинини етаклаб келибди! Ҳозир Пъярининг унга иши бўлмади, ҳатто қизиқсинмади ҳам. «Улар бир-бирла-рига бирам муносибки!» — деб ўйлади Пъяри, Кажри бошдан оёқ ясанганди. Сукхрам олдингидан ҳам соғломроққа ўхшаб кўринди. Тўсатдан Пъяри ўзини бемор, эзилгандай ҳис қилди. Ўзидаги ўсиб бораётган ҳамма нарсага бефарқлик ҳиссини енга олмади. Иzzат-нафсига берилган зарба барча орзуладарни унтишга мажбур қилди. Вужудини умидсизлик эгалаб олди.

Беҳолликдан унинг боши айланди. У каравотга аранг бориб ётиб олди.

Кажри билан Сукхрам тепага кўтарилиши.

— Ким у? — Пъяри ким келаётганини билса ҳам шундай деб овоз қилди. — Сенмисан? — у сохта ажабланиш билан каравотга ўтирди. — Келадиган кунинг ҳам бор экан-а! Бу ерлардан кўчиб кетдингмикан деб ўйлагандим.

Пъяри атайлаб Кажрига эътибор бермади, Кажри эса буни пайқамади. У ёқ-бу ёққа бошини буриб анграйганича хона қандай ясатилганини қизиқиб томоша қиласарди. Сукхрам билан Пъяри сўзсиз унга тикилишарди. Сукхрам кулимсиради. Унинг

жилмайганини пайқаган Пъяри аламига чидай олмади, эрига илтижоли нигоҳ ташлади, бу боқиши, «нечун мени шунча азиятларга мубтало қилдинг», деб сўраётгандай бўлди. Лекин Сукхрам кўзини олиб қочди.

— Кажри! — дея гина қилиб чақирди Сукхрам.  
— Лаббай? — Кажри сесканиб кетди.  
— Нега атрофга аланглайверасан?  
Кажри хижолат бўлди.  
— Кўрдингми, катта хотиним ўтирибди.  
— Унинг оёғидан хок олишга ижозат бергин! — деди Кажри истеҳзоли, кейин тҳакураникига тақлид қилиб, Пъярининг тўпифидан тиззасигача одоб билан қўлини юргизди. Уялгандан Пъярининг юзи лоладай қизариб кетди. Бундай ҳолатларда: «Тақдир сенга кулиб боқсин, баҳтинг зиёда бўлсин! Доим сутда чўмилгин, нуқул ўғил болаларни вояга етказгин!» дея изҳори дил этишдан бошқа иложи қолмади. Кейин Пъяри Сукхрамга ўгирилиб буюрди:

— Ўтири.

Сукхрам ерга ўтириди. Кажри тикка тураверди.

— Кажри деганинг шуми ҳали?

— Бу ўша.

— Чиройли экан! — маъқуллади Пъяри.

Кажри пиқ этиб кулиб, бошини рўмоли билан яширди.

— Сен нима дейсан? — Сукхрам унга савол берди.

Кажри тескари ўгирилди.

— Нима ҳам дердим? — у ёлғондан хижолат бўлди. — Уялганимдан ўзимни қаёққа қўйишимни билмаяпман.

Пъяри қовоғини солди, Сукхрамга таънали назар ташлаб, бошини чайқади.

— Кажри, ўтири, — деди Сукхрам.

— Сени ўтиришга таклиф қилиш ҳам эсимдан чиқибди, — ўзини оқлашга интилди Пъяри.

— Таклифсиз ҳам ўтиравераман, — деди Кажри ҳеч бир тортинмай. У берам, баҳтиёрга ўхшар, баҳорнинг латофати, жозибаси унда ўзини кўз-кўз қилиб турарди.

— Кел, ёнимга ўтири, саутим<sup>1</sup>, — Пъяри каравотдан — ёнидан жой кўрсатиб чақирди.

Бироқ, Кажри Сукхрамнинг ёнига ўтириди, Пъярининг сўзларига эътибор бермаганини билдиromoқчи бўлди. У ўзи хоҳлаганча йўл тутди. Унинг дадил ҳолати Пъярининг бу ердалигидан зарача тортинмаётганини кўрсатиб турарди.

— Ёнимга ўтиришингни хоҳлардим, — деди Пъяри норози бўлиб. Унинг нигоҳида сабрсизлик, ундан ҳам кучлироғи, Кажри

<sup>1</sup> Саут — кўп хотинли эркакларда иккинчи хотин, кундош.

буйруғини бажармагани иззат-нафсига текканидан ранжиганлиги рўй-рост билиниб турарди. «Ўз уйимда амримга бўйинсуң масликка нечун ҳаддинг сиғди?!» — деган сўзлар янгради унинг овозида.

— Жойим эрим ёнида, — деди Қажри унинг гапини бўлиб.

— Ихтиёринг, — рози бўлди Пъяри ва яна нимадир демоқчи бўлгандай бош чайқади. Сукхрам унинг дилидагини дарҳој пайқади. Пъяри кундошининг афзаллигини тан олган, шунинг учун ҳам ёнидан жой кўрсатган эди. Лекин Қажрий ҳақиқий ўрмон гули бўлгани учун қалбаки гуллар тикилган чойшабда ўтиришдан воз кечди.

— Сени баҳслашиб енгиш ҳам қийинга ўхшайди, — деди Пъяри кулиб. У ҳаммасини ҳазилга йўйишига интилди.

Аммо Қажри бунга ҳам қаноат ҳосил қилмади.

— Биз камбағал одамлармиз, хоним, бизга шу ер ҳам бўлаверади. Ёнингда ўтириб каравотингга безак бўлолмайман. Чодирда, ерда ўтириб ўрганганман, ўз одатимдан нега воз кечарканман?

— Майли, ўтирган жойингда қолавер. — Пъярининг ғаши келди. — Ихтиёринг. — Сўнг ўз ишига киришди.

— Уй эгаси билан суҳбатлашмасдан иложи йўқ, — деди Пъяри.

— Ўзим гаплашаман, — деди Сукхрам.

— Сен ўзингни касалга солиб туравергин, бўптими? — қўшиб қўйди Қажри.

— Бу хусусда хотиржам бўл, — Пъяри кулиб унинг бошини силади.

— Демак, менда шубҳанг йўқ, а? — сўради Сукхрам кулиб.

— Жонимдан тўйдирдинг! — деди норозилик билан Пъяри. Сукхрам кулиб юборди.

— Жаҳлинг чиқмасин, опа. Ҳаммасини ўзим тўғрилайман, — деди Қажри.

— Яна ким қачон келасан? Менга қара, уйга қайтаётганингда кимгadir сабоқ бериш эсингдан кўтарилемасин.

— Унга ҳар куни буни тайинляяпман, — гап қўшди Қажри.

— Буни бошқа бирга олиб юрмайман. Уни бу ерга олиб келиш учун янги латта-путталар ғамлолмайман. Эёки кийимда келгани унамаяпти.

Сукхрам билан Пъяри кулишди, Қажри бўлса қизарив кетди.

— У кичик хотин-да, — деди Пъяри мулойимлик билан.

— Бўпти, биз кетайлик, — деди Қажри.

— Яна келасанми?

— Чақирсанг албатта келаман.

Эшик ёнига борган Қажри тўхтаб ўгирилди.

— Келгуси сафар келганимда оёғимга бўёқ суртиш эсингдан чиқмасин, илтимос, — деди у мугомбirona кулиб.

## 19

Кеч кирди. Дала ва ўтлоқлардан пода қайтди. Юзларча туёқлардан кўтарилган чанг бурун тешикларига ёпишди. Гоҳ у, гоҳ бу ерда оғизни нордон, ёпишқоқ алланарсаларга тўлдириб ингичка тутун оқими сузив юради. Яқинлашиб келаётган қонғулик борлиқни юпқа, тиник парда билан қоплай бошлади, ана шу парда устида кўзга кўринмас тузоқдан қутулгандай қушлар баъзида чарх уриб учади. Ибодатхона қўнғироқларининг бир оҳангдаги ва ташвишли жаранги атрофни тўлдирган.

Дхупо уйида ўтириб, бҳарбҳудлар<sup>1</sup> табақасига мансуб Дин исмли кишининг хотини билан сұхбатлашишарди. Сұхбатнинг охири кўринмайдигандай эди. Дхупо Пъярини ҳам, Банкени ҳам унудишига улгурди. Банкени калтаклашгандан кейин ундан ўч олишни ўйламай қўйган эди. Ҳаёт ўз изида борарди. Дин келгунга қадар иккала хотин мириқиб сұхбатлашишди. Эри келиши билан хотини бошига рўмол ташлади.

Дин уйга кирмай останага яқин жойга ўтирди. У билан бирга бир неча оғайнилари ҳам келган эди.

Эркаклар сұхбатига қулоқ солган Диннинг хотини жавради:

— Тамом, ўтириб олди, ейиш-ичишини ҳам унуди.

Дхупо ўз эрини хотирлади.

— Эҳ, опажон! — хўрсинди у. — Эркакларнинг гаплашадиган гапи кўп.

— Тўғри-тўғри! Бу ёқда иссиққина нон совиб қоляпти.

Дин олим тўтиқуш<sup>2</sup> ҳам, денгизчи ҳам эмасди. У бир мусулмон одам эди. Айвонда дунёвий воқеалар хусусида гап кетди.

— Қулоқ солинглар, сизларга бир воқеани айтиб бераман, — таклиф киғитди Дин.

У дуо ўқиди, сўнг баланд, жозибали товуш билан ҳикоясини бошлади:

— Илоҳий кучлар бизни не кўйларга солиб қўйганини кўринг! Худди ўша кучлар Яман подшосини Маккага зиёратга боришига мажбур қилибди. Подшо ўша ёққа ўғли билан жўнаб кетибди. Ўша пайтларда қизларни бирга олиб юриш расми йўқ бўлганидан қизини уйда қолдириб кетибди. У жўнаб кетиши Силан вазири қора ниятини рўёбга чиқармоқчи бўлибди. Малика шунақаям гўзал, шунақаям соҳибжамол эканки, уни таъриф-

<sup>1</sup> Б ҳ а р б ҳ у д а р — бу табақа одамлари мушакбозлик учун ишлатиладиган петарда, қарсилдоқ ясаш билан шуғулланади.

<sup>2</sup> О л и м т ў т и қ у ш — яна «Тўтинома»га ишора.

лашга тил ожиз. Унинг мулойим кулгисидан гулларга титроқ киаркан. Дилдор жонон қаёққа назар ташласа ҳаммаёқ гулгул яшнаб кетаркан, тун кундузига айланаркан. Малика ёш ниҳолдай қадди-қомати келишган экан. Ҳаммадан ҳам шафқатли, саховатлилигини айтмайсизми?! Вазир қизнинг ҳузурига келиб: «Малика, бугун уйимга келсангиз», депти. Малика бўлса: «Қасрингга қайтиб бориб жавобимни куттгин», депти. Вазир итоат қилибди, кетибди, бироқ маликанинг гўзаллиги уни лол қилиб, оромини йўқотибди. Қалби заҳар билан тўлдибди, ҳирс илон бўлиб ўрмалаб кўксига вишиллабди. Юраги ўт бўлиб ёна бошлабди. Нима қилиш керак? Қандай йўл тутиш лозим? Шу пайт иблис унинг кўнгил уйига кириб олибди. Кириб олибди-да: «Жавобини кутма. Туриб унинг ёнига бор. Куч билан унга эга бўл. У ўз хоҳиши билан хўп дермиди?» деяверибди. Ниҳоят коронғи тушиб, ой чиқибди. Ой маликанинг юзидаи нур тарата бошлабди, вазирнинг тоқати тоқ бўлиб қасрга йўл олибди. Малика ўз ётоғида тунги кийим билан кўзгу олдида ўтирган экан. У кўзгуда ўзи томон писиб келаётган вазирни кўриб қолибди. «Нима қилдим энди,— ўйланибди у.— Отам йироқда, акам отам билан бирга кетган. Мен ёлғизман. Борди-ю, номусимни бой берсам кейин қандай яшай оламан?» Малика хизматкорларга дарвозани беркитишни, вазирни тошбўрон қилишни буюрибди. Шундай қилишибди. Вазир келган жойига кетишга мажбур бўлибди.

Оллонинг иродаси билан шу пайт маликанинг отаси билан акаси қайтиб келишибди. Қалтакланган вазир улар ҳузурида ҳозир бўлъибди, подшо унга савол берибди: «Эй, садоқатли вазирим, сенга нима бўлди? Жавоб бер!» Вазир шундай жавоб қилибди: «Холимга эътибор берманг, подшоҳим. Ҳаммаси худонинг иродасидан». Бироқ подшодан осонликча қутулиб бўлмаслигини билган вазир ёлғон гапирибди: «Қизингиз ўзини ножӯя тутди, подшоҳим, унга насиҳат қилмоқчи бўлсан, мени тошбўрон қилишга буюрдилар».

Ҳамма воқеа шундан бошланибди. Подшо ишонувчан, бунинг устига хушомадни ёқтирадиган одам экан, вазир эса инсон эмас, балки чаён экан, қаерга найза уришини биларкан. Подшо ўша заҳоти валиаҳдга буюрибди: «Мени шарманда қилишга журъат этган бузук қизни қилич билан иккига бўлиб ташла!»

Валиаҳд кетибди. Аммо ёвуз вазир маликага тұхмат қилганини валиаҳднинг юраги сезибди.

Дхупо нафасини ичига ютиб қулоқ соларди.

Дин эса қўлини осмонга чўзиб ҳикоясини давом эттириди:

— Валиаҳд синглиси ёнига бораётганиши оёғи унга ҳеч бўйсунмасмиш. «Болалигимида бирга ўйнардик,— ўйлабди у.— Наҳотки синглимни яхши билмасам! Йўқ, унга қилинган тұхматнинг рост-ёлғонлигини аввало ўзим текшираман». Ичкарига

кирса малика қордек оппоқ ўринда ўтириб, қуръон ўқиётганимиш. Подшонинг валиаҳди қуидаги сўзларни эшишибди: «Иzzате ман сахатван аур зиллате ман сахатван». Бунинг маъноси шундай экан: «О оллоҳ, бизга ор-номус берасан, бизга шармандаликни келтирасан». Йигитнинг юраги зирқираб кетибди. «Йўқ, унинг гуноҳкор бўлиши мумкин эмас! — депти ўз-ўзига. Лекин малика акасига ялинибди: «Отамнинг амрини бажо келтир, мени чопиб ташла. Мени бузуқ деб шубҳа қиласа яшамай қўйганим маъқул. Акажон, отамнинг амрини бажар, сендан ўтиниб илтимос қила-нан». «Йўқ, сингилжон, — жавоб қайтарибди валиаҳд, — мен бошқачасига йўл тутаман». У қимматбаҳо ёғочдан ясалган каттагина сандиқ келтирибди, ичига синглисисини ўтқазибди, беркитиб дарёга ташлабди. Аммо сандиқ сувга чўкмабди, суза бошлабди, чунки у сеҳрли сандиқ. Сандиқ чўкмас экан, тўлқинлар ҳам уни соҳилга чиқариб ташлай олмас экан, у фақат оқимга қараб сузиб кетаверар экан.

Дхупо ҳикояни кўзларини катта очганича эътибор билан тингларди. У нуқул тўлқинлар устида чайқалиб, номаълум ёққа сузиб бораётган сандиқ ичидаги бечора малика нималар ҳақида ўйлаётганини тасавур қилишга интиларди.

Диннинг хотини чуқур хўрсиниб қўйди. Дин бир йўталиб олиб, ҳикоясини давом эттириди:

— Бу орада Чин ҳоқони мактуб йўллабди: «Менинг валиаҳдим ажойиб, чиройли йигит бўлиб етишди. Эй, Яманнинг улуғ подшоси, сенинг эса соҳибжамол қизинг бор. Уни ҳузуримга юбор. Тўю томоша қилайлик». Мактубнинг Яманга етиб бормай туриб сандиқнинг дарёда суза-суза Хитойга бориб қолгани худонинг иродаси эмасми? Бунинг устига Хитой валиаҳди шу вақтда дарё ссхилида ов қилиб юриб, сандиқни кўриб қолибди.

У имо қилиши билан одамлари сувга ташланишиб, сандиқни соҳилга олиб чиқишибди. Дурадгорларни чақиришибди. Дурадгорларнинг эса ўз болтасини ишга солишдан олдин унинг овозини билиш ниятида сандиқни тақиллатиб кўриш одати азалдан бор экан. Дурадгор сандиқни тақиллатган экан, ундан: «Секин-роқ, эҳтиёт бўлиб тақиллатинг», деган овоз келибди.

Дурадгорнинг қўрқувдан тили калимага келмабди. У жонҳолатда қочиб қолибди. Валиаҳд сандиқни бузишга амр қилибди. Маликани қўрибди-ю, ошиқу бекарор бўлибди, малика ҳам ибо билан ерга боқиб, йигитни севиб қолганини тан олибди. Валиаҳд: «Мановиси соз бўлди! Яманга отланаётган эдик, энди у ёққа боришининг ҳам ҳожати йўқ, қанчадан-қанча пулларни тежаб қоладиган бўлдик. Келин бўлса уйга ўз оёғи билан келиб қолди», деб ўйлабди. У маликани саройга келтирибди, тўй қилишибди. Келин-куёв баҳтли ҳаёт кечиришибди. Ватқ ўтиши билан малика ҳаммани хурсанд қилиб ўғил туғиб берибди.

- Буниси соз бўлибди! — хитоб қилди Дхупо.
- Ҳаммаси тақдирдан, — деди насиҳатомуз Диннинг хотини.
- Бу ҳақ гап. Қимнинг пешонасига нима ёзилган бўлса шуни кўради.

Дин виқор билан атрофга назар ташлади, телпагини бостириброқ кийди. У тикка туриб эшитаётгандарни ўтиришга таклиф қилди, ўтиргандардан уларга жой беришни сўради.

— Қулоқ солинглар. Бу ҳам оллонинг иродаси! — давом этди Дин ҳамма жой-жойига ўтиргач. — Бир куни валиаҳд тўқувчиляр маҳалласига борибди, бир аёл тўқувчига айтаётган қуйидаги гапларни эшитиб қолибди: «Аҳдим шундай, азизим! Подшоҳимизга ўхшаб уйлансанг, эртагаёқ тўй бошлигинга розиман, Сорди-ю, жамоамиз қонунлари талаб қилганидай ҳамма таомилларга кўра тўй қилмоқчи бўлсанг, тирсагингни тишлаганинг дагина тўйга рози бўламан».

Бу сўзлар валиаҳдни ҳайратга солибди. Шу маҳаллада бўлиб, кўнгилни алғов-далғов қиласидан гапларни эшитганини қаранг. Бу ҳам оллонинг иродаси билан бўлди! Саройга қайтиб келган валиаҳд ўй сура бошлабди: «Тўқувчилар зотидан бўлган бу аёл ажойиб гапларни айтди-я! Бу гапларда қанақа маъно яширингани!» У бонг урибди. Сарой аҳли ҳозир бўлга, тўқувчи билан ғалати гапларни айтган аёлни дарҳол саройга келтиришни буюрибди. Соқчилар тўқувчи билан аёлни олиб келишибди. Улар қўрқувдан қалтирашибди: ким билсин, валиаҳд шаҳзода уларни нима қиласкин? Бироқ валиаҳд уларга шундай дебди: «Қўрқманглар, сизларни хеч қанақа хафв хатар кутаётгани йўқ. Лекин, хой хотин, менга тушунтириб бер, нега тўқувчи подшо сингари тўй қилса унга тегишга розисану жамоа қонунларига кўра тўй қилса, у тирсагини тишламагунча унга тегишга рози бўлмайсан?» — «Улуғ шаҳзодам, — жавоб қайтариби аёл, — жаголоссангиз ҳам, марҳамат қилсангиз ҳам ихтиёр ўзингизда, аммо ҳақиқат оловдан қўрқмайди<sup>1</sup>. Подшолар уйланса, келин унинг ўйига ўзи келади, сарф-ҳаражат ҳам, ташвиш ҳам йўқ. Никоҳ ўқилса бўлди — олам гулистон. Борди-ю, тўй жамоа қонунларига кўра бўлса-чи? Сарф тагида қоласан!»

Аёл билан тўқувчи кетибди. Валиаҳд Яман маликаси суратини олиб қараса, у ўзининг хотини экан! Валиаҳд министрни чақириб шундай дебди: «Хой, министр! Хотинимни отасининг ёнига олиб бор, кейин жамоа қонунларига кўра музикаю ҳашамат билан уни тўй қилиб тушириб келамиз». Малика ўғли

<sup>1</sup> Ҳақиқат оловдан қўрқмайди — бу ерда садоқат ва ҳаққонияти оловдан синаш — «агнипарикша» удуми кўзда тутилмоқда. Тўғри ва ҳаққоний одам олов ичидан зиён-заҳмат кўрмай ўтиб кетади. Рама хотини Ситани ана шундай усул билан синаған. Чунки, Сита Раванинг қўлида асрда бўлган. Сита садоқатини намойиш этиб, олов ичидан соғ-омон чиққан.

билан йўлга равона бўлибди. Ҳой одамлар, оллонинг иродаси бизни не кўйларга солишини кўринг, йўлда министр маликани зўрламоқчи бўлибди. У ниҳоятда ярамас, йўлтусар одам экан. Валиаҳдга берган ваъдасини унудибди. Чодир тикиб, маликага: «Ҳирсимни қондир», дебди. Малика эса: «Аввал отам ёнига олиб Соргин, кейин талабингга яраша жавоб берай», дебди. Министр соқчиларни бошқа жойга жойлаштирган экан, шу важдан қўрқишини хаёлига ҳам келтирмабди, у ҳозир айтганимни қиласан леб оёқ тираб тураверибди. Малика чодирнинг энг баланд жойига чиқиб олибди. Министр: «Ёнимга кел, пастга туш, бўлмаса ўғлингни ўлдираман!» дебди. Малика: «Ор-номусимни сақлашим керак; ҳаёт билан ўлим оллонинг қўлида», деб жавоб қайтарибди. Бераҳим, қатттол министр болани ўлдирибди. Малика кечаси чодир тепасидан тушиб, ўрмонга яширинибди. Министр ҳамма аскарларини маликанинг орқасидан юборибди, аммо маликанинг изини ҳам топа олмабдилар. Министр валиаҳднинг ёнига қайтиб келиб шундай дебди. «Улуғ шаҳзодам! Хотинингиз бўлмағур экан, йўлда боласини еб қўйди. У хотин эмас, алвастининг ўзи! Манфур ишини қилиб, ўзи ўрмонда дом-дарааксиз йўқолди».

Эҳ-хе! Шаҳзода шунақаям қайғуга тушибдик! Тортган ғамининг чеки-чегараси бўлмабди. У маликани жудаям яхши кўрарди-да. Шаҳзода ғазаб, умидсизлик ўтида ёниб, Яман подшоҳига чопар юборибди: «Биз ҳадемай қизингизни хотинликка олиш учун етиб борамиз!» деган мазмунда бир мактуб ҳам йўллабди. Яман подшоси қандай жавоб қайтаришни билмай гангиб қолибди. Унинг бу ҳолатини доно вазири пайқабди. Қайси вазир дейсизми? Маликани сандиққа солиб, дарёга ташланишига сабабчи бўлган оқил вазир-да. У қулай пайтни пойлаб: «Кўнглим ҳукмдори! Сизни балодан халос қиласман. Қизингиз ўрнига қизимни куёвга бера қолинг, ҳеч ким билмайди»,— деб айтибди. Шунга келишишибди. Хитойда тўйга ҳозирлик ишлари кучайиб қетибди. Мамлакат бўйлаб овоза тарқабди. Лекин шу пайт малика қайтиб келибди. У эркакча фақир кийим кийиб, пойтахт чеккасидаги ибодатхоналардан бирига жойлашибди. У ерда малика афсунгарлик, башорат қилиш бобида донг таратибди, унинг ёнига мамлакатнинг ҳар томонидан одамлар оқиб кела бошлабди. Моҳир башорат қилувчининг овозаси валиаҳднинг қулогига бориб етибди, у тўй олдидан фақир ёнига ташриф буюриб, ўз тақдирини билмоқчи бўлибди...

Осмонда бирин-кетин юлдузлар милтиллади, бу ялтироқ қўнғизмисол юлдузлар самода оловли из қолдириб, дарахтларнинг қоп-қора тузоқларига илиниб қолгандай, йўлини давом эттириш учун тузоқдан қутулолмаётганга ўхшардилар..

Лекин Дхупо юлдузларни пайқамасди, қоронғи тушганини ҳам сезмасди, у бутун вужудини қулоққа айлантириб ҳикоя тингларди. Айвонда анчагина одам ўтиради; Дхупонинг ёнидан Диннинг хотини жой олганди.

— О, олоҳ! — ҳўрсинди у. — Маликанинг бошига не кунлар тушибди-я!

— Тақдир кишиларни не кўйларга солмайди!

Дин ҳолатини ўзгартирди, ҳазин ва ғамгин товуш билан давом этди:

— Оллоҳ яна ўз иродасини ишга солибди: фақир кийимидағи малика бўлажак тўйдан хабар топибди, эртасига эрталаб унинг ҳузурига хитой ҳоқонининг валиаҳди ташриф буюрибди. Малика уни қабул қилибди, сўнг шундай дебди: «Тақсири, бугун ажойиб туш кўрдим». «Авалиё отам, — деб илтимос қилибди валиаҳд, — тушингни айтиб бергин». Лекин «фақир» шундай жавоб қилибди: «Йўқ, тақсири, туш туш-да, унда нима ҳақиқат, нима ёлғон эканини ким билсан. Борди-ю, тушим кўнглингда маҳкам ўрнашиб олиб, сени бесаранжом қилса-чи. Яхшиси тушимни эшитмай қўя қол, тушим ўзимни ҳоҳламабди. «Йўқ, отаҳон, — оёқ тирабди у, — айтиб берасан». «Яхши, укам, бунчалик илтимос қилиб қолдинг, эшит бўлмаса. Тушимда аллақандай подшо Макканинг муқаддас жойларига зиёратга жўнабди, қизини уйда қолдирибди. Қизни вазири яхши кўриб қолибди, унга зига бўлмоқчи бўлибди, аммо малика уни ўзига яқинлаштирамабди. Шунда вазир подшоҳ қайтиб келиши билан қизи устидан тухмат тоши ёғдирибди. Қизнинг акаси синглисини чопиб ташлаш ҳақидаги отаси берган буйруқни бажармабди. Унинг ўрнига синглисини ёғоч сандиққа солиб, дарёга ташлабди. Сандиқ оқиб бораётганда бир валиаҳд шаҳзода ов қилиб юрган экан, у сандиқни кўриб қолиб, дарёдан олиб чиқишга амр қилибди. Сандиқ ичидан чиқсан маликани кўриб ошиқу беқарор бўлибди, уни хотинликка олибди. Шунақа, туш туш-да, нима ҳақиқат, нима ёлғон эканлигини ким билсан. Тушим шу ерда тўхтаб қолаверсин. Тақсири, давомини сўрамагин!»

Лекин бунинг иложи бўлмапти. Валиаҳд ҳикояга шу қадар берилибдик, давомини эшитишта жудаем қизиқибди. «Йўқ, отагинам, — дебди у, — давомини ҳам айтиб берасан!» «Йўқ, тақсири, шу ерда тўхтатиб қўя қолай!» «Йўқ, йўқ, айтасан!» Валиаҳд ўз гапида маҳкам турибди, «фақир» тушини охиригача айтишга мажбур бўлибди. «Олдиндан парвардигори олам ҳукм чиқарган бўлса керакки, валиаҳд тўқувчининг бир аёл билан ёўлган сұҳбатини эшитиб қолибди. Валиаҳд хотинини отаси ёнига жўнатишига аҳд қилибди. Бироқ йўлда маликани кузатиб бораётган министр уни таъқиб қила бошлибди, малика ўз ор-

номусини ҳимоя қилиб ундан қочибди. Шунда министр унинг ўғлини ўлдирибди. Мана, тушим ҳам тамом бўлди. Тақсиrim, энди мени яхшиликча қўйиб юбор, чунки туш туш-да, унда нима ҳақиқат, нима ёлғонлигини ким билсин. Тушим кўнглинга маҳкам ўрнашиб, бесаранжом қилмаса бас!» «Авлиё отам, — «фақирга» мурожаат қилибди валиаҳд,— тақдиримда бўлишинг керак. Лекин ҳикоянинг мен охирини билмоқчиман».

«Тақсиrim, ахир бу туш-ку, — деб жавоб қайтарибди малика. — Мен дарбадар юрган фақирман, тақдирингда бўлишга менга йўл бўлсин! Илтимос қилсанг тўйингга келаман».

Бу орада тўй маросими қатнашчилари, улар билан бирга вазирнинг қизи ҳам келиб қолибди. Шунда фақир: «Келинни Яман маликаси сурати билан таққосла!» — дебди.

О, шунда роса тўполон бўлибди! Валиаҳд суратни келин юзи билан таққослади. Қараса, у эмас! Маликадаги шоҳона улуғворлик қани? Илоҳий гўзаллик қани? Сутга чайқагандай оппоқ юзлар, тимқора жингалак соchlар қани? Э, худолар! Валиаҳд беҳол йиқилибди, халқ ҳаяжонга келибди, фақирдан нима бўлганлигини сўрай бошлашибди. «Отахон, унга муқаддас кул сочгин, унинг устида дуо ўқигин, у яккаю ёлғиз ўғил, ота-оналари мусибат чекиб ўлиб қолишади! Авлиё отам, каромат кўрсат!» — деб ҳамма қичқира бошлади. Фақир: «Ўрнингдан тур!» — деса валиаҳд иргиб туриб: «Мен қаердаман? — деб сўрабди. Бу ҳам оллонинг иродаси. Ўз номусини авайлаб сақлаган аёл қудрати ана шунақа бўлади.

Малика эгнидаги фақир кийимларини улоқтириб валиаҳдга: «Мени танидингми?» дебди. У маликани дарҳол таниб, баҳор гулларидай яшнаб кетибди. Шу заҳоти уларни яна никоҳлашибди. Ноғоралар гумбурлабди, карнайлар чалинибди. Валиаҳд саройга севикли хотинини олиб келибди, ҳамма байрамлардан ҳам зўрроқ тўю томоша бошланибди, мушаквозлик авжига чиқиб, осмон чароғон бўлиб кетибди..

Дин жим бўлиб қолди. Назарида тўйда отилаётган мушакларни ўзи сотаётгандай, халқ талашиб олаётгандай, ҳадемай у бойиб пули ҳам қадиқка сифмай кетадигандай бўлиб туюлди. Бу фикрдан ҳузур қилган Диннинг кўзлари юмилиб кетди, кўзини очганда ҳикояга маҳлиё бўлиб ўтирган кишиларни кўрди. Шунда Дин гапириб эмас, куйлаб тамом қилди.

Севишганлар топишиса савол нечун?  
Қисса айтдим, ёқлаб аёл номусин.  
Номусингиз сақлангиз қорачиқ мисол,  
Шундан толар ҳар ким ҳам бахту иқбол.

Сукхрам билан Қажри Рустамхоннинг уйига кираверишда, ҳовлида ўтиришибди. Қеч тушаётир. Қуёшнинг сўнгги зиёси уйқуга кетишга шайланадиган табиатни кучсиз ёритиб турибди. Нихоят нурлар уфқ ортида кўздан йўқолди.

- Уйга киравер! — деди Сукхрам.
- Сенсиз-а? — ҳадиксираб сўради Қажри.
- Бўлмасам-чи! — деди бепарвогина Сукхрам.
- Бу ерда ёлғиз нима қиласан?
- Хотинларнинг орасида нима ишим қолган?
- Кажри уйга кириб кетди. Пъяри унга пешвоз чиқди.
- Қажригинам! — хурсанд бўлиб хитоб қилди у.
- Пъяригинам, — деди Қажри сал хижолат чекиб.

Бир-бирларига меҳр қўйган аёллар қўл ушлашиб, шодон кулишиб, зинапоядан тепага кўтарилишиди.

Ичкаридан Рустамхон чиқди.

Сукхрам унга салом берди:

- Салом бердик, улуғ тақсири!
- Сенга ҳам салом. Аҳволлар қалай?
- Дуойи жонингизни қилиб юрибмиз, ҳоким тўра, — жавоб қилди Сукхрам ерга чўкаётиб.

Рустамхон ўтириди.

- Сен ҳам ўтирибман. — Сукхрам шундай деди-ю, чилим сархонасига чўғ ташлаб, найдан бир неча бор тамакини ичига тортди, тамаки яхши ўт олгач, чилимни Рустамхонга узатди.
- Айтинг-чи, тақсир, соғликларингиз қалай?
- Худога шукур, бутунлай тузалиб кетдим.
- Йўқ, тақсир. — Рустамхоннинг кўзига тик қараб деди Сукхрам, — бутунлай соғайганингиз йўқ! Бир ойдан кейин қасаллик қайталаниши мумкин.

- Қайталанадими? — титроқ овозда қайта сўради Рустамхон.
- Албатта.
- Энди нима қиласан?
- Ўзингизни тиясиз, тақсир.
- Винс ичиш ҳам мумкин эмасми?
- Йўқ, вино хоҳлаганингизча ичаверинг.
- Ҳунарингни яхши биласан, Сукхрам,— ялинди Рустамхон. — Наҳотки муддатини қисқартира олмасанг?
- Буни ўзингиз қилишингиз ҳам мумкин.
- Мен-а? Қандай қилиб?
- Бемаъни ҳирсдан сақланинг.

Рустамхон қовоғини солди, лекин бардош берди, индамади. Аммо кўнглида шубҳа туғилди: бу нат уни тузатишга ваъда берган, яна нечун бошини айлантиради?

Рустамхон туриб, уйига кириб кетди.

— Қажри! — чақириб қолди Сукхрам.

— Ҳўш, — жавоб қилди Қажри, — унга айтдингми?

— Йўқ, фақат замин тайёлладим.

Шу пайт деразадан Рустамхон мўралади. Сукхрамнинг кейинги сўзларини эшилди.

Рустамхон деразадан нари кетди. У ҳамма гапга тушунди.

— Ҳозир келаман, Қажри, — деди Сукхрам. — Мени шу ерда кутиб тур.

— Ким билан гаплашдинг? — қизиқиб сўради Пъяри.

— Сукхрам билан.

— Нима деди у?

— Сиҳат-саломатлигингни сўради.

— Ўзи тепага чиқмадими?

— Йўқ у шошиляпти.

— Қаёқقا?

— Бозорга. Бўлмаса оқшом тушиб уйга улгурмаймиз.

— Шу ерда ушланиб қолишдан қўрқасизларми?

— Бўлмасам-чи, бироннинг уйида ўтириб нима қиласми?

Пъяри хафа бўлди, буни Қажри тушунди.

— Сени хафа қилмоқчи эмасдим, — деди у. — Тўғри гапни айтяпман. Айт-чи, бу ерда ўз уйингдагидай эркин яшаяисанми?

— Йўқ! — деди Пъяри дадил.

— Буни ҳамиша билардим. Бу бегона уй деб адашмаган эканман-да?

— Йўқ!

— Қажрижон, мени бу ердан олиб кет!

— Олдин анови билан гаплашиш керак-да.

— Рустамхон биланми? У рози бўлмайди.

— Бу ёғини Сукхрам тўғрилайди.

Қажрининг жавоби Пъярини ўйлантириб қўйди. У даҳшатли хатога йўл қўйғанлигини тушуниб етди.

— Ҳаммаси шунаقا бўлади деб ўйлабманми?

— Қанақа бўлади деб? — Қажри сергакланди.

— Анави тирик мурда йўлимдағов бўлишини, бўйнимда оғир тош бўлиб осилиб туришини айтяпман. — Кейин Пъяри ўз-ўзи билан гаплашгандай паст товуш билан сўзлади. — Наҳотки ҳаммасига чидағ ўтирам? Йўқ. У ўзи ким бўлиб қопти, нуқул менга буйруқ қиласверади?! Ахир мени натниман-ку. Натни! Мени ушлаб ўтиришга кучи етармиди?

Пъярининг назарида тош зиндоннинг эшиклари очилаётганга ўхшади.

— Сенга нима бўлди, Пъяри? — Кажри уни юпатишга интилди.

— Бу ерга ўзим келганманми, ўзим кетаман, — давом этди Пъяри.

— Қўлидан нима келарди? Қамаб қўядими? Қамаса ҳамайверсин! У абраҳни тинчтиб қўяман, вассалом!

Пъяри гўё уйғониб кетгандай Кажрига қаради ва:

— Менга ёрдам берасанми? — деб сўради.

— Ёрдам бераман, — деди Кажри, — аммо қўрқаман.

— Мени ушлаб қолишга ҳадди сиғмайди.

— Ишонгим келмаяпти.

— Ушлаб қоломмайди.

— Борди-ю, қўйиб юбормаса, унда нима бўлади?

— Унга бўйсунади деб ўйлайсан шекилли? — қичқирди Пъяри. Унинг товушида телбалик барагла сезилди. Кажри беихтиёр сесканиб кетди. Пъяри қўрқувдан мутлақо халос бўлгандай эди. Ҳзини бўрондан сақлаб қолган, ҳозирда поёнсиз осмонда чарх ураётган қушгина ана шундай бор овоз билан ғолибона қичқириши мумкин. Остида денгиз ёйилиб ётибди, лекин қуш ундан заррача бўлсин қўрқмайди, энди унга тўлқин писандми!

— Агар зўравонлик қиласа-чи? — ҳамон шубҳа билдириб тақрорлади Кажри. У бўлажак жанжал манзарасини яққол тасаввур қилиб турар, лекин унинг хайрли тугашига ақли етмасди.

— Рустамхоннинг чўриси эмасман! — давом этди Пъяри. У атрофига ғазабли аланглади, ўз нигоҳи билан хонадаги ҳамма буюмларни тешиб юборгудай бўлди.

— Унга бас кела олармидинг, — Кажри елка қисди. — Ҳукумат унинг тарафида.

— Эшигини бузиб қочиб кетаман!

Кажри кулди.

— Нега кулласан?

— Роса топиб гапирдинг-да! Ҳозиргача ўғри эшикни бузиб буюмларни олиб кетарди, энди буюмларнинг ўзи ўғрининг эшигини бузиб, ундан қочиб кетяпти!

Пъяри кулмоқчи бўлди-ю, лекин ўша заҳоти қовоғини уйиб қизариб кетди.

— Омади гап, опа! У сени қандай қилиб қўйиб юборади? Эркак киши бўлганимда мен ҳам қўйиб юбормасдим. Жанжал роса авжига чиқади-да!

— Менга ҳеч ким қарамасин учун юзимнинг дабдаласини чиқариб ташлайман.

— Сукхрам ҳам қарайди деб ўйлайсанми?

— Қарамайдими? — Пъярининг ранги оқариб кетди.

— Ҳамма эркаклардан унинг зуваласи бошқача деб ўйлайсанми?

- Йўқ, Қажри, йўқ, унинг дили бошқача.
- Эҳтимол, гапинг тўғридир. Биз ҳаммага ўхшамаган йигитни ахтарганимизда, нега энди у ҳам ўзига чиройли аёлни ахтармаслиги керак?
- Икковлари ҳам қулиб юборишиди.
- Борди-ю, у бадбашара бўлгандা-чи? — сўради Пъяри.
- Парвардигор бадбашара аёлларни яратмаганми? — жавоб қилди Қажри.
- Чиройингга бино қўяяпсанми? — деб сўради Пъяри.
- Қажри унга кўз қирини ташлади-ю, аммо индамади.
- У нима ҳам дея оларди?
- Тўсатдан хонага Рустамхон кирди.
- Пъяри кийимларини йиғиштири, ўзини бепарво тутди, кейин Рустамхонга савол назари билан тикилди.
- Қулоғимга аллақандай овозлар чалинди, — деди Рустамхон.
- Ким билан гаплашаётган эдинг? — у хонага кўз ташлади.
- Қажри удумга кўра дарҳол бошига ёпинчифини ташлади, лекин Рустамхон унинг юзини кўришга улгурган эди.
- Ким бу? — сўради у Қажридан кўзини узмай.
- Қажри одоб тақозо этгандай бошини қуий эгмади. Ёпинчифи четини икки бармоғи билан ушлаганича бармоқлари орасидан Пъяри ҳамда Рустамхонни кузатди. Пъярининг нафратига сазовор бўлган одамни дурустроқ кўриб олмоқчи эди.
- Унинг исми Қажри.
- У ким, деб сўрайяпман?
- Қундошим! — деди Пъяри дадил.
- Рустамхон хижолат бўлди. Демак, Пъяри ҳозиргacha ўзини Сукхрамнинг хотини деб ҳисоблайди. Рустамхон эса унинг учун гўё йўқдай!
- Сукхрам ё менинг хотинимга нисбатанми? — ачитди у.
- Кўзгуга боқиб ўзингни бир томоша қил, — қаҳр билан жавоб қилди Пъяри.
- Унинг жавоби Рустамхонни бутунлай хижолатга солди.
- Ана, дарров жаҳлинг ҳам чиқа қолди, — деди ўзини йўқотган Рустамхон.
- Мен ҳазиллашдим.
- Мен билан ҳазиллашишга бало борми? — Пъяри елкасини жирканч билан қисиб, унинг гапини чўрт кесди.
- Рустамхон Қажрига ўқрайиб нигоҳ ташлади, сўнг бурилиб чиқиб кетди. Бу аёл оғриб турган жойингга бигиз санчишини билади. Рустамхон Пъяри бошқаларга ўхшамаслигини, унинг устунлиги ва ҳокимиятини тан олмаслигини ҳозир яққол тушуниди. Аёл киши ҳеч қачон эркакка бўйсунмайди. У эркакни ақлли ва билимдон деб билса ҳурматлаши, унга ғамхўрлик қилиши, қадрига етиши мумкин, лекин аёл киши эркакни ўзи билан тенгглаштиришга интилади, унинг устунлигини тан олмайди. Эри-

нинг бошқа аёллар билан дон олишганини эса ҳеч қачон кечирмайди. Фигони чиққан Рустамхон Пъяридан ўч олмоқчи бўлди.

— Ҳавасингга куйдирғи чиққур, биттаси камлик қиляпти унга! — деди Кажри жаҳали чиқиб Рустамхон кетгач.

— У нима деганинг?

— Менга еб қўйгундай бўлиб тикилганини пайқамадингми?

— Тикилишга арзийдиган чиройинг йўқ.

— Майли, эркакларга ёқмаслигим ҳам мумкин!

Пъярининг кўнглида нафрат тўлиб тошди. «Ярамас, нақадар ифлос одам!» — деб жаҳали чиқди унинг. Пъяри ўз баданига маҳлиё бўлган кўп эркакларни биларди. Ӯшаларда ҳар замонда бўлса ҳам ачиниш, инсонга хос шафқат уйгонарди. Рустамхончи? Унда инсонийликнинг ўзи йўқ. Худодан ҳам қўрқмайди, инсоф нималигини ҳам билмайди. Ҳеч кимнинг гапига кирмайди, ҳеч нима уни ниятидан қайтаролмайди. Кажрининг истеҳзоли гаплари Пъярига оғир ботди. У ниҳоятда шафқатсизларча ғлданганини ҳеч ким тушунмасди! У ўзига озор етказганлардан қасд олиш учун бу ерга келган эди, бироқ нимага эришиди? Ҳеч нимага? Бу ерда қамоқда ётгандай ётибди, қўл-оёғи боғлиқ. Ўз тақдирини шу қадар пасткаш одам билан боғлади-я!

— Хафа бўлдингми? — сўради Кажри.

— Йўқ! — Пъяри қайгули фикрларни ҳайдашга интилди.

Кажри унга диққат билан тикилди. Шу ҳолатда бир неча лаҳза ўтди. Ниҳоят Пъяри ўртадаги жимликни бузди.

— Бирон нарса ейсанми? — сўради у.

— Йўқ, кўнглим тусамаяпти! — Кажри рад жавоби берди.

— Бетель тайёрлаб берайми?

— Хоҳишим йўқроқ.

— Сенга ёқади, мен бетель тайёрлашни ўрганиб олганман, — Пъяри шундай деди-ю, бетель солинган яшикни олиб, баргларни тайёрлай бошлади. Пъяри ишга шунчалик ҳафсала билан киришдики, Кажри уни бадавлат хонадон аёлларига тақлид қиляпти, деб ўйлади, лекин ўша заҳоти бу фикридан қайтди.

— Эҳтимол, тайёрламаганинг маъқулдир? — деди у мужмалроқ қилиб.

Пъяри барг устига озгина оҳак солди, каттҳа<sup>1</sup>ни танлай бошлади. Кажрининг гапига димоғида «инҳ-ҳ» деб ғулдираб қўйдиди, кейин кулиб юборди. Кажри қизариб кетди.

— Мана, тайёр бўлди. Марҳамат! — Пъяри Кажрига ўроғлик баргни узатди.

Кажри бетелни олди, эгилиб таъзим бажо келтирди. Бундай удум Кажрига одат бўлиб қолганди. Бунгача у бетелни анча

<sup>1</sup> Каттҳа — ҳинд акациясидан олинган экстракт бўлиб, бетель тайёрлашда ишлатилади. Бундан ташқари ундан газлама бўяшда ва териларни ошлашда ҳам фойдаланилади.

юқори табақа одамлар қўлидан олган, шунинг учун ҳам ҳар сафар одоб билан миннатдорчилик изҳор қиласади.

— Нега чайнамаяпсан? — бетелни оғзига олиб бормаётганини кўрган Пъяри ўндан сўради.

— Борди-ю, у аччиқланса-чи? — деди Кажри қўрқа-писа.

Ниҳоят Пъяри Кажрининг Сукхрам ҳақида гапираётганини англади, лекин Кажрининг ниятига ҳали ҳам тушуниб етмаган эди. У ҳамон Кажри устимдан куляпти деб ўйларди. Пъяри кундоши томонга шубҳа билан назар ташлаб сўради:

— У нима ҳам дерди?

Кажри ўзини тутолмади.

— У: «Сен ҳам мени ташлаб кетдингми?» дейди, — жавоб қилди Кажри.

Пъярининг қалби ачинди. Демак Сукхрам ҳанузгача уни ташлаб кетганини кечирмаган экан-да. Нега энди унинг ўзи бу ҳақида ҳечқачон лом-мим демайди?

— У шундай деганимиди? — деб сўради Пъяри.

— Бўлмасам-чи! Албатта айтган, — Кажри тўсатдан кулиб юборди.

Пъяри ўзининг оқариб кетаётганини пайқади. У Сукхрамга беҳуда интилибди! Энди уникига боришнинг ҳожати қолмапти-да.

Уз кашфиётидан маъюсланган Пъяри дамини ичига ютди. «Бироқ бу ерда ҳам қололмайман. Ҳеч қачон! Ҳеч ҳам мумкин эмас! Ўнда нима қилишим керак? Қочиб кетаймий? Қаёққа? Қолсам-чи? Аммо Сукхрамнинг ғазаби ҳеч қачон тарқамайди. Слдин бунга умид қилса бўларди, лекин ҳозир у Кажри билан яшаб турган бир пайтда беҳуда хаёлнинг ўзи бўлиб қолади!»

— Бер бу ёққа! — деди Кажрига қўлини узатиб.

— Нимани?

— Бетелни.

— Нега? — нима гаплигини тушунмаган Кажри қўлини тортди. — Бунақа йўл тутиш одобдан эмас.

— Бу ҳақда ўйлама, — қўлини ҳамон чўзганича эътиroz билдириди Пъяри. Кажри аввал унинг қўлига, кейин Пъярининг юзига қаради.

— Нега энди?

— Ахир бетель чайнашингни у ёқтирмайди-ку.

— Пъяри! Мен ҳазиллашгандим!

Қош қсрайди. Пъяри фонаръ келтирди. Фонарнинг шишаси тоза, қурумнинг изи ҳам йўқ эди. Пъяри фонарга ёф қуйиб, пилигини буради ва ёқди. Хона ичига майин сарғиш нур тараалди.

— О, улуғ Рам! — ҳайрат билан хитоб қилди Кажри. — Мунчаям ёруғ-а!

Пъяри кулимсиради.

- Шунақа чироқни чодирингда ёқиб ўтиришни хоҳлайсанми?
- Ёқолмайди деб ўйлайсанми?
- Бунақа фонарь жуда қиммат туради, — деди Пъяри кулиб. Кажри фонарни қўлига олди.
- Мен оддий натниман, — деди у ўйчан. — Чодиримда шунақа фонарь бўлиши ақлга сиғмаган иш! Ие! Қўлни кўиди-паркан!
- Ўрнига қўйиб қўй, ағанатиб юбормагин тағин.
- Опа, айт-чи, — фонарни жойига яхшилаб қўйгач сўради Кажри, — у шамолда ҳам ўчмайдими?
- Ўчмайди.
- Жудаям антиқа буюм экан! — Кажри хўрсинди. — Бунақа буюмлар оламда қанчаю! Ҳаммаси ҳам бизга насиб қилмайди.— Кажри жим қолди, кейин бир нарсани хотирлади шекилли, гап бошлади: — Йкки йил олдин пойтахтда бўлгандим. Рожанинг қасрини ташқарисидан кўрдим. Болохонасида малика турган экан. Бай-бай-бай! Шунақаям чиройли, шунақаям латофатлики! Ўнинг ёнига мени қўйсанг, оппоқ сигирнинг ёнидаги балчиқдан чиққан урғочи қўтосга ўхшайман. Қаср ёнида, мановиндаقا улкан тувакларда, — у қўлинни ёзib кўрсадти, — етти хил рангдаги чироқ ёниб турганини кўрдим. Турган жойимда қотиб қолдим. Улар шунақаям чиройли эдики! Кечаси кундузгидаи ёп-ёруғ эди, таралаётган нур сутдай оппоқ эди!
- Рожалар — катта одамлар.
- Эҳтимол шундайдир. — Кажри унинг гапини маъқуллади, ҳозир ҳам унинг қаршисида ўша чироқлар ёниб тургандай бўшлиққа хаёлчан тикилиб қолди.
- Кажри, Сукхрамни қандай қилиб қайириб олгансан?
- Қўйсанг-чи, бирор эшитиб қолади.
- Айта қол, Кажри.
- Бунақа нарсаларни сўрайдиларми? — Кажри кулди.
- Айтавергин.
- Кажри жавоб беришга шошилмади. Пъяри ўйга толди.
- Ўшанда у ёлғиз эди, у билан учрашдинг, кейин нима бўлди? Қандай қилиб танишиб олдиларинг? — бўш келмади Пъяри.
- Бир-биримизга ёқиб қолдик, бўлган гап шу.
- Бунақа жавоб Пъярини қониқтирмади.
- Кейин-чи? — Қисташда давом этди.
- Кейин эр-хотин бўлиб олдик.
- Пъяри пастга шўнғиб, тумшуғини очиб, ўлжасига чанг солишга тайёр турган йиртқич қуш сингари ҳолатда эди.
- Унгача эринг ким эди? — гап қистирди у.
- Уни эслагим ҳам келмайди! — деди Кажри дадил. — У ёмон одам эди.
- Сени калтаклармиди?

— Урмасди, бироқ тирикчилик ўтказишнинг ғамини ўзим ердим. У кўп ичарди.

— Кейинчи?

— Кейинми? Буниси ҳам ичарди. Уни ичкиликбозликни ташлашга мен мажбур қилдим.

— Нега энди уни эр қилиб танладинг?

— Уни яхши деб билдим.

— Кажри, ҳамма натлар ичади, бунинг нимаси ёмон?

— Бизда жамоа тан олмаган нарса ёмон, холос. Аммо мен жамоадан ҳеч қанақа рўшнолик кўрмадим. Одамлар жанжаллашади, муштлашади. Олдинги эрим ичкиликни деб жиноятдан ҳам қайтмасди. Бир куни у кафанликка қўйилган пулни ўғирлаб ишиб юборди. — Кажрининг ҳаяжони кучайди. — Болалигимда ёнимизда Чикува деган кўкфуруш истиқомат қиласарди, у биз томонларга қўй боққани келарди. Қунларнинг бираиди у дўсти Багара билан бирга келди, уларнинг ёнида иккита канжар аёл, яна Деҳлидан келган кўкфуруш Саркасрайян ҳам бор эди. Улар бир-бирлари билан муштлашишди, канжар аёллар қочиб кетишиди. Саркасрайянни ўлдиришди. Кейин Чикува билан Багарани дорга осишиди. Канжарлар не аҳволда ҳаёт кечиришига бир на зар сол! Қанақа жойда яшашади? Улар кўча супурувчи — фаррошлардан қолган сарқитни ҳам ейишади.

— Кажри, отанг-чи, у ҳам ичармиди?

— Отам ҳам, онам ҳам ичарди.

— Ўзинг-чи?

— Мен ичмаганман.

Кажри, сенинг калланг, ақлинг менда бўлганда эди.

— Ақл дейсамми? Ақлни аёл кишига тўйдан кейин эри беради. Курри беролмаган ақлни Сукхрам берди. Унда рожа қони бор.

— Кажри, шунга ишондингми? Бундан нима фойда?

— Ҳеч қанақа, лекин ишонгинг келади. У бошқа натларда қамиди? Унда шунча ақл, олижаноблик қаёқдан?

— Кажри, у лапашанг бузоқнинг ўзи. Умри бино бўлиб ҳеч ким билан муштлашмаган, мени бирор марта бўлсин чертмаган.

— Аммо ҳозир муштлашяпти, рақибларининг суюгини синдирияпти. У сени ҳеч қачон урмаганми?

— Бир марта урган.

— Демак севмаган.

Пастда Рустамхон бесаранжон бўлиб ўтирибди. Нега Банкедан дарак йўқ! Одатда у бу маҳалда шу ерда бўларди. Бирон кор-ҳолни бошламадимикан?

Рустамхон ҳовлига тушиб, у ёқ-бу ёққа қаради. Ҳеч ким йўқ. Фақат қўтос бемалол кавш қайтаряпти. У дарвозадан бамайли хотир ташқарига ҳам кўз ташлади. Рустамхон қишлоқ оқшоми-

нинг сукунатини ҳис әтди, кўча кимсасиз эди. Уйга қайтиб кириб, яна Банкени кута бошлади. Аммо хавотирлик ҳамон тарк әтмасди. Юқоридаги анови аёл ҳузурида талай шўртак гапларни әшишишга тўғри келди. Кўнглига қандай гаплар келдийкан? Рустамхон Пъярининг измидан чиқмаскан, деб ўйламадимикан?

Юқорида шодон қаҳқаҳа әшишилди. Назарида аёллар унинг устидан кулаётгандай бўлиб туюлди. Унисини ҳам, бунисини ҳам ҳайдаб юборсамикан? Бунисини — Пъярини-я?

Нақадар ғалати аёл!

Иўқ, бу ерда бир бало бор. Сукхрам ҳам кесатиб гапирадиган бўлиб қолди.

Рустамхон ўйга чўмди. У бошини қўллари орасига олиб, ўз хәёлларига берилиб ўтирав, кўз олди қорайганини ҳам сезмас эди. Унинг ўйлари қоронфи эди. Бу қанақаси? Банке — садоқатли сдам. Ҳаммасига Пъяри айбдор. Ў одамлар орасида обрўйини бир пул қилди. Шундай қилишга қандай ҳадди сифди экан?

Уни ҳақ ўйлдан адаштирган қора ҳасад иблиси дилига озор берарди...

Тепада эса аёллар сухбати борарди.

— У мен ҳақимда сенга ҳеч нарса демадими? — сўради Гъяри.

— Ҳеч нарса.

— Шундайми? — ўсмоқчилаб сўради Пъяри.

— Хўш, яхши аёл эканлигингни айтди, — деди Кажри.

— Шу холосми? — Пъяри бош чайқади.

— Пъяри! — эшик ортидан Рустамхонинг ғазабнок товуши әшишилди.

— Ҳозир, — жавоб қилди у, — Рустамхон чақиряпти.

Пъяри хонага кирди, Рустамхон унга синчков назар ташлади.

У ўрнидан турди, чилимга тамаки солди, озгина наша ҳам қўшиб қўйди.

— Сархонани нега алмаштирамадинг? — дағдаға қилди у Пъярига.

— Алмаштирдим.

— Анови нимага кепти?

— Шундоқ ўзи.

— Уни уйнга жўнатиб юбор.

— Нега энди?

— Ҳой хотин, гапни қўпайтирма!

— Меъдамизга теккунча гаплашаверамиз.

— Қатта ўзгаришларни сезяпман.

— Ўзингдами ё мейдами?

— Унинг ҳузурида мен билан қандай гаплашганингни эсла!

— Гапингни қара-я! Ўзинг мен билан қанақа оҳангда гаплашдинг?

Рустамхон шошиб қолди, нима дейишини билмади.

— Нега уни «кундошим» дединг? — деди у ранжиб.

— Икковимиз бир эрнинг хотини бўлсак уни бошқача нима ҳам деб атардим?

— Сен унинг хотинимисан ё мени?

— Унинг хотиниман, сенинг ўйнашингман.

— Вой уяти йўғ-еъ!

Пъяри елкасини қисди.

— Ўзинг уялишинг керак. Уят нималигини билганингда мени бу ерга келишга зўрламас эдинг. «Бу ёққа келасан, бўлмаса эрингни қамаб қўяман», деб айтмасдинг. Уятмиш! Уятинг бўлса мени жамоага олиб бориб уйланиб ол. Сен эркаксан, сенинг ғуноҳларинг — гуноҳ эмас-да. Агар уятинг бўлганида эди, аллақачон уйланиб олар эдинг, тўғри ғелган аёл билан дон олишиб юрмасдинг...

— Сен расвогарчилик кўчасига кирганинг йўқми?

— Мен тубан саводи йўқ хотинман, пастлардан ҳам пастман, менинг табақамдан паст табақа йўқ, жамоамдаги қонунлар ҳам энг расво, мен ҳамиша оч, ҳамиша яланғоч аёлман... Сени расво йўлга киришга нима мажбур қилди? Менга тенг кела оласанми? Дўстинг Башке ҳамма ифлос ишларингга камарбаста! Сенинг қонунинг қиморхона очишини ман қиласди, сен бўлсанг қиморхонадан тушган чўтал ҳисобига семираётиссан, яна уят ҳақида лоғ-қоф урасан? Виждонсиз! Мен кўпгина бемаъни ишларни қилидим, ўзимни яхши одамлар қаторига қўшмаяпман-ку. Бузук хотинлигимни бутун олам билади, лекин сен эса ўзингни бамаъни одамлар қаторига қўшяпсан!

— Пъяри, ўт билан ўйнашма! — бақирди Рустамхон.

— Устингдан керосин қўйиб юбораман, ҳали шошмай тур, сени пилик қилиб ёндираман, ўт билан олишиш қанақалигини ўшанда кўрасан? Нега бақраясан? Қўрқитмоқчимисан? Қўрқитиб кўр-чи? Аламига чидамай ўзини осиб юборади деб ўйлайсанда? Устимдан қулфлаб қамаб қўясанми? Қамаб бўпсан! Барибир қочиб кетаман, одамларга сени шундай ёмонлайманки, номингни эшитганда ҳамма нафратланиб тупуриб юборадиган бўлади.

Пъяри унинг жавобини кутмай орқасига бурилди, зинапояни тақиллатганича тепага кўтарилди. Рустамхон унинг орқасидан нафраторумуз қараб қолди, унга қандай жавоб қайтариш ҳақида эўр бериб ўлади, лекин арзигули жавоб тополмади.

Пъяри хонасига қайтганида орадан ҳеч нарса бўлмагандай хотиржам эди, аммо ичини мушук тирнарди. Нега шу вақтгача Сукхрамдан дарак йўқ? Ташида билинтирмаса ҳам ичидан ташвишланарди.

— Келгани йўқми? — Кажри пешвоз югуриб чиқди.

— Йўқ ҳали.

— Жұда ҳаяллаб кетди!  
— Қелади, мунча ташвишланасан?  
— Құрқяпман.  
— Вой эсім қурсин, — түсатдан ҳушёр тортди Пъяри, — полициячи пастда, қоронғуда ўтирибди.

— Фонарни ўзим олиб туша қолай.  
— Йўқ, йўқ, фақат сен эмас.

Пъяри иккинчи фонарни ёқиб, пастга тушиб кетди.

Қажри миннатдорчилик билан Пъярининг орқасидан қараб қолди.

Рустамхон каравотда ётарди.

— Ҳайрият, ниҳоят мени ҳам эслабсан-да? — деди пичинг билан чўзиб.

— Ўзинг биласан, ёнимда одам бор.

— У ҳали ҳам кетгани йўқми?

— Йўқ.

— Ҳа, бугун катта кенгашларинг борга ўхшайди...

— Қанақа кенгаш? — Пъяри қовоғини солди, индамай тескари ўгирилиб олди. Рустамхон жаҳлга минганди. У ўзини қўярга жой тополмасди.

— Анови қачон кетади? — таъкидлади у.

— Ҳозир.

— Ўтираверади, ўтираверади. Үнга бу ерда нима керак ўзи?

— Бошидаги соҳиби ҳозиргacha қайтгани йўқ.

— Қанақа соҳиб?

— Сукхрам.

— Бу аёлни у етаклаб келганмиди?

— Ҳа.

— У ярамаснинг ўзи қаёқда қолиб кетдийкан?

— Ӯша гапингни яна бир марта қайтар! — Пъяри аччиғидан сапчиб кетди.

Рустамхон бир лаҳзага лол бўлиб қолди.

— Қайтарсам нима бўлади? — деди у ниҳоят.

— Ит! — бақириб юборди Пъяри.

— Ўзинг итсан!

— У ифлос касалингни тузатди, сен бўлсанг уни ярамас деб ўтирибсан-а?

— Тилинг чиқиб қолганга қуйиб ўлайми? Итоат қилишни ҳам унутиб қўйдинг....

— Мени қўрқитма, мен эркин одамман.

— Ким билан гап талашаётганингни биласанми?

— Сен ҳам менинг кимлигимни биласанми? — деди Пъяри, қўзлари чақнаб.

— Сен натнисан! Узини бозорга солувчи бузуқ аёл! — Рустамхон ҳаёсизларча тиржайди.

— Сени қараб тур ҳали! — пўписа қилди Пъяри.  
— Дўқ урма, бу менинг уйим! — бақирди Рустамхон.  
— Сен овозингни баландлатавер! — деди Пъяри заҳарханда билан.

Рустамхон ғазабланганидан қизариб кетди.

Кажри Рустамхоннинг бақирганини эшилди. Ҳатто қўрқиб ҳам кетди. Кейин ўзини босди, билинтирмай паства тушди. Бурчакка яшириниб олиб, қулоқ сола бошлади.

— Ҳаммангни турмада чиритиб юбораман! — авжга минди Рустамхон.

— Қўлинг қисқалик қиласди, чўчқанинг боласи, тишингни синдириб оласан! Турмада чиритармиш! Қанақа қилиб чиритишингни кўрамиз! Ҳали ўзинг участкага бора олармикансан? Дўқингни қара-я! Аёл эқан деб, билганимни қиласман деб ўйлайсан шекилли! Манавини кўрдингми?

Пъярининг қўлида пичноқ ялтиради. Рустамхон бўздай оқариб кетди.

— Нимталаб ташлайман! — деб бақирди Пъяри. — Яхиси, истоаткор итлигингча қолавер! Мен натниман.

— Нега жаҳлинг чиқади? — Рустамхон сал бўш келди. — Мен ҳазиллашдим.

Пъяри бурилиб, хонаси томон йўл олди. Кажри унинг оёқ товушларини эшилган заҳоти хонага қараб чопди.

Пъяри кириб буюмлари турган жойга борди, ханжарни Кажрига узатди.

— Ма, ол, ўзимники бор.

Кажри ханжарга қаради.

— Иш шунгача бориб етдими?

— Етади! Ҳаммаси очилди, ҳаммаси ўз жойида қолди.

— Уни тездагина бир ёқлик қилдингми?

— Йўқ, Кажри, тутилиб қолдим, узоқроқ тутилиб қолдим, — деб жавоб қайтарди Пъяри ва эшик томонга ўйчан нигоҳ ташлади. Кажри унинг нигоҳи маъносини тушунди.

## 21

Банке қиморхонадан чиқди. Унинг чўнтаклари қофоз пулларга тўла эди. Бугун унинг омади келди; у анча пул ютди. Севинганидан терисига сифмасди. Қиморбоз дўстлари қайта ютиб олиш учун Банкени ушлаб қолишимоқчи бўлишди, лекин уринишлари беҳуда кетди: Банке бунақа қулай пайт келмаслигини қилиб, ўйиндан чиқди.

Бугун хурсанд бўлганидан ҳаяжони зўрайди. Шунча пулни қандай қилиб ютиб олганига ўзи ҳам тушунмасди. Ўз баҳти юришганига ишонишдан ҳам қўрқарди. «Бугун худо марҳаматини мендан аямади», — деб ўйлади. Банке қишлоққа қандай

Етиб борганини билмай ҳам қолди. Қулоғига: «Эвоҳ, баҳти қаро ғёл зоти!» деган нидо чалингандагина ўзига келди.

У ёқ-бу ёққа қараб Дхупони кўрди. У кўчанинг бурчагида Диннинг хотини билан бирга турарди. У Дхупони кузатгани чиққан бўлса керак.

— Ҳақ гап, — деб маъқуллади Диннинг хотини, — кимки орномусини сақламаса, у хонадонини ҳам сақлай олмайди.

— Яхши қол, мен кетай, кеч бўлиб қолди, — деган гапни эшитди Банке.

— Эҳтиёт бўл, ҳаммаёқ қоронғи.

— Даладан ўтсам бўлди, уйимга етаман.

Дхупо йўлга тушди. Ёниб турган фонарлар тун бошланганидан далолат бериб турибди. Дхупо йўлни кесиб ўтиб, бир вақтлар қишлоқ аҳли душмандан ўзларини ҳимоя қилиш учун тиклаган гувала девор ҳаробалари ёнинг чиққунга қадар бутазор ёқалаб кетди. Эндиликда қишлоқ аёлларининг ўзи девор душмани бўлиб қолганди: ундан кўримсиз ҳароба кўзга ташланарди, гувалаларни ўз кулбасини тикилаш учун ташиб кетишган.

Атроф жимжит, кимсасиз. Қишлоқ ортидан кўтарилиган ачимтири тутун муздек тун ҳавосида эриб кетяпти. Жазира мақомидан кейин кишилар жунжикишишмоқда. Лекин Дхупога тунги аёз хуш ёқарди. Шамол шиддати тўсатдан марҳум эрини эсга солди. Дхупо уни кўргандай ҳам бўлди, лекин шамол ўзи учун азиз бўлган кишиси қиёфасини учирив кетди.

Дхупо маҳаллани кесиб ўтиб далага чиқди. У орқасида кимнингдир оёқ товушларини эшитди. «Эҳтимол, мен сингари кеч қолган ёлғиз йўловчиидир, уйига шошилаётгандир», — деб кўнглидан ўтказди. Қўрқувдан юраги увишди, аммо ўзини дадил тутишга интилди. Қадамини тезлатиб, йўлида давом этди.

Банке унинг орқасидан изма-из келаради. У бетоқатликдан титрарди. Банке сабр-қаноат, меҳр-оқибат билан ўз муҳаббатларига эришган кишилар устидан куларди. У фурсатни беҳуда ўтказмайди. Ахир Банке бор-бисотини зўравонлик билан қўлга киритган. У Дхупога етиб олай деганда кимнингдир вазмин қадам товушлари уни секинлашга мажбур қилди. Банке қўрқди. Бу аёл кишининг қадам товуши эмасди. У орқага қайтиши жуда-жуда хоҳлади, лекин вақт ўтган эди.

Кейин, бу одамлар бўлмаса керак. Эҳтимол, биронтасининг моли тентираб юргандир, деган фикр миясига келди. У қадамини энди тезлатаман деганида олдинда — Дхупо қораси ўринида иккى эрқак юрганга ўҳшади. Улар Банкени кўриши биланоқ қоронғиликка сингиб кетишиди.

— Бу ерда ким бор? — паст овозда сўради Банке.

— Нима ишинг бор? — шу хилда шивирлаб жавоб қайтарди кимдир.

— Менга қара, эхтиёт бўл, — деди яна бири шивирлаб.

— Нега битта одамдан қўрқиб ўтирибмиз?

Банке сесканди; у товуш эгаларини таниган эди.

— Тҳакур Чарансинх, Харнам, сизмидингиз?

Икковлари ҳам яширган жойларидан чиқиши. Уларнинг кўлларида ўроқлари ярқираб турарди. Улар қишлоқ подачиси даласига ўғирликка келишганди. Қаерда ҳокимият бўлса, зўравонлик ҳам ўша ерда. Подачи отасининг хокини Ганг дарёсига топширгани Соронга кетганди<sup>1</sup>. Хотини касал, дала парвардигори олам ихтиёрида қолганди. Аммо тҳакурлар бундан заррача хижолат бўлишмади. Бироннинг риҳзи ҳисобига бойиш бўлса ular шердай ботир бўлиб кетишади, шу важдан исмларига синх — шер сўзини қўшиб айтишади. Ботирликларининг олий нуқтаси деб полицияда хизмат қилишни билишади. Чунки полиция ҳимоясида ожизларни бемалол қисиб қўйиш, вино ичиш, лаззатли таомлар ейиш мумкин.

— Ҳа, биз, — деди улардан бири. — Сени бу ёққа полициячи юбордими?

— Нима ишларинг бор? — деди Банке.

— Ахир, сен полициячининг дўстисан-да! — деди Чарансинх.

— Дўстиман, — маъқуллади Банке, — аммо сизларга ёмонлик қилганим йўқ.

— Вақти келса кўрармиз.

— Полициячи билан дўстлашганингда солиқлардан озод қилдими? — сўради Банке.

— Йўқ. — деб жавоб қайтарди Харнам.

— Ана шунаقا. Сизларни мен эмас, Пъяри хонавайрон қилди, тушундиларингми?

— Бу ёққа нега келдинг?

— Унинг дугонасини изма-из қувиб келяпман, — деди Банке.

— Ким у?

— Дхупо, чамар аёл, — деди Банке аста. — Вақтичоғлик қилмоқчиман.

— Бу гапинг ёлғон, — деди Харнам, — Дхупо туфайли сени калтаклашди, ундан ўч олиш учун қувиб келяпсан. Нега биз билан беркинмачоқ ўйнайсан?

<sup>1</sup> ...отасининг хокини Ганг дарёсига топширгани Соронга кетганди — Сорон Уттар Прадеш штатидаги Ганг дарёси соҳилига жойлашган шаҳар. Ганг Хиндистонда самодан бошланган муқаддас дарё. Шунинг учун ҳам Ганг самога борадиган энг яқин йўл. Ўлганлар хокини Ганг ёки бошқа бир дарёга ташлаш ҳақида хурофий тушунча бор. Индуизм қоидаларига кўра, материя, ер, сув, оловдан иборат. Киши ўлиши билан унинг жони янги мавжудотга ўтади, яъни ерда қолади. Чириган танани олов билан сувга топшириш керак. Шунинг учун жасад олдин куйдирилади, кейин кули сувга ташланади.

— У туфайли калтакланганим тўғри. Бироқ Рустамхон билан Пъярининг замонлари ўтиб кетди.

Икков тҳакур ҳам ўйланиб қолишиди.

— Рустамхоннинг вақти ўтди, Пъяри ҳам ҳадемай истеъфога чиқади. Уларнинг омади кетди деб ҳисоблайверинглар. Хўш, кетдикми?

— Сен Дхупони ўлдирмоқчимисан? — сўради Чарансинх.

— Бу ўлимдан ҳам баттар бўлади, унга аёл киши умр бўйи бошини кўтариб юра олмайдиган, эсидан чиқармайдиган мусибат келтираман.

— Дхупо тул хотин-ку! — Харнам сал инсофга келди.

— Сен аҳмоқнинг ўзисан, — Банке ҳужумга ўтди. — Хўш, сорасизларми?

Уччови Дхупони деб йўлга тушишди.

Банке огоҳлантирувчи маънода қўл кўтарган эди, улар тўхташди.

— Ана у! — шивирлади Банке.

— Ёлғиз! — Чарансинх енгил тортиб гап қотди. Сўнг сўради: — Аввал ким яқинлашади?

— Банке, олдин сен бор, — деди Ҳарнам.

Банке биринчи бўлиб борди. У қўрқувдан дағ-дағ титрарди.

— Ким у? — яқинлашиб келаётган оёқ товушларини эшитган Дхупо бақири.

— Бу мен, Банке, — экинзор орасидан чиқиб овоз берди у.

Банке индамай унга яқинлаша бошлади. Индамай унга ташланиб, елкасидан ушлади. Дхупо Банкенинг қўлидан чиқиб қоча бошлади.

Банке уни қувиб етиб, яна ушлаб олди. Дхупо додлаб одамларни ёрдамга чақира бошлади, тҳакурлардан бири яширинган жойидан сакраб чиқиб, унинг оғзини беркитди. Дхупо унинг қўлини тишлади, кейин жон-жаҳди билан тепди. У гандираклаб кетди. Шунда бошқа тҳакур чопиб келиб, Дхупога мушт уриб, ерга ағанатди. Дхупо йиқилди, ўридан сакраб турди, қочиб кетишга интилди, аммо улар унинг оғзига латта тиқишиди. Дхупо охирги марта бор кучи билан улар қўлидан чиқишига уринди, лекин қурби етмади...

Атроф зим-зиё, осмонда қоронғуликни тарқатадиган битта ҳам юлдуз йўқ. Шамол экинзорларда шовуллаб, осмону фалакка интилади. Қишлоқ анча йироқда. Ким бақирса ҳам — фазилатлими ё иллатлими, даладаги товуш у ёққа етиб бормайди. Бақириқ олови ўчиб қолаётган ўчоқлардан тун қоронғулигига сузиб юрган тутунлар билан тўқнашиши эҳтимол. Бақириқ қишлоққа етиб келганида ҳам уни қишлоқ томларининг бепарво сукунати кутиб олиши мумкин эди. Осмон бир лаҳзага сескангандай, уйқудан негоҳ уйғонган юлдузлар кўзи пирпирагандай

бўлди. Бир лаҳзага нотекис қизғиши-сариқ нур билан жумлаи жаҳон ёришгандай бўлди, аммо шу заҳоти ер устини қалин, қимир этмайдиган зулмат қоплаб олди. Тирик табиат ўлик бепарвонликка ён берди. Бўлиб ўтаётган воқеага ёш экинларнинг баланд, ингичка поялари тошюракларча бепарвонлик билан томошагўй бўлиб турди. Агар улар тириклик ва шафқатдан маҳрум бўлса нечун тилсиз гувоҳ бўлиб, бу ерда саф тортиб туришибди? Осмон зулмати чекинмаяпти, у билан бэрорбар келишга ҳеч ким қодир эмас. Пўлатни шам сингари парча-парча қилиб кесиб ташлаш, совуқ пўлатни эритиш мумкин, аммо сон-саноқсиз замон қатламидан иборат осмон зулматини йўқ қилиш ҳеч кимнинг қўлидан келмайди...

Учови қочиб кетишига, Дхупо гандираклаб ўрнидан турди. У ақлдан бегона бўлиб қолди: ҳозир юз берган ҳодисани тузатиб бўлмайди. Унинг кўз олдини зулмат қоплади, қалби заҳарланиб, қасос олишга ундади. Шармандалил!!! Гуноҳ!!! Бадномлик қалбига юзларча ханжар бўлиб санчиляпти, баданини олов бўлиб ёндирияпти. У ғазаб ва умидсизликдан титраб-қақшади. Энди у қандай ҳаёт кечиради? Шармандалини қандай ювади? Шу лаҳзада унда ҳаётнинг улуғ ҳақиқати бор овоз билан янгради. Қалбига ерни устида гулдираб, вайронлик келтирувчи яшин чақиб, ерни само сувларига тўлдириб юборгудек хавф солувчи жуда улкан момақалдироқ булутлари билан қиёс қилгудай янги туйгулар тўлиб-тошли.

Таҳқирланишдан кейин келадиган азобловчи уят кишини бўлиб ўтган уқубатни унутишга мажбур қиласди.

Саркаш фурур ва аёл қадр-қимматининг таҳқирланган туйғуси унинг кўнглини тўлдириб тоширди, куч-қувват ато этди...

Дхупо алам ва умидсизликнинг жонли тимсолидай йифи-сиги, додвой билан қишлоққа қараб чопди.

Кўрқиб кетган қишлоқ аҳли ҳеч нарсага тушунмай, гўёки у кишилар ҳаётини ўзига тортувчи магнитдай маъсума аёл орқасидан эргашишди.

Дхупо чамарлар қишлоғигача чопиб борди. Унинг дард-аламга тўла нидосини эшитиб, кўча одамга тўлиб кетди. Дхупо ўзини ерга кўтариб урганича жон талвасасида типирчилай бошлади. Аёллар даҳшатдан донг қотиб қолишиди, болалар қўрқанларидан оналарига маҳкам ёпишидилар.

— Нима бўпти? Нима бўпти? — деб ҳамма бир-бирига савол беришди.

— Ҳой, панчаят одамлари, бу ёққа! Бу ёққа келинглар! — қичқирди Дхупо.

Қон бўлган қалбнинг ич-ичидан чиққан нидо кишилар кўнглидан жой олаётган даъват, ҳимояталаб ялиниш ҳамманинг дилида акс-садо бериб, ягона қичқириққа айланди.

— Йўқ, йўқ! — қичқирди Дхупо ақлдан озган одамдай кўзларини олайтириб. — Оқсоқоллар, қаердасиз? Адолат талаб қиласан! — у яна бир нима демоқчи бўлар, аммо ғазаби гапиришга йўл қўймас эди.

Унинг атрофига чамарлар тўплана бошлади; бутун қишлоқ етиб келди. Оломоннинг ноаниқ ғовур-ғувури бора-бора умумий бақириқ-чақириқ билан алмашди, бу воқеага бўлган барчанинг қизиқсиниши осоиишталик талаб қилиб, ҳокимона қўл кўтарди. Лекин Дхупо буни сезмагандай эди. Аёллар унга ҳайрат билан боқар, болалар қўрқсанларидан оналарининг орқасига яшириниб, ўша ердан қўрқа-писа қараб туришарди. Тўпланганлар орасида чоллар ва катта ёшдаги эркакларнинг овози борган сари баландроқ эшитила бошлади. Уларнинг товуши Дхупонинг қичқириқлари билан қўшилиб тунги ҳавода қатъий жарангларди. Қоронғулукнинг ўзи жим турish аҳдини бузиб, ҳар усулга олиб гапираётгандай эди.

Сукхрам ҳам шу ерда ҳамма билан бирга туради.

У бозорда Аҳмадободдан қайтган бетелфуруш билан учрашиб қолди. Бетелфуруш ана шу шаҳардаги ҳаётини ҳикоя қилиб берди. Сукхрам унинг гапларини нафасини ичига ютиб тинглади. «Мен ҳам Пъяри билан Кажрини олиб ўша ёқларга кетсам-чи? Фабрикага жойлашиб олишим, Пъяри билан Кажри ҳам ишлashi, тинч-тотув яшашмиз мумкин», — деб ўйлади у Рустамхонникига кетаётib. Ярим йўлда шовқинни эшитиб, оломонга қўшилиб қолди.

Ниҳоят Дхупо ўрнидан турди.

— О худолар! Хароб бўлдим! Мени балчиқقا булғашганини кўрмаяпсизларми? О худолар!

Унинг худоларга қаратса айтган сўнгги илтижоси юрагидан шунақаям дард-алам билан отилиб чиқдики, аёллар чидамай кўзига ёш олди. Кимнингдир боласи қўрққанидан: «Ойи!» деб йиғлаб юборди.

Шунда Дхупо ёввойи кишилар кулгисига ўхшаш кулги билан даҳшатли қаҳ-қаҳ урди.

— Дхупо, нима бўлди ўзи? — сўради қария Гилла. — Нега бўлган воқеани айтмаяпсан?

— Айтолмайман! — ингради Дхупо. — Ўзимни қудуқقا ташлайман! Шармандаю шармисор бўлдим! Менга қараманглар! Қараманглар!!

Дхупонинг кенжак ўғли қўлинини чўзганича унга қараб югурди, лекин Дхупо бақириб берди:

— Қўлингни теккизма менга! Теккизма! Мен гуноҳкор, наҳсман! Танам олов ичиди, у ёняпти, ҳеч қайсиларинг қўл теккизманглар! Теккизманглар! Ҳаммангиз ёниб кетасиз! Ёниб кетасиз!!!

— Нима бўлди? Нима гап ўзи? — қичқирди одамлар.

— Сизда дадиллик, ботирлик борми? — Дхуто оломонга мурожаат қилди.

— Сен бор гапни айтгин, ўшанда кўрасан! — деб баралла жавоб қилди оломон.

— Айтаман, аввал мен учун ўч олишга худо номи билан, ўз оналарингиз номи билан қасамёд қилинг, агар уларнинг ор-номуси сиз учун қадрли бўлса, берган оқ сути ҳурмати қасамёд қиласизлар!

— Қасамёд қиламиз! Айт! — Ҳамма учун жавоб қилди Кхачера.

Сукхрам олдинга интилди. Оломон зич турарди, лекин унга ўйл беришди, у Дхупонинг қархисида пайдо бўлди.

— Демак, ваъда бердиларинг! — деди Дхуто баланд овозда. — Унинг уддасидан чиқишиларингни кўраман! — У оқариб, қўзлари чақнаб кетди.

Сукхрам Дхупога қаради, у ўз қўзларига ишонмади. Дхуто! Нега у ғалати гапларни гапираётпир? Йиғлаётганини ҳам, кулганини ҳам билиб бўлмайди? Ундан нимани сўрашяпти?

— Дхуто! — бор овози билан бақирди Кхачера.

Лекин у қайрилиб ҳам қўймади.

— Уз хоҳишимни маълум қиламан: бугундан бошлаб то умрининг охирига қадар болаларимга панчаят ғамхўрлик қиласиди! — деди у баланд ва тантанавор товушда.

Дхупонинг болалари йиғлашди.

Одамларнинг қизиқиши ортди.

— Ҳаммасини гапиравер! — бақирди оломон.

Дхуто бошини чангллади, ёпинчиғи елкасига тушди.

— Олдин сизлар жавоб беринглар! Агар динимиз қонунларига зид гапиргудек бўлсан, сўзларимни тўғрилаб турасизлар,— деди Дхуто ялангбош турганича.

— Нима гаплигини тушунтиргин энди! — деб Кхачера бақирмоқчи эди, ўша заҳоти тилини тийди. Ҳамма инсон қадр-қиммати туйғуси уйғонган Дхуподаги мағрур нигоҳни кўришди. Гап бошлиши биланоқ бу аёл гуркираб ёнаётган машъалага ўхшаб кетди.

— Олдин қасамёд қилинглар! — унинг қатъиятли, дардга тўла овози янгради, қишлоқнинг ҳар ёғидан тўпланган оломон ягона шиддат билан: «Қасамёд қиламиз!» деб хитоб қилди.

Кишиларни охирги шубҳа ҳам тарк этди, улар дадил ва қатъиятли бўлиб қолишли. Дхупонинг даъвати қишлоқ бўйлаб парвоз қилди, ҳар бир хонадон, ҳар бир том остига кириб, ҳар бир қалбда акс-садо берди. Уларнинг қасамёди қуруқ ваъда эмасди, бу қасамёдда уч боланинг тақдирни, уларнинг ҳаёти, ризқ-рўзи мужассамланган эди.

— Энди айт! — деди ёшлардан бири сабри чидамай.  
Аёллар юзларини яшириб турган ёпинчиқларини кўтаришди.  
Маҳбусларни зиндон деворларига занжирбанд қилиб турган  
кишанлар жаранглаб ерга тушгандай, озод бўлган қуллар бо-  
шини мағрур, тик кўтаргандай бўлди.

— Гапириб нима қилардим, яхшиси қудуқقا чўкиб ўлганим  
маъқул! — йиғи солди Дхупо. — Ялинаман, менга ишонинглар!  
Ҳозир ўликдайман. Руҳим гапириб турибди, холос. Ишонинглар,  
гуноҳкор эмасман. Гуноҳкор эмасман! — у яна ҳўнграб йифлади.

— Нима гап ўтганини айтасанми ё йўқми? — яна бақирди  
Кҳачера.

— Айтаман, айтаман!

Лекин одамларнинг сабр косаси тўлди, ҳамма бараварига  
шовқин солди, уларнинг товуши муттасил гувиллашга айланди.

Дхупо ўзини ўйқотиб атрофга аланглади.

— Жим бўлинглар, оғайнилар! — Гилла тартиб ўрнатишга  
интилди. — Унинг гапини эшитайлик! Нима деркин!

Одамлар секин-аста жим бўлишди, шунда Дхупо гап  
бошлиди. Унинг сўzlари суд олдида нутқ сўзлаганга ўхшар  
эди.

— Бир куни ораларингдан бир киши мени бу ерга олиб  
келиб, менга уйланажагини маълум қилди, шундайми?

— Шундай.

— У ҳозир қаерда?

— Худо даргоҳига қабул қилган.

— Ҳозир кимим қолди?

— Биз, жамоа.

— Тул қолдим деб бирор билан кўнгил хушлик қилсан-чи?

— Сени ўлдирашим!

— Бундай гуноҳда айбдор бўлмасам-чи?

— Сен учун жонимизни ҳам аямаймиз!

— Онажон! — деб бақирди Дхупонинг тўнгич ўғли, додлаб  
онасига ташланди, Дхупо юзини яширганича қичқирди:

— Ушланглар уни! Менга тегса гуноҳимга ботади!

Аёллар болани ушлаб қолишиди.

Дхупо тишлирини ғижирлатди. Фазаб ва умидсизлик ақлини  
оздирганди.

— Дхупо! — бақирди Кҳачера.

— Ҳаммангиз ваъда бердингиз! — кўзлари ғазабли чақнаб  
хитоб қилди Дхупо. — Қасамёд ҳам қилдингиз!

— Ҳа, қасамёд қилдик! — тасдиқлади Кҳачера.

— Бўлмаса ханжарларни ҳозирланг! — деди Дхупо қатъий.—

Мен ўламан, аммо болаларим айбдор эмаслигимни билиб қўйиш-  
син. Мен гуноҳ қилмадим.

— Ким у! — ғазабдан титраб сўради Кҳачера.

— Банке билан яна иккитаси. Улар менга ташланиши. Бор кучим билан ўзимни ҳимоя қилдим, аммо улар уч киши эди, начора...

— Шундай дегин! — Кҳачера тишларини фижирлатди.

Дхупо авлиё Вайдехига<sup>1</sup> ўхшаб турарди. У адолат талаб қиласади.

— Бориб ўч олинглар! Оналарингиз ҳурмати! Аёлларингиз ор-номуси учун ярамас, ифлосларга қарши қўзғолинг!

— Гапларинг ростми, Дхупо? — деб сўради Сукхрам унга яқинлашиб.

Унинг овози қаҳрли эди, Сукхрамнинг хўмрайиб боқишила-рида қатъият алансаси ёнарди.

— Мени синглим деб атагансан,— деди Дхупо ошкора алам билан. У ўз ор-номусини ҳимоя қилишини илтимос қилмади, балки талаб қилди, унинг сўзлари кишилар қалбидаги ғазаб алансини баттар кучайтириди.

— Худди шундай, — қисқа жавоб берди Сукхрам, унинг сўзлари қасамёддай янгради. — Синглим, сен учун ўч оламан! — деди у самимий, лекин қатъий товушда.

Дхупо унга жуда яқинлашиб сўради:

— Мени деб ўч олишга аҳд қилдингми?

— Йўқ! — деди Сукхрам дадил. — Эндиликда фақат сен учун-гина эмас. Бу — бизнинг ҳам ор-номусимиз, ор-номус учун ўч олиша қон талаб қиласаман.

— Сизга ўз қонимни бераман, ҳаммангизни ўч олишга чақи-раман!

Сукхрамнинг дилида түғён урган бўрон бошқаларни ҳам тинч қўймади. Дхупонинг сўзлари уларни ларзага келтириди.

— Анови бемаза иш қандай содир бўлди? — деди Кҳачера олдинга чиқиб.

Бироқ Дхупо жавоб беришга улгурмасдан унинг орқасида аёллар пайдо бўлишди. Ҳаммасининг ёпинчиклари туширилган эди, улар охирги нафасгача олишишга тайёрдай важоҳатда эдилар.

— Билиб нима қилардинг? — деб аёллардан бири унга ташланди. — Бунақа қизиқиш кимга керак?

Бу эрли аёл эди<sup>2</sup>, лекин ҳозирги лаҳзада эркак билан хотини ажратиб турган ҳамма деворлар қулаганди.

— Фақат Дхупони эмас, ҳаммамизни бадном қилишибди! — деб қичқирди эрли аёл.

<sup>1</sup> Вайдехи — Ҳозирги Бихар штати территориясидаги Вайдехи ҳокими подшо Жанакнинг кизи, Раманинг хотини Ситанинг эпитетларидан бири. Текста «Рамаяна» эпизодларидан бирига ишора қилинади.

<sup>2</sup> Бу эрли аёл эди — индуизм қонунига кўра аёл, айниқса эрга теккан аёл эркаклар суҳбатига аралашишга ҳақи йўқ.

Унинг сўзлари оловга ёғ қўйгандай бўлди.

— Сен қанақа ор-номусни гапиряпсан? Эркаклар шунақа қуён юрак бўлса, аёл киши кимга ҳам мурожаат қиласди?— деди бошқа бир аёл уни қувватлаб.

Бу сўзлар сон-саноқсиз ўткир пичоқقا айланиб эркаклар юрагини тилиб ташлади.

— Ҳамманизга лаънат!— шовшув кўтаришди аёллар.— Минг лаънат!

— Жим бўлинглар!— бақириб берди Қачера.

— Хотин ва қизларингизни булғаб, бадном қилишяпти-ю, сизлар бўлса қўл қовуштириб тек ўтирибсиз!— аёллар жонжадлари билан қичқиришди.— Қанақа эркаксизлар, ўзи? Қампирдан ҳам харобсизлар! Қўлларингизга билакузукларимизни тақиб олсаларинг ҳам бўларди!

Оломон: «Ўч оламиз!» деб ўкирди.

— Оқсоқоллар!— оломон гувуруни босиб бақириди Дхупо.— Илтимос, буюинглар, сати<sup>1</sup> бўламан!

— Сати!!— оломон бир тебраниб олди.

— Полиция бостириб келса-чи?— деган ҳадикли овозлар ёшитилди.— Бу аёл нималар деяпти ўзи?

— Йўқ, йўқ!— оломон гулдиради.— Ўч оламиз! Ӯлим ҳақида ўйлама!

— Қизим!— Дхупога мурожат қилди бир қария.— Сен сати бўйлмайсан.

— Бўламан! Ор-номусни ўғирлашди!

— Ҳой, ор-номусни гапираётган, шонима. Қишлоғимизда сен-дақа аёллар камми?— деб бақириди оломон ичиди кимдир.

Дхупонинг кўзларига қон тўлди.

— Қани, шу гапингни менинг юзимга айтгин-чи!

— Ким айтди шу гапни!— Қачера кўпчиликка мурожаат қилди.

Бироқ оломон ичиди ҳеч ким чиқмади.

— Ким мени гуноҳкор деб айтди? Оқсоқоллар, айбим нима? Бу иш менинг хоҳишим билан бўлдими?

— Олов бўлмаса тутун бўлмайди!— деб бақириди кимдир бошқа томондан.

Дхупо дарғазаб бўлганидан кўз олди қоронғилашди.

— Қўрқоқ! Бу ёққа чиқ!— деб бақириди у томоғи йиртилгандай бўлиб.— Одамларга кўринишдан нега қўрқасан?

Лекин кўпчилик ичидан ҳеч ким чиқмади.

<sup>1</sup> Сати—эри жасадига ўзини қўшиб ёндирадиган тул хотин. Ҳозирги пайтда сати удумига, яъни тул аёлларнинг ўз-ўзини ёндиришга амал қилинмайди. Бу одат 1829 йилда инглиз ҳукумати томонидан расмий равишда ман этилган эди.

— Дхупо айбдор эмас! — деган ғазабнок овозлар эшитилди, — гуноҳ қилгани йўқ!

— Одамлар шундай дейдиган бўлса сати бўламан. Гуноҳимни шу йўл билан юваман. Парвардигор олдинги умримдаги қилмишларим учун жазолади, гуноҳимни ювмоқчиман!

— Йўқ, қизим, — гапга аралашди ҳалиги чол. — Сен поксан, бу ҳақ гап, аммо дин бошқа фикрда.

— Бу қанақаси? — савол ташлади ёшлардан бири.

— Ўғлим, бу аёл киши.

— Ахир, унинг айби нимада?

— Айборми-йўқми, барибир, унга гуноҳ ёпишди. Агар гуноҳ боболардан мерос қолган бўлса, уни сати билан ҳам ювиб бўлмайди.

Дхупо чолнинг ҳамма гапларини эшитди. Шунинг учун ҳам у ўлимдан гапириб, ҳалқ жавобидан қўрқди. Қутурган фил экинларни пайҳон қилгандай, даҳшатли шармандалик уни эзғи-лаб ташлади.

— Эвоҳ, — ингради у, — демак илож йўқ экан, ҳеч қачон гуноҳимни юволмас эканман-да... — унинг товуши сустлаши, Дхупо югуриб бориб, бошини тош деворнинг қиррали бурчагига зарб билан урди. Ёрилган чаккасидан шарқираб қон оқди. Аёл ерга йиқилди. Шилдираб оққан қон тупроқ, қумга шимилиб қотиб қолди. Дхупо ана шундай фожиали жон берди.

Эркаклар тишларини тишларига босиши, ғазабланганларидан гапиролмай қолдилар.

— Эҳ, Банке, жонингдан умидингни уз! — тишини қисиб деди Сукхрам, — қонингни ичаман... — Аммо у гапни тугатолмади, томоғига бир нарса тиқилгандай бўлди. — Дхупо бизни ўч олишга даъват этди, — хитоб қилди Сукхрам. — У бизга ишонди!

Унга ҳеч ким ёлавоб қайтармади. Ҳамма бир-бирига индамай жаланглади, ўз тинчини кўзлаб ташвишланиши, кўзларидан қўрқаётганликлари рўй-рост сезилди. Баъзилари жасадни тезроқ ёндириб, полицияга маълум қилишни, бу ишга барҳам беришни хоҳларди, лекин воқеани эшитган одамлар улардан нафратланишидан қўрқиша, ҳеч ким ўз фикрини дадил айтишга ботинолмас эди.

— Нега жимиб қолдиларинг! — Сукхрам одамларнинг юзларига бир-бир қараб оломонга мурожаат қилди. — У ўч олишга даъват қилган эди-ку!

— Нима ҳам дердик? — деди кимдир. — Оқсоқолларни тўплаш керак, улар нима деса шу-да.

Сукхрам қовоғини солди. «Йўқ, агар бизни таҳқирлашса, натлар, бошқача йўл тутамиз, — деди у кўнглида, — аввало дилозордан ўч оламиз, кейин бундан буён нима бўлиши устида бош қотирамиз. Чунки эркинмиз, бизни ҳеч нарса тутиб турмайди.

Баъзида натлар золимона қонунлар олдида бош эгишга мажбур. Аммо жаҳллари чиққанда қутурган йўлбарснинг ўзи бўлишади. Мановилар эса ҳеч қачон одам бўлмайди! Қўрқоқлар, юраксиз қўрқоқлар!»

Сукхрам қовоқ-лунжи осилганича кетишга ҳозирланиб йўлга қаради.

— Қани, ишга киришинглар! — тўсатдан Қачера авж олди, — маъбуда Бхавани<sup>1</sup> мотам тахтиравонини гуллар билан безанг! Дхупо малика эди, орамиздан шундоққина қетмасин. У Бхавани сингари авлиё эди!

Аёллар рози бўлиб бош ирғашди, тахтиравонни безашга тушишди.

— Ҳаммангиз қасамёд қилгансиз! — ғазаб билан бақирди Сукхрам.— Наҳотки виждонларинг уйғонмаса?

— Қўлимиздан нима ҳам келарди? — деб эркаклардан бири қўрқа-писа сўради.

— Банкени топиб ўлдириш керак.

— Полиция бостириб келса-чи?

Полиция номини эшитиб, одамлар қўрқувдан қунишиб кетишиди.

— Унда бу ишга ўзим қўл ураман. Уни ўзим бир ёқлик қиласман.

— Сен натсан. Қочиб кетишинг, ўрмонда яширинишинг мумкин, бизнинг ҳолимиз нима кечади? Уйимиз шу ерда. Яширинадиган жойимиз йўқ!

— Сизларни жин ҳам урмайди. Уни ўлдирсам, полиция мени ушлайди. Бироқ сизлар Дхупо учун ўч олишга қасамёд қилгансизлар-ку!

— Яхшиси, ўзим учун ўч оламан, деб қўя қолгин.

— Мен-а, ўзим учун-а?

— Унда қасдинг бор.

— Дхупо учун ўч оламан!

— Уни севиб қолганинг йўқмиди?

— Эҳ, қўрқоқлар!

— Биз болаларимизни ўйлаяпмиз,— деди бир чамар.— Болаларимиз ҳаётини поймол қилишни истамаймиз.

— Қон тўкилган бўлса, бу ҳукуматнинг иши,— деди иккичи чамар,— Дхупо ўлди, аммо қонун ўлгани йўқ!

Сукхрам чамарлар қўрқаётганини фаҳмлади.

— Ҳаммасига Рустамхон айбдор,— деди Қачера.

— Бўлмаса унинг ҳузурига борайлик, ундан сўрайлик,— таклиф киритди Гилла.

<sup>1</sup> Б х а в а н и — Парвати ёки Дурга номларидан бири, уни қуйи табақалар ҳурматлайди. Үгри, талончилар ва қароқчиларнинг ҳомийси, пири ҳисобланади.

— Ундан нимани ҳам сўрардинг?— Сукхрам жирканиб елка қисди.

— Ёшсизлар, ҳеч нарсани тушунмайсизлар,— насиҳатомуз гап бошлади Ҷҳупони гуноҳкор ҳисоблаган қария.— Ғазаб — ёмон маслаҳатчи. Ҳукумат ҳаммангизни бир-бир қовуради, буғдой донасига ўхшатиб янчади. Банкени полицияга олиб боринглэр, у ёфи нима бўлса бўлар.

Чолнинг гаплари чамарларга маъқул тушди.

Улар Банкени излаб топиш учун одамлар юбормоқчи бўлишиди.

Сукхрам бўлаётган воқеаларга ғамгин назар солиб турарди.

Қҳачера унга яқинлашиб, кўзларига дадил тикилиб:

— Қийналма, дўстим. Уларнинг ҳаммаси қўрқоқ. Бироқ икковимиз бормизку.

Қҳачеранинг сўзлари Сукхрамга таскин берди, лекин у индамай чамарларни кузатишида давом этди.

— Кўрамиз ҳали, ким енгаркин!— Қҳачера шундай деди-да, аёллар томон юрди. Улардан:

— Жасад қани?— деб сўради.

Дхупснинг жасади гуллар билан безатилган таҳтиравонда ётар, чамарлар ҳамон гул қўйишда давом этишар эди. Улар эрталаб тушган бир неча томчи шудрингни ҳам зўр баҳт деб билган, ёмғирга ташна дәхқонларни эслатардилар.

Дхупони охирги йўлга кузатувчилар орасида унинг қариндошлари йўқ эди, шунинг учун ҳам ҳеч ким йифламас, кийим-кечакларини юлқиб йиртмасди. Фақат Дхупонинг болаларигина онасининг жасадини қучоқлаб аччиқ-аччиқ йиғлашарди. Уларни онаси жасади устидан аранг ажратиб олишиди. Болаларнинг йифи-сифиси аёллар кўнглини вайрон қилиб юборди, улар ҳам юбкаларининг этаги билан кўз ёшларини артиб, пиқиллаб йиғлай бошладилар. Лекин оқсоқоллар ҳаддикда эди. Чунки Дхупо болаларини улар ихтиёрига ташлаб, нариги дунёга кетди. У худоларни ёрдамга чақирди, аммо Дхупонинг болаларини нима қилиш керак?

— Биз кетдик,— Қҳачера чамарларга мурожаат қилди.

— Қаёқقا?— сўради Гилла.

— Рустамхон ҳузурига.

— Нега?

— Банке ўша ерда.

«Пъяри билан Кажри ҳам ўша ерда,— деб ўйлади Сукхрам.— Бордию, Дхупонинг ўлигини кўриб Пъяри севиниб кетса-чи? Унинг бу қилмишини кечира оламанми? Ҳеч қачон!».

Қҳачера олдинга чиқди, унинг қўлида таёқ бор эди.

— Ким қўрқса қайтиши мумкин!— деб қичқирди у.

Оломон ичидан олдин ўн, кейин йигирма, ундан кейин йигирма беш, сўнг юз киши, охирида ҳамма олдинга чиқди.

— Кўтаринглар! Бхаванимизни кўтаринглар!

Чамарлар тахтиравонни кўтаришди ва ҳаммалари барага: «Номинг муқаддас бўлсин, Рам...» деб дуо ўқий бошлишди.

Сукхрам чамарлар билан бирга кетди. У Дхупонинг болаларини олиб, тарбиялашга тайёр эди, лекин Сукхрам карнатлар табақасига мансуб, жамоанинг қонунлари эса жуда қаттиқ. Чамарлар паст табақа одамига болаларни тарбия қилишга берармиди?

«Авлиёларга қўш биздан кетган марҳумни!»— деган дуо сўзлари оломон устида янгради.

— Маргхатга кетяпсизларми?— Сукхрам Қҳачерадан сўради.

— Йўқ,— деди у.

— Нега бўлмаса улуғлаш қўшигини айтяпсизлар?

— Бутун қишлоқ билсин учун!

— Унда жасадни полициячиларга топшириш керак-ку!<sup>1</sup>

— Уларга бермаймиз!

— Талаб қилишса-чи?

— Уларнинг қонини ичамиз, суюклари бақувватми-йўқми билиб оламиз!— Қҳачера боши узра таёқни баланд кўтариб фурур билан жавоб берди.

Аммо унинг товуши оломоннинг баланд қўшиғида кўмилиб кетди:

«Номинг муқаддас бўлсин Рам!»

## 22

Банке мамнун эди. Ниҳоят у бугун ниятига етди. Дхупонинг номусига тегиб, ўз назаридаги эътибор қозонгандай бўлди. Бу ўжар аёл энди нима деркин? Учрашганда кўзига қандай қаараркин? Бу воеа бутун қишлоққа овоза бўлади. Ана ҳангома маана ҳангома!

Банке тўппа-тўғри Рустамхоннинг ҳузурига йўл олди. У қовоғини солиб ўтиради. Банкега пешвоз чиқиб, ўрнидан қўзғолмади ҳам. Лекин Банке бугун ўз ҳомийсининг тундлигини пайқамади.. У қувонганидан терисига сифмасди. Банкедаги ажиб хушчақчақлик Рустамхоннинг эътиборидан четда қолмади. «Яна қанақа бемаъни иш қилди экан?»— ҳушёр тортди полициячи. Банке таъзим қилди.

<sup>1</sup> Жасадни полицияга топшириш керак—Англия ҳукумати ўлганлар жасадини куйдириш ё дағи қилишдан олдин ўлиш сабабларини аниқлаш учун полиция участкасига топширишини талаб қилган.

— Устоз!— деди у Рустамхоннинг оёқлари остига ҳамма гуноҳларини олиб келгандай бўлиб. Унинг хушомад билан боқиб турган маст кўзлари, титраб турган мўйлови, қайноқ нафаси Рустамхоннинг қизиқишини кучайтирди. Буни пайқаган Банке дадиллашди. Энди ҳаммасини айтса бўлаверади.

— Хўш?— Рустамхон саволга тутди.

Рустамхон ўз қадр-қимматини оёқ ости қилишдан қўрқар, шунинг билан бир вақтда қизиқиши ҳам тобора ортиб борарди.

— Маза қилдим,— деб жавоб қайтарди Банке. У кўзларини юмиб, мўйловларини бурай бошлади.

— Нима гап? Бетоқат бўлиб айтишга шошилаётганинг қанақа маза экан?

— Устоз, худо умрингизни зиёда қилсан!— деди Банке. Рустамхоннинг оёқларини силаб.

— Гапирсанг-чи, нима бўлди ўзи?— сўради Рустамхон.

Банке ҳузур қилиб кулди. Пъяри юқорида унинг кулгисини эшишиб сергакланди.

— Пастда нима бўляпти!— Қажри унга савол берди, юраги ташвишли ура бошлади.

— Банке келганга ўҳшайди.

Яна ўзига бино қўйган маст одамнинг кулгиси эшитилди.

— Қажри!— аста чақириди Пъяри.— Мен пастга тушаман, сен шу ерда қол, аммо шай бўлиб тур.

— Мен ҳам бирга бораман. Бу ерда ёлғиз қолмайман.

— Майли, икковимиз тушсак яна ҳам яхши бўлади.

Икковлари эҳтиёткорлик билан пастга тушишди, эшик табақасига ёпишиб, уларнинг суҳбатига қулоқ сола бошлашди. Банке билан Рустамхон ҳеч вақодан хабарсиз суҳбатларини давом эттиришди.

— Картада омадинг юришдими?— қизиқсинди Рустамхон.

— Ютуқ бор,— деди Банке. У чўнтағидан пул чиқариб, Рустамхоннинг олдига ташлади. Рустамхон ҳайрат билан пулларга тикилди.

— Ҳаммасини олавер, устоз! Бугунги ҳамма пул сеники,— Банке одоб билан бошини эгди.— Менинг рожам, ҳамма пул оёғинг остида. Йўқ деб мени ранжитма. Ҳаммасини оламан деб Банкега қасамёд қил.

Рустамхон Банкени риоя қилиб пулларни олди.

— Бугун жуда ўжар бўлиб кетибсан. Ҳотам Тойлигинги қара-я! — деди Рустамхон.

— Сен билан мен бир одам эмасмизми? Устоз, бугун Дхупо қўлимидан қочиб кетолмади, у меники бўлди!— бақири Банке ва яна хаҳолаб кулди.

Пъяри дикқат билан қулоқ солди.

- Ният-мақсадингта етибсан-да? — сўради Рустамхон.
- Раҳмат, менга ақл бўлдинг!
- Баракалла! Омадинг бор экан! — Рустамхон омад ўзини четлаб ўтгандай оғир хўрсиниб қўйди.
- Устоз, қалбимни яралаяпсан! Нега бунчалик оғир хўрсинасан?
- Рустамхон жавоб бермади.
- Тушундим, устоз, тушундим! Хоҳласанг буюр, ўша аёлни ҳозироқ шу ерга келтираман.
- Қандай қилиб?
- Мени кўрганда энди Дхупо чидаб тура олармиди?
- Бу тўғри,— деди донишмандларга хос оҳангда Рустамхон.
- Устоз, йил бўйи унинг атрофида парвонадай айланиб юрдим,— деди Банке.— У ярамас бўлса яқинига йўлатмади.
- Пъяри унга аччиқлангани эсингдами?
- О, у доғули аёл ўз ишига пишиқ. Бироқ ўша куни жазманинг натни тарафини олдим. Нега шундай қилганимни билсанми? Анави жizzаки Дхупонинг адабини бермоқчи бўлдим.
- Унга пул бермагансан. Бир рупия берганингда иш силлиқнина кўчарди. Ахир у чамар аёл-да.
- Йўқ, устоз! Хафа бўлмагину натни билан чамар аёл ўртасида ер билан осмонча фарқ бор. Чамар аёллар ўзларига бегона эркакларни яқинлаштиришмайди. Бироқ бунақа таранг қилиш эркаклар ният-мақсудига етиб олгунча давом этади. Хаха-ха... Ана унда уларни ғинг дегизмай қўйиш мумкин. Дхупо ўзини жizzаки аёл қилиб кўрсатишга уринди! Шилқимлик қилганимни ҳаммага айтаман деб қасамёд қилди. Пулмиш-а! Сен бир рупияни гапирасан! Унга ўн рупия берсам ҳам Дхупо пулмни юзимга отди.
- Майли, пулинг бутлигича қолибди.— Рустамхон кўзларини олайтириб кулди. Банке яна одоб билан эгилиб, ўзини унинг оёқлари остига ташлади.
- Ҳаммаси сенинг шарофатинг билан, устоз! Ёлғиз ўзимнинг қўлимдан ҳеч вақо келмасди,— хушомад қилди у, бир оз жим тургач, қўшиб қўйди.— Устоз, аммо бир кўнгилсизлик бўлди... Мен ёлғиз эмасдим...
- Ие?!— Рустамхон ажабланди.
- Ёнимда яна икки киши бор эди.
- Пъярининг соchlари тикка бўлиб кетди.
- Ёнингда кимлар бор эди?
- Айтгани қўрқаман.
- Нега?
- Улар душманларинг бўлган,— деди Банке,— аммо эндиликда ҳаммасини текисладим, устоз! Улар Харнам билан Чарансинх.

Рустамхон титраб кетди; Пъяри ғазабдан лабини тишлади. Қажри бурилиб, унинг қулоғига: «Улар ким?» деб шивирлади.

- Тҳакурлар,— Пъяри бўғиқ товушда жавоб қилди.
- Уларни танийсанми?
- Ҳа, ҳар икковини калтаклашга буюрганман.
- Анави ярамас билан уларнинг ҳам тили бирми?
- Секинроқ гапир, Қажри, эшитиб қолишиади.

— Олдинига қўрқиб кетдим,— ҳикоя қила бошлади Банке,— қарасам, бу икки товламачи подачи Байнининг даласидаги буғдойни ўғирликча ўришаётган экан.

— Ҳа, биламан. Яқинда унинг отаси қазо қилганди, отасининг хокини олиб Ганг дарёсига кетганди,— деди Рустамхон.— Вой эпчиллар-е! Қулай фурсатни пойлашибди-да! Шу важдан уларни далада учратибсан! Хўш, кейин нима бўлди?

— Аввалига ҳамма уринишим зое кетди деб ўйладим. Кейин калламни ишлатиб қолдим. Уларга: «Дхупо Пъярининг қалин дугонаси, уни Рустамхоннинг буйруғи билан калтакладим. Пъяри Сукхрамга Дхупонинг ёнини олишни тайинлади. Шунда Рустамхоннинг буйруғига кўра Сукхрам билан уришдим. Устозимнинг сизларга ҳеч қандай адовати йўқ, ҳаммаси Пъярининг оёғи тагидан чиққан, Рустамхон унинг гапларига учган», дедим. Иккала тҳакур ҳам қармоққа илинди, улар билан тил топишга муваффақ бўлдим.

— Мендан айбни олиб, Пъяри билан Сўкхрамга тўнкаганинг яхши бўлибди. Тҳакурлар билан ўчакишгим ҳам йўқ эди. Ҳа, ҳаммаси анови фоҳиша туфайли бўлди, бу ҳақ гап. Қўзими尼 ёғ босибди...

Қажри эшик ёриғидан диққат билан тикилиб турган Пъярига кўз қирини ташлади:

- Эшитяпсанми?— сўради Қажри.
- Эшитяпман,— жавоб қилди Пъяри.
- Хўш!
- Буни унга эслатиб қўяман,— деди Пъяри кўзида ёш билан.
- Тҳакурларни уришга буюрганимидинг?— сўради Қажри.
- Э-э, уларни бутунлай хонавайрон қилгандман.
- ...Пъяри гапиришга ҳам арзимайди,— жавоб этди Рустамхон.— Анови иккови нима деди?
- Улар оёғимга йиқилиб онт ичишиди.
- Нега?
- Устоз, негалигини ўзим ҳам билмайман,— сохта итоаткорлик билан жавоб қилди Банке.
- Бўлди, гапни чўзма, гапир,— деб буюрди бу воқеани тафсилотини тезроқ билишга қизиқаётган Рустамхон. Афт-

ангорини бужмайтириб, турли қилиқлар кўрсата-кўрсата, Банке бор гапни айтиб берди.

— Ҳа-ҳа-ҳа,— Рустамхон қўлларини бир-бирига ишқаб, хавдон ташлаб кулди.— Жуда кўнгилдагидай иш бўлибди. Анови тҳакурлар ҳам эпчил одамлар, чакана эмас. Мегажин Пъяри бўлмаганида уларга адоватим йўқ эди.

— Устоз, бу ерда сенинг айбинг йўқ.

— Тўғри айтдинг.

— Айт-чи, энди чинакам ўғил боламанми?— мақтаниб сўради Банке.

— Бўлмасам-чи!

— Ўшанда мени ким пичоқлаганди?

Кажри Пъярига қаради, у кулимсиради. Кажри меҳр билан унинг елкасига қўл ташлади.

— Анови натнингдан шубҳам бор,— деди Банке.

Пъяри билан Кажри ҳушёр тортишди.

— Бу қанақаси? У тепада бўлган-ку,— эътиroz билдириди Рустамхон.

— Э-э, устоз. Пъярини билмас экансан! Пастга иргиб тушшиб, кейин тепага чиқиб олиш унга қийинми? Үларнинг ҳаммаси мушук зотидан, эпчил.

— Буни ўзим ҳам ўйлагандим,— унинг гапини маъқуллади Рустамхон.

— Устоз, бу ишни чамарлар қилгани йўқ, улар мени калтаклашгандаёқ ўчини олишган.

— Аблаҳлар, шу важдан бурнини кўтариб, кеккайиб юришибди. Хўш, улардан тўлиқ қасдингни олдингми?

— Йўқ, устоз, бу ҳали ўч олиш эмас. Буни ҳар замонда кўнгил хушлаш жойим тайин бўлсин учун қилдим холос. Ахир у бева-ку.

Рустамхон ўйланиб қолди.

Пъяри билан Кажри нафасларини иchlарига ютиб кутишди. Рустамхон Пъяри билан бўлган жанжални, уни боплаганини керилиб айтди. Кажри Пъярига савол назари билан қаради.

— Ёлғонляяпти, ярамас! Мен даф қилганимда кўрққанидан лол бўлиб қолган,— шивирлади Пъяри жаҳли чиқиб.

— Энди уни нима қилсан экан?— деди Рустамхон.

— Такаббурлик қиляпти: ифлос!

— Сукхрамга ишоняпти.

— Устоз, мен уни мундоқ...— у сўйиб юборишим мумкин дегандай қўлини бўғзига юргизди.

— Бўити, дўстим, ишга кириш.

— Сўяман! Шу бугуноқ, ҳали кўрасан! Гаров бойлашамизми?— Рустамхон гаров бойлашиб ўтирмади. Фақат:

— Унинг иккинчи хотини ҳам ҳозир шу ерда,— деди у.

- Қаерда?
- Тепада.
- Уни кўрдингми?
- Рустамхон жилмайди.
- Қалай экан?— деб сўради Банке.
- Қаёқдан билай? Үнга кўз ташламоқчийдим, ўзимники ловиллаб кетди, даҳшатнинг ўзи!
- Пъяри Кажрининг қўлини қисди.
- Истараси иссиққинами?— Банке нотаниш аёлнинг қиёфасини хаёлан кўз олдига келтириб тиржайди.
- Лекин Рустамхон елка қисиб қўйди, холос.
- Натни!— хитоб қилди Банке. Қўзлари чақнаб кетди.
- Бошини кўтариб, кўзини қисганича Рустамхонга қаради.
- Устоз, бугун нуқул ҳузур қиласидиган кун экан,— ширин хаёлга берилди у.
- Қизишма! Сабр қил! Ҳамма ишни бирданига қилиш чакки иш,— деди Рустамхон мулоҳаза билан.— Аёллар ўта хавфли бўлади.
- ...Сукхрам у билан гаплашдими?— Пъяри эшитилар-эшитилмас оҳангда сўради.
- Ҳа.
- Кажри Пъярига қаради. У қўлида ханжар ушлаб турарди.
- Тўхтаб тур! Шошилма!— шивирлади Кажри.
- Қачонгача!— деди Пъяри сабрсизлик билан.
- Пъяри, қизишма! Ажойиб режа туздим.
- Нима қилмоқчисан?— деб сўради Пъяри ҳадиксираб.
- Йўлдан ураман.
- Кимни?
- Ким десанг ўшани.
- Ҳали вақти етгани йўқ,— деди Пъяри тўлқинланиб.
- ...Жуда ўткир вино келтирибсан,— деди Рустамхон стаканини бўшатиб.
- Банке мастона кулди, яна бир шишанинг оғзини очди.
- Бас, етар. Бошқа керак эмас,— Рустамхон рад қилди.
- Эҳ, устоз! Илгари косалаб ичардинг.
- Банке унинг стаканини тўлдирди. Рустамхон бош чайқади, винони ичди-ю, ўша заҳоти йиқилди.
- Ҳой, устоз, ке, яна бир стакандан отайлик,— тили калдирраб қистай бошлиди Банке. У оёғида аранг турарди. Чўнтағидан сигарета олиб чекди, аллақандай қўшиқни минфирилаб айтди. Қажри пастга йўл олди.
- Қаёқка?— деди Пъяри уни тўхтатмоқчи бўлиб.
- Кажри қўл силтади.
- Унинг олдига кира кўрма!
- Қўй, менга халақит берма.

— Нима қилмоқчисан?

— Унга ёқмоқчиман.

— Унда нима бўлади?

— Ўшандада кўрамиз.

Пъяри ён берди.

Банке ҳамон куйларди:

Оҳ гўзалим, сенинг кўзларинг...

Тўсатдан эшик қия очилди. У бошини кўтарган эди, эшик ортида турган аёлга кўзи тушди. Аёл ширин жилмайди. Қайфи ошган Банке ўз кўзларига ишонмади. У стаканда қолган винони ичиб, яна эшик томонга қаради. Аёл ёпингичини сал кўтариб, Банкега ҳамон жилмайиб қараб турарди.

У кўзларини ишқалади, лекин аёл кўз ўнгида тураверди. Банке қўзғолди, оёғида аранг турди.

Кажри унга қараб турарди.

— Ҳой, сен... сен...— ғулдиради Банке. Лекин аёл имо билан Рустамхонни кўрсатиб, овоз чиқармасликни буюрди.

Маст Банке бу Пъяри, у ўз ёнига чақиряпти деб ишончи комил эди. Гандираклай-гандираклай аёлга эргашди. Кажри эшикни секин очиб, Банкени ташқарига чақирди.

— У ухлаяптими?— эшикни ёпиб сўради Кажри.— Рустамхон бизни кўргани йўқми?

— Йўқ.

— Ундан қўрқаман.

— Э-э, мен бу ерда эканман, у ярамаснинг қўлидан нима келарди?— Банке қаттиқ тебраниб кетди. Кажри унинг елкасидан ушлаб қолди.— Кимсан?— деди у бармоғи билан Кажрини тутишиб. Ундан гупиллаб вино ҳиди келарди, Кажрининг кўнгли айниб кетди, аммо ўзини аранг тутиб кулимсиради. Банке билан ўйнашиб, ўзини сал четга олди, ёпинчиғи четини ишва билан тузатиб:

— Кажри,— деб жавоб қилди.

— Қанақа Кажри? Қаёқдан келдинг?

— Мен Сукхрамнинг янги хотиниман.

— Йўғе!— Банке ҳушёр тортди.— Ростданми?

— Рост бўлганда қандоқ? Сени Сукхрамни калтаклаган кунингдан бери ахтараман. Ўша полвон ким экан деб кўришни орзу қилиб юрардим.

— Эҳ жонгинам! Хаёлимда боядан бери кўринган аёл сениндинг?— эриб чулдиради Банке.

— Сен ўзим тасаввур қилгандай экансан.

— Ростдан-а?— унга яқинлашиб илжайди Банке.

— Тепага чиқайлик. Бу ерда у бизни кўриб қолади.

— Ким?

— Полициячи.

— У аблаҳ, ит. У ўз хотинидан ўлгудай қўрқади.

— Менга ёқиб қолдинг. Мен билан юрасанми?— Кажри уни шоширди.

Банке қаттиқ тебранди. Ерга йиқилиб тушишига сал қолди, бироқ Кажри уни ушлаб қолди.

— Кўнглимдагидай жувон экансан,— фулдиранди Банке.

Кажри уни орқасидан эргаштирди. Пъяри ташвишга тушди. Унинг нияти қанақа? Маст Банке оёғида аранг турғубди, у бўлса йиқилиб тушмасин деб қўлтиғига кирялти. Гарчи анча хотиржам бўлса-да, Кажрининг юзида аллақандай ғалати табассум ўйнаяпти.

Пъяри билан тенглашгач, унга огоҳлантирувчи имо җилди. Ниҳоят Кажри Банкени юқорига олиб чиқди.

Пъярининг қизиқиши ортди. Сабри чидамай Кажрига эргашди.

— Мана етиб келдик,— деган Кажрининг гапи қулоғига чалинди.

— Шундоқ, жонгинам,— деди Банке, Кажрининг қўлидан ушлаб ўзига тортди, лекин йиқилиб тушишига оз қолди.

— Банке, жудаям бақувват экансан. Қучоғингдан чиқолиб бўлман,— ундан ўзини халос қилишга интиларкан, Кажри хаҳолаб кулди.

— Қўйиб юбормайман!— деди Банке.

— Ахир сен Сукхрамни ўлдиришинг керак-ку,— деди кулиб Кажри.

— Азизим, уни шу кечанинг ўзида ўлдираман!

— Лекин Сукхрам жуда эпчил. Буни ҳам биласанми?

Банке болоҳонадор қилиб сўкинди, Кажри кулди.

— Яхсиси сен ёнбошла,— деди Кажри уни каравот томон итариб.

Банке итоаткорлик билан ётди ва:

— Бу ёқقا кел,— деб чақирди.

— Олдин бир нарсани сўрасам майлими?

— Сўра!— деди Банке уйқу билан олишиб.

— Сукхрамни ўлдирасанми?— сўради Кажри.

— Э, э, арзимаган иш. Уни бир зумда сўйиб ташлайман.

Бирдан Кажри унинг юзига ёстиқ ташлаб, бутун оғрилиги билан босди. Пъяри эшик ёнигача чопиб келди. У Банкенинг қутулиш учун қўл-оёқларини қимиirlатаётганини кўрди. Бироқ вино дармонини қуритган эди. Банке жим қолди. Шу пайт Кажрининг қўлида ханжар ялтиради. У ханжарни Банкенинг кўкрагига уч марта сопигача ботирди, икки марта қорини чавақлади. Қейин Банкенинг нафас олмаётганига ишонч ҳосил қилгач, ёстиқни суриб, энгашиб қаради. Кажри қаддини ростлади, чўзилиб ётган жасадга нафрат билан тупурди, сўнг тантанавор жилмайди.

Пъяри каравотга яқинлашиб, ўликнинг юзига қаради. Кажрига бурилиб у ҳам кулди.

— Ҳаром ўлди,— деди у гўё гап ҳайвон ўлими ҳақида кетгандай.

Улим олдидағи азоблар Банкенинг афтини ўзгартириб юборибди. Ниҳоят унинг ярамаслиги, золимлиги, ваҳшийлиги барҳам топди. Раван<sup>1</sup> вафотидан кейин агар у ҳақ йўлдан кетганида бу буюк дев талай хайрли ишларни қиласарди деб кўплар афсусланганди.. Лекин Банке майда, назарга кирмайдиган абллаҳ одам эди, унинг ўлганига ҳеч ким ачинмайди.

— Ханжарингни артиб ол!— деди Пъяри.

Кажри ханжарини чойшабга артди, ўпиб қинига солди ва юбкаси қатига яшириб қўйди.

— Опа, менга ханжар ҳадя қилмаганингда эди!— деди у. Пъяри ўзига келди.

— Унинг бақиришига ҳам йўл қўймадинг!<sup>2</sup>— хитоб қилди у.

— Банке Дхупонинг оғзини ҳам ана шундай қилиб беркитган!

Пъяри бош иргади.

— Бошқа иложим йўқ эди! Уни бирданига ўлдириб қўймоқчи эмасдим. Уни парча-парча қилиб кесиб, кесилган жойларига туз сепмоқчи эдим, аммо ундай бўлмади, ҳайвон сингари сўйиб юборишга тўғри келди!— деди Кажри нафратланниб.

— Э худойим!— Пъяри титраб кетди.

— Қўрқяпсанми?

— Йўқ.

— Рангинг шунақаям оқариб кетдики!

— Жасадни қаёққа саранжом қилишини ўйлаяпман,— деди Пъяри. Ўлиб ётган Банке ҳақида гапиришга бошқа ҳеч нарса қолмаганини таъкидлагандай бўлди. Етар, ҳаром ўлди. У дунёга кетгани маъқул. Энди ўз ғамини ейиши керак.

— Сен опамсан,— деди Кажри,— қўрқмаслигинг керак. Биламан, унинг катта хотинисан. Борди-ю, сен қўрқадиган бўлсанг, кимга ҳам ишонардим.

Пъяри Кажрига миннатдорчиллик билан боқди.

— Бу ўйга келиб катта гуноҳ қилдинг, Пъяри,— давом этди у.— Лекин эндиликда ўша гуноҳларингни ювдинг.

<sup>1</sup> Раван — қадимий ҳинд эпоси «Рамаяна» персонажларидан бири, маккор ва ёвуз кишилар рамзи.

<sup>2</sup> Унинг бақиришига ҳам йўл қўймадинг — яъни жони танидан тарк этишига йўл қўймадинг дейилмоқчи. Бундай қилиш индуизм қонунларини бузниш бўлиб, бепоён қайта туғилиш занжирларидан бири узилади.

— Қанақасига ювибман?

Кажрининг кўзлари чақнаб, аста кулди. Бу кулги Пъярини даҳшатга солди.

— Ундан ўч олдинг, буни биламан. Бу тақдир, ўшанда утирик қолди.

— Ўзимни оёқларинг остига ташлайман. Қажри, сен Сукхрамга муносибсан! Менга ўйл бўлсин!

— Қўйсанг-чи шу галларни!

— Ёшсан, аммо кўнглинг меникидан олижаноброқ. Саҳоватлироқ ҳам!— деди Пъяри Қажрининг оёқларига эгилиб.

— Үрнингдан тур, Пъяри,— деди Қажри.— Опамсан, ҳамиша опам бўлиб қоласан. Мен ҳам, худо ҳам буни ўзгартира олмайди. Мен қотилман, сен эса поксан!

— Ўшанда уни тасодифан ўлдиролмай қолганман,— иқор бўлди Пъяри.— Аслида эса ўлдирмоқчи эдим.

Қажри кулиб, Пъярининг пешонасига қондан чизиқ тортди.

— Сен эримга қарашлисан,— деди у,— кўхна қалъа эгасининг биринчи хотинисан. Бундан бу ёғига натни эмассан. Пешонангга рани белгисини<sup>1</sup> чизиб қўйдим.— Қажри Пъярининг ҳайратомуз юзига диққат билан тикилди.

Улар ҳаёт нашъасини суришди. Умумий мақсадга бугун эришдилар. Бу ҳол уларни бир-бирига бутунлай қадрдон қилиб қўйди.

— Қажри, мени халос этдинг.

Улар бир-бирларининг кўзларига тикилишиб туриб, бирданига қучоқлашишди...

— Үнисини ҳам тинчтамизми?— хитоб қилди Қажри.

— Кейин-чи? Бизни қидиришади-ку.

— Иккови ҳам маст эди, муштлашиб, бир-бирини ўлдиришибди деб ўйлайди одамлар,— деди Қажри.

— Барибир бизни қидиришади!

— Бу ердалигимни ким билиб ўтирибди,— саволгà савол билан жавоб қилди Қажри.

— Мени билишади-ку.

— Э-э, натнидан нима ҳам олишарди? Қочиб кетасан, вассалом!

— Қаёққа қочаман, Қажри? Қаёққа?

— Таборга.

У ерда бизни ушлаб олишади.

— Бўлмаса бошқа князликка қочиб кетамиз. Нима, бизни бу жойларга боғлаб қўйишибдими?

<sup>1</sup> Рани белгиси—алоҳида табақа белгиси ҳисобланмиш айлана ёки чизиқ бўлиб, уни тика ҳам дейишади, бу белги олий табақаники. Рани рожанинг хотини, хоним, ҳукмдор аёл.

— Бу гапинг тўғри,— маъқуллади Пъяри.

Пъяри пастга тушди. Рустамхон донг қотиб ухлаб ётарди. Пъяри у ёқ-бу ёққа қараб бироз турди, кейин Рустамхонга яқинлашиб, уни турта бошлади. Лекин Рустамхон миқ этмади. Шунда у қаттиқ туртиб:

— Хой, менга қара!— деб чақирди.

— Ҳи-им-м...— фулдиради Рустамхон, сўнг бошқа томонга ёнбошлади.

Пъяри андак тараддуланиб турди, кейин шишадаги винони Рустамхоннинг юзига сепди. Сассиқ ҳид димоғига урилди. Пъяри шишани оғзига олиб борганда:

— Фу!— деган товушни эшилди.

Пъяри уялиб кетди. Кажри уни кўрган эди. Қолган винони Рустамхоннинг юзига сепиб, уни қаттиқ силкитди.

— Ҳой эшак, тур. Турсанг-чи!— деб уйғота бошлади.

Рустамхон кўзини очмай, у ёқ-бу ёққа тебраниб ўтириди.

— Нима гап?— сўради у тилини аранг қимирлатиб.— Нима бўлди?

Ўзини ёнбошга ташлаб, яна хуррак отаверди. Пъяри уни туртди, чақирди, лекин у миқ этмади. Пъяри нима қилишини билмай, ҳайрон бўлиб қолди.

Пъярининг ҳаяллаб кетганини сезган Кажри пастга тушди, гап нимадалигини билиб: «Қаттиқроқ силкитгин!» деб ишора қилди. Пъяри қўлларини ёзиб, қўлидан ҳеч вақо келмаётанини билдириди.

— Уйғотсанг-чи!— Пъяри жаҳли чиқиб жон-жаҳди билан қичқирди.

— Ким бу?— Рустамхон сесканиб, ўрнидан турди.

— Ортиқ чидолмайман, бу нима деган гап ўзи?— бақирди Пъяри.

— Э-э-э,— тўнғиллади Рустамхон, кўзларини юмиб, қўллари билан чаккасини ушлади.— Нима бўлди? Нега бақирасан?

— Мени ўлдириб қўя қол!— қичқирди Пъяри.

— Ўлгинг келган бўлса ўзинг ўлавер!

— Сени кулфатга қўйиб, бу дунёдан кетмайман,— деб жавоб қилди у. Рустамхон кўрқа-писа кўзларини каттароқ очди.

— Тепада Банке Кажрини ушлаб олди,— деди Пъяри.

— Ким!— бақирди Рустамхон.

— Банке.

Рустамхон оқариб кетди.

— Тезроқ юр,— Пъяри уни шоширди.

Рустамхон ўрнидан аранг турди.

— Уйимда бемаза қозон қурдими?— деди у аччиқланиб.

— Сен бўлса маст бўлиб ётибсан.

— Mast бўлманми?!

- Банке, унга атайлаб ичқиздим, ўзим ичмадим деб айтди.  
— Қани у?  
— Тепада. Тезроқ юр!  
— У ёққа чиқиб нима қиламан?  
— Нима бўлганига наҳот ақлинг етмаса? Сукхрамнинг қанақалигини билмайсанми? У Кажри учун сен билан Банкени ўлдирмагунча қўймайди.
- Рустамхон қўрқувдан титраб кетди.
- Үлдирадими?— деди қўрқиб.
- Бу ерда қолмайман... Қўрқиб кетяпман,— деб қичқирди
- Пъяри ва хонадан югуриб чиқиб кетди.
- Тўхта, Пъяри, тўхта! — бақирди Рустамхон.— Банкени ўлдираман.
- Унинг оёқлари чалмашди.
- Пъяри эшик олдида тўхтади.
- Тепага чиқ!— буюрди Рустамхон.
- Қўрқаман! Олдин сен юр. У мени урди. «Ифлос, полициячинги ҳам бир ёқлиқ қиламан», деб бақирди.
- Нима?— бўкирди Рустамхон, оғзидан ҳақорат ёғилиб тепага кўтирилди. Пъяри унга эргашди.
- Кўчадан келган шовқин Пъярини сескантириб юборди, у тўхтаб қолди. Бу нима? Шовқиндан Кажри ҳам қўрқиб кетди. У деразага қаради. Посёлка томондан уйга оломон яқинлашиб келарди. Авж олаётган шовқин туфайли ҳеч нарсани тушуниб бўлмасди. Аҳён-аҳёнда одамлар Рустамхоннинг номини тилга олиб бақиришарди. «Чамарларми?— саросимага тушди Кажри.— Улар Дхупо учун ўч оларкин? Банке ўлди. Наҳотки ҳамма сир очилса? Ёнида Сукхрам ҳам йўқ, энди нима бўлади?»
- Қани у ярамас?— деб бақирди хонага бостириб кирган Рустамхон. Кажри қочиб кетмоқчи эди, лекин оstonада Рустамхонга ўзини уриб олди. У Кажрининг йўлини тўсди.
- Ким бу? Кажримисан?— у уни таниди.
- Қўйиб юбор мени!— пишқирди Кажри.
- Қаёққа қочяпсан?— унинг қўлини қўйиб юбормай ўсмоқчилади полициячи.— Банке қани?
- Кажри ўзини йўқотиб қўйди.
- Анув жойда ётиди...— деди у, шу лаҳзада кекса тажрибали полиция исковичи Рустамхон бўлган воқеага тушунди.
- Қўлимдан чиқиб бўпсан, ифлос, ярамас! Ётидими? Уни сен ўлдиредингми?— деб бақирди бир зумда кайфи тарқаб.
- Қўйиб юбор!— Кажри унинг қўлидан чиқишга уринди.
- Жавобни ким беради?
- Үлдирганим йўқ. У ўзи ўлди!

— Ха, гапир, ифлос маҳлуқ... Сени дорга остираман!  
— Қўйиб юбор мени!— қичқирди Кажри.

Кўчадаги шовқин кучайди. Дарвозанинг нариги ёғидан: «Рустамхон, ҳей Рустамхон! Нега яширинасан? Бу ёққа чиқ!»— деган бақириқлар эшитилди.

Рустамхон деразага чопди, Кажрини сал бўш қўйди, у полициячининг қўлини тишлаб олди. Рустамхон оғриқ азобига чидамай бўкирди, қўлини ёзди. Кажри қочмоқчи эди, лекин полициячи уни соғ қўли билан ушлаб қолди, юзига бир неча бор мушт туширди. Шу лаҳзада хонага Пъяри югуриб кирди ва:

— Унга тегма!— деб бақирди.  
— Иўқол кўзимдан, ифлос!

Газабга минган Пъяри Рустамхонга ташланди. Бироқ полициячи ҳушёрга турганди. Уни қаттиқ тепди.

Бу орада кўчадаги шовқин кучая борди. Уй қуршалгандай ҳар ёқдан бақириқ-чақириқлар эшитила бошланди.

Рустамхон шошиб қолди. У Пъярининг қорнига тепди. Пъяри чидаб бўлмас оғриқдан йиқилиб ҳушидан кетди. Шундан кейин Рустамхон Кажрини маҳкам ушлаб олди. Рустамхон Кажридан анча кучли эди. Аммо Кажри жон сақлаш учун олишиб; ҳозирги ҳолати унга куч-қувват бағишилади. У эпчиллик қилиб Рустамхонни девор томонга улоқтириди. Кажри ханжарини чиқаришга улгурмасдан Рустамхон ўлжасини бир ёқлил қилишга шайланган одамдай унга ташланди. Кажрининг қўлига стакан тушиб қолди. Унинг калласини мўлжаллаб отди. Лекин Рустамхон чап беришга улгурди, стакан деворга тегиб, чил-чил синиб кетди.

Кўчадан оломоннинг: «Рустамхон, бу ёққа чиқ! Қўрқоқ! Банкени қаерга яшириб қўйдинг?»— деган ҳайқириқлари эшитилди.

Пъяри ўзига келиб, Рустамхон Кажрини ушлаб олганини, у эса унинг қўлидан чиқишга жон-жаҳди билан уринаётганини кўрди. Пъяри ўрнидан турди. Ҳаммаёғи зирқираб оғрирди. У қўлида ханжар билан олдинга ташланди, Рустамхоннинг қорнига ханжарни солигача ботирди. Рустамхон қўлини ёзди.

Пъяри яна ханжар солди. Рустамхон бақирди. Пъяри устма-уст ханжар ураверди. Рустамхон йиқилди. Кўчада даҳшатли шовқин кучайиб кетганидан унинг бақириғини ҳеч ким эшитмади.

Полициячи жимиб қолди. Пъяри уни жирқаниб тепди.  
— Ифлос!— деб шивирлади.

О, шу лаҳзада у жуда кўп гапларни айтарди-ю, аммо нафрат бошқа туйғуларни ютиб юборган эди! Пъяри Рустамхоннинг жасадига виждони заррача бўлсин азобланмай тикилди.

У умрининг заволи бўлди. Пъярини шарманда қилди. Рустамхонни ўлдирмаганида у Қажрини ўлдириб қўярди. Худога шукур, ундай бўлмади. Пъяри хандон ташлаб кулди.

Қаттиқ кулги оломон шовқини ичидаги кўмилиб кетди, лекин Пъярининг телбаларча нигоҳи Қажрини ваҳимага солди.

Пъяри қонга буланган ханжарини ушлаганича ҳамон тик турарди. Бора-бора юзи мулоиймлашди. У Қажрига яқинлашди, мёҳр билан елкасига қўл ташлаб кўзларига тикилди ва кулимсиради.

Ташқарида одамлар: «Қўрқоқ!» «Қўрқоқ! Бу ёққа чиқ!» деб бақиришда давом этишиди.

— Уларга нима керак экан?— сўради Қажри.

— Озгина бирга ўтирайлик, азизим,— деди Пъяри кўчадан келаётган шовқинни унугандай.

— Утирадиган вақт эмас, кўчага қара!— хитоб қилди Қажри.

— Ўтири! Пешонага ёзилганидан қочиб қутулиб бўлмайди,— Қажрини зўрлаб ўтқизаркан, уни ўз гапига ишонтиришга интилди Пъяри.

Қачон бўлмасин, ҳаммамиз ўламиз,— давом этди у,—эртага бўлмаса буғун, эҳтимол ҳозирнинг ўзида.— Пъяри хаҳолаб кулди. Кейин Қажрининг оёғига Рустамхоннинг қонини суртди.

— Қўрднигми,— деди Пъяри,— сўзимнинг уддасидан чиқиб, оёғингга бўёқ суртдим.

Қажри йиғлаб юборди. Улар кўзларига ёш билан бир-бирларига бир нёча лаҳза тикилиб туришди, кейин қучоқлашишди.

Кўчадаги шовқин кучайди.

— Тур, шошилиш керақ!— деди Қажри.

— У ёқда нима бўляпти?— сўради Пъяри ўрнидан туриб.

— Одамлар тўпланибди. Банкени қидиришяпти. Кетайлик, менга ёрдам бер! Кётамиз!

Улар Банке ётган каравотга яқинлашишди, уни девор томонга суриб, кўкрагига ханжар суқиб қўйишиди. Кейин Рустамхонни судраб келишиб, ёнига юзини пастга қилиб ётқизиб қўйишиди.

— Мана, бўлди,— деди Пъяри. У винодан бўшаган шишаларни олиб келиш учун пастга югарди, шишаларни ўликлар ёнига ташлаб қўйди.

— Қочдик!— қичқирди Қажри.

Пъяри деразадан ташқарига қаради. Оломон қалин девор сингари кираверишда турарди.

— Қаёққа?— сўради қўрқиб у.

— Қазомиз етадиганга ўхшайди!— деб хўрсинди Қажри.

Чамарлар уйга бостириб киришга юраклари дов бермай

туришибди. Ўйдан ҳеч ким чиқмади, эшик эса очиқ. Ичкари жимжит. Баъзида деразадан соя кўриниб қолади, буни улар кўришди. Лекин кимнинг сояси эканлигини билишмади, чунки қоронғи тушиб қолганди. Пастки хонанинг эшиги ёриғидан ингичка нур чиқиб турибди. Одамлар полиция участкасига бир йигитни жўнатишиди, у қайтиб келиб, у ерда Рустамхоннинг йўқлигини маълум қилди. Демак, у уйда! Оломон яна овозига зўр бериб: «Бу ёққа чиқ, қўрқоқ! Бу ёққа чиқ!»— деб бақира бошлади.

Аммо ҳар бир киши ўз жонидан қўрқарди. Ким биринчи бўлиб киради? Чамарлар қон тўкилишини исташмасди. Хумордан чиққунча савалаш учун Банке керак, полициячига тегишмайди. Шовқин кучая борди.

Сукхрам деразалардан бирида кўринган сояни биринчи бўлиб лайқади. У уйга кириши мумкин эди-ю, лекин одамлар билан бирга бўлгиси келди. Бу ердагиларнинг ҳаммаси Рустамхонга эмас, Банкега қарши кайфиятда эдилар. Қолган икки нафар тҳакур ҳақида одамлар ҳеч нарса билишмасди. Агар Сукхрам уйга биринчи бўлиб кирса ҳамма ундан кулади. Дхупо унга ким бўлиб қопти? «Уларга тегишмайди»,— деб ўйлади Сукхрам Пъяри билан Қажри ҳақида. Рустамхон уйда эканлигини била-кўра туриб, у нега қорасини кўрсатмаётганини тушунмасди. Сукхрам уйнинг чап қанотига пусиб бораётган бир одамни кўриб қолди, лекин унга эътибор бермади: у ёқбу ёққа югуриб юрган одамлар озми?

Оломон бўкира бошлади. Лаҳза сайин одамларнинг қаҳри даҳшатли тусга кираверди.

Сукхрам ҳалиги одамни кузатди. У атрофга ўғринча боқиб, уйга пусиб борища давом этди. Сукхрам тепадаги уй деразасига қаради. Лекин кўнглидаги ғашлик кучаяверди. Бу орада ҳалиги одам уйнинг орқасида кўздан фойиб бўлди. Кўп ўтмай ўша ёқдан нурсиз ёруғлик ловиллади. Оломон бўкиришда давом этди. Сукхрам нима бўлганини билди. Ҳалиги одам уй ортидан чиқиб, шошилмай нари кетди. Уйнинг тепасида олов тиллари осмонга ўралди. Бир неча лаҳзадан кейин одамлар уйнинг ёнаётганини кўришди. Ёнгин! Ҳалиги одам қочди. Сукхрам уни таниди: браҳман Нироти!

Сукхрам уни қувиб кетди. Ярамас браҳман чамарлар Рустамхоннинг уйини қуршаб олганидан фойдаланиб, эндиликда ундан қасд олишга аҳд қилибди. Пъяри уни калтаклашга буюрганди, бугун бўлса у қасд олгани келибди, шундай қилса, уйни ёндиришда чамарлар айбдор бўлишини, ўзи ҳақида ҳеч ким чурқ этмаслигини биларди. Рустамхоннинг уйи ёниб кетади, бунга анови хор табақадагилар жавоб беради, Нироти эса сувдан қуруқ чиқади.

Қишлоқда қий-чув, тўполон бошланиб кетди. Шамол оловни гулдиратиб ёндириди. Уйни тўполон кўтарган чамарлар ёндирганига ҳеч кимда шубҳа қолмади. Улар бундай йўл тутишга қандай журъат қилишдийкин? Уйга ўт қўйиш-а, олий табака одамлари бундай ёмон аломатни кўришиди. Иш шу ҳолда кетаверса улар тил биритириб туриб истаган одамнинг уйига ўт қўйиши мўмкин. Йўқ, бу ҳақда ҳукуматга маълум қилиш керак! Бир неча киши полиция участкасига қараб чопиб кетди. Ётган жойидан турғазилган полиция участкаси навбатчиси олти ойлик уйқудан уйғонган Кумбхакаранг<sup>1</sup> ўҳшарди.

Олов томни бутунлай қоплаб олди. Шамол уни пуфлаб берди, олов қозондан тошган сутдай том четларидан оқиб туша бошлади. Олов шуъласида том олтинранг бўлиб товланди. Қип-қизил қон сингари олов тиллари шамол шиддати билан айланниб ўйноқлар, бир-бирини қучоқлар эди. Мана, олов ўнларча ўтли тароқ ҳосил қилиб, томнинг олд четига ёпирилди, ҳеч қандай тўсиққа учрамай пастга шўнғиди. Том олов ичида кўринмай қолди.

Чамарлар ёнаётган уйга қараб хушнуд қичқиришиди:

— Яшасин, Бҳаван! Сенинг тафтингдан жирканч гуноҳкорнинг ини ёниб кетди!

— Бу сатининг ғазаб-нафрати!— деб бақирди бир чол.

Ёнғин худонинг жазоси эмаслигини кўплар тушунди. Ёнғин жуда қимматга тушади. Ҳукуматнинг қаҳр-ғазаби уларга, чамарларга тушади. Лекин чекинишининг вақти ўтди. Улар қочиб кетишса, уйни улар ёндириди деган шубҳа туғилиши мумкин.

Сукхрам Ниротини изма-из қувиб бораверди.

— Сени танидим, қўрқоқ!— қичқирди у.— Бошқаларни айблашлари учун яширинмоқчимисан?! Барибири айтиб бераман...

Унинг гапларига ҳеч ким ишонмаслигини Сукхрам хаёл-хотирига ҳам келтирмасди. Нироти оёғини қўлига олиб югурди, қандайдир тор кўчада кўздан фойиб бўлди.

— Қўрқоқ!— Сукхрам нафрат билан ерга тупурди.

У ўзини ўзи койиди. Аблаҳ ёнгинасида эди, уни ушлай олмади. Бу дармонсиз браҳман шунақаям югурдники! Ўқдай учиб югуришга тўғри келди. У шундай қочмаганида уни ўлдиришарди... Энди чамарлар бало-қазодан қутулолмайдилар. Ноинсоф дунё! Одамлар аёлни зўрлагани учун адолатли ўч олишга келишганди, анави ярамас пайдо бўлиб, ҳамманинг дилига ғулгула солиб кетди.

Сукхрам бир неча минут тараффудланиб турди, тўсатдан бақириб юборди. Ахир, Қажри билан Пъяри ўша ерда-ку, атрофларида олов ҳалқаси. Улар ёниб кетишади!

<sup>1</sup> Кумбхакаран — («сув оладиган жом сингари қулоқли идиш») Раванинг акаси, мифик улкан девнинг исми.

У ўйлаб ўтиrmай ўзини уйга урди. Назарида бутун олам ёнаётгандай, олов тиллари қайнаб тошаётгандай, уй деразалиридан кўрқиб кетган иккала аёл кўринниб кетгандай бўлди.

Сукхрам югуриб келгунча бутун уй ўт оғушида қолган эди. Олов гоҳ юзларча учли ходалардан тикланган девордай осмонга ўралар, гоҳ мингларча ўзининг қўл-қиличларини шамолга ҳамла қиласар, гоҳ шамолни чекинишга мажбур қилиб оловли ўқ ёмғирини ёғдирар эди. Олов қон оқими сингари ерда илондай ўрмаларди. Ўт айвонга ўтганда қўтос ниҳоятда қўрқиб кетиб, арқонини узиб қочди. Аввалига у деворга қамти келиб қолди, кейин дарвозага қараб чопди, ўзини тўппа-тўғри оломонга урди. Бир неча кишини ағдариб оломон орасидан ўтиб, кўздан ғойиб бўлди. Лат еганларнинг дод-войи қўрқиб кетган кишилар бақириғига кўмилиб кетди.

Бора-бора бақириқ-чақириқлар тинди. Чамарлар Дхупонинг жасадини кўтаришди. Олдинда турган Кҳачера атрофга ғамгин назар ташларди. Унинг ёнида қайфули сукут сақлаб чоллар қотиб туришарди. Хотинлар ҳам келишиди. Улар тобора авж олаётган алангага ҳам қувонч, ҳам даҳшат билан тикилишарди. Яхшиямки, Рустамхоннинг уйи бошқа уйлардан анча йироқда, ялангликка жойлашганди. Рустамхон кўринмади, у ўйқлиги учун ҳеч ким ёнғинни ўчиришга шошилмади: ота-оналарининг уйи ёнмаяпти-ку. Рустамхонни бутун қишлоқ ёмон кўрарди.

Аланга ҳеч қандай тўсиққа учрамай вайроналик келтирувчи рақсига тушаверди. Гўёки олов юзли Чандика<sup>1</sup> шиддатли қуонда айланаверди. Уй олди кундузгидай ёп-ёруғ бўлиб кетди.

Полиция бошлиғи оломон билан ёнғинга кўзи тушгач, ақлдан озишига сал қолди. Буларнинг ҳаммаси исёнга ўхшаб кетарди.

— Хузур<sup>2</sup>, чамарлар итоат қилмай қўйишидиги, исёнга ҳозирлик кўришяпти,— воқеани билиш учун чопиб кетган мирза маълум қилди.— Уларнинг айтишича, кимдир чамар аёлни зўрлади.

— Паст табақадагилар жиноят қилишибди — уйга ўт қўйишибди, деб полиция бошлиғи баланд овозда бақирди.

Ҳозиргидан ҳам жиддийроқ воқеаларга бир неча бор дуч келган тажрибали полициячилар ҳам етиб келишиди.

— Қалькуттада ёнғин чиққанди, ана ўшани ёнғин деса бўлади,— ҳикоя қилди улардан бири,— бир зумда ўт ўчиради-

<sup>1</sup> Чандика — маъбуда Дурганингни номларидан бири.

<sup>2</sup> Хузур — лавозими, мавқеи юқори бўлган кишиларга ўта ҳурмат кўрсатиб мурожаат қилишда айтилади, «аъло ҳазрат» маъносига тенг келади.

ган машиналар етиб келди, ёнгинни ҳам бирпасда ўчирдик. Қишлоқда унақа машиналарни қаёқдан топасиз?

Ниҳоят полициячилар агар ҳукумат хоҳласа қишлоқ жойларыда ҳам ўт ўчирадиган машиналар бўлиши мумкин, деган хulosага келишди. Аммо ҳукумат қишлоққа ғамхўрлик қилармиди?

Участка бошлиғи Рустамхоннинг уйини ямлаб ютаётган оловга сеҳрлангандай қараб қолди.

— Оломонни тарқатинг! — буюрди у полициячиларга.

— Тарқалинг! Тарқалинг! — қичқиришди полициячилар одамлар устига бостириб бориб.

Лекин уларнинг ўкиригидан илгари ер ларзага келган бўлса, ҳозир сичқоннинг чийиллашибалик ҳам таъсир қилмади. Полициячилар олдинги сафларни қиса бошлади, аммо орқадагилар одамларни олдинга итаришди.

Шундай чамарлар устига таёклар дўлдай ёғилди. Оломон ларзага келиб, орқага сурилди. Улардан куч ишлатиб қасд олмоқчи бўлишяпти. Лекин улар қўрқишимайди. Уларни қўрқитиб бўлмайди. Аввалига уларнинг табақасидан бўлган аёлнинг номусини булғашди, энди бўлса таёкларни ишга солишяпти.

Олдинги қатордагиларнинг аҳволи танг бўлди. Қон тўкилди. У ер-бу ерда муштлашиш бошланди. Полициячилар кўпчилик эмасди, қишлоқда полициячининг кўп бўлишига ҳожат йўқ, халқ усиз ҳам ҳукуматни «ҳурмат қиласди», ўзлари устидан тургандардан ҳамиша қўрқиб яшайди.

Бироқ бу сафар чамарларнинг ғазаби тўлиб-тошди. Улар уришга уриш билан жавоб қайтармоқчи бўлишди. Бир неча эркакларга полициячининг қўлига тушиб қолмаслиги учун Дхупонинг жасадини маргхатга олиб боришни буюришди. Бўлмаса қорнини ёришади. Бҳаваниларининг дағи гулханини ҳаром қилишади. Кўплар ўз жойларида қолишли.

Оломон ҳужумга ўтди. Полициячилар орқага чекиниши.

— Яшасин Бҳавани! — деб қичқирди кимдир орқа қатордан. Оломон бўкирди. Қачера полициячини даст кўтариб ерга урди. У тўппа-тўғри участка бошлиғининг устига бориб тушди, бошлиқ «ўлдиришди!» деганича юзтубан йиқилди... Полициячиларнинг ҳаммаси бир-бирига ўхшайди.

Участка бошлиғи йиқилиши биланоқ оломон:

— Уларни қуршаб олинглар! — деб бақиришди.

Чамарлар зич ҳалқа бўлиб йиқилган участка бошлиғи билан полициячиларни қуршаб олишди. Бошлиқ бошидаги салласини олди<sup>1</sup>.

<sup>1</sup> Бошидаги салласини олди — яъни енгилганини тан олди.

— Раҳм қилинглар! Саллам оёқларингиз остида! Оилам, бола-чақаларим бор. Раҳм қилинглар!

Ҳозир у ҳар қандай қилиб бўлса ҳам бу ердан чиқиб кетмоқчи эди. Қейин буларга кўрсатиб қўяди... Агар уни ўлдириб қўйишса, ҳукумат улардан ўч олади, албатта, аммо бундан унга нима фойда?

— Раҳм қилинглар!..

Сукхрам ўзини ёнаётган уйга урди. Том қулай-қулай деб қирсиллаяпти.

Қайноқ аланга Сукхрамни куйдирди.

— У ҳалок бўлади-да...— деб бақириб қолишиди орқадаги-лар.

Сукхрам икки сакраб ҳовлидан ўтди ва уй олдига келиб қолди.

Поға-поға тутун кўзини ачиштириди, тутун ўпкасига ҳам етиб, боши айланди. Нарироқча йўл йўқ эди. Сукхрам кўзини юмиб, олов устидан ҳатлаб ўтди. У биринчи қават хонасига кириб қолди. Тутун ортида нима борлигини кўриб бўлмасди. Орқасидаги эшик тарақлаганича ағанаб тушди. Олов темир илгак билан аёвсиз ҳайдаб борилаётган филлинг карнай овозига ўҳашаш даҳшатли шовқин билан олдинга интилди. Танани куйдирувчи учқунлар ҳар томонга сочилар, чўзиқ вишиллаш билан ўчиб қоларди. Тепадан қулаётган том синиқлари оловнинг тўймас оғзида бирин-кетин йўқ бўла бошлади.

Сукхрам зинапояни тополмай қолди. Аланга минг бошли аждар сингари наизасини ирғитар, буралиб, тўлғаниб ҳамон олдинга интиларди. Олов деворга ўтди, илиғлик турган кийимлар ёрқин нур таратиб, лоп этиб ёнди. Сукхрам ўзини орқага ташлади, кейин тепага югорди. Бахтига ўт зинапоягача етиб келмаган экан.

Кўрқиб кетган Кажри билан Пъяри нима қилишини билмай хона ичиди у ёқ-бу ёққа югуришарди.

— Шу ердамисизлар?— бақирди Сукхрам хона ичига чопиб киравкан.

Улар севинганларидан йифи-сиғи билан унга ёпишишиди.

— Опа, ўладиган бўлсан ҳам энди қўрқмайман,— деди Кажри.

— Иўқ, Кажри, сизлар қочишларинг керак,— деб жавоб қайтарди Пъяри.

Аёллар йиғлаб юборишиди. Сукхрам ҳеч нарса тушунмади. Укириб йиғлашди-ю, жойларидан қимирлашмайди, атрофда эса слов авжга миняпти! Иккови ҳам бахтиёрликдан йиғлашар, ўзларини тутиб олишолмас эди. Уларнинг бахтиёрлиги шунақаям чексиз эдик, ҳайратга тушган Сукхрам бир муддат-

га ярим күйиб битган уй билан олишаётған даҳшатли алангани укутиб қўйди.

— Нима гап ўзи?— Сукхрам ҳайрон бўлди.

— Ўлиш насиб қилса бирга ўламиз,— деди Кажри.

Бу ерда бўлиб ўтган ҳодисадан Сукхрам хабарсиз эди. У Кажрининг заррача қўрқмаётганини кўрди. Муҳаббат ўлим устидан ғолиб чиқишига ёрдам берди. Кажри юбкасини кўтарди, сёқларини кўрсатиб, фуур ва тантана билан деди:

— Хой эр, бу ёққа қара, опам унинг қони билан оёғимни бўяб қўйди.

— Кимнинг қони билан?— Сукхрам фақат шундагина ўлиб ётган Рустамхонни кўрди.

Пъяри ҳам унга яқинлашиб, бошини сал эгиб деди:

— Бу ёққа ҳам бир қара, соҳибам, Банкенинг қони билан пешонкамга тика<sup>1</sup> чизилди.

Сукхрам ҳайратдан қотиб қолди. Ундан ўч олинибди, буни икки аёл қилибди. Оғир дамларда аёллар ҳам даҳшатли қаҫоскорларга айланиши мумкинлигини у ўйлаб кўрмаган экан.

Иккала жасад ҳам ёнма-ён ётар, ҳар икковига ҳам биттадан ханжар санчилган эди.

— Булар тамом бўпти!— деди Сукхрам.

Аланга дераза орқали хонага урилди. Лекин Сукхрам ҳайратдан ҳамон ўзига келгани ийқ эди; бутун қишлоқнинг битмас-туғанмас газаб-нафратига учраганлар аёлларнинг қўлида ўлибди. Ҳар иккови ҳатто ўлиб ётиб ҳам газаб, жирканч ҳиссими туғдирмоқда. У бўлса улардан бирини даволади!

— Ениб кетамиз!— қичқирди Пъяри.

Сукхрам ўзига келди. Ў яна оломоннинг шовқинини, оловнинг гувиллашини, Пъярининг товушини эшилди.

— Қочинглар!— деб буюрди.

Аммо иккала аёл ҳам унга ночор қараб турарди. Шунда коридордаги ҳовлига қараган панжарали дераза ёнига чопиб борди. Оёғи билан панжарани тепа бошлади. Пъяри ён томондаги хонага югуриб кириб, болға олиб чиқди. Сукхрам панжарани суғуриб олди.

— Дҳости борми?— сўради у.

— Чойшаб бор,— деди Пъяри.

— Келтир!

Пъяри чойшаб келтирди. Улар чойшабларни бир-бирига боғлаб эшишди. Узунгина арғамчи ҳосил бўлди. Жиноят белгиси қолмаслиги учун Сукхрам арқонни фонаръ ёғига шимдирди. Арқоннинг бир учини дераза ромига боғлади, бошқа уигиа болғану боғлаб, кўчага ташлади.

<sup>1</sup> Тика — алоҳида бўёқ билан қош ўртасида думалоқ ёки чизиқча қилиб суртадиган табақа белгиси.

- Туша қол, Кажри! — буюрди у.  
 Кажри маймундай чаққонлик билан бир зумда ҳовлига тушди.
- Пъяри, сен ҳам тезроқ туш,— деди Сукхрам.  
 — Йўқ, олдин сен туш!  
 Пъяри Кажри сингари йўл тутмай ўжарлик қилди. Ҳозирги нозик пайтда ҳам ўз хукмини ўтказмоқчи бўларди.
- Бўл тезроқ! — Сукхрам бақириб берди.  
 Пъярининг кўзларида ёш йилтиллади.  
 Лекин Сукхрам юмшамади.  
 Энг охирида Сукхрам тушди. Уччовлари енгил нафас олиши, қочишга шайланиши, аммо Кажри:
- Арқонни куйдир,— деб эслатиб қолди.  
 Сукхрам арқонни ёндириди, илонсимон олов тепага ўрмалади.

Улар гўнг тепанинг орқасига яшириниши.

Аланга авж олаверди. Энди у томининг бошқа томонидан осмонга ўрлади. Ҳозиргина улар тушган деразада олов тиллари яққол кўринди. Эсаётган шамол шиддатида олов янги куч билан гувиллади. Фазабга мингдан алганга тун зулматини ямлайдерди.

Уччовлари келишиб олишгандай қочиб қолиши. Улар бутазордан эсон-омон ўтишиб, ибодатхоналардан бирининг орқа ҳовлисидан чиқиши, ундан айланиб, тош йўлга чиқиб олиши. Йўлдан кесиб ўтишгач, атрофга кўз ташлаши: рўпарада ма-лиларнинг<sup>1</sup> уйлари қорайиб туради. Улар билан тўқнашиш яхшиликка олиб бормасди. Сукхрам у ёқ-бу ёққа назар ташлади-да, чапга бурилди. Аёллар унга эргашиши. Бир оздан кейин улар сув шовқинини эшитиши. Қўл! Энди улар бехатар жойда эдилар. Қўлда ҳеч ким йўқлигига ишончлари комил бўлишгач, йўлда давом этиши. Бу ташландиқ йўлда гоҳида шоқоллар учраб қолар, буларни кўргач, четга қочишар эди. Нихоят улар бокқа етиб келиши, қалин дараҳтлар тагида тўхташди.

— Қочамиз,— деди Сукхрам,— бу ерда қолиш мумкин эмас.  
 Сукхрамни келгуси ҳаёт ташвишлантиради. Эндиликда бутун жавобгарлик унинг зиммасида эди. Қаёққа борса экан? Юз берган ҳодиса уни даҳшаттга солар, шунинг билан бирга беҳад қувонтиради ҳам. Лекин хотиржам бўлишга ҳали эрта, баривир, қаттиқ жазога мубтало бўлиши турган гап.

— Ким билсин, чамарларни нима қилишар экан? — биринчи бўлиб Пъяри гап бошлади.

Улар боғдан ўтиб ўрмонга етиб бориши. Бу ер тинч эди. Шунақаям тинч эдики, кишининг кўнглига ваҳима соларди. Ўт-

<sup>1</sup> Мали — багбонлар табақасига мансуб кишилар.

ўланлар босган сўқмоқлар, дараҳтларга чирмashiб кетган чирмовиқлар уларни керагидан ортиқ қўрқувга солди. Улар тиқанли чакалакзордан ўтишди. Ҳар бир бута ортида йиртқич ҳайвон тургандай бўлаверди.

Кажри билан Пъяри қуролсиз эдилар. Сукхрам ханжари билан анча қийналиб, иккита шоҳдан таёққа ўхшаш нарсани йўнди-да, аёлларга биттадан улашди. «Кегдик»,— деди у. Лекин Пъяри қорнини ушлаганича ўтириб қолди.

— У унинг қорнига тепди,— деб тушунтирди Кажри.

— Қим, Банкеми?

— Йўқ, Рустамхон.

— Пъяри у билан ёқалашдими?

— Мени қутқариш учун ташланди.

Сукхрам Пъярининг ёнига ўтирди.

— Қаттиқ оғрияптими?

— Жудаям,— жавоб қилди Пъяри. Кажри Пъярининг ёнига, кўкат устига ўтириб, унинг бошини тиззаси устига олди.

— Бу ерда қолиш мумкин эмас,— деди Сукхрам,— узоқроқ-қа кетишимиш керак.

— Кетдик,— деди Пъяри ўрнидан зўрға қўзғалиб.

— Қаёққа борасан?— деб сўради Кажри.

— Қувватим борича юраман, кейин юролмай қолсам ташлаб кетаверасизлар.

— Нима дединг?!— Кажри Сукхрамга бурилди.— Орқангга кўтариб ол. Бир сафар у мени ҳам кўтарган. Ўшанда тоққа кўтарилигандик.

— Қачон?— оғриқни унугтиб сўради Пъяри.

— Кейин гаплашамиш,— Кажри қўл силтади,— ҳозир эса кетиш керак, бирор кўриб қолса балога қолишимиз мумкин. Бир нарсани ўмариш учун кечаси ўрмонда изғиб юришибди, деб айб қўйишади. Бу қамоққа олиш учун бир баҳона бўлади. Кейин у ёғига анови иккаласининг ўлимини ҳам тиркашади. Учковимиз Андаманга гумбирлаганимизча тушамиз<sup>1</sup>.

Кажри Пъярининг белидан қулоқлаб турғазди, Сукхрам уни орқасига кўтарди. Пъяри Сукхрамнинг бўйнидан қулоқлаб олди, елкасига бошини ҳорғингина қўйди.

— Иккинчи хотин бўлишдан худо арасин,— ҳазиллашиб шикоят қилди Кажри,— рашк қилавериб ажалингдан олдин куйиб ўласан.

Пъяри кулимсиради.

Узоқдан отишма овозлари эшитилди.

— Бу нимаси?— ташвишланди Пъяри.

<sup>1</sup> Андаманга гумбирлаганимизча тушамиз — Бенгаль қўлтиғидаги Андаман ороллари, каторгачилар сургун қилинадиган жой.

Бу ердан улар ёнғин алангасини кўришмади, лекин қишлоқ турган жой осмонининг тенг ярмини ёнғин шуъласи қоплаган эди.

Осмон фонида кўҳна қалъа қора соядай кўзга ташланади. Унинг минораларида узоқдаги ёнғин нури липиллаб кўринарди.

Сукхрам кулди.

— Рашик қилма, Кажри,— деди Пъяри.

— Рашик қилаётганим йўқ,— деди Кажри.— Тўғри кетганимизда аллақачон жойимизда бўлардик,— тўнғиллади у.

— Бирор кўриб қолса-чи?— сўради Пъяри.

— Ҳозир участкага қамашмаяпти,— деди Сукхрам. Аммо кейин қамчи билан роса савалашади. Улар бизни ёниб кетган деб ўйлашади. Бироқ иккита скелетни топиб олишгач, бир корҳол бўлганини дарҳол пайқашади.

— Унда таборда яшшимиз ҳам мумкин бўлмай қоларканда?— деб сўради Кажри.— Индамасак ҳам-а?

— Эҳ, хоҳ инда, хоҳ индама — бир гўр, бизни қотилликда айблашади.

— Мен ҳеч нарса билмайман деб айтаман.

— Эҳ, соддагинам, сендан сўраб ҳам ўтиришмайди. Кейин нима бўлишини биласанми?

— Йўқ.

— Кейин бошлиқ олдингга ҳалво билан ёғли нон қўйиб: «Е!» деб айтади. Кейин нима бўлишини биласанми?

— Э, э, ҳаммаси ҳаром ўлишсин! Нима, бизни бу ерга боғлаб қўйишибдими? Қелинглар, бу ердан бутунлай қочиб кетамиз. Бир вақтлар отам келган жойларга борамиз,— таклиф киритди Кажри.— Дангнинг<sup>1</sup> шарқ томонида гужорат натлари, уларнинг нариёғида исёнчи натлар яшашади. Улардан ҳам нарида карнатлар истиқомат қилишади. Ўша ёқларга яширинамиз. Карнатлар посёлкасида қўрқмай яшаса бўлади. Ўша одамларни бир кўрганингда эди! Уларнинг орасида сени қалъа хўжайини қилиш учун жонини ҳам аямайдиган ботир йигитлар бор.

— Полиция-чи?— деди Сукхрам.

— Нималар деяпсан? У ерлар ўрмон, тоғ. Полициячилар тумшуғини суққани қўрқишиади. Бир куни биттаси уриниб кўрган... Рожа бизга бошпана беради. У ерда гужорлар ҳам бор. Уларнинг қўтосини ўғирлаб, хоҳлаган ёқса олиб кетишинг мумкин. Дўпти тор келиб қолса ўғирлик қилганлар рожага пул беришади-ю, ёниғлиқ қозон ёниғлигича қолаверади. Таҳсилдор билан ҳамма иноқ. Куппа-кундуз куни ҳам ўқ отишади. Ҳеч кимга ҳеч ким хўжайнчилик қилмайди, бироқ рожа учун жон-

<sup>1</sup> Данг — киши ёғи етмаган ўрмонлар билан қопланган, бориши ниҳоятда қийин тоғ участкасининг жамлама номи.

ларини беришга ҳам тайёр. Ҳар ким кўнглига маъқул келганича яшайди... Жудаям чарчаб кетдим! Озгина дам олайлик.— Кажри нафасини аранг ростлаб олди.

— Бир оз тўхта,— деди Пъяри Сукхрамга, сўнг Кажрига юзланди.— Менга қара, энди мен юрай, у сени кўтариб олсин.

Пъяри бу гапни беғаразлик билан, Кажрига раҳми келганидан айтди. Аммо Сукхрамнинг жиғибийрони чиқди.

— Иккита тегирмон тоши орасига тушиб қопман-да! Мен сизларга эшакмидим?

— Бўпти, бўпти, тажанг бўлмай қўя қол,— деди Кажри муросага келиб.— Елкангга минмайман. Эшаклигингча қолавер. Пъярини кўтариб ғинг демай кетавер. Ўзим юра бераман.

Учковлари ҳам қулиб юбориши. Лекин бирон бир режа ўйлаб топиш керак эди.

— Сизлар шу ерда ўтира туринглар,— таклиф қилди Сукхрам,— мен бўлса таборга бориб қутучамни олиб келаман.

— Бу ерда икковимиз қоламиزمи?— қўрқа-писа сўради Пъяри.

— Бўпти, сизлар қолинглар, таборга ўзим бориб келаман,— деб Кажри талабгор бўлди, Сукхрамдан ханжарини олиб, юбкасининг қатига яширди.— Шу ерда кутинглар,— деди-да, йўлга тушди.

## 23

— Кажри, сени ҳеч ким кўрдими?— деб сўради Сукхрам у қайтиб келганида.

— Йўқ,— деди у.— Мен ҳеч кимга билдирамай бордим.

— Мангу табордами?

— Билмайман, уни кўрганим йўқ.

— Отни нима қилдинг?

— Ечиб юбордим,— деди Кажри. Сукхрамни ғам босди.

— Итни-чи?— сўради у.

— Уни бир неча марта ҳуштак чалиб чақирдим.

— Қайтиб келса бизни ахтаради.

Улар анчагача индамай йўл юриши.

— Буюмлар-чи?— сўради Сукхрам.

— Буюмлармиш, мана, улар қопда, у ёқда увадалар қолди, холос,— жавоб қилди Кажри.

Тепалик бошланди. Ҳаммаёқда қоя тошлар осилиб турибди. Кажри қутуни тошлардан бири устига қўйди.

Учковлари биттадан бири чекиши.

— Кетдик!— буюрди Сукхрам.

— Кетсак кетибмиз-да,— деди Кажри.

Улар қўзғолиши. Пъяри қопни кўтарди, лекин у жуда вазмин эди: у гандираклаб, қопни кўтаролмай йиқилиб тушди.

— Кўтаролмайсанми? — сўради Сукхрам.

— Эҳтимол, илгари кўтара олармидим.

— Қопни ташла,— деди Кажри.

— Бу ёқса бер,— қўлини чўзи Сукхрам.

У қопни орқасига кўтарди, лекин қутича ҳам бор эди. Сукхрам унга қараб кулимсиради.

— Сукхрам, эркак кишисан-ку, қутичани ҳам кўтариб олсанг нима қилади? — деди Пъяри Кажрининг бутунлай ҳолдан тойганини пайқаб, унинг ёнини олди.

— Тўғри, эркак кишиман, аммо удумларимиз ҳам бор-да,— деди Сукхрам.

— Қанақа удум? — Пъяри қизиқсинди.

— Қутичани ҳам олардим. Бироқ ўзинг ўйлаб кўр, шу эркакларнинг ишими? Бу қанақаси, сизлар шундоқ кетаверасизлару бутун юкни мен кўтараманми? Одамлар кўрса мендан кулишмайдими?

— Нега кулишаркан? — сўради Пъяри.

— Анови йигит бу аёлларга ҳаммол бўлиб ёлланибди дейншади,— деб жавоб қилди Сукхрам.

— Майли, тилларининг қичиғини бостираверишсин. Сенга ёпишиб олишармиди? Бошқаларнинг ғамини ейсану ўзингникини ўйламайсан! Олдин уйингни ўйла, кейин дарвозадан ташқарига қара,— деди Пъяри.

— Қўйсанг-чи, Пъяри. У ўзини рожа деб билади. Ундан шундоққина тҳакур ҳиди келиб турибди. Лекин тҳакур гарчи парда<sup>1</sup> одатини бажо келтиришга мажбур қилса ҳам хотинининг ишлашига мутлақо ўйл қўймасди. Сукхрам ё биз тенги бўл, ё жаноблар қаторига ўтиб ол.

Оёқ остида муссон пайтида тоғдан ёмғир суви оқими билан пастга тушган шағал фижирларди. Шағалдан юриш қийин — оёқ сирғанарди. Муюлища улар шовқин эшитишди. Шовқин тобора яқинлашаверди. Уччовлари ҳадиксирашди.

— Йиртқич ҳайвонми? — шивирлади Пъяри.

— Йўқ, одамларга ўхшаяпти,— эътиroz билдириди Кажри.

Кажри гарчи ўзи қўрқувдан титраётган бўлса-да, Пъярини қучоқлади. Эндиликда улар ёнмаён туришар, бу эса уларга дадиллик бахш этарди.

— Ким бор бу ерда? — қичқирди Сукхрам.

Унинг бақириғи тоғларда акс-садо бериб қайтди. Гўё тошлар «ким бор бу ерда» деб такрор-такрор қичқиргандай бўлди.

<sup>1</sup> Парда — хотинлар туродиган хонани, яъни ичкарини ташқаридан ажратиб туради.

Қоя орқасидан бир киши чиқди. Тонг қоронғусида у даҳшатли жинга ўхшаб кўринди. Ўнинг қоп-қора қалин соқоли тепага сал-пал диккайган эди. Эгнидаги эски жандар чопони орасидан яланғоч кўкраги, икки томондан боғлаб қўйилган дҳотийси кўриниб турарди. Бошида салла. Чақнаб турган шаҳло кўзлари, тимқора юзи унга қўрқинчли тус бериб турарди.

У учковларига, айниқса аёлларга диққат билан тикилди. Пъяри ерга қаради, Қажри унга бақириб берди:

— Ҳа, нега еб қўйгундай бўлиб, кўзингни лўқ қилиб қараб қолдинг?

Нотаниш киши оппоқ тишларини ярқиратиб, гулдираб кулди.

— Қаёқдан келяпсизлар?— вахимали сўради у.

— Бу ерлик эмасмиз,— деди Қажри.

— Қаёққа кетяпсизлар?— деди у масхараомуз.

— Данг томонга,— жавоб қилди Сукхрам.

— Қанақа одамсизлар?

— Карнатлармиз.

— Нега кечаси изғиб юрибсизлар?

Учовлари ҳам индашмади.

— Бу ер менинг подшолигим,— деди яна нотаниш одам.—  
Бу ёққа полициячилар келишса, уларни ўтказмайман.

— Кечаси юрищимиznинг боиси — полициячилардан қўрқамиз,— деб уқтириди Сукхрам.

— Нега бундай? Биронтасини ўлдирдиларингми?— қизиқди нотаниш одам.

— Йўқ, бизни ўғирлиқда айблашди.

— Ўғирлиқда айблашди дегин?— деб қайта сўради у.—  
Демак, ўғирлиқда устаси фарангмиз денглар?

— Мен ўғри эмасман,— деди Сукхрам.— Йўлтўсар бўлишим мумкин, аммо ўғри бўлмайман.

Нотаниш киши хаҳолаб кулди. Мириқиб кулиб олгач, «Кхадагсинх!» деб бақирди.

— Лаббай, бошлиқ,— дея худди ердан ўсиб чиққандай бир одам пайдо бўлди.

Унинг орқасида яна тўрт киши кўринди. Уларнинг елкасида сафар халталари бор эди.

— Қўрдингми?— бошлиқ улардан бирига мурожаат қилди.—  
Манови йигитга бир қара!

— Қарадим, хўш нима бўпти?— деди у.

— Үғримасман, бироқ йўлтўсар бўлишим мумкин деяпти.

Нотаниш одамлар кулиб юбориши.

— Мунча тиржаясанлар?— деди сабри тугаган Қажри.— Бир куч синашинглар, уни ўшанда биласизлар.

— Бунга ҳали улгурамиз,— деди Қхадагсингх дегани.— Олдин ўзларингни ким деб танитган бўлсаларинг, шуни исботланглар. Қани, қутичани очинглар-чи.

— Нега?— деб сўради Қажри.

Пъяри, индама, деб уни чимчилаб қўйди. Лекин Қажри бўш келмади.

— Бизга ҳадеб буйруқ қиласизлар, ўзларинг ким бўлиб қолибсизлар? Агар ўғри бўлсанк бор бисотимиз шу ерда, қараб нима қиласизлар? Олаверинглар.

— Майли, оч,— деди Сукхрам.— Қўришсин.

Пъяри қутини ерга қўйди.

— Қўринглар,— деб ўзини четга олди.

Қхадагсингх олдинга чиқди. Сукхрам кўз қирини ташлаб, бошлиқ ишора қилганини сезиб қолди, найза ушлаган одамлар уларни қуршаб олишди.

Қхадагсингх қути ёнига чўқди.

— Бунинг қулфи ҳам йўқ экан!— деб хитоб қилди у.

Бошлиқ қовоғини солди. Қхадагсингх қутини очди. Унинг ичиди талай латта-путта, портрет бор эди.

— Нима бор экан?

— Аллақандай сурат,— жавоб қилди Қхадагсингх.

Бошлиқнинг ишораси билан кимдир гугурт чақди.

— Бу аёл ким?— деб сўради суратга қараган бошлиқ.

Сукхрам ўйланиб қолди. Қандай жавоб қайтаришини билмади.

Бироқ Қажри ўзини йўқотмай дарҳол савол берди:

— Кімлигини билиб нима қиласизлар?

— У кўпигина гавҳар, марваридларни тақиб олибди,— деди бошлиқ.

— У бизнинг олдинги бекамиз,— деди Қажри.— Бунаقا қимматбаҳо безаклар унда бўлмай сиз билан бизда бўлармиди?

— Эҳ-хе!— бошлиқ суратга қараб кулимсиради.

У ўз ўйлари билан банд бўлгандек ўйга толди... Суратдаги гавҳар билан марваридлар унинг ҳавасини келтираётган эди.

— Бу тҳакуран! У оламдан ўтган,— чуқур хўрсаниб гапирди Сукхрам.

— Унинг уйи қаерда?

— У рожалар авлодидан. Аммо унинг авлод-аждоди оламдан ўтган, ери билан мол-мулкини бошқа рожа эгаллаб олган,— деди Сукхрам.

Бандитнинг ҳафсаласи пир бўлди.

— Қаёққа кетяпсан, Данггами?— сўради у.

— Ҳа,— деб жавоб берди Сукхрам.

— Йўлингдан қолма.

— У ёққача кўп юриш керакми?

- Эртага кечқурун ўша ерда бўласан.
- Бироқ, егулик ҳеч вақомиз йўқ, очмиз,— деди Кажри.
- Соқолли уларга ун беришга амр қилди.
- Сен ҳақиқий рожасан!— деди унга Пъяри.
- Ундан яна озгина қўшиб беришди.
- Кучли йигитга ўхшайсан,— деди Сукхрамга Кхадагсинх,— лекин фууруринг ҳам борми?
- Фақир одамлармиз,— деди Сукхрам ва сирли кулим-сиради.
- Кхадагсинх унга тарсаки тортиб юборди. Сукхрам унга чақ-қонлик билан ташланди, уни боши узра кўтариб, ерга улоқ-тирди. Аёллар қўрқанларидан чинқириб юбориши.
- Сардор, бу бўладиган йигит экан!— деди Кхадагсинх ўрнидан тураётib.
- Ҳақ гап,— деди бошлиқ кулиб.
- Улар кўздан ғойиб бўлишгач, Кажри қопдан коса олиб, унга ун тўқди, мис қозонни кўтариб сувга кетди.
- Сукхрам тош устига чўзилиб пинак қилди. Пъяри ўт ёқиб, товани қўйганича Кажрини кута бошлади.
- Кейин у Сукхрамга қаради. Сукхрам қўлларини ёзганича ётарди.
- Ухлаяпсанми?
- Сукхрам ўрнидан қўзғолмай пастга қаради. Пастда — кўҳна қалъа бутун салобати билан равшан кўриниб туарди. Пъяри унинг нимага қараётганини билди.
- Утиб кетган подшоликни яна хотирлаяпсанми? Наҳотки қалъа каллангдан шу вақтгача чиқиб кетмаса?
- Кажри қайтиб келиб уларнинг сұхбатига қулоқ солди.
- Опа, уни тузатиб бўлмайди,— деди у.— Майли, ўз ўйлари билан юпанаверсин.
- Аллақандай вайрөнани деб ақлдан озиш мумкинми, ахир?— аччиқланди Пъяри.
- Авлод-аждодлар ҳақида нимаям билардик, опа? Улар бизга мерос қилиб маънови ерни қолдириб кетишган. Ер эса ҳамманники, ҳамма қатори бизники ҳам. Бунинг фуурурланадиган нимаси бор?
- Ер билан фуурурланавер,— деди Пъяри.— Бутун оламни ўзида кўтариб тўрган ер бўлмай нима?
- Кажри оловга ўтин ташлади. Атроф ёришди. Бора-бора кўз оловнинг ёрқин нурига кўнилди. Гулхан уларни яхшигина қизитди, улар ўтга яқин суримишди. Қуруқ шох-шаббалар атрофга учқун сачратиб чирсиллаб ёна бошлади.
- Эрталабки шамол жунжиктирди. У ўтлоқлар устидан териб олган гулларнинг хушбўй ҳидини йўл-йўлакай соча-соча бу ерга изгириинини олиб келди.

Гулхан олови ўйноқлайверди. Сап-сариқ олов тили қизарди, пастроқда кўкиш чизик, яна ҳам пастроқда — тарашаларнинг тубида мовийранг олов липиллади.

— Эндиликда бошимиз устида чодиримиз ҳам йўқ,— деди Сукхрам чуқур хўрсиниб.

— Янгисини қурамиз,— деди Қажри.— Қушлар ҳар йили янгидан ин қуришади.

— Одам ҳоҳласа юзлаб чодирлар тикади,— унинг гапини қувватлади Пъяри.

— Сизларни битта эркакнинг хотинлари деб ким айтади?

— Ишқилиб, бизга рашк қилмаяпсанми?— деб Пъяри ажабланди.

— Рашк қилмай бўладими? Сизларнинг иноқлигингиз менга яхшилик келтирмайди,— деди Сукхрам кулиб.

Пъяри билан Қажри шарақлаб кулишди.

— Мен нима дегандим!— деди Қажри.— Мана, ўзи тутилиб қолди. Аёлларнинг кўнгли эркакларники сингари бачканга эмас!

Бир муддат ҳаммалари жим қолишиди.

— Бетелфуруш Аҳмадобод ҳақида гапириб берганди. Уччовимиз ўша ёққа кетса микан-а? Ишлаймиз, бир амаллаб тирикчилик ўтказамиз,— деди Сукхрам, сўнг қўшиб қўйди.— Йўқ, мен қўрқаман!

— Нимадан?

— Шаҳарликлар унча яхши одамлар эмас.

— Улар билан нима ишимиз бор?

— Бизнинг-ку ишимиз бўлмайди,— деб жавоб қайтарди Сукхрам.

У ўз ҳадигини айтмоқчи эдию, аммо журъат этолмади. «Шаҳарликлар менда қўш хотин борлигини кўрганда мақташмайди»,— деб ўйлади Сукхрам.

— У ёқда ҳеч кимим йўқ,— деди у.— Бунинг устига Нироти, Харнам, Чарансинхлардан ўч олишим керак.

Иккала аёл бир-бирларига қўрқиб назар ташлашди. Улар даҳшатга тушишди. Фуур, меҳр, севги каби туйғулар қўрқув билан олишиб кўрди. Бироқ қўрқув ҳисси кучлилик қилди, уғолиб чиқди, ҳозир ҳар икковининг дилини қамраб олди.

— Кеткизма уни, Қажри,— секин илтимос қилди Пъяри. Унинг товуши Қажрига Сукхрам устидан ҳамма ҳақ-хуқуқларни бериб қўйгандай синиқ жаранглади.

— У гапимга киравмиди?— шубҳа билдириб бош чайқади Қажри.

— Нироти дедингми?

— Ундан нега ўч оласан?— деб сўради Қажри.

— Уйга ўша ўт қўйган, унинг касофатига натларга қараб ўқ узишяпти.

- Ниротига қарши далилларинг борми?
- Ҳеч қанақа далили йўқ,— Пъяри гапга аралашди.
- Ҳақиқатни исботлашга далил керакми? Ўт қўйганини ўз кўзим билан кўрдим!— қичқирди Сукхрам.
- Бу ҳозир ҳам ҳеч нарсага тушунмаяти,— деди Пъяри.
- Тўғри, опа,— қувватлади уни Кажри.— Ўшандада уни ақлли деб беҳуда айтган эканман. Илгари у бунақа эмасди. Сен қайтиб келганингдан кейин яна ақлдан озиб қолганга ўхшайдими, дейман?
- Йўғ-е, у ҳамиша шунақа бўлган. Бир куни ор-номусимни ҳимоя қилишга уриниб қопти дегин. Уни чалажон қилиб роса уришган.
- Бу ҳодиса қачон бўлган?
- Полиция бошлиғи ҳузуримга келасан деб буюрди, «рожа» жаноблари бўлса ўз тҳакурасини ҳимоя қилгани бордилар.
- Натнинг ор-номусини ҳимоя қилибди-да?— Кажри хахолаб кулди.
- Жуда соз, икковларинг тил топганларингни кўриб турибман. Лекин ҳеч ҳам кўрқмайман, уқдиларингми?— деди Сукхрам.— Нимани адолатсиз деб билсан унга қарши курашавераман.
- Ол-а, ҳали бунга ҳуқуқинг ҳам бўлиши керак.
- Ҳуқуқ курашиб олинади.
- Ростдан-а? Курашиб нимага эга бўлдинг?
- Сукхрам бу саволга жавоб беролмади. Фақат:
- Баҳслашгиларинг келса, ўzlаринг баҳслашаверинглар, бунга вақтим йўқ,— деди олди, холос.
- Сен бир сўз билан икки юракни яралашни билиб олгансан,— деди Кажри.
- Уни ўз ҳолига қўй. Кўриб турибсан, у. муҳим иш билан банд. Унинг вақти зиқ,— деб унинг гапини бўлди Пъяри.
- Бўпти, етар. Ухланглар,— деди Сукхрам.
- Ҳа, энди бу қишининг уйқуси келиб қолди-да!— хитоб қилди Кажри.— Бордию қоплон ҳамла қилиб, суюкли хотинингни олиб кетса, унда нима қиласан?
- Пъярини бош томонингга боғлаб олиб ухлайвер.
- Қеплон мени олиб кетса-чи?— деб сўради Пъяри.
- Ҳой хотин, яххиси оловга ўтин ташлаб қўй. Мени ухлатасизларми-йўқми? Роса қақилладиларинг-ку! Ҳудо ҳеч кимга қўш хотин ато қилмасин! Биттаси кун бермасди, энди бўлса иккита бўлиб қолишиди,— деб хўрсинди Сукхрам.
- Бу шўрликни қаранглар-а! Нега энди уйқуси келмас экан-а?— хитоб қилди Кажри.— Ҳаммаёқ жимжит, рожа жанобларининг тагида энг яхши тошлардан пар тўшак бўлса. Ётиб, роҳатингни суравермайсанми?

— Отам ҳам худди шунга ўхшарди,— деди Пъяри.— У ҳамиша онамдан ҳазар қилларди, фақат кечасигина қўрқмасди, холос. Кажри эркакларнинг ҳаммаси бир гўр: уйқу вақти келиши биланоқ рожага айланиб қолишади. Худо кечаси дараҳтларнинг япрогини ҳам шилдиратмасин, улар дараҳтни арралаб ташлашга ҳам шай бўлишади. Яхшиси уларга кечаси тегма. Бола йиғласа ҳам улар унинг онасини калтаклашади.

Лекин Сукхрам бу гапларни эшитмади, у ухлаб қолганди.

Пъяри тонг отмасдан уйғонди. Кажри билан Сукхрамни уйғотди. Улар ашқол-дашқолларини олиб йўлга тушишди, кўп ўтмай беш-олти кулбадан иборат қишлоқчага дуч келишди. Яқинроқда қўтос, сигирлар ўтлаб юришар, атроф ўша ўзлари билган тоғлар билан қуршалганди.

Уларга бир неча эркаклар пешвоз чиқишиб, карнатлар посёлкаси йўлини кўрсатиб беришди. Уларни хушнуд кутиб олишди.

— Хоҳлаган жойларингга чодир тикиб яшайверинглар,— дейишли уларга.— Бу ерда ҳеч нарсадан қўрқманлар.

Яхшиямки, чодир тикишга ҳожат қолмади — тайёри топила қолди: Пъярида пул бор эди, улар савдолашиб, битта чодирни беш рупияга олишди.

Улар кун бўйи дам олишди, келгуси кун эрталаб Сукхрам посёлкани айлангани чиқиб кетди. Даставвал танишган одами — қарғадай қоп-қора Кисна исмли нат бўлди. У Киснани чодирга бошлаб келди. Уни Сукхрам билан бирга кўрган Кажри:

— Қара, Пъяри, у ўзига ака толиб олибди,— деб ҳазиллашди.

Кисна аёлларга кўз ташлаб:

— Менинг хотиним ҳам жуда яхши,— деди.— У булардан хабардор бўлиб туради. Ҳеч ташвишланма. Қизим ҳам шулар билан тенгдош. У бу ерга эртага келади...

Сукхрам қўзғолди, аёллар унинг қандай қарорга келганини шунда билишди.

— Дхупога қасамёд қилганман,— деди у.— Чамарларни кўришим керак. Бормасам, улар бизни бу ишга қайраб қўйиб, ўзи қочиб кетди дейишлиди. Шундай қилиш эркакка лойиқ ишми? Улар ҳам одам. Бугун кечаси уларга ўқ отишди... Кимларни ўлдиришганини ким билсин?

— Қайтиб қеламан деб қасам ич!

— Кимнинг номини тилга олиб қасам ичай?— деб сўради Сукхрам.

Пъяри унга бирдан жиддийлашиб кетган юзини ўғирди. Унинг қўзлари чақнади. У Кажрини кўрсатиб:

— Унинг номини,— деди.

Қишлоқда полиция қутуарди. Маҳаллий полициячилар ёнига округдан келганлари ҳам қўшилди. Улар чамарларни суриштирмай ушлашар, полиция участкасига олиб боришар ва омонсиз калтаклашарди. Турмалар тўлиб кетди. Ҳар бир уйдан йифи, нола товушлари эшитиларди. Бечоралар кимдан ҳимоят талаб қилишни билишмасди.

Дхупога қарши бўлган чол полиция айғоқчиси бўлиб чиқди. У ҳукуматни ҳамма гапдан хабардор қилиб турарди. Эндиликада уни полиция қўриқлаяпти. Аёллар эса унга лаънат ўқишардилар.

Ҳар иккала тҳакур ҳам полиция билан бир ёқадан бош чиқармо ҳаракат қилияпти. Чарансинҳ мўйловларини бураганича қишлоқда керилиб, бемалол одимлаб юрибди. Ҳар нима бўлса бир неча ёш натларни полицияга тутиб бернишга ёрдамлашди.

Нироти ҳам полициянинг ўз одами бўлиб қолди. У браҳманларнинг соғ, муқаддас зиннорини ўртага қўйди ва уйга Қҳачера ўт қўйган деб онт ичди.

Чамарлар даласида ҳосил пишиб етилди, лекин уни истаган одам йигишириб оляпти. Тҳакурлар ҳукуматнинг сўзсиз розилиги билан уларнинг ерларини тортиб олишди. Ҳосилнинг тенг ярмини полиция бошлиғига беришиб, қолганини ҳеч тортинмай ўзаро тақсимлаб олишди.

Жасадларни полициячиларнинг ўzlари куйдиришди, ҳатто кулини ҳам қариндошларига беришмади. Қатл қилинганлар оиласи очдан ўла бошлади.

Сукхрам бу ерга келганида чамарлар посёлкасида ана шунақа даҳшатли ҳодисалар содир бўлаётган эди. У Дхупо учун қандай ўч олинганини айтишга ошиқарди, лекин Сукхрамга кўзи тушган аёллар ундан юзларини ўгиришди. У яқинроқ бориб, уларнинг йиғлаётганини пайқади.

— Питонинг ҳамма тишини уриб синдиришди,— деди улардан бири.

- Қаерда у?
- Ўлди,— деди бир хотин.
- Кейин-чи?— сўрашда давом этди Сукхрам.
- Радхунинг хотини ўзини қудуқقا ташлади.
- Нега?
- Уни зўрлашди.
- Эшитяпсанми, парвардигор? Яратган оламинг ана шунақа! Адолатингни қара!— Сукхрам қўлларини осмонгә чўзиди.— Бизни паст одамлар деб аташади. Юқори табака одамлари эса камбағаллар терисини шилишади. Очкўзликлари, шуҳратпарастликлари йўлида ҳеч қандай айбсиз одамлар-

ни хонавайрон қилишади. Оламда ҳаммадан жирканиб умр ке-чиришади, бировларнинг уйини хонавайрон қилиш учун ҳоким-ликларини ишга солишади! Яна нималар бўлди— деб талаб қилди Сукхрам овози бўғилиб.

— ...улар Буддху, Хиро, Пангани яланғоч қилиб ечинтириши, кейин таёқ билан савалашди, яраларига қалампир сепишиди.

— .... Панганинг хотини ҳомиладор эди, уни зўрлашган эди ўлиб қолди.

— Кейин-чи?

— Булар озми?

— Йиғламанглар!— деди Сукхрам.— Агар йиғлайверсаларинг улар кўнгилларига маъқул келган ишларни қилишаверади. Понани пона билан уриб чиқарадилар, темирни темир билан кесадилар. Қўрққанларингни сездириб қўйсаларинг улар баттар сурбетлашади. Йиғламанглар. Ваҳшийлик қилишаверишсин, аммо руҳларинг тушмасин! Пичоқ бориб суюкка етганда олишинглар! Биз натмиз, ҳеч вақомиз йўқ. Биз қартавоз, ўфри, қўшмачи, от ўғриси, алдамчи, фирибгар одамлармиз! Полициячилар билан зодагонлар аёлларимизга ифлос касалликларни юқтиришади, бу касаллик хотинларимиздан бизга ўтади. Биз маълум вақтгача тишимизини тишимизга қўямиз, аммо долзарб пайт келганида ғазабимиз тўлиб-тошади, улардан омонисиз ўч оламиз. Бизни эркин одамлар деб айтишади, лекин биз бировларнинг сарқитини ейишдагина эркинмиз, холос. Шундай бўлса ҳам дод демаймиз. Нега сиз, чамарлар, кўз ёши қиласиз?

— Иржайиб кулишим керакми?— деди аёллардан бири.

— Бўлмаса-чи, кулганингиз маъқул,— деб жавоб қайтарди Сукхрам. Аёл киши бамисоли ер, у ҳаёт беради. Золимлар болаларни сўйиб, зўрлаганда йиғлаш керакми? Ер йиғладими? Ҳеч қачон! Ер жаҳлга минади, қўзголади, зилзила билан ҳаммаёқни вайрон қилади... Қажри менинг йўлимни тўсди! Пъяри ҳам бу ёқقا келишимга йўл қўймади! Эҳ, хотинларим, бу ерда нималар бўлаётганини бир кўриб қўйинглар! Бу ваҳшийликларни кўриб наҳотки индамай қоласизлар? Улар қанча-қанча одамларни ўлдиришди! О, худойим! Бу дунё — чинакам дўзах, биз — ифлос куртлар. Бири бошқасини аёвсиз ўлдирадиган оламни нега яратдинг? Бу оламда ҳамма гуноҳга ботган, камбағаллар билан хор табақа бўлиб туғилганлар бир бурда нонни деб дили билан танини булғамоқда, ҳаром қилмоқда. Ҳар биримизни лойга булғаб топташ мумкин, чунки хор табақа бўлиб туғилганмиз. Нега зодагонлар зулм ўtkазишади? Эй, парваридигор, индамаганинг учун ҳам бойлиги, ҳокимлигини деб, улар одамларга зулм ўtkазишдан ҳам қўрқишишмайди!

— Худо бизга ҳаёт бериш билан синааб ҳам кўрятни.— гапга аралашди аёллардан бири.— Донишмандларнинг айтишича, бу

ҳаётга саккиз миллион тўрт юз минг тирик мавжудотлар орқали ўтиб, эришган эканмиз<sup>1</sup>...

— Ҳой хотин!— деди Сукхрам.— Бу ҳаётга саккиз миллион тўрт юз минг ҳар хил тирик мавжудотлар орқали эришган эканмиз, кейинги туғилишлардан наҳотки яна шунча марта ақлли киши бўлиб гавдаламасак? Ё абадий тилсиз-забонсиз ҳайвонлигимизча қолаверамизми?.. Мен қосос оламан. Полиция бошлигини ўлдираман. Дунёни ўзгартириб бўлмайди, аммо бир ярамас камаяди...

— Худо мададкор бўлсин, Сукхрам,— деди аёл тўлқинланиб.— Сендақа ўғлим бўлганида ўзимни баҳтиёр деб билардим.

Сукхрам унинг қаршисида бош эгди.

— Бугундан бошлаб онамсан,— деди у,— мен эса ўғлингман.

— Умринг зиёда бўлсин, болам,— деди аёл кўз ёшларини артиб.

Қишлоқдаги қотилликка кўпроқ конгрессчилар қарши чиқишиди. Буларнинг аксарияти савдогар ва дўйондорлар эди. Савдоғарлар ўзларига тушаётган фойдага хавф туғилганидагина чинакам шов-шув кўтаришади. Баъзи судхўрлар Конгресс партияси аъзоси бўлмасалар-да, уни яширин равишда маблағ билан таъминлаб турарди. Нарешнинг отаси Тҳакур Викрамсинг бу воқеалар юз бермасдан олдин турмага ташланган, унинг оиласи эса тирикчилигини зўрға ўтказар эди. Қишлоқда юз берган воқеалар тафсилоти пойтахтдаги адвокатлар қулоғигача борибетди, улар норозилик билдиришиб, тергов ўтказишни талаб қилишди, лекин тергов ишлари негадир чўзилиб кетмоқда эди. Қишлоқ ўқитувчиларининг деярли ҳаммаси Конгресс партияси тарафида эди. Улар ҳам ошкора бўлмаса-да, полиция ўзбончалигини қоралашар эди. Шунинг учун ҳам тҳакурлар билан браҳманлар Конгресс партиясига қарши эдилар. Улар пасткашларнинг дадил ҳатти-ҳаракати Конгресс партияси олиб

<sup>1</sup> Саккиз миллион тўрт юз минг тирик мавжудотлар орқали — қадим замонлардан бери ҳинд фалсафа тафаккури фазо — муваққат олам беҳадлигига ишониш билан фарқ қиласди. Ҳинд донишмандлари дунёқарашига кўра, олам ўн тўртта райондан иборат, ҳар бирининг оралиги 160 миллион километрга тенг. Бепоён олам мингларча ана шундай оламлардан ташқил топган. Чексиз вақтга келганда ҳинд мутафаккирлари буни ҳозирги оддий, маълум-машхур бўлган ўлчов бирликлари билан ифодалашга ожиз. Улар бундай ўлчовга 432 миллион йилга тенг бўлган яратувчи Браhma кунини қабул қилишади. Бу ҳар бир яралган фазо давр давомийлигидир. Яратувчининг туни ёки яратувчилиқ фаoliyatining тўхташи вайрон-гарчиллик ёки хаос билан белгиланади. Кунлар ва тунларнинг, яралиши ва вайронликнинг бундай алмасиб туриши бошлиниши йўқ қаторлардан иборат. Инсон эволюциясининг узоқ ва мураккаб жараёни ҳам шундан. Чунки у-бир хил сезги — сезиш туйғуси (ўсимлик, модда зарралари) билан икки, уч, тўрт туйғули тирик мавжудотлар орқали беш сезиш туйғуси бор инсонгача яшаб келган.

борган пропаганданинг натижаси деб ҳисоблашар ва буни индиизм дунёқараашларига хавф солиш деб қарапшар эди. Оломон ичида бир неча бор «Яшасин Мҳатма Ганди!» деб қичқирғанликлари учун ҳам улар Конгресс партиясини айблашар эди.

Кеч кирди. Полиция бошлигининг базми авжиды. Базымдагиларга қараб туриб ҳар бир киши наглар<sup>1</sup> түғрисидаги афсонани эслали мумкин эди: гүё наглар рожаси марказда — түрда, унинг иккى ёнида эса кичикроқ илонлар ўтиришибди. Ҳаммаси фақат бошлиқ учун биканер<sup>2</sup> виночи тайёрлаган винони ичишмоқда. Улар Конгресс партияси спиртли ичимликлар сотишини тақиқлашни талаб қилаётганлиги хусусида гап юритишар, бу эса маҳаллий шаробхўрларни безовта қилган эди.

Полиция бошлигининг ўнг қўйл томонида ҳаммага қирғий қарапаш қилиб дароги — мириза: унинг биқинида суд секретари ўтиришибди. Унинг ёнида покдомон авлиё қаландар қиёфасига кирган Нироти жойлашган. У вино ичмаяпти. Ҳарнам билан Чарансинх кўпгина вино ичганликларидан яхшигина. Қизариб ўтиришибди. Сукхрам салом беришдан олдин бу ердагиларни бир-бир кўздан кечирди. Нироти қўрқиб кетди. Полиция бошлиғи гап билан овора бўлганлиги учун Сукхрамни дарҳол пайқамади. Сукхрам кутиб турди. Нихоят бошлиқ шарақлаб кулганича у турган томонга қаради. Сукхрам таъзим қилди.

- Кимсан? — сўради бошлиқ.
- Карнатман.
- Исламинг? — гулдиради у.
- Сукхрам, хўжайин.
- Қани, ўтири!

Сукхрам ўтириди.

- Нега келдинг?

— Тақсиримга салом бергани, унга бизга нисбатан шафқат йўқлигини айтгани келдим. Олдинги тақсирим пайтида осойишта яшардик, — деб жавоб қилди Сукхрам Рустамхонга ишора қилиб.

- Ҳозиргача қаерда эдинг?

— Дайдиб юрибман, тақсир, — деди Сукхрам, тўсатдан натлар қувфин қилинаётганлигини, у эса ҳозиргача эркинликда юрганлигини эслаб, ўта ғамгин қиёфага кирди ва йиғлашга тушди: — Яхшиси, сўрамай қўя қолинг, тақсирим. Адои тамом бўлмоқдамаи. Иккита хотиним бор эди. Йккови ҳам йўқолди. Ўларнинг қаердалигини билолмай ҳайронман, маҳарож. Ҳаммаёқни қидириб чиқдим. Энди бўлса ҳузурингизга келдим.

<sup>1</sup> Наг — илон, қирол кобраси. Бундан ташқари танаси илонсимон, боши одамсимон девларни ҳам наг деб айтилади.

<sup>2</sup> Биканер — Рожастон штатидаги бир шаҳар.

— Гапни айлантиришини қара-я! Хотинларимни сизлар яшириб қўйгансизлар демоқчи! Эшитяпсизларми, ҳурматли жаноблар?!— деб қичқирди мирана.

— Тушунарли,— деди бошлиқ.— Биз Банке билан Рустамхоннинг суюкларини топдик. У ерда унцинг хотинлари йўқ эди, демак, икки маст эркак аёлларни талашиб муштлашганда улар қочиб кетган. Хотинларинг сени ташлаб кетишибди!

— Тақсир, мени талон-торож қилишди,— деди Сукхрам ингламсираб.— Ҳузур, валинеъматимиз, падари бузрукворимсиз,— давом этди у,— мени ҳимоя қилинг, Манови одамнинг ка-софатига,— у Ниротини кўрсатди,— Рустамхон ҳалок бўлди, хотинларим йўқолди.

— Аблаг, менга туҳмат қилмоқчи!— аччиқланганидан қипқизариб кетган Нироти бор овози билан бақирди.— Брахманни айблашга ҳадди сифяпти-я!

— Бу қанақасига туҳмат бўлсин, махарож?— Сукхрам ажабланди.

— Мени уйга ўт қўйди деб айтмоқчи эмасмисан?— Ниротининг оғзидан ғазаб ва қўрқув аралаш ортиқча гап чиқиб кетди.— Сен мени қувлаганингни, ушломмаганлигинги ҳам айтарсан. Шундай эмасми?— деб қичқирди у.

— Саркор,— деди Сукхрам,— кўнглимдаги гапларни қандай билиб олдинг? Бугун бирданига уч оламни: осмонни ҳам, ерни ҳам, дўзахни ҳам кўраётганга ўҳшайсан!

Полиция бошлиғи мирзага энгашиб, қулоғига бир нималарни шивирлади. Нироти титраб-қақшади.

— Нега қалтираялсан?— деб сўради ундан Сукхрам.

Полиция бошлиғи Ниротининг димоғдорлигини сал пасайтириш зиён бўлмаса керак деб ҳисоблаб, сал сергакланди.

— Қани, гапир-чи?— деб буюрди у.

Сукхрам, Харнам билан Чарансинхга қаради. Улар унга еб қўйгудай бўлиб тикилишар, аммо ўzlари қўрқувдан титрашар эди. Бошқалар ҳам ҳадиксираб туришди. Сукхрам ўрнидан туриб, полиция бошлиғи томонга бир неча қадам юрди.

— Тақсиримининг ўзи ҳам тҳакур, анови иккаласи ҳам тҳакур,— деди у.— Адолат юзасидан иш тутишингизга умид боғласам бўладими? Тақсирим,— авж олган шовқинни босиб ялиниа бошлади Сукхрам.— Сиз районнинг рожасисиз, аммо анови иккови жуда хавфли одамлар. Улар даҳшатли жиноят қилишган... Сиз жиноятчилар қурювовида ўтирибсиз...

Вазият жиддий тусга кирди.

— Ушланглар, аблажни!— деб буюрди бошлиқ.

— Майли, ушланглар!— деб бақирди Сукхрам.— Манови иккови Банке билан Дхупони зўрлашган...

Ҳаммаёқдан ғазабнок товушлар эшитилди, полициячилар Сукхрамни аллақаочон ушлаб туришарди.

— Энди гапир! — буюрди бошлиқ.

— Тақсир, бу зўравонлик-ку!

— Зўравонлик деяпсанми? Мирза! — У дарогани чақирди.—

Бу нималар деяётганини эшиятсанми?

— Тақсир, илгари бунақа гапларни ҳеч эшиитмаганман.

— Тўғри, миরза жаноблари,— деди Сукхрам.— Илгари олий табақадагилар ҳозиргидақа йўл тутишмаган. Биттаси ёнғин чиқарди, иккитаси бир аёлнинг номусини булғашди, сизлар бўлса уларни ҳимоя қиляпсизлар. Бу зўравонлик эмасми?

Сукхрамга зарба ёғилди. Бошлиқ хахолаб кулди. Нироти билан бошқалар бўлаётган воқеани ҳадиксираб кузатишиди. Сукхрам зарбаларни қайтара бошлади. Унинг бўйсунмайдиган вақти етди.

У ўзини ушлаб турган полициячиларни тепиб юборди, вахмали бақирди. Унинг бақиригини эшитган, унда юз берган даҳшатли ўзгаришни кўрган одамлар донг қотиб қолишиди. Ҳа, ит бўрига айланган эди. Бу ўзгариш шунақаям тез бўлдики, ҳатто бошлиқнинг ўзи ҳам гангид қолди. Мирза бир нима демоқчи бўлди, аммо оғзини очганича қолаверди. Нироти қалтиради, иккита тҳакур ҳам даҳшатдан қотиб қолди. Район судининг секретари бошларига қанақа кулфат тушганига ақли етмай қолди. Сукхрам ўзини ушлаб турган полициячиларни яна урди, бир силтаниб, уларнинг қўлидан чиққач, олдинга интилди. Йўл-йўлакай яна бир полициячини улоқтириб ташлади.

Қапалаги учеб кетган бошлиқ ниҳоят ўрнидан турди. Кўзлари дা�ҳшатдан олайди, қўли аста-секин тўппончаси томон борди. Лекин Сукхрам ундан чақонлик қилди. Чопиб бораётib бошлиқни урди, у ағанади. Сукхрам уни кўтариб, ерга урмоқчи бўлиб турган эди. Ҳужумга ўтган полициялар унга ташлашиб ура бошлашди. Нима тўғри келса шу билан уришди.

Сукхрам астойдил олишиди. Кучлар тенг эмасди: бир кишига беш киши эди. Аммо Сукхрам қўли, оғинни ишга солиб, ўнгга, чапга зарба берарди. Саросима бошланди. Тўс-тўполонда кимдир керосин лампани ағанатиб юборди, чироқ ўчди. Муштлашиш қоронғиликда давом этди. Сукхрамнинг ҳайқириғи умумий шов-шувда кўмилиб кетди. Полициячилар уни йиқитишиди, қовурғасини синдиromoқчи бўлишиб тепкилай бошлашди. Бундай ваҳшиёна усулга уларни анча тажриба орттирган бошлиқлари ўргатган эди. Ким уларнинг чангалига тушиб қолса, унинг амрига кўра, айборнинг бош териси шилиб олинар ва ярасига туз сенилар эди. Полициячилар тилида буни «айборнинг соясини олиш» деб аталарди. Бунақа қийноқлар унинг участкасида одат тусига кириб қолган эди.

— Олов келтириңг!— деб қичқирди мирза.

Полиция бошлиғи түппончасини олди. Қоронғиликда ўқ овоzi янгради. Ҳамма сесканиб жим бўлиб қолди. Ўқ узилгандан кейин муштлашишга ўрин қолмайди. Одамлар даҳшатдан вужудлари жимиirlаб кетганини ҳис этишди.

Аввало бошлиқ қўрқитиш учун осмонга икки марта ўқ узди. Лекин қўрққанидан ўзини идора қилолмай қалтираган бармоқлари билан яна тепкини босди. Бу сафар ўқ нишонга тегди: кимдир оҳ тортиб йикилди. Яна момақалдироқдан сўнг юз берадиган ваҳимали сукунатга ўхшаш жимлик чўқди.

Шу пайт ёниб турган чироқни келтиришди. Ҳамма енгил нафас олди. Ҳар бир киши яраланмадимми экан, деб ўзини кўздан кечирди.

— Тҳакур Харнам ҳалоқ бўлибди. Уни бошлиқ отиб ташлади,— деб бақирди тўсатдан Нироти.

— Отиб ташлабди, отиб ташлабди...— шовур-шувур тарқалди бўйердагилар орасида.

Полиция бошлигининг ранги оқариб кетди. Шунда мирза олдинга чиқди.

— Ҳузур, кўрдингизми, анови нат ўта хавфли қотил экан,— деди у хотиржамлик билан.

Одамлар ҳушёр тортишди.

— Тақсир, нима қиласдингиз шошиб?— давом этди мирза.— Мен ёнгинангизда эдим. У тўппончани сизга қараб отганида нима бўлишини ўйладингизми?

— Ким отди?— Ҳамма бараварига ҳайрати ошиб қичқирди.

— Мен йигирма икки йилдан бери полицияда хизмат қиласман. Бу ҳазилакам иш эмас! Муштлашиш пайтида манови нат тўппончани тортиб олганини пайқамай қолдиларинг! Мен билан бошлиқ жаноблари унга ташландик. У билан тенг келиш менга йўл бўлсин. Бошлиқ жаноблари ҳаётларини таҳлика остида қолдириб, тўппончани тортиб олдилар,—деб тушунтириди мирза. Кейин ҳайрон бўлиб турган бошлиққа ўтирилиб деди:— Ҳузур, сиз мўъжиза кўрсатдингиз! Мен кўп офицерларни кўрганман, лекин сиздақа шер юраклигини энди кўришим.

Бошлиқнинг назаридаги мирза жаннат элчисига ўхшаб кетди.

— Демак, Сукхрам ўқ узибди-да?— деб сўради суд секретари.

Нироти ҳеч нимага тушунмади. Лекин Чарансинхнинг Харнам ўлдирилганлигига, бу дунёга бошқа қайтиб келмаслигига дарҳол ақли етди.

Сукхрам ўқ узилмасдан илгари ҳушидан кетганди, у секинаста ўзига кела бошлади.

— Пандит Нироти, тур ўрнингдан!— деб бақирди мирза.

— Лаббай, тақсир,— қўрқувдан титраб-қақшаб жавоб қилди Нироти.

- Полициячилар, уни қамоққа олинг.  
— Раҳм қилинг, тақсир! — Нироти йиғлади. Лекин полициячилар уни дарҳол ушлашди.  
— Айбим нима, тақсир? — йиғлаб сўради у.  
— Яна айбини сўрайди-я, ярамас? Сен анови нат билан шериксан! Бошлиғимизни қотилликда айبلاغан сен эмасми?  
— Секретарь жаноблари, давлат тўппончасининг йўқолганига уч кун бўлди,— деди мириз,— манови ўғирлаган экан. Худога шукур, тўппонча топилди, бўлмаса бизга қарши уч юз тўртинчи модда<sup>1</sup> бўйича жиноий иш қўзғатиларди.

Ниротини олиб кетишиди.

- Мен қотил эмасман! — деб бақирди Сукхрам уни нима билан айлашашётганини пайқаб.— Яхшиси Чарансинх, қолаверса Харнам иши билан шуғулланинглар.

Лекин унга ҳеч ким қулоқ солмади. Полициячилар Сукхрамни участкага судраб кетишиди.

Уни заҳ, қоронғи камерага ташлашди. Сукхрам кўзини очиб, қоронғиликка тикилди. Унга нотаниш бир кимса яқинлашди ва «Яна биттасини ушлашибди... Ким экан, бир билиб қўйсан... ярамас ҳамма режаларимни йўққа чиқармасин-да, ишқилиб»,— деб аста пўнғиллаганини эшилди. Сукхрам зўрга ўрнидан туриб ўтири.

Нотаниш киши олдинга интилди. Сукхрам қоронғида унинг юзини кўра олмади.

— Нега жавоб бермаяпсан? — деб бақирди нотаниш одам. Унинг товушида асабий бетоқатлик жаранглади.

Сукхрам бир лаҳзага ўйга толди, бирдан қўрқув ҳисси тарқаб кетганини сезди.

— Мен Сукхрам исмли карнатман,— деди у секин ва қатъий қилиб.

— Карнат?! — нотаниш киши севиниб кетди.— Ўзимники! — тақрорлади у енгилкашиб.— Жуда соз!

— Нима? — ажабланди Сукхрам.

Нотаниш киши унинг саволини эшилмагандай индамади. Ҳатто қоронғида ҳам унинг энди хотиржам бўлиб қолганини билиш мумкин эди.

— Нега индамаяпсан? — Сукхрам аччиқланди.

Нотаниш киши Сукхрам устига эгилиб, унинг қулоғига фахр билан шипшиди:

— Мен карнатларнинг сардориман.

Сукхрамнинг кўнгли тоғдай кўтарилди. Ва ниҳоят орзусига етди! Шу кунлардага у шу рожани қидириб юрганди.

<sup>1</sup> Уч юз тўртинчи модда — Британия Ҳиндистоннинг жиноий кодекси 304-моддаси назарда тутилмоқда. Бу моддага кўра, ҳиндларнинг ўт очиш куроли олжаб юришлари ман этилади.

— Рожа-жи! — Сукхрам одоб билан туриб, унинг оёқлари-га эгилди.

— Баҳтли бўл! — деди Сукхрамга рожа ва уни сигарета билан сийлади.

Сукхрам сигаретани чекиб бўлиб бутунлай ўзига келди. Энди у ўзини беҳол, эзилган ҳолда ҳис этмасди.

Сукхрам бошидан ўтганларини ҳикоя қилиб бергач, рожа бир оз ўйланиб туриб, шундай деди:

— Улар сени қотиллик қилганинг учун суд қилишади.

— Ахир, ҳеч кимни ўлдирганим йўқ-ку!

— Унда сен карнат эмас.

— Чиндан ҳам айбдор эмасман.

— Тентак! — деб бақирди рожа. — Карнат ҳамиша айбдор бўлади. Ўлдирмаган бўлсанг ҳам, барибир, қотиллигингни бўйинингга олишингга тўғри келади.

— Нега?

— Нега ўлдирмадинг? — саволга савол билан жавоб қилди у.

Сукхрам нима дейишини билмади. У индамай рожага қараб тураверди. Қоронғиликда унинг юзи қора доғга ўҳшарди. Сигарета тутатиш учун гугурт чаққандада Сукхрам бир лаҳзага унга кўзи тушди.

— Мени нега қамоқقا олишгани боисини биласанми? — гўсатдан сўраб қолди рожа.

— Йўқ.

— Боланинг бўйнидаги маржонни олганим учун.

— Нега олдинг?

— Шунга ишондингми? «Нега олдинг?» деб сўрасанг, демак сен карнат эмас. Агар чиндан ҳам натнидан туғилганингда: «Нега ушлаб олишди?» — деб сўраган бўлардинг.

Сукхрам ҳеч нима демади.

— Тентакнинг ўзи экансан, — деб кулди рожа.

— Энди нима қислам экан?

— Ухлаш керак!

— Майли, ухлай, кейин-чи?

— Кейин дорга осил.

— Сенинг ҳолинг нима кечади.

— Ҳозиргача нима бўлган бўлса шу.

— Улишни хоҳламайман.

— Сени ўлдирмайман.

— Лекин сен рожамиzsан, сендан ҳимоят талаб қиламан.

— Бўпти, ухла.

— Ухлайми? — ажабланди Сукхрам.

— Ҳа, ухла, куч тўпла. Қачон зарур бўлсанг ўшанда уйғогаман.

- Ўзинг нима қиласан?
- Сени қўриқлайман.
- Нега?
- Мендан ҳимоя қилишимни сўраяпсан-ку,— деб жавоб қилди рожа.

Ярим кечада у Сукхрамни уйғотди.

- Энди ёрдаминг керак бўлиб қолди,— деди у.

Сукхрам оёққа турди. Ҳаммаёқда жимжитлик. Соқчилар ухлаган. Қамеранинг сим билан тўқиб маҳкамланган ёлғиз деразаси бор экан. Рожа ишни шундан бошламоқчи бўлди.

Улар иккови ромни сим панжара билан бирга суғуриб олишмоқчи бўлишди, лекин уни чиқариб бўлмади.

Сукхрам ромни пачақлашга тушди.

Бир соатдан кейин Сукхрам ром тахталарини сим маҳкамланган жойгacha майдалаб, панжарани суғуриб олди. Қочиш учун йўл очилди. Улар кўчага мўралашди — ҳеч ким йўқ!

## 25

Рожа оломоннинг ўртасида курсида ўтирибди. Унинг рани /малика/си ҳам келди. У яқинлашиб, рожага одоб билан таъзим қилди. Сукхрам ерга бўди. Рожа кулимсиради.

- Бу киши ким?— Сукхрамни кўрсатиб сўради рани.

— У озод бўлишимга ёрдамлашди,— деб жавоб қилди рожа. Кейин атрофдагиларга қўл силтаб деди:— Қулоқ солинглар, қулоқ солинглар!

Ҳамма яқинроқ келди.

- Қандай буйруфинг бор, рожа-жи?— деб сўради кимdir.

— Манови йигитга бир қаранглар!— деди рожа.

Одамлар Сукхрамга тикила бошлашди.

- Ким бу?— деб сўрашди тўпланганлар.

— Вазирим,— деб жавоб қайтарди рожа.

— Қайси қоидага кўра у вазир бўларкан?— сўради ранинг орқасида турган бир хотин.

- Шунга қарор қилдим.

— Аммо тушунтиришинг керак.

— Бажону дил,— рози бўлди рожа.— У турмадан қочишинга кўмаклашди.

Натлар Сукхрамга таъзим қила бошлашди. Улар бундай жавобдан мамнун бўлишди.

- Бақувват одам!— деди бир киши Сукхрамга тикилиб.

— Ажабланадиган жойи йўқ,— деди яна бири.— Натнидан туғилганидан кейин кучли бўлади-да.

Бир аёл кружкага вино тўлдириб Сукхрамга узатди. Сукхрам рожага савол назари билан қаради.

— Унга нега бақраясан? — ҳайрон бўлиб сўради аёл.

— Унинг қўш хотини бор, — деди рожа ва кулиб юборди.

— Бўлмаса нега у ҳадиксирайди? — деди сал хижолат бўлган рани.

— Уми? Бўлмаган гап! Сукхрам ҳадиксирамайди! — деди рожа. — Ичавер, вазирим, — деди у Сукхрамга амирона. Қейин натлардан бирига юзланди: — Ҳаммага хабар қил — вазир келди.

У кетди. Сукхрам ўзига рани астойдил тикилаётганини пайқаб қолди.

— Ичақол! — деб қистади рожа.

Сукхрам бир кўтаришда кружкани бўшатди. У анчадан бери энди ичиши эди. Шу важдан винонинг олдинги таъмини дарҳол ҳис қилди.

Оломон ичиди қўшиқ бошланди. Энг сараланган эркак ва аёллар рожани қуршашди, уларни доира орасига олиб, натлар рақсга тушди. Қабоб пиширилди.

Ҳамма тўйиб ичди. Рожа ранига ўз қўли билан қўйиб берди. Рани бутунлай масти бўлиб қолди, охирида у ҳам рақсга тушиб кетди.

У бўксаларини ўйнатиб, эшилиб қўшиқ айтди:

Дугонажоним! Ўртаб хону моним!

Кетди шум эрим, ўзга деб ёрим.

Дангда ҳайронман, кўнгли вайронман,

Йўлда излайман, топмай бўзлайман.

Кетиб эргинам, йўқ чодиргинам.

Яшаб етимдай, дил таскин топмай

Не кунга қолдим, аламдан толдим.

Ҳамма кулди. Рақсга рожанинг ўзи ҳам тушиб кетди. У Сукхрамнинг белидан қучоқлади. Сукхрам ҳам ўйинга туша бошлади. Ўйин билмаганидан оёқлари чалмашиб кетаверди.

— Ҳой, қуй яна! — Сукхрам кимгадир бақирди.

На1 вино тўла кружка келтирди. Сукхрам ичди.

— Рожа! — деб бақирди у.

— Лаббай, вазир.

— Ҳаммадан мамнунман!

— Мамнунман дегин! — рожа, хахолаб кулди. — Энг муҳими шу, вазир.

Натлар ўйинга тушишар, Сукхрам бўлса оёғида аранг турарди.

Бора-бора хурсандчилик тўлқини сусая борди. Кайфи оштаган натлар гўштга ташланишиди. Рожа ўнг ва чап томонида

Ўтирганларни роса мақтади, ҳамманинг оғзи қулогига етиб хурсанд бўлди. Овқатлар ейилгач, одамлар тарқала бошлади.

Сукхрам рожанинг ёнидан гандираклаганича йўлга туши, у оёқларида зўрга турарди. Боши айланарди. Назарида, у қаёқ-қадир учиб кетаётгандай. Ниҳоят у дараҳт тагига жойлашиб, чўзилиб ётди. Дараҳт илон чирмашгандай чирмовиқлар билан қопланганди. У юзини қўллари билан яширди, кўп ўтмай чирмовиқларни унуди, кўзларини юмди, яна қаёққадир учиб кетаётгандай бўлди.

Шунда Сукхрам қўшиқ бошлади.

Ўйна, жарангла, менинг гитарам, эй ёргинам...

Адашиб кетиб бошқа қўшиққа ўтди:

Қорача гўзалим, қудуқ ёнига кел...

Кажри анча қидирганидан кейин уни шу дараҳт остидан топиб олди. Кажри одамлардан уни вазир қилиб тайинлашганини билиб олди. У вазирнинг хотини бўлиб қолибди, буни Сукхрамнинг ўзи унга айтиши керак эди.

Кажри унга яқинлашди қалби ачиниш туйғусига тўлиб тошдӣ. У Сукхрамнинг ёнига ўтириди, йиқилган болани аста кўтарған она сингари унинг қўлини олди. Кажри унга аччиқ қиласарди, шу билан бирга раҳми ҳам келарди.

— Тур, кетдик,— деди у.— Пъярининг аҳволи оғир.

Аммо маст Сукхрам бор овози билан қўшиқ айтаверди:

Эй мағрур қиз, мафтунинг биз,  
Ҳайдама зинҳор, лаблари қирмиз...

— Нима?— ҳайрон бўлган Кажри бақириб юборди.

Сукхрам унинг қўлидан ушлаб яна кўйлади:

Эй мағрур қиз, мафтунинг биз...

Кажри унинг қўлини итариб юборди. Сукхрам уни ушлаб олишга интилди. Лекин Кажри аччиқланиб ўзини олиб қочди.

— Ярамас, ичиб шу ерда думалаб ётибсан-а! Уялмайсанми? Сукхрам ниманидир тушуниб бўлмайдиган қилиб фўлдиради.

— Нима бало, ақлдан оздингми?— Кажрининг жаҳли чиқди.

— Ақлдан озибманми? Мен-а? Ҳой ўзинг кимсан?— Сукхрам қўрқа-писа сўради, рўпарасида одам турганини энди кўрди. Кажрини таниб кулимсиради, белидан қулоқлади.— Келибсан-да. О, бугундан бошлаб катта одамнинг хотинисан,— деди Сукхрам фуур билан.— Рожа мени ўзига вазир қилиб олди.

— Рожанг билан бирга ордона қол! Кайфинг ҳам қуриб кетсин!— унинг қўлини олиб ташларкан, жаҳл билан деди Кажри.

— Сенга нима бўлди? — Сукхрам ҳеч нима тушунмади. —  
Мартабам ошганига хурсанд эмасмисан?

— Мартабангни қара-я! — масхараомуз хитоб қилди Кажри. — Юрасанми ё йўқми? — деб сўради у.

— Қаёққа?

— Жамоага.

— Шу ерда сенга ёқмаяпманми?

— Юр, Пъярининг аҳволи оғир,— деди Кажри астагина,  
Сукхрамнинг кайфи бир зумда тарқаб кетди.

Пъярининг юзи хотиржам ва гўзал эди. Кажри чироқ ёқди.  
Энди нур тўғри Пъярининг юзини ёритмоқда эди. Унинг сал  
чўзинчоқроқ кўзлари чақнарди. Кажрининг назарида Пъярининг  
юзи аллақандай самовий гўзаллик билан нур тарататётгандай  
эди.

Сукхрам безовталаниб қолди. Чодирга оғир сукунат чўқди.  
Пъяри унга қараб кулимсиради, лекин ҳеч нима демади. У эри-  
га ёш тўла кўзлари билан нигоҳ ташлади: қараганда ҳам ас-  
тойдил, киприк қоқмай меҳр ва алам билан боқди. Кажри-  
нинг кўзларida эса қўрқув, умидсизлик аломатлари кўринди.  
Бу умидсизлик Сукхрамга ҳам ўтди.

— Ёнимга ўтири, — аста илтимос қилди Пъяри.

Аммо Сукхрам турган жойидан жилмади. Ундаги жасурлик  
қаёққа йўқолди? Ҳозир ўта ожиз, ночор одамга ўҳшарди. Сук-  
храм Пъярига тикилар, аммо тикилиб тўймасди, у сирига ўзи  
тушуниб етмаган табиат яратган энг ажиб ва гўзал инсонга  
нигоҳ ташларди.

— Сени чақирипти, ёнига борсанг-чи,— деди Кажри.

Сукхрам Пъярининг ёнига ўтирди. Кажри уларга яқинлашди  
ва Пъярининг бошини унинг тиззасига қўйди.

Энди Пъяри ўта баҳтиёр эди. Энди уни на нафрат, на адоп-  
ват, на рашик — ҳеч нима қийнамасди.

Пъярининг Сукхрамга тикилган яrim очиқ шаҳло кўзлари  
унга ҳар икковининг садоқатли севгисини тўлдириб турувчи  
меҳр ҳадя қиласарди.

Кажри гоҳ Пъярига, гоҳ Сукхрамга қаарарди.

Худо билан уни қадрловчи илк дафъа бир-бири билан қову-  
шиб биррикиб кетди, бир-бирининг жонини эритиб, яна унга эга  
бўлди<sup>1</sup>...

<sup>1</sup> ...Бир-бирининг жонини эритиб, яна унга эга бўлди.... — Бу ерда ҳинд фалсафаси мактабининг ақидаларидан бирни кўзда тутилади. Бунга кўра, бизни ўраб олган олам ҳақида иккита нуқтаи назар бор. Биринчи нуқтаи назар, оми одамларнинг олами қандайдир реал, худони эса ҳар нарсага қодир, ҳамма нарсани сақловчи ҳамда вайрон қилувчи, деган фикрни ифодалайди, иккинчи нуқтаи назарга олам кўзга ташланиб турувчи нарса, аслида худодан бошқа ҳеч нарса йўқлигини тушуниб етган олим одам-

Шам ўчай деб қолди, лекин бутунлай ўчиш олдидан қорон-  
ғиликни ютиб юбормоқчидай ёрқин нур сочиб лоп этди.

Пъярининг юзи жуда оқариб кетди.

Кажри ўзини тутолмай ҳўнграб йиғлаб юборди. Унинг йифи-  
сидан Пъяри билан Сукхрам сесканиб кетишиди. Бахтли дамда  
ёқилган ўтни раҳмсиз шамол ўчиргандай бўлди<sup>1</sup>.

— Кажри!— деб чақирди Пъяри.

Лекин Кажри йифидан тўхтамади.

— Тентаккинам, нега йиғлайсан?— деди мулойимлик билан  
Пъяри, гўёки у ҳаётнинг абадий моҳиятини тушуниб етгандай  
эди. У хотиржам, хушмуомала бўлишга интиларди. Бу дунёни  
ҳам худди шу алпозда тарк этгиси келарди.— Кажри!— деб ча-  
қирди у.— Сен ҳам, маҳбубим,— деди Пъяри Сукхрамга қараб.

Сукхрам индамай унга тикилар, чуқур қайғу ўнинг нигоҳини  
қоронғилаштириб қўйганди. Пъяри ҳадя қилаётган ва у яна  
қайтариб олаётган ҳамма нарса нақадар улуғвор эди!

Пъяри кулимсиради. Унинг кулгиси ҳамиша ғолиб ҳаёт тान-  
танаси ҳақида, ўлимни писанд қилмайдиган ва муқаррар ўлим  
олдидаги қўрқувни енгишга қодир, энг юқори баркамолликка  
эришган ҳаёт ҳақида ҳикоя қиласар эди, чунки фақат чириган та-  
нагина ўлади, холос, жон эса абадий.

Кажри бўлса ҳамон йиғлашдан тўхтамасди.

— Сукхрам, ахир уни ўша тепди, Пъярини ўша ўлдирди!

— Рустамхон ўлди, аммо унга ёрдам берганлардан ҳам қа-  
сос оламан!— гўё ўйқудан уйғонгандай бақирди Сукхрам.

Нихоят муҳаббати Пъярини ушлаб қололмаслигини, у олам-  
дан кўз юмишини тушуниб етди. Пъяри ўз муҳаббати билан кў-  
тарилган юксакликка Сукхрам кўтарила олмайди. Унга яна ёл-  
физлик шарпаси ёпирилиб кела бошлади. Кажри йиғлар, Сук-  
храм эса ўзининг қайғули фикрлари билан банд бўлиб, ҳеч ни-  
мани эшитмас эди.

Пъяри дармони тугаётганини ҳис қилди.

— Кажри, яқинроқ кел,— деб чақирди Пъяри.

Кажри аччиқ-аччиқ йиғлаганича унга энгашди. Пъяри Қаж-  
рининг пешонасидан, йиғлайвериб ҳўл бўлиб кетган юзидан  
ўпди.

лар амал қилади. Бундай «реал» нуқтаи назарга билмасликни бартараф этиш  
шарти билан келиш мумкин. Бунда туйғу ва ақл устидан назорат ўрнатиш,  
реал олам обьектларига барча турдаги боғлиқликдан воз кечиши, ўткинчи  
характерни иносабатга олиб, озод бўлишни астойдил исташ керак. Ана ўшандагина  
жон кишини худдан ажратиб турган ғоялардан халоба қилиб, худо билан  
бирикниб кетади; бошқа кулфатлардан халос бўлади. Худо ҳузур-ҳало-  
ватнинг ўзи бўлгани учун у билан бириккан жон ҳам роҳатга чиқади.

<sup>1</sup> Бахтли дамда ёқилган ўтни раҳмсиз шамол ўчиргандай бўлди.— Ҳиндистонда турли хил диний ҳамда халқ байрамлари-  
да ўт ёкиш одати бор. Ўчиб қолган шам яқинлашашётган бахтсизлик аломати.

— Жонгинам,— Пъяри Сукхрамга юзланиб ожиз товуш билан чақирди. Лекин у ҳушсиздай эди. Пъяри индамай унга тикилди. Бугун у эридан мени ўпгин деб илтимос құлмоқчи эмасди. Нима, Пъяри бахтсиз, ачинишга муҳтоҗмиди? Йўқ, у ўзини ўта бахтиёр деб билади, хотиржам ва мардонавор туриб ўлимни кутяпти. Пъяри гоҳ Сукхрамга, гоҳ Қажрига тикилиб қаради. Қейин кўзлари севинч билан чақнади, лабида табассум ўйнади. У ана шу табассумни ҳамма одамларга, Сукхрамга ҳам, Қажрига ҳам ҳада қилди. Аёл кўнглининг илоҳий гўзаллиги ўйғонди, гуллаб-яшнади. Гўёки маъбуда Лакшми<sup>1</sup> ҳинд дарёсининг тубидан бутун улуғворлиги билан намоён бўлди. Пъярининг юзида кулги қотиб қолди, у чиндан ҳам ўлимдан ғолиб чиққандай, кўзларида мангу севинч порлаб қолди.

Қажрининг астайдил, дилларни ларзага солувчи йиғиси қоронғуликни парчалаб, бутун қароргоҳга акс садодай ёйилди. Лекин Сукхрам ҳеч нимани эшиитмасди. У бошини эгиб, индамай ўтиради. Унинг кўз олдида вужудини бутунлай эгаллаб олган аёл кишининг улуғвор, ўлмас кулгиси турарди, ҳозир у ўзини Сукхрам эмас, балки кулгининг ўзи деб биларди. У Пъяри абадий уйқуга кетмаганига, аксинча абадий уйғоқликка эришганига ишончи комил эди. Назарида қаршисида маъбуда Дурганинг ўзи ётгандай эди.

Қажри алам билан додлаб йиғларди. Эркак ва аёллар тўпланишиди.

— Вазир, бандачилиқ экан, хотининг вафотидан мотамдамиз,— деди улардан бири Сукхрамга яқинлашиб.

— Ёлғон,— деди Сукхрам.— У мени ташлаб кетмайди. Бошка хотин олганимда ҳам мени ташлаб кетмаган. Пъяри шу ерда, ёнимда. У ухлаб олсин, халақит берманглар.

— Э-э, бир вақтлар эркак кишининг умр йўлдоши бўлган аёлга бирон кимса шунчалар куйганми?— деди кимдир.

Аммо бу сўзлар жавобсиз қолди: Сукхрам тошдай қотиб қолганди. Қажрининг кўзидан эса дарё-дарё ёш оқарди.

Пъяри тинч, қимирламай ётиби...

Кажри унинг оёғини ушлади. Оёғи совиб қолган эди...

— Марҳуманинг юзини ёпинглар!— деди кимдир.

Пъярининг юзига чойшаб ёпиб қўйишиди.

— Бориб ҳаммани чақир,— деб буюрди кампир натлардан бирига. У чопиб кетди.

— Йиғлама, Қажри. Аёл кишига эрининг тиззасига бош қўйиб ўлишдан ҳам ортиқ баҳт йўқ. Унинг юзига қарадингми? У ўлимдан ҳеч ҳам қўрқмади...— деб кампир Қажрини юпата бошлади.

<sup>1</sup> Лакшми — ҳинд мифологиясида баҳт ва гўзаллик маъбудаси, латифликнинг гавдаланиши. У худо Вишнанинг хотини.

Рожа келди. Пъярига қараб, бошини афсус билан чайқади. Пъярининг жасадини чодирдан олиб кетишиди.

Сукхрам йифламади. Индамай одамлар орқасидан эргашди.

— Исминг муқаддас бўлсин, Рам!

— Биздан кетганни авлиё деб ата!

Жасадни дағи тахтаси устига қўйишди. Гулхан ёқишиди, олов илон сингари юқорига интилди.

Сукхрам ҳеч нарсани кўрмай, нима бўлаётганини тушунмай оловга тикилди.

— Сукхрам, хотининг бизни тарк этяпти. Кўрдингми, у ённати!— деб қичқирди рожа.

— Иўқ, рожа-жи, у ухлаяпти,— деди Сукхрам ҳазин товушда.

Одамлар хўрсинганларича бир-бирларига қарашди. Баъзиларининг кўзида ёш кўринди. —

Олов зўр тафт билан ўрлади. Юқорига интилган олов тиллари Пъярининг танасини қисқичлари билан чангллади. Ҳаёт манбаи бўлган олов ўлим рамзига айланди. У кундузги нурнинг жизинагини чиқариб, йўлида учраган ҳамма нарсани ёндиришга шай эди. Олов гувиллади, унинг гувиллаши узоқ-узоқларга ҳам эшитилди.

Гулхан қиздира бошлагач, одамлар ўзини четга олишди.

— Сукхрам, қоч қуиб кетасан!— деб қичқирди рожа.

— Нега?— Сукхрам жойидан қимирламай ҳайрон бўлиб сўради.

Шунда рожа яқинлашиб, уни куч билан гулхандан нарига судраб кетди.

Авж олаётган алнга Пъярини кишилар назаридан яшириди.

— Олов унинг танасини ютди,— деб қичқирди кимдир.

— Бор, унинг бошини улуғла<sup>1</sup>,— деди яна бир киши.

Нат олдинга чиқиб, сопи узун ёғоч қошиққа озгина доф қилинган ёғ қуиди, кейин Пъярининг боши турган жойга — гулханга тўқди. Ёғ енгилгина чирсиллаган овоз чиқариб, гулхан гувиллашига сингиб ёниб кетди.

— Худо даргоҳига қабул қилди,— деди бир чол.

— Ҳа, у энди самога етди, маъқуллади одамлар.

— Тирик қолганлар яшайверсинг.

— Қачон бўлмасин ҳамманинг тақдирида оламни тарк этиш бор...

Рожа яна Сукхрамга яқинлашибди. Кўзлари синчковлик билан боқди. У янги дўстини яхшироқ билиб олгиси келарди. Рожа бу одамнинг ҳанузгacha миқ этмай туришига ҳеч тушунол-

<sup>1</sup> Олни табақаларда коҳин дуо ўқиб, марҳум танасини ўпнуб чиқади, шу йўл билан уни тозалайди. Қуий табақаларда бунинг ўрнига марҳумнинг бош томонига ёғ қуиб қўйилади, холос.

маётган эди. Наҳотки у авлиё бўлса? У бу хотинни жонидан ортиқ севарди, буни ҳамма биларди. Рожа Сукхрамга янада яқинлашиб, унинг юзларига тикилди. Унинг юзи ҳамон жиддий ва ҳаракатсиз эди.

- Сукхрам! — деб чақириди рожа.— Нега йиғламаяпсан?
- Йиғламаяпсан? Нега?
- Пъяри ўлди...
- Йўқ...
- Қаршингда ким турибди?
- Пъяри.
- У олов ичидা.
- Йўқ, рожа-жи, сен ёлғон гапиряпсан.
- Сукхрам, у ўлди.
- Йўқ!
- Ишонмаяпсанми?
- Ишонмайман.
- Нега?
- У мени ташлаб кета оладими?
- Бу худонинг иродаси.
- Аммо ҳозиргача икковимизнинг ўртамиизда ҳеч кимнинг иродаси бўлмаган-ку!

Рожа хўрсинди.

— Сен ёлғон гапиряпсан,— деди Сукхрам аввалги ишонч билан.— Пъяри ҳаммага ёлғон гапириши мумкин, фақат менга ёлғонламайди. У менга ишонади. Жудаям ёшлигимда мени севганини сизлар қаёқдан билардингиз. Ўтиб кетаётсам йўлда турроқ устида ўйнаб ўтиради. Ўтиб кетаётиб уни турттардим. Пъяри бўлса йиғларди. Кейин икковимиз бирга ўйнайдиган бўлдик. У ғашимни келтирса урадим. Пъяри бўлса йиғларди, мени тишлий бошларди. Дадам билан онам оламдан ўтганда Пъяри мени уйларига қабул қилган. Жононим мени ташлаб кетади деб нега мени ишонтиromoқчи бўласизлар? Нега у кетаркан? Пъяри ҳамиша мен билан бирга бўлишни хоҳламаганмиди?

Сукхрам ҳаммани қалтироққа соладиган совуқ, руҳсиз қаҳқаҳ отиб кулди.

— Рустамхоннинг уйи ёнгани эсингдами? — деб давом этди Сукхрам.

— Ҳа, эсимда,— суҳбатни давом эттириш учун жавоб қилди рожа.

— Жуда яхши одамсан,— гапида давом этди Сукхрам.— Ҳаммаси эсингда! Ўшанда шунақаям қўрққандим! Пъяри билан Қажри ёниб кетади, деб ўзимни ёнғин орасига, уйга урганман. Аммо Қажри билан Пъяри омон қолишибди. Улар ҳалок бўлишмади. Пъяри ўша оловда ёниб кетмади. Наҳотки у шу ерда ёнса? Биласанми, бу ўзи нима?

— Нима?  
— Туш!  
Улар қароргоҳга етиб келишди.  
— Рожа-жи!— бақирди Сукхрам.— Энди қара!  
— Нима?  
— Қара. Анови ёққа?— деб қўли билан кўрсатди.  
Рожа ўғирилиб, даҳшатдан қотиб қолди.  
Чодирга кираверишда Пъяри кулимсираб турарди.  
— Маҳбубам!— деб чақирди аёл.  
— Пъяри!!!— дея олди холос Сукхрам.  
— Ҳа, мен шу ердаман,— деб жавоб қилди Қажри йигидан овози титраб.  
— Пъяри қайтиб келади деб айтган эдим-ку, одамлар бўлса менга ишонишмади.— Сукхрам кулди.— Қажри қаерда?  
— Қаерда дейсанми?— деди Қажри.— У ўлди.  
Шунда Сукхрам Қажрига астойдил тикилди.  
— Пъяри!!!— деб бақирди Сукхрам ва ўкириб йиғлаб юборди. У ерга думалаб, бошини ерга ура бошлади.  
Қоронги тушди, Сукхрам чодирда ётарди. Унинг боши Қажрининг тиззасида.  
— Ким бор бу ерда?— деб сўради у ҳушига келганда.  
— Мен, Қажри.  
Сукхрам уни ўзига тортиб қучоқлади.  
— Қажри? Сен кетмайсан-а, мени тарк этмайсан-а?— деди секингина.  
— Тоғни ер билан бараварлаштириш ёлғиз одамнинг қўлидан келмайди. Фақат кўпчилик одамларгина тоғни забт қилиши мумкин,— деди Қажри.

## 26

Сукхрам тоғдан тушганда кеч кириб қолганди. Деҳқонлар подасини уйга ҳайдаб келган, юзларча туёқлардан кўтарилиган чанг яна ерга қўнишга улгурган эди. У афсунгар Чандоннинг уйига етиб боргунча қоронги тушиб қолди. Сукхрам қишлоқни четлаб айланма йўллар билан борди. Чандон қишлоқ четида, яшар, ўзи эса ахлат тозаловчилар табақасидан эди. Уйининг рўжарасида ахлатхона бўлиб, у ерда чўчқалар тимирскиланар эди. Ахлатхона ёнидан оқава сув оқиб ўтарди.

Забардаст киши нафратланса, нафрат ботирлик ва жасурликка айланиши мумкин. Бордию ожиз ва бечора одамда нафрат ҳисси уйғонса, у заҳар бўлиб бутун вужудига тарқайди. Нафратдан карахт бўлган киши ҳамма нарсани унутади. Унда фақат битта ният қолади — ҳар қандай қилиб бўлса ҳам кейин ҳузур қилиб кулмоқчи, қасд олганидан мамнун бўлиш учун ўз

режасини амалга оширмоқчи бўлади. Ожизлар ҳаммавқт бошқалар орқали ўч олишга интилади, ўзининг эса юраги дов бермайди.

Сукхрам қаҳри ва сувдан тоймас бўлиб қолганди. Тан олинмаган тҳакурлик қадр-қимматига зарба берилди. Аслини олганда Нироти қамоқда. Харнам ўлдирилди, мириза ўзини ҳар жафога солса ҳам полиция бошлиғига қарши суд иши қўзғотилди, булар ҳақида Сукхрам Чандонникига келаётib ўзига таниш чамар аёлдан билиб олди. Шундай бўлса ҳам у афсунгарга боришга аҳд қилди. Хўрланган иззат-нафси устун келиб, Кҳачера оиласи учун ўч олишдек қулай баҳона ҳам топилиб қолди.

Чандоннинг беш хотини бор эди. Аёллар унга тинимсиз меҳнат қилишарди. Чандон бор жойда уларнинг биронтаси ҳам бир оғиз гай айтишга журъат этишолмасди. Ҳар қайси хотинининг болалари бўлиб, улар ҳам оналари ёнида терга ботиб меҳнат қилишарди. Шўндай бўлса ҳам Чандон ҳаётдан мамнун эмасди.

У олтмишларга бориб қолган бўлса ҳам анча ёш кўринарди. Фақат чакка соchlари оқариб қолган. Чандон баданига ёпишган кийим кияр, бу билан мускулли баданини кўз-кўз қилмоқчи бўларди. Унинг сергўшт каттагина бурни остидаги қоп-қора мўйлубви ҳамиша диккайиб туради.

Чандон анча бегам одам бўлиб, ор-номус ҳақида ўз тасаввурларига эга эди. У бирордан қарзга пул олса, қистатмай ўз вақтида қайтариб беришга интиларди. Бордию қарз берганлардан биронтаси муддатидан илгари қарзини қистаб қолса буни ҳақорат деб биларди.

Бу миқти, бақувват, йўғон овозли, қоп-қора одам анча қаҳри қаттиққа ўхшаб кўринарди. Аслида афсунгар анча кўнгилчан одам эди. Агар хотинлари жанжаллашиб қолишиса, сабр-қаноат билан уларнинг гапига қулоқ соларди, кейин вазиятга қараб кекса одамдай катта хотинини тинчлантираси, ёш хотинини эса файрат-шижоати зўр йигитчадай юпантарарди. Қолган хотинларга унча эътибор бермацди; уларнинг даври ўтган эди.

Чандон ичиб олса, хотинлари унинг устидан кулишар, лекин итоаткорлик билан унга қўшиқлар айтиб беришарди. У эса хотинларини: «Эй, ярамаслар, яхшироқ айтсаларинг-чи! Шундай қўшиқ айтингларки, холи<sup>1</sup> байрамида совға учун борганда заминдорнинг хотини сизлардан мамнун бўлсин»,— деб койирди.

Чандон винога ҳирс қўйиш боисини вино афсунгарликда анча қўй келади деб оқларди. Чандон машҳур афсунгар бўлиб, у афсун қиладиган жасадлар куйдириладиган жой — унинг иккичи уйнга айланганди. Ҳатто қишлоқнинг зодагон кишилари

<sup>1</sup> Холи — худо Кришна шарафига ўтказиладиган байрам. Бу сайл февраль-мартда бўлади, шу куни ҳамма баҳорни табриклияди, бир-бираига буёқли сув ва ранг сепишади.

ҳам Чандондан чўчишарди. Маълумки, ёвуз инс-жинсларни ишга солиши ҳамманинг ҳам қўлидан келавермайди. Бу мумтоз одамлар иши.

Кайфи ошган Чандон одатда дараҳт остида ўтирас, гоҳ-гоҳида косасига вино қуяр, ўзининг таъбирича бу билан инс-жинслар дунёсини тўплар, дўриллаган овоз билан нуқул бир хил:

Юлдузинг барчаникидан баҳтиёр бўлсин,—

деган мисрани ҳадеб қўйлайверарди.

Назарида овози жуда ширалидай эди. Аммо йўловчилик унинг бу увиллашини эшишиб, қулоқларини беркитиб олишар, Чандон ўтирган жойни четлаб ўтишарди.

Бордии Чандонга пул зарур бўлиб қолса заминдорнинг ҳузурига борар, қўлидан супурги тушмасди. Ҳар хил баҳоналар билан уй эгаси кўзига кўпроқ кўринишга, ўзини астойдил ишлатгандай қилиб кўрсатишига интиларди. Чиндан ҳам у пулсиз қайтиб келмасди. Чандон заминдорнинг хотинидан ўз хотинлари учун бир неча бор кийим-кечак сўраб олган эди. У зодагонларга хушомад қилишни қойиллатар, шу йўл билан эҳтиёжини қондираади.

Чандон чўчқа боқар, унинг қилини натларга пулларди. Натлар қилларни унча катта бўлмаган шаҳарларга олиб бориб қайта сотишига, у ерда қилларни той қилиб, катта шаҳарларга, кейин қайта ишлаш учун чет эллардаги фабрикаларга жўнатиларди. Чандон чўчқаларининг қили Хиндистондан ташқарига ташиб кетилаётганини билиб олгандан бўён назарида денгизнинг нариги ёнидаги тенг ярим хазинанинг эгасидай ҳис қиласди ўзини.

— Ҳой, Чандон!— деб бақирди Сукхрам, Чандоннинг гувала билан урилган кулбаси эшигига яқинлашиб.

Остонада бир қиз пайдо бўлди.

— Хўжайн уйдами?

— Уйда. Унга нима гап айтай?

— Қажрининг олдидан бир одам келди деб айт.

Сукхрам исмини айтишини истамади. Бирон кимса эшишиб қолса, фалокатга қолиши ҳеч гап эмасди.

— Э, ўзингмисан, ўғлим!— Чандон уни таниб салом берди.— Ўтир. Ҳой қизим, чилим келтир!— қичқирди у.

— Йўқ, керак эмас. Мен фақат бири чекаман.

— Ихтиёринг,— хотиржамлик билан жавоб қилди Чандон.

У ўзининг уйида тайёрланган чилимдан Сукхрамнинг чекмаслигини биларди. Ўзи эса қаерда таклиф қилишса, ўша ерда чекаверарди.

— Нега келдинг?— деб сўради Сукхрамдан.

- Бир иш бор.
- Унда уйдан чеккароқقا чиқайлик.
- Полиция бошлиғи күн бермаяпти,— деди Сукхрам дарахт тагига ўтиришгач.— Ундан бизни фақат ўзинг халос қиласан.
- Қандай қилиб?
- Ҳой, ўзингни гўлликка солма! Талай афсунларни биласан! Ёнингга алвастилар келади, ўшалардан сўра.
- Э, йўқ, булар ҳеч тўғри келмайди,— деб кулди Чандон.— Бунга алвости эмас, аёл киши керак. Қароринг қатъийми?
- Ҳа.
- Унда маргхатга аёл келтирасан.
- Аёл?
- Ҳа. Бир вақтлар бу ишга бешинчи хотинимни жалб қилгандим,— деди Чандон.— Ўшанда у хотиним эмасди. Унга кеъин уйланганман. Унинг менга ёрдами жуда зўр бўляпти. Учта бола туғиб берди.

Сукхрам ҳеч нима тушуммади.

- Аёлни нима қиласан?— сўради у.
- Маргхатда уни ечинтириш, вино ичириш учун...
- Йўқ, йўқ,— Сукхрам бош чайқади,— тўғри келмайди.
- Йўқ, дейсанми?— ажабланиб сўради Чандон.
- Бундай йўл тутолмайман.
- Эркак кишимисан? Ҳеч бўлмаса пул олиб келдингми?— Чандон аччиқланиб сўради.
- Пулнинг ўёриғи бошқа.
- Камида эллик рупия керак. Ўйлаб кўр.— Чандон Сукхрамга астойдил тикилди.— Агар аёл кишини келтирсанг ўн беш рупияга тушади. Аёл кўпи билан уч рупия олади.
- Илтимос, бу ҳақда бошқа гапирма.
- Ихтиёргинг,— Чандон кулимсиради ва уй томонга қараб:— Қизим чилим!— деди.
- Эллик рупия!— деди Сукхрам.— Бу кўп эмасми?
- Пул алвастига-да!— Чандон таъна билан бош чайқади.
- Озгина камайтирсанг бўларди.
- Алвости камайтирсин!
- Майли, келтираман.
- Жуда соз!— мамнун хитоб қилди Чандон ва чилим чекишига тутинди.
- Ўйлаганимиз рўёбга чиқишига ишонасанми?— таажжуб билан сўради Сукхрам.
- Бўлмасам-чи, полициячинг ўша заҳотиёқ ағдарилиб тушади.
- Қачон?
- Қилични силтасам бўлди. Ўша лаҳзада унинг юраги уришдан тўхтайди.

Сукхрам енгил нафас олди.

— Пулни кечаси келтираман.

— Бўпти, ишга туш,— деди Чандон аста.— Пулни судхўр Лаллунинг уйидан оласан.

— Қаёқдан биласан?

Мен билмай ким билсин? Судхўрнинг жияни ўша пулларни эплаштиromoқчи бўлиб, мендан афсун қилиб беришимни илтимос қилди. Лекин мен унамадим.

— Нега?

— Савдогарнинг ўғли қўрқоқ. Оғзидан гуллаб қўйиши мумкин. Унда рўзгоримга ким қарайди? Мен бўлмасам хотинларими бошқа бирор башқара олармиди? Ярамасларнинг бекорчилардан қўллари бўшамайди.

— Гапинг тўғри,— деди Сукхрам бепарво.— Бу ташвишлар билан кимнинг ҳам иши бўларди?

Сукхрам атрофга олазарак қараганича тўғри судхўр Лаллунинг уйига йўл олди. Унинг дўкони бозорда эди. Қишлоқ бекорчилари унинг дўконига тез-тез келиб туришарди. Лекин одамларнинг бу ерда бўлиши бирорлар билан муомала қилишига халақит беришни пайқаган заҳоти судхўр гиламчаларни қоқар, қўлига супурги олиб, дўконни супуришга тушар, шунда ҳамма гур этиб ўрнидан туриб кетишарди. Умуман, Лаллу ювон одам эди, аммо иш пулга бориб тақаладиган бўлса кўзлари файэсиз, тиканакли бўлиб кетарди. Ў ниҳоятда хасис бўлиб, ҳар пайса устида думбалоқ ошарди. Айтишларича, сариеёққа паشا қўнса, аввал унинг ёғини шимиб, кейин қўйиб юборар экан.

Лаллу бозордан соат ўндан олдин қайтмасди, чунки унинг дўкони извошлар тўхтайдиган бекатга яқин бўлиб, у ерда одам кўп тўплана, қарз сўрайдиганлар ҳам чиқиб қоларди. Ташқи кўринишидан Лаллу қашшоқ дарвишга ўхшарди. Белига кирлигидан мослашиб, ярқираб кетган дҳоти боғлар, унинг устидан кир камзул кийиб оларди. Оёқларида дағал, ямоқ солинган сандали бўларди. Афт-ангорига қараб, ҳеч ким Лаллуни судхўр деб ўйламасди. У мўйловини ўстириб юборганди. Тежаб қолинган ёғларни тарозида тортаётганида мўйловлари ҳамиша қимирлаб турарди. Ҳатто у ўзига зарур бўлган ёғдан ҳам уриб қолишга интиларди! Лаллу художўй одам эди. Уни кузатганлар қўлидаги тасбеҳи доналарининг жуда тез айланишини кўриб ҳайрон қолишарди. Унинг ибодат қилиши ҳам ажаб бўлиб, бир оёғида туриб ибодат қиласарди.

Сукхрам Лаллунинг лойсувоқ уйидан иккита ғиштни аста кўчириб олди. Бугун у биринчи мартаба ўғирлик қилаётгани учун бирор кўриб қолмасмикан, деб жуда қўрқди. Аммо атроф жим-

жит эди. Уй ичида ҳам сукунат ҳукмрон эди. Сукхрам ўзи теш-  
ган жойни тозалаб ичкарига кирди.

Хона ичида ҳеч ким йўқ. Сукхрамнинг қаршисида кўзалар турибди. У биринчи кўзадан иккита маржон олди ва яна жойига солиб қўйди. Иккинчи кўзада пул бор экан. Сукхрам кўза ичи-  
га қўй суқиб, икки ҳовуч пул олди. Пулларни яшириб, кўчага чиқди, у ёқ-бу ёққа ҳадик билан қаради-да, оёғини қўлига олиб чопди. У шамолдай тез югуар, юраги қинидан чиқиб кетгудай бўлиб уради.

У қишлоқ чеккасигача чопиб борди, кейин айланма йўллар билан Чандоннинг уйига келди. Афсунгар дараҳт остида ухлар-  
ди. Сукхрам атрофга назар ташлаб йўталди.

— Ма, ол,— деди Сукхрам унинг ёнига ўтиаркан.

Чандон аста кулди. Унинг кулгиси тегирмон тошининг фи-  
жиллашини эслатарди. Чандон қўлинни узатди. Сукхрам ҳамма пулни унинг кафтига тўқди.

— Бу ерда неча пул?— сўради Чандон.

— Ўзинг сана.

— Саксон рупия экан,— деди Чандон пулларни санаб бўлиб.

— Ҳаммаси ўзингда қолаверсин. Менга пул керакмас. Сен каттасан, пул ҳам сенга бўлсин.

Улар йўлга тушдилар.

Урмондаги ибодатхона қаршисидаги тош ётқизилган баланд майдонда тўхташди. Сукхрам маъбуданинг тош ҳайкалига ти-  
килди, вужудини титроқ босди: назарида маъбуда ҳозир гапи-  
риб юборадигандай. У қўрқиб кетди. Унинг овозини эшитса ҳоли не кечади? Тоқат қила олармикан? Сукхрам ўзида ботирликдан асар ҳам қолмаётганини ҳис этди.

— Душманинг ким?— сўради Чандон.

— Полиция бошлиғи.

— Унинг хотин, бола-чақалари борми?

— Ҳа, бор.

— Кейин улар қандай кун кўришади?

Сукхрам нима ҳам дея оларди? У индамай бошини эгди.

— Уларнинг кулфати сени оғир гуноҳ бўлиб босади. Шунга шаймисан?— деб айёрлик-ла сўради Чандон, сўнг бир оз жим тургач қўшиб қўйди.— Шуни билки, халоскор худодан бошқа ҳеч ким йўқ. Бунга унинг иродаси бўлса душманинг ўлади. Бўлмаса йўқ, унда ҳеч кимнинг қўлидан бир иш келмайди.

Сукхрам на ўлик, на тирик эмасдай жим тураверди.

— Худо ўз иродасини ҳаммага ўтказади, бутун оламни ўз их-  
тиёрига кўра бошқаради,— давом этди Чандон.

— Ҳаммаси тақдир қўлида,— деб шивирлади Сукхрам.—  
Бордию парвардигор йўқ деса, унда нима бўлади?

— Унда хўроз сўйишга тўғри келади.

— Нега?

— Акс ҳолда мен думалатган кўза бу ишга қўл урган одамнинг устида синади, у ўлади,— деб жавоб қилди Чандон.— Шунинг учун ҳам аёл кишини келтириб, уни вино билан сийла деб бежиз айтмагандим. Аёл киши ҳаммасини бажо келтиради. Бизга на гуноҳ, на қўрқув ёпишмасди. Бироннинг умрига завол бўлсанг сени нималар кутишини биласанми?

Сукхрамнинг юраги тез-тез ура бошлади.

— Йўқ,— деб жавоб қилди.

— Мохов бўлиб қоласан, тириклайн чириб тамом бўласан. Сукхрамнинг тепа сочи тик бўлди.

— Кейинги ҳаётингда чўчқа бўлиб дунёга келасан,— деб давом этди Чандон.

— Бас, тўхтат!— деб бақирди Сукхрам.— Ўч олишдан возжечаман.

— Бу қанақаси?— аччиқланди Чандон.— Ахир, маъбуда ибодатхонасида турибмиз! Агар у рози бўлса, ҳозирги нияting йўққа чиқади...

— Ҳамма гуноҳ зиммамга тушадими?

— Ҳаммаси эмас, ярми.

— Кейин ҳолим нима кечади?

— Мохов бўлиб оғримай этинг чирийди.

— Етар, афсун қилмай қўя қол!

— Кимсан ўзи, менга ақл ўргатасан!— деди норози бўлиб Чандон.— Агар маъбуда норози бўлса, ўзи ҳам бу қилмишинга қаршилик қиласверади.

— Бу ишларинг эвазига сени нималар кутади?

Чандон ўзининг бўйнидаги мунҷоқларни ушлади.

— Булар бўйнимда экан, ҳеч нимадан қўрқмайман, булар туморим.

Сукхрамни зўр ваҳима босди,

— Агар менга халал берсанг энг азиз одамингдан жудо бўласан!— деб пўписа қилди Чандон.

«Кажри! Ўлади?— деган фикр Сукхрамнинг миясида чархурди.

— Мохов бўлиб чиришга ҳам, чўчқа бўлиб дунёга келишга ҳам тайёрман,— деб ялинди у.— Ҳаммасига розиман. Маъбудага айт, халал бермайман.

— Жуда соз!— Чандон севиниб кетди.— Худоларга ана шундай жавоб айтмоқ даркор. Аммо сен қўрқоққа ўхшайсан. Бешинчи хотиним ичишдан ҳам, онадан қандай туғилған бўлса ўша ҳолатда маргхатда рақсга тушишдан ҳам қўрқмасди... У сендан ботирроқ...

Сукхрам қуш овловчилар табақасидан бўлган бу мудҳиши аёлни кўз олдига келтириб ўйлади.

— Бешинчи хотинимнинг отаси художўй эди,— Чандон хўрзунинг боши ва кўксини қизил бўёқ билан бўяди, шу бўёқни ибодатхона дарвозасига ҳам суртди: ибодатхона ичидаги худоларга ҳамма таъзим қилиши мумкин, аммо ахлат тўпловчиларга ичкарига киришга ижозат йўқ.

Кейин у дҳотийси қатидан белбоғига боғлаб қўйилган вино тўла шишани олди.

— Ичасанми?— деб сўради у Сукхрамдан.

— Йўқ,— гарчи карнагларга ҳамманинг қўлидан вино олиб ичиши мумкин бўлса ҳам Сукхрам ана шундай жавоб қилди.

— Нима бало, ҳеч ичмайсанми?

— Ичишни ташлаганман.

Шу пайт анча узоқдан шовқин эшитилди. Чандон диққат билан қулоқ солди. Шовқин тобора яқинлашаверди. У дарҳол қорачироқни ўчирди.

— Халос бўлдинг,— деди Чандон.

— Мაъбуда рози эмасми?

— Нега бунақа дейсан?

— Ахир, унга халақит беришди-ку, шовқинни эшитмаяпсанми?

[...] итияпман.

Чандон шундай дедиу пулларни олиб Сукхрамнинг қўлига берди.

— Пулларингни ол,— деди у қоронфиликда.— Нияting рўёбга чиқмади.

— Пуллар ўзингда қолаверсан. У ўғирлик пул. Бугун мени ҳимоя қилган маъбудага ер ўпиб таъзим қиласман,— деди Сукхрам ва таъзим кетидан таъзим қиласверди.

— Сукхрам, қоч!— деб тўсатдан бақириб юборди Чандон.

— Нега энди?

Чандон шошилганича виноли шишани белбоғига маҳкамлади.

— Деконлар таёқ кўтариб келишяпти,— деди у.— Қочавер! Кимдир қишлоққа инс-жинс тўла кўза юмалатгани келди деб ўйлашаётганга ўхшайди. Тезроқ қоча қол, тентак!— қаттиқроқ шивирлади Чандон.— Улар бизни ушлаб олишса бурда-бурда қилиб ташлашади.

Шовқин тобора яққолроқ эшитиларди.

— Қочавер!— деб қичқирди Чандон ва оёғини қўлига олиб югурди. Сукхрам унинг кетидан чопди.

Йккови ҳам қоронфиликда кўздан ғойиб бўлишди.

Сукхрам жон-жаҳди билан қочди. Назарида оломон фақат уни қувлаётгандай бўлиб туюлди.

Эндиликда товушлар ибодатхонадан эшитила бошлади.

— Бу ёққа қаранглар, манови ерга хўroz боғланибди,— деб бақирди кимдир.

— Унга сурма ҳам суртишибди!

— Ҳозиргина қочишиб кетганга ўхшайди.

Сукхрам қаршисидаги харобазорга кўзи тушди. У ўша ёқقا чопиб бориб яширинди.

Ҳаммаёқ тинчигач, ташқарига чиқиб қулоқ солди. Жимжитлик. Сукхрам атрофга назар ташлаб, ўз кўзларига ишонмади... Кўхна қалъя! Шу ерга яширинибди-да! Ота-боболари яна уни қутқариб қолишибди! Сукхрам улар ҳақига таъзим бажо келтириди, уларга миннатдорчилик билдиригани оғиз очмоқчи бўлганда, гапи оғзида қолди. Қалъя харобаларида шамол увиллади. Қоронгида уулкан девнинг ҳайбатли кўксига ўхшарди. Атрофда зоғ учмайди, фақат на кулгига, на нолага ўхшамаган бўғиқ товушлар эшитиларди, холос. Бироқ Сукхрам қўрқмади. Назарида у ишончли пана жойда эди, ғалати қаҳ-қаҳа бўлса бойқушнинг қичқириғи эди. Сукхрам бир вақтлар Кажри билан бирга келган жойида турарди. Сал нарироқда кўлнинг шовқини эшитилаётir, шу пайт кўл томонидан қоплоннинг ўкириғи қулоғига чалинди. Сукхрам даҳшатга тушди. Шунда худога илтижо қила бошлади. Қалби эзгу ҳис-туйғуларга тўлиб-тошган ҳолда ер ўпид таъзим қилди ва одоб билан шундай деди:

— О аждодларим! Мен гуноҳкор, баҳтсиз бандама! — Сар сингари диёнатли эмасман! Мен камбағал, фақир, пастамман. Мени олий табақадан маҳрум қилишибди, менга қолдириб кетганларингни эндиликда ололмайман. Аммо ғам чекмайман. Булар менга керак эмас. Мени ҳимоя қилдингиз, ҳаётимни сақлаб қолдингиз.— Сукхрам яна ер ўпид таъзим қилди. Сукхрам, аждодларим мени эшигади, деб ишончи комил эди, шу сабабли қўрқмай қўйди.

Сукхрам ўз хаёллари билан банд бўлиб орқага қайтди. Олдинги ўйлари тарқаб, унинг ўрнини янгилари эгаллади. У ибодатхонага писиб кириб олди. У ерда ҳеч ким йўқ, дарвоза ёнида ўлик хўрор думалаб ётарди.

— О, маъбуда, сен мени гуноҳдан асраб қолдинг,— деди Сукхрам боши билан ибодатхона эшигига суюниб.— Мендан тҳакур карнатга айланиб азоб-уқубат чекиши ҳар қандай гуноҳдан озми? Гуноҳ мени инсоний қадр-кимматдан маҳрум қилди. Бунда сенинг ҳеч қандай айбинг йўқ, ҳаммасига тҳакурани айбдор. У гуноҳ қилди, унинг гуноҳи ҳозиргача ювилгани йўқ. О, маъбуда, қалъя менга қолмасин, лекин инсонийлигимча қолишга изи бер!— У жим қолди, кўзларида ёш филқиллади.

Осмонда юлдузлар милтиллади. Тонг оқара бошлади, Сукхрамнинг назарида маъбуда кулимсирагандай бўлди. Шу пайт у яна миннатдорчилик билан маъбудага таъзим қилди.

— Энди қандоқ тирикчилик ўтказамиз? — деб сўради Кажри.

— Билмайман, — деди Сукхрам.

— Аммо қорнимиз билади.

Кўҳна қалъа жойлашган қишлоқقا Сукхрам қайтолмасди. Баъзида у қўшни қишлоққа борар, у ерда ёввойи асад сөтар, Дангнинг маҳаллий аҳолисига табиблик қиласди.

Сукхрам ов ҳам қиласди. Ови бароридан келган кунлари рўзгор гўштга сероб. Қўлга тушиб қолишдан қўрқиб, бу кунлар томоша кўрсатишмасди, ҳеч ким уларни хизматга ҳам чақирмас эди. Сукхрам ва хотинига Аҳмадободга кетишдан бошқа илож қолмаганди. Лекин ҳе йўқ, бе йўқ қўзғолиб, бегона юртларга кетишига уларнинг юраги дов бермасди.

Бир куни Сукхрам билан Кажрининг ҳузурига рожа келди. Иккови ҳам унга одоб билан таъзим қилишди, кейин уни каравотга ўтқизишиб, оғзидан қанақа гап чиқаркан деб кутиб туришди. Рожа ўғирликлар хусусида гап юритди. У қўрқув нималигини билмайдигандай эди. Полициячилардан эса яшириниб юрарди.

~~Хозир~~ нима иш қиляпсан? — деб сўради у Сукхрамдан.

Сукхрам билан Кажри нима жавоб қилишларини билмай бир-бирларига қарашди.

— Ҳеч нима, рожа-жи, — деди Сукхрам.

— Демак, ейишдан бошқа ишинг йўқ экан-да?

— Бунга ҳам худонинг марҳамати керак. Қун бўйи бир маҳал тамадди қиляпмиз, — гап қистирди Кажри.

Сукхрам унинг гапини маъқуллаб бош иргади.

— Мен билан бирга юрсанг бўлмайдими? — деб сўради рожа.

Шу пайт чодирга рани кириб келди.

Кажри унга меҳрибонлик кўрсатиб, каравотга — эри ёнига ўтқазди.

— Уни қаёққа бошлаб бормоқчисан? — қизиқсинди рани.

— Ўғирликка.

— Хўш, нима дейсан? — деди Кажри Сукхрамга.

— Бу ишга кўнглим чопмайроқ туриби, — деб жавоб қайтарди Сукхрам.

— Кўнгилмиш! Тентак, камбағалда кўнгил нима қилсин! Нима муҳим ўзи, ҳаётми ё кўнгилми? — унга дағдага қилди рани.

— Ҳаёт, — деб тан олди Сукхрам.

— Бўлмаса кетдик! — деб қистади рожа.

— Кажри, нега сен индамаяпсан? — сўради рани.

— Айтавериб оғзим чарчади,— деди-да, Кажри хўрсиниб қўйди.

— Демак, қўрқяпсан-а? Мановинга бир қара!— деди рожа Сукхрамга елкасини кўрсатиб.— Тузукроқ қара: булар қамчи зарбидан пайдо бўлган чандиқлар. Барибир мен қўрқмайман! Болалигимдан мени қўлидан келган одам калтаклайверган. Аммо мен бўш келмадим, шафқат нималигини билмадим. Олиш мумкин бўлган пулни қўлдан чиқариш одатим йўқ. Битта мисол айти: камбағал деҳқон эртаю кеч меҳнат қиласди, уни эса еридан маҳрум қилишади, уйини ким ошди савдосига қўйиб, уй ҳайвонларини сотиб юборишади. Шундай бўлса ҳам у деҳқончилик қасбини ташламайди-ку! Биз ҳам экиб тирикчилик ўтиказишимиз мумкин эди. Аммо бизнинг еримиз йўқ, биз натмиз. Бизга ҳеч ким ишонмайди. Шундай экан, нима учун бошқаларга қараганда ҳалолроқ бўлишимиз керак?

— Эҳ, Кажри, ҳақиқий эркакча яшаш қийин бўлиб қолди,— деди рани рожанинг елкасидаги чандиқларни фурур билан си-лаб.— Қанчадан-қанча азоб-уқубатларга чидашга тўғри келади! Уларга ҳеч ким раҳм қилмайди. Қара! Жимжилогининг тирнофи йўқ — полициячилар шилиб олишган. Аммо бу эркак. Калтаклашгандавой ҳам демади, ҳатто ўғирланган мол қаерга яширганини ҳам айтмади. Баъзида худо мени аёл қилиб яратиб, зўр мурувват қилганга ўхшаб кетади!

Кажри унинг гапларини эътибор билан эшитди, кейин йиф-лаб юборди.

— Нега обидийда қиласан?— рожа ҳайрон бўлди.

— Йўқ, уни қўйиб юбормайман, ўлдириб қўйишади,— деди Кажри йиғи аралаш.

— Э-э, сарою қасрларда одам ўлмаяптими?

— Уларнинг йўриғи бошқа.

— Ихтиёринг,— деди рожа қўзғалиб. Сукхрам ҳам ўрнидан турди. Кажри ўтирганича қолаверди — у ҳамон ўзига келолгани йўқ эди.

— Сенга нима бўлди,— уни юпатди Сукхрам меҳмонларни кузатиб келгач.— Мени у билан бирга кетади, полициячилар ўлдириб қўяди деб ўйладингми?

— Ақлинг етгандан кейин сўраб нима қиласан?

— Кажри, ажойиб хотинимсан-да.

— Нималар деяпсан?— Кажри хижолат чекди.— Наҳотки эркак зоти хотинини мақтаса?

Хотин! Бу сўз Кажрининг оғзидан беихтиёр чиқиб кетди. Бу нимаси, Кажри эркакларни ўз танаси билан мафтун этувчи оддий аёлликдан чиқдими? У аёл кишини хотиндан ажратиб турдиган чегарадан ҳатлаб ўтиб кетдими? Бу сўзда онланинг ҳимоячиси, меҳру муҳаббати зўр она, қийинчиликларни енгишда

эрига тиргак бўлган ғамхўр, садоқатли хотин сиймолари яши-  
ринганди.

Бу сўз унинг оғзидан беихтиёр чиқиб кетди, чунки бу сўзда  
чексиз вафодорлик туйғулари мусаффолигининг бутун маъноси  
пинҳон сақланган эди, бу ўринда уларнинг яқинлашуви ҳаёт  
барпо этишнинг олижаноб ҳамда муҳаббат ва бола тарбияси  
учун масъулиятда эса эркак ва аёл тенглашиб қолған, пасткаш-  
ликка ҳам, қабиҳликка ҳам ўрин йўқ эди.

— Қажри, ҳақ гап, ниҳоятда яхшисан,— деб таクロлади,  
Сукхрам.

— Бирорларнинг фикрини ўқияпсан.

— Нега?

— Чунки сен ҳақингда худди шундай фикрда эдим.

Ташқарида қадам товуши эши билди. Кираверишда кимдир  
тўхтади.

— Ким у?— товуш берди Сукхрам.

Чодирга Қадагсинх кирди.

— Э-э, сенмидинг?— деди Сукхрам.— Сени кўрмаганимга ан-  
ча бўлди. Аҳволлар қалай?

— Бошлиқ сени йўқлаяпти, кетдик,— деди Қадагсинх.

Қажри сергакланди. Сукхрам Қажрининг ён томонига, бош-  
ка ёққа индамай қараб турарди.

— Йўқ, ака, бизга ҳеч кимдан ҳеч нима керак эмас. У ҳеч  
қаёққа бормайди,— деб гапга аралашди Қажри.

Сукхрам билан Қажри жамоадан биргаликда чиқишиди. Тे-  
паликка кўтарилишганда қаршиларидаги қадрдан кўҳна қалъа-  
га кўзлари тушди. Сукхрамга қалъа ўзидан анча йироқлашиб,  
баъзida у қалъанинг борлигини ҳам унутиб қўйгандай туюлиб  
кетди.

— Унга тикилиб қолдинг?— унинг фикрларига кириб олиш-  
га интилиб савол ташлади Қажри.

— Унинг эгаси бўлолмайман.

— Кераги ҳам йўқ! Эгаси бўлганингда ҳам қанча нафи бў-  
ларди?

— Қажри, наҳотки сенга ҳеч нарса керак бўлмаса?

— Қерак эмас. Ҳамма нарсам бор. Ўзимникини бир-  
майман, бирорвонки эса менга керак эмас.

Қажрининг сўзлари Сукхрамнинг кўнглидан чуқур жой олди.  
Шу лаҳзада ўзи учун қалъадан кўра Қажри азиз, мўътабароқ  
эканлигини фаҳмлади. Нега у ҳозиргача анови вайронани эгал-  
лашга шунчалик интилиб келди? Унинг Қажриси бор-ку, унинг  
бор бисоти шу аёл-ку. Бордию чала қолган қалъага эга бўлган-  
да нима ҳам қила оларди? Сукхрам ҳатто ўқишини ҳам билмай-  
ди, зодаган одамларнинг эса ҳаммаси саводхон. У ўзи ким?  
Тҳакурман деган фикрга ёпишиб олган пасткаш бир карнат!

Шунинг учун ҳам шу ерларда ўғридай одамлардан қочиб совуқда дилдираб юрибди.

Сукхрам билан Қажри ўз ўйлари билан банд бўлиб, тепаликда анча туриб қолишиди.

«Ҳаётда муносиб ўрин топиб олганимда эди! Йўқ, эркинликдан маҳрум бўлгандан кўра ишсиз ўтирган маъқул»,— деб ўйлади Қажри.

— Қажри, менга қалъя керак эмас!

— Уни сенга ким ҳам бериб қўярди?

— Беришганда ҳам олмайман.

— Оҳ, Сукхрам!-- хитоб қилди Қажри.— Ниҳоят миянг равшанлашди-я!

— Қажри, бу ерлардан бутунлайин кетамиз,— деди Сукхрам ишонч билан.

— Қаёқقا?

— Аҳмадободга.

Қажри жуда севиниб кетди. Назарида ҳамма бало-қазолар ортда қолгандай бўлди.

— Қачон кетамиз?— сўради Қажри.

— Эртага. Пулингдан қолганми?

— Ха, ўн беш рупия бор.

— Йўл харажатига етади. У ёқда бирон иш топиб олармиз.

— Уйга қайтайлик, қоронги тушяпти,— деди Қажри.

— Тўхта, қалъага охирги марта қараб олай, кейин кетаман.

Қоронгилик уни бутунлай бағрига олсин. Шундагина уни юрагимдан бутунлай узиб ташлайман.

— Мен қўрқяпман, Сукхрам? Кетайлик!— деб қистади Қажри.

Қаъла қоронгиликка сингиб кетди.

Шу пайт иккаласи ҳам тун бағрини ёрган қичқириқдан чўчиб кетишиди. Қичқириқ такрорланди. Бу сафар фарёд яқинроқдан, баландроқ эшитилди.

Сукхрам Қажрининг белидан маҳкам қучоқлади-да, ўзига тортди.

— Шу яқин ўртада,— деди ниҳоят Сукхрам.

Шу аснода оёқ товушлари қулоққа чалинди.

Сукхрам билан Қажри пастга югуриб тушишиди ва катта қоя орқасига яширинишиди. Улар томонга қўлига машъала ушлаган одам яқинлашиб келарди. Машъала алангаси атрофга сариқ нур таратиб ловилларди.

— Қара,— деб пичирлади Сукхрам Қажрининг қўлини маҳкам ушлаб.

Қажри тош ортидан қарадию аста товуш чиқарди.

— Бу дўстинг Қхадагсингх-ку.

— Ёнида бошлиқ ҳам бор!— деди Сукхрам.— Ёнларида қандайдир аёл ҳам келяпти.

— Аёл башанг кийинган, жудаям оппоқ экан,— деб ажабланди Кажри.

— У инглиз қизга ўхшайди.

— Э, худойим, чиндан ҳам инглиз қиз. Вой бебошлар-е, эртагаёқ Дангга полиция ёпирилиб келади!

Кажри титраб-қақшади.

— Энди нима қиласиз?

— Қизни қутқариш керак!

— Улар қизни беришмаса-чи?

— Розилик беришга мажбур бўлишади,— деди Сукхрам қатъийлик билан.— Бўлмаса ҳаммамиз хонахароб бўламиз.

Кажри сўқмоққа чопиб чиқди, бандитларнинг йўлига кўндаланг бўлиб турди.

— Ҳой, сизлар!— деб бақирди Кажри.— Ўз бошларингизни ўзларингиз сиртмоққа соляпсизларми? Сен қаёқда қолиб кетдинг?— деб Сукхрамни чақирди у.

Сукхрам яширинган жойидан чиқди.

— А, сенмисан?— деб ажабланди бошлиқ.— Енингда яна бирон кимса борми?

— Йўқ.

— Унда йўлни бўшат!

— Бўшатишга-ку бўшатаман-а,— деди Сукхрам вазминлик билан,— лекин ўзинг нима қилаётганингни биласанми? Ахир, бу инглиз қиз-ку!

— Гапинг тўғри, қара, териси бирам юмшоқ, мулоим!— деди бошлиқ қизнинг қўлларини силаб. Қиз қўлини тортиб олди ва бақириб берди.

— Бақиряпсанми, ярамас!— деб кулди бошлиқ.

— Эртагаёқ Дангга солдатлар келишади, ҳаммани қўрошин билан сийлашга бошлашади. Тентаквой, тушунсанг-чи, ахир, улар рожаларнинг рожаси-ку.

— Шернинг ғашини кетиришга арзийдиган ишми?— Сукхрамни қувватлади Кажри.— Нечун ўзингга ўзинг ўлим тилаб оляпсан?

Инглиз қизнинг юзи қўрқувдан терлаб, сарғиш соchlари елкаси узра ёйилиб кетди.

— Қутқаринглар! Мени қутқаринглар!— деб ялинди у ва Кажрининг оёқларига йиқилди.

Бошлиқ сергакланиб, қаҳр билан уларнинг устига бостириб борди.

— Қўрқма, мэм саъб<sup>1</sup>, қўрқма, ҳеч ким сени хафа қилмайди,— деди Кажри унга ўрнидан туришига кўмаклашар экан.

<sup>1</sup> Мэм саъб — Ҳиндистонда европаликларга ана шундай мурожаат қилиш кенг тарқалган. Мэм «мадам» сўзининг, саъб «соҳиб» сўзининг бузаб талаффуз этилиши.

— Қани, бу ердан жўнаб қол-чи!— бошлиқ Кажрига дағ-даға билан бақирди.

— Сени қара-я!!!— пиқиллаб кулди Кажри.— Жилиб бўпман. Бу отангнинг хотиними? Аёл кишини булғашингга йўл қўярмидим? Улсам ўламанки, унга бармоғингни теккизишингга йўл қўймайман!

— Бунақа аёлни энди кўриб турибман! Вой эсипаст-ей!— деди ҳайратга тушган Қадагсинх.

— Сен менинг халоскоримсан,— деди инглиз қиз ва Кажрига маҳкам ёпишиб олди. Қиз ҳиндча гапирди. Қўрққанидан кўзларини юмиб олди. Машъала нури унинг юзига тушди, Кажри уни дурустроқ кўриб олишга улгурди. Бу нозиккинадан келган, қадди-қомати нафис, лаблари юпқа, олтинранг сочли, тиниқ қўй кўзли, ўн саккиз баҳорни кўрган қиз эди. Ундан анқиб турган атири-упа ҳидлари Кажрига хуш ёқди. Одатдан ташқари ҳид Кажрининг димоғини қитиқлар, шунинг учун ўзига ёпишиб олган қизни қўйиб юбормас эди.

— Енсанг қўйиб юбораман,— деди бошлиқ.

— Шунақами?— Сукхрам унинг гапига тушунмади.

— Мен билан олишасан.

— Қўрқоқ, қуролсиз одамга тўппончча ўқталяпсан-а?— деб кичқирди Кажри. Инглиз қиз кўзини очиб, ранги оқариб кетди. Қутулиш умидлари чиппакка чиқаётгандай эди. У Сукхрамга қаради: Сукхрам қўлларини кўксига қовуштирганича турарди. Важоҳатида хотиржамлик, куч-кудрат таралиб турарди.

— Ҳўп, майли...— деди Сукхрам ва бирдан олдинга ташланди. Бир тепиб, бошлиқнинг қўлидаги тўппончани учирив юборди, у то ўзини ўнглагунча тўппончани қўлга олди. Қейин у Қадагсинхга яқинлашиб, кулимсираганича қуролни унга иргитди.— Буни ушлаб тур. Энди у билан кучимиз тенг бўлди,— деди Сукхрам.

Бошлиқ сакраб туриб Қадангсинхнинг қўлидаги тўппончани тортиб олди, орқага чекиниб, Сукхрамни нишонга ола бошлади.

— Шошмай тур,— деб Сукхрам чаққонлик билан ердан вазмингина бир тошни олди.— Менинг ҳам қуролланиб олишимга имкон бер.

Ташвишга тушган Кажри инглиз қизни бағрига маҳкамроқ босди, қиз эса иккала эркакка даҳшатдан кўзларини катта очиб, қараб турарди.

— Ҳазрати Исо, ўзинг қўлла,— деди инглиз қиз.

Кажри унинг илтижосини уқмади.

— Қўрқма, уни ўлдиришса, барибир, ёнингда ўзим қоламан. Агар менинг ҳам бошимга етишса, ўзингни тириклайн уларнинг қўлига топширма,— деди Кажри.

Бошлиқ ўқ узди, тўппончадан тутун ёйилди. Инглиз қиз чинқириб юборди. Ўқ овози тоғларда акс садо берди. Лекин Сукхрам чап беришга улгурган эди.

— Аблаҳ! Қуроли йўқ одамга нега ўқ узасан?— деб бақирди Кажри.

‘Ўқ Сукхрамнинг қўлини сал тирнаб ўтганди, ўша жойдан тирқираб қон оқа бошлади. Кажри енгил нафас олди, инглиз қизни маҳкамроқ қуchoқлади.

— Қани, эркак бўлсанг имиллама!— деди бандит масхараомуз.

Кхандангсинх карнат нима қилар экан дёб машъалани кўтарди.

— Маҳкам бўл,— деди Сукхрам ва тошни отди, тош бандитнинг билагига тегди.

Тўппонча узоққа учиб кетди.

Сукхрам уни олди-да, бошлиққа ташланди. Унинг кўкрагига ўтириб, тўппончани унинг чаккасига қадади.

— Раҳм қил!— ялинди бошлиқ.

Сукхрам унинг туриб олишига имкон берди. У Сукхрамга миннатдор кўзлари билан тикилди ва таъзим қилди. Кейин бошидан салласини олиб, Сукхрамнинг оёқлари остига ташлади — енгилганини тан олди.

— Бу нима қилиқ?— Сукхрам ажабланди.— Сенинг душманинг эмасман-ку.

— Кўрдингми, мәм саъб, кўрдингми?— мурожаат қилди Кажри инглиз қизга.— Ҳақиқий эркакларни қачон бўлмасин кўрганмисан? Кўрмаган бўлсанг эримга қара. Менга ҳавас қиласан ҳам арзиди.

Инглиз қиз унинг бидирлаб нималар деганини яхши уқмади, лекин анча тинчланди. Эркаклар нималар хусусида гапирганини элас-элас уқди, яkkама-якка олишув уни ҳайратга солди. У Сукхрамга кўзларини катта очиб тикилиб қолди

— Мәм саъб, мени афв эт, қаршингда гуноҳкорман,— деди бошлиқ.

— Уни афв эт, мәм саъб,— бошлиқнинг гапини қувватлади Кажри.

— Афв этдим,— деди инглиз қиз титроқ товуш билан.

— Сени қаёққа олиб бориш керак?— деб сўради Кажри.

Бошлиқ тавозе билан четга чиқди. Инглиз қиз унга ҳадик билан боқди. У ҳануз бандитдан кўрқар, жавоб беришга ботинолмас эди.

— Дақ-бунгалога,— деди у ниҳоят ва бошлиққа қаради.

— Боравер, кўрқма, биз кетамиз,— деди у, ердан тўппончасини олиб, Кхадангсингхга кётдик деган ишорани қилди.

- Тўхтанглар! — Кажри уларни тўхтатди.— Машъалани бизга беринглар. Қизни уйига обориб қўйишимиз керак.
- Бер!— деб буюрди бошлиқ Қхадангсинхга.
- Юр, сени кузатиб қўяйлик,— деди Сукхрам қизга.
- Бизни тутиб бермайман деб аввал қасам ичсин,— деди Кажри.
- Хотиним қасам ичишингни талаб қиляпти,— деди Сукхрам инглиз қизга.
- Нега қасам ичаман?— таажжуб билан сўради қиз.
- Бизни турмага жўнатмасликка сўз бер.
- Ваъда бераман. Сизлар мени қутқардиларинг. Наҳотки сизларни тутиб берсам?— деди инглиз қиз, сўнг бир оз ўйлаб туриб қўшиб қўйди:— Ҳеч қаочон?
- Лекин, мэм саъб, бизни полиция ушлаб олиши мумкин. Анови бандитлар қаердалигини сурнштира бошлашади,— деди Сукхрам.
- Сизларни ҳеч ким сўроқ ва саволга тутмаслигига ваъда бераман. Мени уйга элтиб қўйганларингиз учун, отам сизларни яхшигина мукофотлайдилар ҳам.
- Улар ўйлга тушиди.
- Сизлар менинг халоскорим,— деди инглиз қиз Кажрининг қўлидан ушлаб бораркан,— сизлар бўлмаганларингизда тамом бўлардим.
- Мана бу ёқقا бурилайлик, ўйл қисқаради,— деди Сукхрам.— Йўл ёмонроғу, аммо икки баравар қисқа.
- Кетдик,— рози бўлди инглиз қиз.
- Ийқилиб тушмайсанми?— деб сўради қиздан Кажри.
- Йўқ, тоғларда юришга ўрганганман.
- Жуда соз, бўлмаса кетдик,— деди Сукхрам.
- Мэм саъб, улар сени қандай қилиб ушлаб олиши?— қизиқиб сўради Кажри.
- Тоғда бир ўзим сайд қилиб юргандим. Сизлар вақтида улгуриб келдиларинг. Сизлар бўлмасаларинг қўлимдан ҳеч нарса келмасди,— оддийгина жавоб қилди қиз.— Сен яхши хотин экансан. Жудаям яхши хотин!— дея бир неча бор такрорлади у. Гўё қиз ўз сўзларининг маъносини таъкидламоқчидай бўлиб, Қажрига мамнуният билан тикиларди.
- Бу нималар деяётганига қулоқ сол!— деб хитоб қилди Кажри.
- Сукхрам кулди.
- Инглиз қиз Сукхрамга эътибор билан узоқ тикилди.
- Э-э, мэм саъб, нима бало, уни ютиб юбормоқчимисан?— қизнинг Сукхрамга бунақа тикилиши Қажрига ёқмади.
- Лекин инглиз қиз унинг гапларига эътибор бермади. Сукхрамга завқ-шавқ билан тикилганича:
- Жуда баҳодир йигит!— деди.

Кажрида раشك алангаси кучайди.

— Эй, худо! Ишқилиб эримга кўзи тегмасин-да.

Инглиз қиз ҳеч нима тушунмай савол назари билан Сўкхрамга қаради. Лекин у кулимсираб қўйдию, индамади.

— Хотининг нима деяпти?— инглиз қиз гап маъносини билишга қизиқди.

Сўкхрам Кажрига қаради. Унинг кўзлари чақнаб турарди.

— Бекам, хотиним сиздан қўрқяпти,— деб жавоб қилди Сўкхрам.

— Ҳеч унақа эмас-да, гапини қаранглару жуда қўрқитиб юборди-да!— деб пўнғиллади Кажри.

— Нега қўрқасан? Ахир мен яхши гапларни айтяпман-ку,— деди инглиз қиз.

— Тўғри, мэм саъб,— деди Кажри кўниб.

— Бу эрингми?— қизиқсинди қиз.

— Ҳа, хоним,— деб жавоб қилди Кажри.

— Яхши,— маъқуллади инглиз қиз. Кейин бехосдан айтиб юборгандай завқланиб:— Жудаям яхши киши экан,— деди.

Кажри ҳушёр тортди. Бутун олам Сўкхрамга ҳасад билан кўз олайтираётгандай бўлиб кетди.

— Хўш, жонимга тегди, уйга кетайлик. Ҳой бадбахт, орқангга қайт,— деб гап қотди Сўкхрамга Кажри.

Сўкхрам йўлда юришни давом этаверди.

— Нима бало, гапимни эшитмаяпсанми? Анови енгилтакка қарайвер, бу сассиф алаф ясмин ёғларини суртиб, бурнини осмонга кўтаряпти,— деди Кажри.

— Қанақа ёғ? Кимнинг бурни? Ўзи нима бўлди?— ташвишланди инглиз қиз.

— Ҳеч қанақа ёғ-поғ йўқ, мэм саъб,— жеркиб жавоб қилди Кажри.

Сўкхрам қулимсиради.

— Бунинг нимаси сенга кулгили?

Сўкхрам ўзини тутолмай кулиб юборди.

— Ахир, нега куляпсан?— деб сўради инглиз қиз.

— Шундоқ ўзим, хоним,— дея, жавоб қилди Сўкхрам.

— Биз камбағал, жоҳил одамлармиз,— деди Кажри.— Ҳея нимага тушунмаймиз. Бизни афв этгайсиз.

— Аммо эринг жуда ботир йигит,— деди инглиз қиз,— Бу-нақа йигитларни ҳеч учратмаганман.

— О худойим!— деб хитоб қилди Кажри.

Улар дак-бунгалога яқинлашишди. Сўкхрам билан Кажри нарироқ боришга юраклари бетламай тўхтаб қолишди; Сўкхрамнинг қовоғи осилди.

— Келаверинглар, келаверинглар,— деди инглиз қиз уларни тортиняпти деб ўйлаб.

— Ҳой, шүрлик, у бугуноқ икковимизни ҳам турмага жүннатади,— бидирлади Қажри Сукхрамнинг йўлини тўсиб.— Қайтиб кетайлик, уни ўз ҳолига қўй, ўзи кетаверсин. Кўрқиб кетяпман. Қочайлик!— шундай дедио четга қочди.

Сукхрам жойидан қимирламади.

Қажри тўхтаб, уни ҷақира бошлади.

— Унга нима бўлди?— ҳайрон бўлиб сўради инглиз қиз.

— Хоним, у қўрқяпти,— деди Сукхрам беҳад ялинганнамо оҳангда.

— Нимадан?— ажабланди қиз.

— Сиз — хоним, рожалар ҳукмдори. Биз эса фақир одамлармиз.

— Оҳ, бу қандоқ одамлар-а?— деб кулди инглиз қиз. У ўзини бехатар жойда деб билар, ўзини ҳам мавқеига яраша алпозда тутарди.

— Ҷақир уни, айт, ҳеч нарсадан қўрқмасин,— деди қиз хотиржамлик билан.

— Буёқقا кел!— деб қичқирди Сукхрам.

Қажри секин-аста қайтди. У қўрқувдан вужуди титраб, ўзини инглиз қиз оёғи остига ташлади, йиғлаб ялиниб гапирди:

— Ыўқ хоним. Бизни қўйиб юбор. Яхшиси бу ердан кета қолайлик.

— Нега йиғлайсан?— деди ҳайрон бўлиб инглиз қиз.— Сизлар мени қутқардйнглар, буёқقا сизларни қаматиш учун олиб келаётганим йўқ. Сизларни мукофотлаш учун орқамдан эргашинглар деб илтимос қиляпман. Хоҳламасаларинг — майли, қайтишларинг мумкин. Буёғига ўзим ёлғиз кетавераман.

— Ыўқ, хоним, бу ерларда йиртқич ҳайвонлар изғиб юради,— деди Сукхрам.

Инглиз қизнинг сўзларидан Қажри самимият оҳангини ҳис этди. У ўрнидан туриб кўз ёшларини артди. Лекин кўз ёшлари ўз ишини бажарганди. Инглиз қиз ҳозир қаршисида ўрмондаги ёввойи мушук эмас, қўлга ўргатилган уй мушуги турганини фаҳмлади.

— Қасбинг нима?— сўради инглиз қиз Сукхрамдан.

— Хоним, мен...— деб жавоб бермоқчи эди, аммо гапни Қажри илиб кетди.

— Биз камбағал одамлармиз, хор табақаданмиз. Ҳеч қана-қа касб билан шуғулланмаймиз.

— Қандоқ тирикчилик қиласизлар?

— Нон еймиз, мэм саъб.

Инглиз қиз кулиб юборди.

— Э, йўқ, пулни қаердан оласизлар, деб сўрамоқчийдим,— деди қиз.

Сукхрам билан Қажри ҳеч нима дейишмади.

— Менда хизмат қиласизларми?

— Ыўқ, хоним,— деб жавоб қилди Қажри,— бизнинг табакамиизда...

Бироқ Сукхрам унинг сўзини бўлди.

— Хоним, биз қўйи табақаданмиз,— деди у Қажрининг гапларини босиш учун баланд овоз билан.— Бизни ҳеч ким хизматга олмайди.

— Мен хизматга олсан, хизмат қиласизларми?

— Албатта, хоним,— хурсанд бўлиб деди Сукхрам.

— Хизмат қиласиз, хоним, фақат иккимиз биргаликда,— деди Қажри.

— Эринг билан бирга ишламоқчимисан?

— Унингсиз яшай олмайман!

Инглиз қиз кулимсиради.

— Уни жуда яхши кўрасанми?

— Хоним, сиз билан бирга борамиз,— деди Қажри ва дак-бунгало томон биринчи бўлиб қадам ташлади.

— Аҳмадободга-чи?— деб сўради Сукхрам хотинига етиб олиб.

Қажри кулиб юборди.

— Эндиликда мэм саъб онамиз ўрнида она-да,— деди у инглиз қизга қараб.

Ниҳоят улар дак-бунгалога етиб келишиди. У ерда олағовур авжида эди: полициячилар ҳуштак чалишар, қўлига фонарь ушлаб олган одамлар уёқдан-буёққа елиб-югуришар, бақиришар, шовқин солишар, довдирашар эди.

Инглиз қиз уйга биринчи бўлиб кирди. Уйда унинг қадам ташлашлари анча дадиллашди. Қиз, ҳокимона нигоҳ ташлади, яқиндагина Сукхрам билан Қажри кўрган қўрқоқ, йиғлоқи қизга мутлақо ўҳшамай қолди.

— Мэм саъб келди, мэм саъб келди!— дея ҳар томондан қичқира бошлашдилар.

Полициячилар югуриб келишди.

— Хоним, соҳиб анчадан бери безовта бўлиб ўтириптилар, сизни қидиришга буюрган эдилар!— деди улардан бири одоб билан.

Инглиз қиз кулимсиради.

— Парвардигорга юз марта, минг марта шукроналар бўлсинки, хоним қайтиб келдилар,— гарчи ичида инглиз қизни сўйаётган бўлса ҳам, унинг касофатига қолиб туни билан мижжа қоқмаган бўлса ҳам қўлини осмонга чўзиб художўйлик билан бидирлади полиция участкаси бошлиғи.

Сукхрам на тирик, на ўликлигини билмай донг қотиб саросимада турарди, чунки ҳовлига ҳамма полиция участкалари одамлари тўпланган эди-да...

— Буёққа келинглар! — деди инглиз қиз Сукхрам билан Кажрига мурожаат қилиб.

Одамлар қиз ёлғиз эмаслигига шундагина тушунишди. Қиз бу икковини нега чақираётганига фаҳмлари етган ҳолда, уларга ошкора ҳавас билан тикилишарди.

— Хоним, анови нат турмадан қочиб кетган,— деб инглиз қизга мурожаат қилди полициячилардан бири.

— Турмадан қочди? Шу-я! — инглиз қиз ажабланди.

— Ҳа, хоним, худди шу.

— Бирорларнинг ишига аралашма! Ҳаммасини ўзим текшираман,— деб қаҳр билан унинг сўзини бўлди қиз.

Сукхрам билан Кажри турган жойларида қотиб қолишиди. Инглиз қиз Сукхрамга синовчан назар ташлади. Сукхрам унинг нигоҳини беғараз, очиқ чеҳра билан қарши олди.

— Хоним, соҳиб келдилар,— деб маълум қилди полициячи. Айвонга кексароқ киши кўтарилди.

— Отажон! — қиз бақирганича унинг елкасига осилди.

Эркак қизнинг пешонасидан ўпиди, юзларини силади. Ў мамнун жилмайди.

— Сусанна, қаёқларда қолдинг? Нима бўлди? — деб инглиз ча сўради.

— Сайрга чиққандим,— қиз ҳам инглизча жавоб берга бошлиди.— Менга бандитлар ҳужум қилишиди, судраб олиб кетишиди. Манови одам мени қутқарди. Ёнидаги хотини. Улар жуда жасур одамлар экан. У қуролсиз бўла туриб, мени бандитларнинг қўлидан қутқариб олди. Полициячи халоскоримни турмадан қочган деб айтди. У хар табақадан, уларга бу ерларда зулм ўтказишади. Афсуски, улар христианлардан эмас. Лекин сизларни ранжитмайман деб ваъда бердим. Ота, илтимос қиласман, уларни ҳимоя қилгин. Бундан ташқари уларга мукофот ҳамда бизникида хизмат қиласиз, деб ваъда ҳам қилганман.

Полиция участкаси бошлиғи ҳеч нима тушунмади.

— Эй! — деб чақирди инглиз. Ў яккаю ягона қизи тирик, соғсаломат эканлигидан хурсанд эди.

— Тақсирим, буюрсинлар! — полиция участкаси бошлиғи унинг қаршисида икки букилди.

— Ҳаммангиз кетишингиз мумкин.

— Тақсир, анови одам.

— Уни қизим кечирди,— деди инглиз ва яна қизининг пешонасидан меҳр билан ўпди. У хурсандлигидан чараклаб кетди. Бугун у инсоний туйгуларга тобе эди.

Сукхрам инглизга яқинлашиб, унинг оёқларига йиқилди.

— Тақсирим! — деди у.

Кажри ҳам ўша заҳоти эри нима қилган бўлса шуни такорлади.

- Илоҳим умрингиз узоқ, қизингиз ҳамиша баҳтиёр бўлсин!
- Кажри инглизнинг оёқларини қучоқлади.
- Кекса инглиз кулимсиради, бироқ Сукхрамга эмас, Кажрининг қилиқларига кулди.
- Қани, қани,— деди маъқуллаб инглиз ва кетиш учун бурилди.
- Сен... Исминг нимайди?— деб сўради инглиз қиз Сукхрамга тикилиб.
- Сукхрам, хоним.
- Бизнида хизматкор бўлиб қоласан.
- Тушундим, хоним.
- Мен-чи?— деб сўради Кажри.
- Ўзинг айт-чи, нима истайсан?— дея жавоб қилди қиз.
- Кажри қўрқув ичидаги атрофга аланглади.
- Хоним, мен эрим билан бирга қоламан,— асли шундай демоқчи эмасдию, аммо ҳозир дилидагини айтишга мажбур бўлди,
- Киз қаҳ-қаҳ уриб кулди.
- Албатта қоласан-да, ахир, унинг хотинисан-ку,— деди у рози бўлиб.
- Кажри оғир хўрсинди.
- Сизларни қаерга жойлаштирсам экан-а?— деб сўради инглиз қиз.
- Хоним қаерга буюрсалар ўша ер бизнинг макон,— деди тавозе билан Сукхрам.
- Ҳов анови жойга ўрнашасизлар,— деди қиз хизматкорлар яшайдиган бинони кўрсатиб.— Ҳозирча биз ҳеч қаёққа кетмаймиз. Бордию кўчадиган бўлсак, сизлар ҳам биз билан бирга бўласизлар, розимисизлар шунга?
- Хоним қаёққа буюрсалар ўша ёққа бораверамиз-да,— деди Сукхрам.
- Инглиз қиз хурсанд эди.

## 28

- Ҳой, сенинг ҳам ҳеч уйғонадиган кунинг борми?— деб сўради мендан уй бекаси — Нарешнинг онаси.
- Юзимдаги кўрпани туширдим. Ҳали совуқ эди.
- Бунақа совуқда эртароқ туришга қодир эмасдим. Каравотга ўтириб кўрпа тагидан чиқмай оғзимга сигарета қистирдим, ўрнашиброқ олдим. Уй бекаси менга бир пиёла қайноқ чой берди, уни ҳузур қилиб ича бошладим.
- Эшитдингми? Мен Нарешдан сўрадим...
- У нима деди?
- Ҳеч нима демади.

Мен индамадим.

— Энди нима қилсам экан? Аслида болани сен йўлдан урдинг,— деб таъна қилди аёл.

Жанжал бошлашга тоқатим йўқ эди, шунинг учун хотиржамлик билан:

— Болалар ота-оналари изидан кетяпти деб ўйлабман-да,— дедим.

Уй бекаси аччиқланиб ташқарига чиқиб кетди. Нареш тез-тез ҳузуримга кириб турар, бу эса унга ёқмас эди.

«Бутун оламда оила — эр ва хотин,— деб ўйладим.— Биз наслдан наслга ўтиб келган жуда катта бўлинмас оиласларда яшаймиз. Европада эр хотинини кўчада ўпиши мумкин, ҳеч ким буни айб қаторига қўшмайди. Бизда эса эр-хотин ёлғиз қолган чоғларида ҳам бир-бирларини эркалашдан уялишади, чунки худо ҳар ерда ҳозир, ҳамма нарсани кўради. Денгиз ортидаги мамлакатларда эркак киши сухбат пайтида бехосдан аёлнинг қўлидан ушлаши мумкин. Ҳиндистонда қиз боланинг қўлини ушлаш — ўта масъул иш, бундай қилган эркак бутун умри давомида қиз билан бирга яшashi керак. Ҳиндистонда муҳаббат кўзларда яшайди. Эркак билан аёл сухбатлашмаслиги, учрашмаслиги мумкин, аммо бир марта кўз орқали дил изҳори қилиш абадий хотирасида яшаб қолади».

Ўрнимдан туриб, қўшни хонага кирдим. Ҳеч ким йўқ. Стулга ўтириб чека бошладим.

«Ҳинд қишлоқларидағи кишилар нодон, фикрлари қолоқ,— ўйлашда давом этдим.— Бу ерда фақат жинсий алоқанигина муҳаббат деб тушунишади. Тҳакурлар ва рожалар оиласларida никоҳ пайтида қонунлаштирилган эрига қулдай итоаткорлик қилиши кўпроқ аёлнинг эрга бўлган муҳаббати тимсоли деб тушунишади.

Аммо шаҳарларимизда кўпинча меҳр билан тикилиб қўйиш муҳаббат ўрнини босади, жинсий алоқа бу ерда унча аҳамиятли эмас. Чет эллардаги кўп одатлар қолоқ қишлоқларимиздагига ўхшаб кетади: аёллар баданини ёпиб, юзини очади. Рожастонимизда эса аёллар кўкракларини яrim очиб яйраб юришади, аммо юзларини ҳафсала билан яширишади. Баъзилар муҳаббат хусусида мамлакатимизни патриархал деб ҳисоблашишади. Ажабланишга арзийди! Ахир, кишининг кийими тарбия ҳамда диний дунёқарашига эмас, балки ижтимоий нормага боғлиқ. Рожастонда яланғоч эркакка ҳеч ким эътибор бермайди. Европада эса бу ҳолатни жамоат тартибини бузиш деб қарапади...»

Дераза орқасида кимнингдир товуши эшитилди. Кўчада Сукхрам турарди.

Мен пастга тушдим. Даҳлизда дўстимнинг овозини эшит-

дим, у Сукхрамни ўтиришга таклиф қилди. Ўзи сават курсига ўтириди. Сукхрам унинг ёнгинасига чўккалади.

— Қизинг ўғлимнинг бошини айлантиряпти,— деб норозилик билдириди дўстим.

— Тақсирим — катта одам. Шундай экан, эътиroz билдира олармидим?

Кўринишдан Сукхрам ўзини зўрға ушлаб турибди: юзларидан ўзини босиш нақадар қийинлиги билингити.

— Йўқ, мени эскича қарашларга маҳкам ёпишиб олувчилар тоифасидан эмаслигимни тушунгин. Мен одамларни мавқеинга қараб фарқламаймн. Ҳар ким ҳам гапириши, эътиroz билдириши мумкин.

— Тақсири, қизимга туҳмат қиляпсиз,— деди шунда Сукхрам жаҳол билан.— Чанда ҳали жуда ёш. Уни ёмон йўллардан асрар келдим. Унинг эрга чиқиб, баҳтиёр бўлишини истайман...

— Күёвни тҳакурлар оиласидан топиш фикри миянгга келдими?— деди дўстим кесатиб.

Улар Нарешнинг Чанда уйига боришини ман этиш, Сукхрам эса қизи билан жиддий гаплашиб олиши хусусида келишиб олишди.

— Бошқа гапим йўқ.— Мени тушунган бўлсанг керак,— деди дўстим суҳбатнинг охирида, сўнг қўзғалди.

Сукхрам индамай қулоқ солди. Ў итоаткорлик билан бош эгди. Унинг юзидан ичидаги бир-бирига зид туйғулар курашаётганини пайқадим, лекин хижолат ва юраксизлик устуңлик қилди: у лом-мим демай кетиш учун бурилди. Мен уни чақирдим, ундан баъзи нарсаларни сўраб билмоқчи бўлдим, лекин у индамади, гапни бошқа ёққа буриб, саломатлигимни сўради, оёғим азоб берган ё бермагани билан қизиқди.

— Тақсири, ҳали хизмат ҳақи олганим йўқ,— деди у, оёғим тузалди деб жавоб қилганимда.

— Ма,— дея, қўлига ўн рупия тутқаздим. Сукхрам таъзим қилиб, пулни камзултининг чўнтағига солиб қўйди.

Уни кузатиб қўйдим.

Қишининг чошгоҳ пайти. Қуёш ёздаги сингари чарақлаб, из-ғирин шамол илиқликин тўзитиб ҳайдаяпти.

Биз гаплашиб қолдик: шу муддат ичидаги Сукхрам Чанда тўғрисида ҳеч нима демади.

Қолган воқеа мен йўқлигимда кечқурун юз берди.

Сукхрам кечки пайт уйга қайтди. Чандани уйдан тополмай аввалига ҳайрон бўлди.

Оқ қасрнинг орқасидаги буталар ичидан келган товушлар Сукхрамнинг қулогига чалинди. У оёғининг учидаги сездирмай яқнироқ борди. Бу жой ўта хавфли ҳисобланарди. Бу ерда инс-жинслар, илонлар макон қурган бўлиб, йиртқич ҳайвонлар

ҳам келиб туарди. Худди шу ерда Хонумон ибодатхонаси ҳам бўлиб, уни қадрловчилар қош қораймасданоқ уйларига қайтишганди. Хонумоннинг ёнида худо Шива ва унинг буқаси<sup>1</sup> ҳамда Хиндистондаги табақа ва халқларни бирлаштириш воситаси бўлмиш бошқа муқаддас ҳайкаллар бор эди. Бир куни улар бирлашиб, инсоннинг инсонга бўлган нафратини, диний бетоқатликни яксон қилишади. Аммо бунга анча бўлган. Афсуски, одамлар яна удум, анъана, хурофот асири бўлиб қолишиди.

Сукхрам буталар ортида беркиниб турди. Қоронғилик қуюқлаша борди. Ним дарахтидаги юм-юмалоқ ғўр ва қизил мевалар тебранмоқда.

— ...Бугун отамнинг ҳузурига Сукхраминг мендан шикоят қилиб келди,— деган Нарешнинг товушини эшилди.— У мени ёқтиримайди.

— Ёлғон!— деди Чанда.— Сукхрам оламдаги энг яхши одам. У шунақаям кўнгилчан, бағри кенгки! Сукхрам мени жонидан ортиқ яхши кўради, менга озор етказмайди.

Сукхрамнинг юраги ҳаяжондан қаттиқ ура бошлади. Чанда ҳамон умид боғларди, аммо Сукхрам қизининг орзулари рўёбга чиқмаслигини биларди.

Чанда гапида давом этди:

— Нимани илтимос қилсан, илтимосим ерда қолганмас. Бошқалар қизларини сўкишарди, у эса ҳеч қачон сўқмайди.

— Эҳтимол, уни отам чақириргандир.

Сукхрам буталар орасидан чиқди. Оёклари унга зўрға итоат қиласарди. Унинг ўшларга халақит бергиси йўқ, аммо ҳозир шу нарса керак эди.

— Чанда, мен билан борасанми?— деб сўради Нареш.

— Қаёққа?

— Онамнинг ёнига.

— Нега?

— Эҳтимол, сенга кўзи тушгач кўнгли юмшар...

— Йўқ, кўнгли юмшамайди!— деди Сукхрам баланд овозда. Чанда билан Нареш уни кўриб қўрқиб кетишилар.

— Дада, шу ердамисан?— Чанда ҳайратдан қотиб қолди. Кейин Нареш билан иккисининг бирга турганини дадаси кўрганидан уялиб, юзини кафтлари билан яширди.

Лекин Сукхрам қизга қараб ҳам қўймади.

— Тақсир!— деди Сукхрам Нарешга.

— Уни исми билан чақиравер,— дада!— деб Чанда Сукхрамнинг гапини бўлди.

<sup>1</sup> Шиванинг буқаси—Хинд худоларининг ҳар бири бирон-бир нарсанни миниб юради. Шива Нанди исмли оқ буқани минади, буқа индуизмнинг вишнунит ва шивашт мазҳаблари томонидан ҳурмат қилинади. Нанда ҳайкали мамлакат жанубидаги ҳар бир ҳинд ибодатхонасида бор.

— Тентак қиз! Жим бўл!— деб бақириб берди қизига Сукхрам.— Мен сен билан гаплашгани келганим йўқ.— Нарешга бурилиб сўради:— Айт-чи? Чандага уйланасанми?

— Уйланаман,— деди Нареш қатъий қилиб.

Сукхрам бош чайқади.

— Кейин нима бўлишини биласанми?— сўради Сукхрам.

— Йўқ.

— Мен биламан. Улар Чандани ўлдиришади!

— Унда мен ҳам ўламан!

Сукхрам Нарешни бағрига босди. Қўз ёшларини тия олмади.

— Йўқ, ҳаётингни хазон қилма,— деди у йингитчани ўзидан нари итариб.

— Чандасиз ҳаётни бошимга ураманми?— деди Нареш.

— Сен ҳали ёшсан, кўп нарсага тушунмайсан,— деб хўрсинди Сукхрам. У ўзининг Пъяри билан ўтказган ширин дамларини хотирлади.

— Чанда, кетдик!— дея чақирди Сукхрам.

Чанда истар-истамас отасига эргашди.

— Қачон келасан?— секин сўради Нареш.

— Жиндай туриб.

Сукхрам олдинда борарди. Чанда унга эргашди. Қиз Нарешга яна бир бор нигоҳ ташлаш учун орқасига ўгирилди.

— Сен қизимсан, сени жонимдан яхши кўраман,— деди Сукхрам,— аммо кулфатга қолишингга йўл қўймайман...

Унинг гаплари қизининг қулоқларига кирмади. Чанда Нарешга яна бир бор қараб олиш ниятида билинтирмай орқасига қайрилди.

Эртаси куни қиз яна қочиб кетди. Нареш ҳам онасининг сезгир нигоҳига чап берди. Улар чошгоҳ пайтигача ҳам қораларини кўрсатишмади.

...Кечқурунга бориб ҳеч кутилмаган воқеа юз берди. Деразам ёнида қуш сайради. Нарешнинг сапчиб турганини, эшик томон юрганини кўриб қолдим.

— Қаёққа кетяпсан?— деб сўради онаси.— Китобларингни ўқиб ўтиранг бўлмайдими? Келгуси йили сени шаҳарга ўқишга юбораман. Бобонгнинг уйида яшайсан, у сени ҳақ йўлига солиб қўяди. У ерда қоронғи тушганда уйдан чиқишингга йўл қўйишмайди.

— Эски вақтларда шунақа эди,— деб тўнғиллади Нареш.— Ҳозир шаҳарларда электр бор.

Шундай дедию чиқиб кетди. Ташқаридаги хизматкорлар ҳайвонларни сугоришарди.

Боғда яна қуш сайради.

Нарешнинг онаси деразадан ташқарига, қоронғиликка қарадию бир нима чақиб олгандай ирғиб тушди.

— Бола тушмагур боғда, анови натни билан бирга!

Тҳакурнинг ниҳоятда жаҳли чиқди. Одатда анча босик, мулоҳазали, адолатсизлик ва зўравонлик қилмаслик тўғрисида товуши хириллаб қолгунча сафсата сотувчи бу конгрессчи ҳозир учқун тегиб портлаган порохли бочканинг ўзига айланди.

— Жоварсинх! — деб бўкирди у. — Ухляйсанми ё соқчилик қиляйсанми?

— Буюринг, валинеъматим,— дҳотийсини шоша-пиша боғлаб, қўрқувдан титраб деди хизматкор.

— ... Қочиб кетамиз,— дерди бу пайт Нареш боғда Чандага қараб.

— Қаёққа?

Коронғиликда ёшликлари туфайли ўта беғам, кўнгли ширин орзуларга тўла, дунё нималигидан мутлақо хабарсиз икки ифратли дил бир-бирига роз айтиб турибди.

— Фақат икковимиғина бирга бўладиган узоқ-узоқларга кетамиз,— деди Нареш.

— Бу мумкинмикан? — деб кулди Чанда.

— Нега мумкин бўлмасин? Мен ҳамиша муздек шамоллар эсадиган, қуёш чарақлаб турадиган, ҳеч ким бирорни урмайдиган, ҳеч ким бирорга зулм ўтказмайдиган жойга кетишни орзулаб юраман.

Чанда Нарешга сеҳрлангандай тикилиб қолди.

— Наҳотки шунаقا жойлар бўлса? — деб ажабланди қиз.

— Чанда, мен билан бирга кетасанми? — деб сўради Нареш жавоб бериш ўрнига.

— Кетаман.

— Қўрқмайсанми?

— Нимадан?

Уйда шовқин кучайди.

Кейин Нарешни ушлаб кетишиди. Уни икки хизматкор олиб келишар, у эса қўлдан чиқишига уриниб бақиради:

— Қўйиб юборинглар мени, қўйиб юборинглар!

— Бизнинг Ажмер, Ўдайпур томонларда нат зотини учратмайсиз,— деди кекса тҳакур Рагхунатҳ.... — Бу ерни шарқ дейдилар, оғайнини. Шу важдан ҳам лўлилар сурбетлашиб кетган. Уларни бир...

Чандани ҳам икки хизматкор ушлаб турарди.

Ҳар икковини эшик олдига олиб бориб, бўшатишда, зич ҳалқага олишди.

— Олиб келдик, хоним,— деди чўри хотин.

Нарешнинг онаси каравотда ўтиради. Унинг юзи тунд, қаҳрли эди. У ўлжасининг устига сакрашга ҳозирланган шерга ўҳшарди. Чанда бутунлай хотиржам, ҳатто жилимайиб турарди. Бўлиб ўтаётган ҳодиса уни сал хижолатга solaётганди. Лекин

у ўзини гуноҳкор деб ҳисобламас, шунинг учун ҳам бошини мағрур тутиб турарди. Шу аснода у ниҳоятда гўзал эди.

— Менга келин бўлмоқчимисан?— деб гулдиради тҳакурани.

Чанда унга эътибор билан тикилди, сўнг тавозе билан таъзим қилди.

Чанда билан Нареш онасининг кўзлари тўқиашди. Яқинлашиб келаётган қариллик ўн гулидан бир гули очилмаган ёшлик тимсолида шаккоклик ва беодобликни кўрди. Бошқаси-чи? Қиз севгилисининг онасига диққат билан тикилиб ўйга толди. «Нашотки севгилимга оқ сут берган она шу бўлса? Бу аёл эркинлик нималигини бутунлай унудиб қўйған». Чанданинг эркинлиги унинг ҳаётини оғир кулфатга қўйди. Буларнинг бири жоннинг абавийлиги тўғрисида ибодат қилиб, эскилики ҳурматласа, буниси ҳаётининг ҳар лаҳзасини бу худога ёқадими ё йўқми— буни ўйламай севгилисига бағишлашга тайёр, бири она бўлса, бошқаси қиз, бири даҳшат билан, бошқаси довюраклик билан йўғрилган. Иккови ҳам бир-бирига киприк қоқмай тикилиб туришибди. Онанинг кўзлари бир вақтнинг ўзида нафрат ва ташвиш, кибр ва ғазаб учқунларини сочиди турибди. Чанданинг кўзлари эса меҳр ва садоқат, илк севги покизалиги ва баҳтга интиқлик билан чарақляяпти. Нарешнинг онаси осмондаги чақмоққа, Чанда энди очилаётган муаттар ҳидли гулга ўхшаб турибди. Нарешнинг онаси Чанданинг нигоҳига тоб беролмади. Бир лаҳзага бўлса ҳам Чанда унинг назаридаги покиза ва иффатли, бунинг устига тонг сингари жудаям гўзал бўлиб қўринди. Аёл беихтиёр унга мафтун бўлиб қолди.

Лекин шу пайт гапга чўри аёл аралашди.

— Ҳой, натни жавоб бергинг келмаяптими?— деб қичқирди.

Онанинг юзлари яна ўзгарди. Эзгу туйғулар бир чақнаб ўчди.

— Нега индамайсан?— деб сўради аёл.

— Сизнинг чўрингиз бўлламан,— қисқа жавоб қайтарди Чанда.

Тҳакурани Чанданинг юзига тарсаки туширди.

Нареш олдинга интилиб, онасининг қўлидан маҳкам ушлади.

— Қўй, майли, ураверсин,— деб уни тўхтатди Чанда.

Тҳакурани ғазабдан дағ-дағ титради. Оқ сут бериб боқсан ўғли бир натнини деб қўлидан ушлаб қолди! Энди одамларнинг кўзига қандай қарайди? Ўғли уни шунчалар ҳақорат қилди-я!

— Жоравар!— деб чақирди у.

— Лаббай, хоним, буюрсиплар!

— Ановини ушлаб тур!

У Нарешга ташланиб, маҳкам ушлаб турди.

— Сени шу умидлар билан катта қилдимми, ярамас бола?!— деб қичқирди тҳакурани. У мушт дўлайиб Чандага таш-

ланди.— Қачондан бери бузуқлик ҳунарингни кўрсатяпсан? Пасткаш натни, боланинг бошини айлантиряпсан? Мана сенга! Еқадими? Мана, мана!— Тҳакурани қутуриб қизни ура бошлиди, аммо қиз йифламади, ҳатто додламади ҳам. Тҳакурани хизматкорлари уни уришга бошлагандা ҳам қиз зарбаларга индамай туриб берди. Кейин Чанда бир томчи ҳам кўз ёши тўкмай беҳуш ийқилди.

Тҳакурани бўғилганидан соchlарини юлди.

— Олиб чиқинг уни!— деб бақирди.

Аёлнинг қўлларида вазмин безак, билакузуклар бор эди. Ана шу тақинчоқлар Чанданинг бошида яралар қолдирган, улардан қон сизиб оқарди. Нареш кўзларини катта очиб, севгилисининг қонга беланган юзига тикилди.

— Сабр қил, ворис,— деди Жоравар Чандани кўтариб, эшик томон йўналишганда.

Лекин Нареш онасига ташланиб, бақира бошлади:

— Энди сен менинг онам эмассан! Сен алвастисан! Алвастисан! Туғилган заҳотим нега мени бўғиб қўймагансан? Фақат Чандамнинг қонини тўкмадинг, менинг ҳам қоними ни ичдинг! Юрагимни тилка-пора қилиб, қонимни томчилатиб сўрдинг...

Дўстим тҳакур Викрамасинҳ довдираб қолди. Деворда осифлиқ турган Гандининг портрети унга тикилди, оиласининг қадрқиммати ер билан яксон бўлаётганига кулимсиради. Ҳақиқий инсонпарвар сифатида уни хотиржамлик билан инсонийликка даъват этди.

Сукхрамга одам юборишиди.

Тҳакур хижолат бўлганидан унинг кўзига қарай олмади.

— Қизимни ўлиб қолгунча калтакламаганинг учун обекларингга эгиламан, тҳакур-жи,— деди Сукхрам ғазабини аранг ютиб.— Биронтангиз сув келтиринг,— деб мурожаат қилди у шу ердагиларга.

Сукхрам ғурур билан қаддини ростлади. Кейин Чанда устига эгилиб, уни қўлига кўтарди.

— Тҳакур, ҳаётда нима бўлганда ҳам қизимнинг яраларини ювиш учун сув берганингни ҳеч қачон унутмайман...

Мен сайдран баланд кайфият билан қайтдим. Ююба дараҳтининг муаттар ҳидлари маст қилди: тепаликка чиқиб олиб, ўша ердан қуёш ботишини томоша қилдим. Нақадар чиройли кўринарди!

Худди шу аснода қўлида Чандани кўтариб келаётган Сукхрамни учратдим.

Мен рўмолчам билан қизнинг пешонасидаги қонни артдим, рўмолчани беихтиёр лабимга яқинлаштириб ўпдим. Иқор бўлишим керакки, кўнглим бўш эмас. Одамларнинг таъкид-

лашича, тошбагир, кўнгли эримайдиган одамман, лекин шу лаҳзада қўзларимда ёш йилтилларди.

Иффатли, айбиз Чанда! У булутлардан ҳам баланд Ҳимолай чўққиларидан туриб худо Шивага абадий севги тўғрисида қасамёд қилаётган тоғларнинг буюк қизи маъбуда Умуга<sup>1</sup> ўхшаб кетганди. Чанда ҳам унинг сингари муҳаббат коҳинаси бўлган эди! Яраланган Чанда ўлим соатини кутаётган, тик ёй ўқларидан иборат кўрпа устида ётган жасур ва енгилмас браҳмачара Бҳишмани<sup>2</sup> эслатарди.

— Энди қандоқ ҳаёт кечирамиз, Сукхрам?— дедим.

— Тушунмаялман, тақсир.

Ҳамма кулфат шунда-да! Сен тушунмайсан, одамларнинг такаббурлиги сени алдаб, энг олий адолатлилик йўлида топганларингни ўғирлаб қўймоқда. Сиёсий йўлбошчилар ахлоқ, дин хусусида оғиз кўпиртириб гапиришади. Бири бир хил, бошқаси бошқа хил ўғит беради. Ҳаммасининг сафсата пойдевори ёлғон ҳамда панд беришдан иборат ҳавоий қасрга ўхшайди...

— Тақсирим, сен ўтган кунлар тўғрисида гапиряпсанми?— деб серади Сукхрам.

Чанда бошини отасининг кўксига яширди. У қизининг бошини силай бошлади, назаримда дарвиш Канва Шакунтала-нинг<sup>3</sup> бошини силаётганга ўхшаб кетди.

— Сени ким урди?— деб сўрадим.

— Эсимда йўқ,— қисқа жавоб қилди Чанда.

Шу пайт эгаллаган билимларимнинг ҳаммаси йўққа чиқиб кетгандай бўлди. Мен кўп нарса биламан деб керилиб юрардим! Чанда! Ҳаётни чинакамига билган шу қиз! Бир вақтлар донишмандлар ҳам: «Олий камолотга эриш», деб айтган.

Мен Чандага маҳлиё бўлганимча тикилишда давом этдим. Қалбимда туйгуларим жўш урар, ундан қаттиқ, аламли нола отилиб чиққундай эди. Ҳамма ҳам бу дунёни саодатли қилингаша уринади, деб ўйладим. Ҳамма ҳам бир-бирини такаббурлиги, бойлиги, аслзодалиги, табақаси, мансаби билан эзишга ҳаракат қиласди. Бирон-бир арзимаган одам истаган йўл билан, кўпроқ хушомад билан юқори лавозимга эга бўлиб олса уруғ-аймоқчилик, ошна-оғайнигарчилик пайдо бўла қолади. Улар ўзларининг пучлигини такаббурлик ниқоби билан яшириб, ўз мав-

<sup>1</sup> Уму — Шиванинг хотини Парватининг номларидан бири.

<sup>2</sup> Бҳишма — қадимий ҳинд эпоси «Маҳабҳарат»нинг қаҳрамонларидан бири. Жангда Бҳишманинг ҳаммәғига ёй ўқлари санчилиб, беҳол ийқилади, унинг гавдасини ана шу ўқлар кўтариб туради, кўрпа вазифасини ўтайди.

<sup>3</sup> Шакунтала — машҳур ҳинд шоири «Қалидаса» драмасининг қаҳрамони. Дарвиш Канванинг асрори қизи. Содда қиз енгилтак бир подшога кўнгил қўяди, лекин подшо уни ташлаб кетади. Канва қизини қанча овутмасин, у бебурд севгилисини ахтариб топишга аҳд қиласди.

қеини абадийлаштиришга интиладилар. Улар ақл-заковат, ҳақиқат нурига тоқат қилиша олмайды, унда тоқат қилиб бўлмайдиган манфаатдорликлари билиниб қолади. Бирининг пучлиги бошқасининг арзимаслиги билан омухта бўлиб кетади, иккovi ҳам бир-бирининг ҳақиқий башарасини ниқоблашга кўмаклашади.

Ана ўшанда ўз қадр-қиммати туйғуси ҳеч нимага арзимай қолади. Бундай қадр-қиммат ҳар куни ўлимга тик боқаётганлардагина сақланиб қолган. Бошқалар эса дунёда тараққиёт учун курашиш баҳонасида оламга тамагирлик руҳи уруфини сепишади, уни хароб қилишади. Ислоҳот ҳамда ўзгартишлар ясаш эса ашаддий иллат ташувчилар қўлида.

Бир мисқол билим олган, ўзига бино қўйган нодонлар минбарга чиқиб олиб, ўзларини маданият учун курашувчилар қилиб кўрсатишади!

Эй, қудратли, енгилмас инсон, қаддингни ростла! Атрофимиздаги ифлослик, ярамасликларни йўқотиб, гўзаллик ярат. Наракасур ерни океан тўлқинларига чўқтириб юборганда худо Вишна тўнғиз қиёфасига кириб, уни сақлаб қолган. Ана ўшанда ведлар<sup>1</sup> баралла жаранглаган. Эндиликда ер юзидағи ҳамма ифлосликларни фақат ҳалқнинг ўзи тозалаши мумкин, ўшанда яна ўзи билан инсоният учун баҳт-саодат олиб келувчи зафар қўшиқлари янграйди. Мен булутлар сари парвоз қилмайман... Лекин зулм қилувчилар, эксплуататорларни ҳамиша ҳозири нозир қуллари — амалдор ва олимлари — тарих ахлатхонасига ташланган эксплуатация ва зўравонлик маддоҳларини бир вақтлар Кришна омонсиз олов ичидা ёнаётган Баҳишма билан, Дронани<sup>2</sup> кўргандай кўриб турибман... Инсон аслзодаликдан юқори туриб, ўзидаги димоғдорликни енгандагина мулкчилик қаноти остида гуллаб яшнаётган такаббурлик ва ўз манфаатини кўзлаш, ахлоқсизлик ва зўравонлик тушунчалари бутунлай ўйқолади.

Нафрат денгизи тўлқинланади. У ҳар сафаргидан кўра зўрроқ мавжланиб кўпиклашади. Аммо инсоният кемаси чўкмайди, чунки ҳозирги Колумб денгизга олтин ва кумуш ахтариш, янги ерларни очиш, инсон қудратини намойиш этиш, Нуҳ пайғамбар билан Одам Ато сингари ер юзида ҳаётни сақлаб қолишга интилиш учун эмас, балки энг ёрқин орзулар мужассамлашган, ҳар лаҳзада янги яхшиликлар яратадиган маънавий куч ҳосил қилиш учун чиқди. Маънавий куч ўлмайди; у енгилмас, енгиб бўлмайдиган қудрат. Оламнинг жамики гўзаллиги унинг улув-

<sup>1</sup> Ведлар — эрамиздан олдинги II аср ўрталаридағи энг қадимий ҳинд адабиёти ёдгорликлари.

<sup>2</sup> Ҳинд эпоси «Маҳабҳарата» персонажлари.

ворлиги ва барҳаётлигига баҳо беролмайди. Мендай ёлғиз одам бунинг уддасидан чиқиб бўпти...

Ҳаммамиз ўламиз. Ҳар ҳолда авлоддан авлодга олдинга силжиймиз. Аёл муҳаббати, аждодларга меҳр ҳатто зулмга тўла асrimизда ҳам сақланиб қолган, кўз олдимизда жиловланмаган золимлик содир бўлмоқда...

— Сукхрам!— деб чақирдим.

— Лаббай, тақсирим?

— Нега шунақа бўлаётганини биляпсанми?— У гапимга тушунмади. Лекин Чанданинг кўзлари чақнади. У мени тушунаётганга ўхшайди.— Эҳтимол, олам қашшоқдир, пул етишмаслиги одамлар дилини қашшоқлантириб қўйгандир?

— Уруш йилларida бу ердаги одамларнинг пули етиб ортарди,— деди Сукхрам.

— Хўш, бу нима берди? Одамлар қўтос ўрнига отга, бунинг устига тўй удумлари учун талай олтинга эга бўлишиди. Аммо ақллари ошиб тошмади-ку.

— Худди шундай!— деб фикримга қўшилди Сукхрам.

Шундайлигини ўзим ҳам билардим. Очликдан ярим ўлик ҳолатга тушиб қолган одамларда пулга бўлган янги ишқибозлик, ҳирс пайдо бўлди. Аммо пул уларнинг баҳтига баҳт қўшмади. Шамол тўкиб юборган манго дарахти меваларидан бир неча донасини ўғирлаш билан киши бой бўлиб қолмайди.

Сукхрам гапларимни маъқуллаб бош иргади. Чанда менга ҳайрон бўлиб тикилиб қолди.

— Князликлар битирилди,— деб гапимда давом этдим.— Ўзбошимчалик ўчоғи вайрон бўлди. Бир вақтлар рожалар мамлакатни ҳимоя қилиш пайтида халқдан жонини ҳам аямасди. Ҳозирги рожалар эски тартиб-қонунларнинг кўркўона қулига айланиб, майшатпарастлик, бузуқлик билан машғул бўлишмоқда. Ҳа, эскилик — ўлик! Унинг арвоҳигина яшяяпти.

— Арвоҳ!— бақирди Сукхрам.

— Арвоҳ!— деди Чанда ўйчан.

— Бизни қуршаб олган оламга назар ташланг! Ҳамма нарса зўравонлик, талончилик асосига қурилган. Бир неча юз йилдан бери шундай бўлиб келаётир, кўзларга шундай қисмат ҳамманинг пешонасига абадий ёзилганга ўхшаб кўринади. Ҳали қараб турсизлар, ҳаммаси ўзгариб кетади. Помешчиклар, бойлар ҳукми ўтмай қолаётганидан тиричиламаяптими кан! Ёлғиз бир одам дунёни ўзгартира олмайди. Лекин, Сукхрам, оламда қанчадан-қанчача одамлар бору!

— Тақсирим, оғайним, нималар деяётганингни тушунмаяпмиз,— деди Сукхрам бепарволик билан.

— Сен тушунишга ҳаракат қил,— дедим жаҳлим чиқиб.

- Майли, гапиравер!
- Қамбағалсан-а?
- Ҳа.
- Паст табақадансан-а?
- Ҳа.
- Бордию табақалар йўқ бўлса-чи? Одамларни табақалаш бутунлай йўқ бўлади.
- Ӯшанда одамлар биздан жирканишмайдими?
- Дунё бирам яхши бўлиб кетарди!— деб хитоб қилди Чанда.
- Мен қизни бағримга босдим.
- Сукхрам, сен тушунмаганингни Чанда дарҳол тушунди, чунки у озод Ҳиндистонда ўсяпти. Биз бирорвга бош эгмайдиган замонда яшаяпмиз. Мамлакатимиз озод бўлди, аммо ўз уйимиздаги ифлосликни тозалаб олганимизча йўқ.

## 29

Сукхрам ҳикоясини давом эттириди.

Эндиликда Сукхрам хизматкорларнинг форма кийимини, Қажри эса сари кийиб юришяпти. Уларнинг ҳаёти тубдан ўзгарди. Ҳизмат қилаётганлари мэм саъбнинг исми Сусанна экан. Бу Киплинг китобларини ўқиб тарбияланган мағрур, ўзига бино қўйган қиз эди.

Сусаннанинг отаси жаноб Сойер бу ерга рожанинг юрт бошқаришини кузатгани келган. Рожанинг устидан кўпгина шикоят тушган, норози бўлган деҳқонлар исён чиқаришларига оз қолган, шу важдан вице-қирол князликка ўзининг ишончли одамини юборишга мажбур бўлган. Вице-қирол жаноб Сойернинг тажрибасини, эпчиллигини, маҳаллий князлар билан чиқиша олишини жуда қадрлар эди. Бундай пайтларда сиёсий агент князликда асосий ҳукмдор бўлиб қоларди, ҳукмдорлик мавқеинга эга бўлган леди ҳолати Сусаннанинг бошини айлантириб қўйганди. Қиз «Қамо грядеши»<sup>1</sup> ўқиганидан кейин ўзини атрофини жоҳил бутпарастлар қуршаб олган христиандай деб билди. Фарқи шундаки, Рим бутпарастлари патрицийлар бўлган. Ҳиндистон бутпарастлари эса қуллар. Пьер Луннинг «Афродита»<sup>2</sup>сини ўқигач, ўзини соҳибжамол Крайсисга<sup>2</sup> тенглаштириди, атрофида айш-ишрат, бузуқ йўлга юриш ҳокимдай бўлиб туюлди. Сусаннанинг назарида Англия бошқа оламдай бўлиб қолди.

<sup>1</sup> «Қамо грядеши» — машҳур поляк ёзувчиси Генрих Сенькевичнинг (1846—1916) романи. Асарда христиан итоаткорлиги билан бутпарастларнинг ҳаётга муҳаббати қарама-қарши қўйилади.

<sup>2</sup> Крайсис — француз ёзувчиси ва шоири Пьер Луннинг (1870—1925) романи бош қаҳрамони, ҳайкалтарош Дмитриоснинг маъшуқаси, ишратбоз аёл:

У ерда клублар бор, у ерда базмлар, ҳашаматли зиёфатлар уюштирилади, ҳамма одамлар ўзларини тараққиётга эришган деб ҳисоблайди. Бу ерда бирорлар ҳукмдорлик қилишади, бошқалар улар олдида бўйин эгиб туришади. Кимки бош кўтаришга интилса, отаси дарҳол буни бостиради. Қиз Ребеккнинг «Айенга»сини хотирлаб, унинг тақдири ҳақида соатлаб ўй сурарди. Тоднинг «Рожастон»<sup>1</sup>ини ўқигач, рожпутларнинг ботирлигини европалик рицарлар жасурлиги билан таққослар, атрофида содир бўлайтган воқеаларга назар ташлаб ҳайрати ошар эди. Унга ҳамма Рим патрицийсининг қизидай муомала қилишарди. Сусанна пайдо бўлиши биланоқ унга эгилиб таъзим бажо келтиришарди.

Ўтмишда шу одамлар ҳам қаҳрамон бўлганми? Қизнинг ҳатто уларга раҳми ҳам келди. Борди-ю, бегона юрт одамлари Англия устидан ўз ҳукмронлигини ўрнатса, наҳотки халқ уларга қарши қўзғолмаса, наҳотки қуллик сиртмоғида қолса?

Сусанна кишига ёрқин ҳамда қувноқ орзулас одат бўлган, ёшлиги гул-гул яшнаган бир пайтда яшарди.

Сусаннани қаршисида ёйилиб ётган мамлакатнинг ўзига хослиги ҳайратга соларди. Қиз дастлаб пайқаган нарса шу бўлдики, бу ердаги ҳаёт ватандошлари мақтаб, таъриф-тавсиф қилгандай енгил ва оддий эмас эди. Клайв<sup>2</sup>—пасткаш, ёлғончи одам. Лекин у империя барпо қилди, шу билан улуғ одам бўлди. Эҳтимол, у инсонпарварлик каби одамийлик қиммати жиҳатидан эмас, балки Англиянинг назаридагина улуғ одамдир. Йўқса истаган золимни буюк деб ҳисоблашга тўғри келган бўларди.

Сусанна айвондаги креслога ўтириб олиб кун ботишини кузатишни ёқтиради. Бундай пайтларда қулоқларида Карлейлнинг<sup>3</sup> «Ҳиндистон абадий бизники бўлмаса-да, Шекспир ҳамиша бизниклигича қолади», деган сўзлари жарангларди.

— Сукхрам, эртак айтишни биласанми?— деб сўради Сусанна Сукхрамдан.

— Оз-моз биламан, хоним,— деди ҳурмат билан.

Сусанна жасур кишиларни ҳурмат қилар, шу важдан Сукхрамни бошқа хизматкорлар қаторига қўшмасди.

«Бу одам албатта довруғ таратган бўларди»,— деб ўйларди қиз. Лекин у инглиз бўлиб туғилмаган, Сукхрам кўпроқ қиз

<sup>1</sup> «Рожастон»—инглиз тарихчиси Жеймс Тоднинг—«Рожастоннинг ёки Ҳиндистон Марказий ва Гарбий рожпутлар князлиги штатларининг афсона ва мифларин номи билан машҳур бўлган уч томлик асари.

<sup>2</sup> Роберт Клайв (1725—1774) — Ҳиндистон истилочиларидан бири 1756—1767 йилларда Бенгалия губернатори бўлган.

<sup>3</sup> Томас Карлейль (1795—1881) чөмис идеализми таъсирида бўлган инглиз ёзувчиси, тарихчиси, файласуфи. У «қаҳрамон»ларни шарафлаб, халқ оммасини писанд қилмаган.

кўнглида ўзи қўлга ўргатиб олган ёввойи йиртқичга ўхшаб кетарди.

Сусанна Сукхрамдан Ҳиндистон тўғрисида кўп маълумотларни сўраб, билиб олишни яхши кўрарди. Сукхрам унга батафсил жавоб беришга уринар, аммо олинган жавоблардан Сусанна қониқмасди. Чунки Сукхрам саводсиз киши эди.

— Хоним тилимизни тездагина ўрганиб олган эканлар,— деб ҳаваси келди Сукхрамнинг.

— Ким яхши гапиради: менми ёки отамми? — деб қизиқсинди қиз.

— Мэм саъб, буни билмайман,— Сукхрам тўғри жавоб беришдан бош тортди.

— Айтгани қўрқяпсанми?

Сукхрам жилмайиб ерга қаради.

Сусанна кулди.

— Хоним, жуда кўп ўқиган бўлсангиз керак?

— Бажонидил ўқиганман. Ҳиндистон ҳақида кўп нарса билишни истайман. Мамлакатинг ҳақида бирон-бир қизиқарли нарсани ҳикоя қилиб беролмайсанми?

— Хоним, мен тушунмаган одамман,— деб жавоб қилди Сукхрам. Кейин Англиядаги ҳамма инглиз тилида гапиришади дейдилар, шу ростми, деб сўради.

Қиз унга афсус-надомат билан тикиларди ва ўзинча инглизчасига алланималарнидир пичирларди.

Карнат ёш мисс ёнида ўтириб, қиз билан бемалол гаплашашётганини кўрган отасининг секретари ўзини қўярга жой тополмай қоларди. Чунки у Читрагупта<sup>1</sup> авлодидан бўлиб, карнат жаннат сари элтувчи зиннапоядан кўтарилаётганини кўриб ҳассаддан куйиб ўлгундай бўлаётганди. Агар ёш мисс ўзига ҳам шу қадар марҳаматли бўлганида эди, яхшигина манфаат кўриб қолар, аллақачонлар уйига тош айвон қурдириб олган бўларди. Лекин у бирон-бир ўзгариш ясашга ожиз эди.

Сусания Сукхрамдан хурсанд эди. Қиз истаган баҳона билан унга одам юборар, ўз ишларини фақат ўшангагина буюрарди. Қолган хизматкорлар қизга лаганбардорлик қилишар, унинг эса бундан жаҳли чиқарди.

Баъзида қиз отга минар, Сукхрам эса от жиловидан ушлар, икковлари сайр қилгани жўнашар эдилар. Улар кўпинча тоғда бўлишарди, аммо қоронғи тушмасдан уйга қайтишар эди. Кўз қорайиши билан Сукхрам Сусаннанинг уйидаги катта лампани ёқар, қиз китоб ўқишига тушарди. Сусанна тушликни одатда отаси билан бирга баҳам кўрарди. Сукхрам баъзида бир ўзи

<sup>1</sup> Читрагупта — мифологик персонаж, ажал худоси Яма ҳузуридаги гуноҳларни ҳисобга олувчи амалдор.

ёлриз, баъзида Қажри билан бирга уларга хизмат кўрсатишарди.

— Сукхрам, анови қалъани ким қурган? — деб сўраб қолди Сусанна отда сайр қилиб юрган кунларидан бирида. Сукхрам чўчиб тушди. Инглиз қиз қалъага астойдил тикилиб туриб деди. — Унинг бир томони битмай қолибди, тўғрими? Уни ким қурган?

— Рожа Аммолсинх,— хоним,— деди Сукхрам. Юраги тез-тез ура бошлади: қиз унинг авлод-аждодларини сўрайяпти, у эса ана шу рожа авлодидан эканлигини айтольмаяпти. Айтганидан нима фойда? Қиз унга ишонармиди?

Бу сұҳбат уни ҳаяжонлантириб юборди. Хоним сайдан қайтиб келиб ҳам чала қолган қалъани унутмади.

— Сукхрам, ана шу қалъа тарихини менга гапириб бергин,— деб илтимос қилди қиз кечқурун.

Сукхрам яна унинг ҳамма саволларига жавоб беришга мажбур бўлди.

У тҳакурани тўғрисида нима билса ҳаммасини айтиб берди, ҳатто унинг портретини ҳам кўрсатди.

— Буларни нега айтиб берасан? Нега? — деб қичқирди Қажри ўша оқшомда.

— У шуни хоҳлади-да.

— Мени у рожа қилади деб ўйларсан? — ачитиб масхара қилди Қажри.

— Нега хурсанд бўлиб кулмаяпсан?

Қажри бошини эгди.

— Мени оқ танли хотинга уйланиб олади деб ўйладинг шекилли? — деб сўради Сукхрам.

— Мени кечир! — Қажри унга илтижо билан назар ташлади. — Ахир менга ҳеч вақони гапириб бермаяпсан-да.

— Эсипаст! Улар жаноблар-ку! Шунаقا хаёлга боргани уялмадингми?! Улар зодагон, аслзода одамлар-ку.

— Аёл киши инглизми, браҳманми ё натними, барибир, ҳамиша эркак кишигига интилади...

— Ёлғон!

— Ёлғонми? Нега бўлмаса тҳакурани энанг хизматкори билан дон олишган? Эҳтимол, инглиз қиз менга ёқмаяпти дерсан?

— Ёқади. Унинг тузини ичиб туриб ўзини ёмон дейишга қандай тилим боради?

— Сен чиндан ҳам тҳакурсан, мен эса ҳақиқий натни! — деб хитоб қилди Қажри унинг обёқларига эгилиб. — Мени кечир.

Сукхрам хотинини турразиб бағрига босди.

— Сукхрам! — деб чақириди бир куни Сусанна ва стол устидан тҳакурани портретини олди.

— Лаббай, хоним.

Сусанна креслога, Сукхрам одатдагидай полга ўтирди. Қиз индамас, унинг кўзлари яrim юмуқ эди. Сукхрам чидам билан кутиб турди.

— Ҳиндулар киши ўлгандан кейин яна қайта туғилади деб таъкидлашади, шундай эмасми?— деди қиз.

— Худди шундай, хоним,— ажабланиб тасдиқлади Сукхрам.

— Шунга ишонасанми?— деб сўради Сусанна. Унинг кўзи ҳамон яrim юмуқ эди.

— Ҳамма ишонади.

— Тҳакурани ҳам қайта туғилганми?— деб портретни кўрсатди қиз.

— Ким билсин, хоним. У киши рани бўлган. Сиз ҳам рани. Шундай бўлган-бўлмагани ўзингизга аёнроқ.

Сукхрамга титроқ кирди. Бунаقا нарсаларни гапириш у ёқда турсин ўйлашга ҳам юраги бетламас эди.

— Киши ўлгандан кейин нега қайта туғилади?

— Хоним, киши гуноҳию хайрли ишларига кўра сийланади. Борди-ю, олдинги ҳаётида ниятлари амалга ошмай қолган бўлса, уни рўёбга чиқариши учун қайта туғилади...

— Сен кўҳна қалъадаги хазинани ҳеч кўрганмисан?— деб унинг гапини охиригача эшийтмай сўраб қолди Сусанна.

— Йўқ, хоним,— деди Сукхрам қизга ҳадик билан қараб.

— Мени ўша ёққа олиб борасанми?

Сукхрамнинг қўрққандан эти жунжикиб кетди.

— Қўрқаман,— деди у.

— Нимадан?

— Хоним, у ер жуда хавфли жой...

— Сен ахир довюраксан-ку.

— Хоним, сиз қўрқишингиз мумкин...

— Мен-а?!— Сусанна кулиб юборди.— Ҳеч қачон! Мен ҳеч нимадан қўрқмайман.

— Хоним,— деди Сукхрам.— Рожанинг отаси ҳаётлик пайтларида Германиядан бир соҳиб келиб хазина қидирган. У ҳатто қалъа ичига ҳам кирган. Аммо у ерда уни худолар урган: эртасига эрталаб Германиясига қочиб кетган.

— Мен билан бирга борасанми?— деди Сусанна дадил креслодан тураркан.

— Бораман, хоним,— деб жавоб берди Сукхрам гарчи овози титраётган бўлса-да.

— Қўрқяпсанми?

— Ҳа, хоним.

— Нега?

— Хоним, у ерда йиরтқич ҳайвонлар бор.

— Ўзимиз билан қуролланган одамларни оламиз.

Қизнинг тасаввурида ҳинд рожаларидан бирининг битмас-туганмас бойликлари намоён бўлди, шу бойликка эга бўлишга ошиқди. Ана ўшанда у вице-қирол ёнидан ўрин олади, номи бутун Англияга ёйлади. Сукхрамни бошқа фикрлар безовта қиласди. «Тҳакурунининг руҳи қизга ўтди»,— деб ўйлади у. Чала қолган қалъага эга бўлиш орзуси ўзинга насиб этмаслигини ҳис этди, тақдирнинг бундай ўзгариб кетишидан жуда ҳайрон қолди.

Сусанна аллақачон кетган бўлса ҳам Сукхрам хона ўртасида ҳамон хаёл оғушида эс-ҳушини йўқотганча турарди. У уйқудаги одамдай хонасига қайтиб келди, Кажрига эътибор бермай каравотига узала тушиб ётди.

— Нима бўлди?— деб сўради Кажри.

— Ҳеч нима,— Сукхрам шу заҳоти хотинини чақирди. Хотини хонага кириши билан:— Кажри,— деди у.— Анови қизинглиз эмас, у тҳакуруни экан! Нима деганимга тушундингми?

— Тҳакуруни дейсанми?

— Ҳа, у инглиз қиз эмас, тҳакуруни!!! Тҳакуруни!

Бу сўзлар Кажрининг қулоқларida бўғиқ акс садодай янгради.

— Нега унақа дейсан?— ишонқирамай сўради у.

— Үзим билмайманми?

— Қиз билан гаплашдингми?

— Ҳа.

— Нима ҳақда?

— У хазинани қидираётганини айтди.

— Ахир у хазина борлигини сенинг оғзингдан эшитган-ку,— деб кулди Кажри.

— Майли, шундай бўлсин. Аммо унинг ўзи буни тан олди...

— Тҳакуруни эканлигиними? Бу қанақаси?

Кажрининг овозидан истеҳзо оҳангি баралла янгради, бу Сукхрамга оғир ботди. Лекин эри индамади, фақат Кажрига раҳминг келсин дегандай назар ташлади. Эрининг ташвиш тўла кўзлари Кажрининг кўнглини эритди. Сукхрамнинг ожизлиги, ўзини бутунлай йўқотиши Кажрида бу улкан гўдакка ачиниш ҳиссини уйғотди. «Бундай пайтларда ундан нима умид қилиб бўлади?— деб ўйлади.— Унинг ақли қаёққа кетади».

— Эҳтимол шундайдир.— деди Кажри, у ҳорғин ҳолда эрининг ёнига ётди.

— Мени юпатмоқчи бўляпсанми?— дея сўради Сукхрам.

— Сени юпатяпманми ё ҳақиқатни гапирипманми мен қаёқдан билай?

Кажри елка қисди:— Эҳтимол, тўғридир! Ким билсин? Буларнинг ҳаммаси Раманинг иши. Қаерда ёруғлик, қаерда қоронғилик бўлишини у ҳал қиласди. Раманинг ўзи яратиб, ўзи-

яксоң қиласы. Унинг ниятини билиб бўлармиди? Эҳ, гўдакки-  
нам, бизда нима ҳам бор эди? Қозончамиз қўлимиизда, таёфи-  
миз қўлтиқда, уч олам қўйнимизда. Ҳар учала оламда — жан-  
натда ҳам, ерда ҳам, дўзахда ҳам дайди итмиз... Сенга нима  
бўлди ўзи?— У эрининг бошини ушлади.

\* \* \*

Эрталабки чой пайтида Сусанна отасига:— Дэдди!— дея  
мурожаат қилди.

— Лаббай,— деди у қип-қизил синги бўлиб пишган ионни  
чайнаркан.

— Бу ердаги қалъада битмас-туганмас хазина сақланади  
деб айтишяпти.

— Ҳамма европаликларга теккан касал, Осиёда уларнинг  
кўзлари нуқул хазинага тушади,— деб қулди Сойер.

— Мендан куляпсан-а!— таъна билан отасига хитоб қилди  
Сусанна.

— Сен аслзода хонимсан, бу ерларга анови ёввойиларни  
бошқариш учун келгансан,— деди чол насиҳатомуз оҳангда  
қизига оч мовий кўзларини тикиб. Сусаннанинг отаси бўйни  
йўғон, соchlари тушиб кетган барвастагина одам, бошининг ор-  
қа томони ва чеккаларидагина оз-моз соч қолган. Ажин босган  
қип-қизил юзидағи офтобда куйган қошлари аранг билинади.  
Юпқа лаблари устида осилиб турган бурнининг учиди ортиғи  
бор. У секин гапиради, сариқ тишларини кўрсатиб камдан-кам  
кулади. Унинг юриш-туришида ҳанузгача қиролича Виктория  
замонасида олинган тарбия белгилари сақланаб қолган.

Сусанна отасининг гапини уқмади.

— Бу ерликлар фирт саводсиз, жоҳил одамлар,— деди отаси.

— Аммо Сукхрам қалъада беҳисоб хазиналар бор деб айт-  
япти, ота.

Бу сафар чол кулмади.

— Унинг хазинаси хомхаёллик меваси,— деди чол жиддий.—  
Ҳиндистоннинг ҳар қарич ери чиндан туганмас бойлик. Улар  
ана шу ерга ишлов беришаверсин, хазинамизни бойитаверишсин.

Отасининг фикрлари Сусаннага ёқмади.

— Қизим, улардан ўзингни эҳтиёт қилгин,— деди у яна.

— Лекин у яхши одам,— эътироz билдириди Сусанна.

— Тўғри. Аммо унга ўзингга тенг одамдай муомала қилма.  
Англиядаги истаган қашшоқ одам энг аслзода ҳиндан ҳам юқо-  
ри туради,— деди чол виқор билан. Сусаннанинг назарида ота-  
сининг боши узра Британия байроби ҳилпирагандай бўлиб кетди.

— Таракқиётга эришган олам бизга ҳавас қиласи,— деб ўз  
фикрини жонлантира бошлади чол.— Америкаликлар демокра-

тия ҳақида қичқиришади, чунки ўзлари инглизларнинг қули бўлишган. Ҳозир улар ким?— дея савол ташлаб, ўзи жавоб берди.— Майда дўкондорлар! Биз савдогармиз, бунинг устига ҳукмдормиз ҳам. Биз Ҳиндистонни ақл-заковат ҳамда қилич билан бўйсундирдик. Сукхрам сенинг хизматкоринг, унга ўргатилаётган ҳайвонга қилгандай муомала қил. Ҳинд қанчалик яхши бўлмасин, унга асло ҳам бизга ўхшаган одам эканлигини сездирма, бўлмаса улар бизни ҳурмат қилмай қўйишади. Биз ҳиндиларга даҳшат солиб турмогимиз даркор. Бу ердаги одамларда феодализм руҳи кучли, ҳукмдорга бўйсуниши хислати уларга хос одат, улар одамлар ўртасида бошқача муносабатлар бўлиши мумкинлигини хаёлларига ҳам келтиришмайди. Шаҳарлардаги маърифат кўпчиликда ўз қадр-қимматини тушунишдек онгни уйғотиб қўйди — ўша жойларда исёнлар бўляпти. Лекин ўша одамлар бизгacha ҳам қул бўлишган, биз мавжуд ҳолатни мустаҳкамлаб қўйдик холос, натижада ҳиндиларнинг ҳукмдорлари ҳам ўз қулимизга айланаб қолди. Князликлар дейсанми? Эртами-кечми улар ҳам инглизларники бўлиб қолади.

Сўсанна отасига зўр қизиқиш билан боқди.

— Инглиз ватанпарвар бўлиши шарт, акс ҳолда Англиянинг улуғворлигига путур етади,— деб давом этди у.— Нима ҳам қиллардик, Дальхаузиздан<sup>1</sup> кейин қўл-оёқларимиз боғлиқ бўлиб қолди. Ҳозирга келиб ҳеч кимни ўлдиролмаймиз ёки тахтдан тушира олмаймиз. Лекин ҳиндларда куч-қувват йўқ. Конгресс партиясининг таъсири ўсиши билан рожалар ҳукмдорлиги шу қадар бўшашдик, улар фақат бизга умид боғлашяпти.

— Нега?

— Чунки ҳалқ уларни қўллаб-қувватламаяпти.

— Лекин шундай бўлса ҳам улар идора қилишяпти-ку. Нега бўлмаса революция ўти аланг олмаяпти?— деб сўради қиз.

— Эҳ, қизгинам!— хитоб қилди Сойер.— Бунинг учун ақлкерак, бу ердаги одамлар фақат тақдирга ишонишади, холос. Қизим! Осиё ўз оти билан Осиё-да! Бу эшаклар князлар зулми остида эзиляпти, лекин шунга қарамай княз зотини ҳурматлашади. Қаердадир конгрессчилар ҳукумати тузилибди, бу ердаги дўкондорлар ҳам бош кўтаришяпти. Франциядаги қуий қатлам аҳоли қандай қўзғалганидан хабаринг бор-а. Аммо бу ерда ҳалқ ҳеч қачон ҳокимият тепасига келолмайди, ҳеч қачон. Улар ўз

<sup>1</sup> Дальхаузи, Жејмс Эндрю Рамсей 1812—1860) — инглиз лорди, Ҳиндистоннинг генерал-губернатори, Дальхаузи ўтказган анексия сиёсати мамлакатда сиёсий тенгликни бузган. Инглизлардан ҳинд ва мусулмон ҳукмдорлари норози бўлишган. Ҳинд дәхқонларига оғир солиқлар солинган. Бу 1857—1859 йиллардаги миллий қўзғолонга олиб келган. Бундан ниҳоятда қўрқиб кетган инглизлар кўп соҳада ён беришга мажбур бўлишган.

табақаларига маҳкам ёпишиб олишган. Биз эса бундан фойдаланиб қоялпмиз.

— Лекин бу мумкинми...— Сусанна отасининг сўзини бўлди-ю, гали оғзида қолди.

Сойер қизига савол назари билан тикилди.

— Бу ҳол қачонгача давом этади деб сўрамоқчи эдим.

— Англия дengизларга ҳукмдор бўлиб тургунча.

— Гитлер эса Германияда ҳукмдор бўлиб тургунча, а?

— У бизга ҳавас қилиши мумкин, холос. Қўлимиздан келса, уни Россия билан тўқнаштириб қўямиз, улар бир-бирларини йўқ қилишади. Энг даҳшатли душманимиз — Россия. Қизим, худо баҳtingни берсин,— деди инглиз фарзандига меҳр билан боқиб.— Энди қиладиган ишим бор.

\* \* \*

Жаранглаб соат ўн бирга занг урди.

— Вой, вақт мунчаям кеч бўлиб қолибди!— Сусанна эснади.

— Сув берайми, хоним?

— Бер.

Кажри стаканда сув берди. Сусанна сал кўтарилиб, озгина сув ичди-да, яна ётди.

— Хоним, бирам яхшисизки,— деди Кажри.

— Ростдан-а?

— Сиз ранисиз, бироқ қўлимдан сув олиб ичгани ҳазар қилмадингиз.

— Биз ҳамманинг қўлидан еб-ичаверишимиз мумкин, фақат овқат покиза бўлса бас.

— Хоним, энди мен ҳар куни ювиняпман. Хоним... Менга биттагина совун беринг. Эртага совун билан ювениб ҳузурингизга келаман.

— Наҳотки совунинг йўқ бўлса? Унда бошларингни нимада юvasизлар?

— Мультан лойи<sup>1</sup>, совуни ёнгоқ ёки қатиқ билан. Хоним, энди озода уйда яшаяпман, бошимни лойда ювмайман,— деди Кажри болаларга хос соддалик билан.— Совунингизни олсан майлими?

— Олавер,— деб кулимсиради Сусанна.

— Раҳмат, сизга! Худо сизга кўнглингиздагидай куёв ато қилсин, болаларингиз ой юзли бўлсин, ниҳоятда баҳтиёр бўлинг,— деди Кажри хурсандлигидан энтика-энтика, сўнг Сусаннанинг оёқларига йиқилди.

<sup>1</sup> Мультан лойи — алоҳида навдаги ёғли лой бўлиб, аҳолининг энг камбағал қатлами аёллари унда бош юнишади.

Кажри уйига қайтиб келди. Сукхрам каравотда ётарди. У со-  
вунни Сукхрамнинг боши томонга қўйди.

— Ўғирладингми?— деб сўради Сукхрам.

— Бориб шикоят қилгин,— Кажри тўнгилләди.— Қўрқиб  
бўпман. У ярамас Сусанна совунда ювинади-ю, мен ювина ол-  
майманми?

\* \* \*

Қари соҳиб эрталабга яқин дарахтларнинг кўм-кўк қалин  
барглари орасидан қуёшнинг илк нурлари мўралаётган пайтда  
келди. Сойер дарвозага яқинлашди, Сукхрам мотор овозини  
эшишиб, чолни кутиб олиш учун шошилди.

Ошпаз дастурхон тузади, Кажри унга кўмаклашди.

— Ота, назаримда ишинг сенга анча оғирлик қилаётганга  
ўхшайди,— деди Сусанна нонушта пайтида.

— Шу ишдан манфаатдорман. Князлиқда нотинчлик, эҳти-  
мол, сенинг қари дэддинг яқин йиллар ичидагенерал-губерна-  
тор<sup>1</sup> ҳузурида алоҳида топшириқлар бўйича амалдор бўлиб  
қолар.

— Wonderful!<sup>2</sup>— хитоб қилди Сусанна. Севинганидан кўзла-  
ри чақнаб кетди.

— Аммо бу иш режам амалга ошмасдан илгари бўлмайди.  
Мен князлиқда бошқаришнинг янгича усулини жорий этмоқчи-  
ман.

— Хўш, кейин-чи?

— Омон бўлсак кўрамиз. Ҳозир замон вазмин. Конгресс таъ-  
сири ҳатто князликларда ҳам кучаймоқда.

— Аллақачонлар тартиб ўрнатиш керак эди,— деди Сусан-  
на.— Конгрессчи ҳукуматни<sup>3</sup> тарқатиб юборсаларнинг бўлмай-  
дими? Ушанда ҳаммаси ўз жойига тушарди. Бу ёввойилар  
бирон-бир нарсани тушунишармиди? Гитлер шундай йўл тутди-  
ку!— деди қиз.

Чол кулиб юборди.

— Британия қонуни ҳаммасидан афзал. Биз унақа йўл ту-  
толмаймиз.

— Нега энди?

<sup>1</sup> Генерал-губернатор — баъзида Ҳиндистоннинг вице-қироли шун-  
дай деб аталади.

<sup>2</sup> Wonderful — жуда соз.

<sup>3</sup> Конгрессчилар ҳукумати — «Ҳиндистонни бошқариш тўғриси-  
да» (1937 йили) қонун чиққандан кейин мамлакатнинг ўн битта штатида про-  
винциал автономия тузилган. Ҳиндистон миллий конгрессига сайловлар ўтган-  
дан сўнг мамлакатни тўққизта провинция ҳукумати бошқарар эди.

— Чунки бутун Германия Гитлер томонида эди. Бизни эса фақат маҳаллий рожалар қувватлайди, халқ бизга қарши,— деб жавоб қилди у.— Бу ернинг рожаси бекорчи, майшатпарат одам. Англияда икки марта бўлган, у ердан Францияга қочиб ўтиб, ҳамма пулини айш-ишрат учун совурган.

— Нега уни олиб ташламайсизлар?

— Унинг ўрнига бошқа одамни — рожани ўзининг узоқ қариндошини тайёрлайпмиз. Эҳ, шу рожани ўзининг ўғли бўлганида эди, иш хамирдан қил суургандай осон кўчарди-да...

Сусанна бу ерлик рожа нима учун фарзандсиз эканлигини ҳозир отасидан сўрашга ўнгайсизланди, яхиси буни у Сукхрам ёки Кажридан кейинроқ билиб олади. Нонушта охиригача қизча падарига ҳеч қандай савол бермади.

Чол кетиб, уйда осойишталик ҳукм сургач, Сусанна бориб айвондаги креслога ўтириди, газетага кўз юргутириди, уни бир четга қўйиб, Сукхрамга одам юборди. Ў келиб, қизнинг ёнига полга ўтириди.

— Бекам, мени чақирдиларми?— деб сўради у.

— Ҳа,— деди Сусанна.— Сен рожани яхши биласанми?

— Қайси рожани, хоним?

— Ўз рожкангни-да.

— Мен камбағал одамман, махарожани қаёқдан билай?

— Шунақами?— деди ҳафсаласи пир бўлган Сусанна.

— Унинг қасрини кўрганмисан?

— Ҳа, кўрганман, хоним. Кўча томондан кўрганман, холос.

— Ўнинг ўзи ҳақида ҳеч нарса билмайсанми?

— Хоним, у бизнинг ҳукмдоримиз эканлигини биламан, холос.

— Бўпти, кетишинг мумкин. Кажрини айтиб юбор.

Кўркувдан ўтакаси ёрилиб Кажри етиб келди.

— Хоним! Ў менга түхмат қилибди. Совунни ўзингизнинг ижозатингиз билан олганман...

— Нималар дэяпсан?— деди ҳайрон бўлиб Сусанна.

— Совунни айтаяпман, хоним!— деди Кажри.— Совунни олиб кирсам Сукхрам уни ўғирлагансан, ўғрисан деб айтди.

— Бунга чақирганим йўқ,— деб кулди Сусанна.— Мана бу ерга ўтири.

Кажри итоаткорлик билан ўтириди.

— Рожани биласанми?

— Вой-вой-вой, бегойим! Рожани қаёқдан биламан?— деди Кажри бидирлаб.— У катта одам, мен эса натни. Мендақа лўли аёллардан юзлаб бор, рожанинг чўриси бўлишга ҳам арзимаймиз. Чўриликка ҳам хушрўй, оқбадан аёлларни олишади.

— Нега энди?— ўзини ўта бепарво туттиб сўради Сусанна.

— Бундай улуғ жаноб ҳақида мендақа натнининг гапира

олиши йўл бўлсин! Лом-мим дейишга ҳаддим сиғмайди. Бунинг устига ҳали куёвга чиқмаган қўзиз. Унинг ҳақида сиз билан гаплашолмайман.

— Рожа неча марта уйланади?

— Хоним, буни бирор билармиди? Рожа жуда катта одам. Унинг саройидаги амалдорларининг ҳам кўплаб хотинлари бор. Хоним, сизлар ҳам катта одамсизлару сизларда ҳам шунақадир?

— Йўқ, бизда эркак кишининг фақат битта хотини бўлади,— деб жавоб қилди Сусанна.— Агар у иккинчи маротаба уйланадиган бўлса олдинги никоҳни бекор қилиши керак.

— Э худойимей!— хитоб қилди Кажри.— Бутунлай натларнига ўхшар экан. Илгари эркакларимизнинг бир неча хотини бўларди, аммо эндиликда, хоним, битта ҳам хотини йўқ эркаклар бор. Биз кимни севсак ўша билан яшаймиз. Янгиси ёқиб қолса аввалгисини ташлаймиз. Бироқ олий табақаларда бунақа эмас. Уларда ҳар бир эркакка кўплаб хотин бўлади. Ўша хотин шўрликларнинг баъзилари эрининг қанақалигини тузукроқ кўришга улгурмай умрини ўтказади. Бордию, бошқа бирор билан гап-сўз бўлиб қолишиша, уларни табақадан ҳайдашади, динидан ҳам маҳрум қилишади. Хоним, уларнинг аҳволи оғир. Олий табақада бўлиш аёл киши учун кони азоб.

Сусанна Кажрининг гапларини эътибор билан эшилди.

— Яна бир гап, хоним, агар рожанинг бирон-бир жойда чиройлироқ аёлга кўзи тушиб қолса, уни дарҳол тутиб келтиришга буюради. Аёл розими ё йўқми, уни ҳеч ким суриштирмайди! Рожа фақат сизлардан қўрқади, холос. Сизлардан ҳамма қўрқади, хоним,— деди Кажри бошини силкитиб.

— Осиё, Осиё, ёввойи, сирли Осиё!— деб юборди Сусанна бир оз жим тургач сўраб қолди:— Рани нима қиласади?

— О, хоним, рани ҳеч нима қилмаслиги керак! У фақат буйруқ беради холос.

Сусанна Крайсисни хотирлади. У соҳибжамол ҳам ҳокимиятпарастликни яхши кўрарди! Ҳа, мана шунақа аёлларгина Ҳиндистонда, бу ерда яшайди!

\* \* \*

Сусанна кенггина диванда бағрини ёстиққа бериб, оёқларини ўйнатиб ётарди. У эгнига торгина шим, қайтарма ёқали хушбичим кўйлак кийиб олган. Соchlари кўзигача тушиб қолганди, қиз очиқ айвонда мана шундай алпозда ётиб китоб ўқишини ёқтиради.

Дарвоза ёнига каттагина автомобиль келиб тўхтади. Сукхрам машина эшиги ёпилганини эшитиши билан ўша томонга чопиб

чиқди. Автомобилдан нотаниш инглиз йигит тушди. Сукхрам унга эгилиб таъзим қилди.

— Соҳиб уйдами?— деб сўради инглиз йигит.

— Тақсирим сафарга жўнаб кетгандилар,— деди Сукхрам ҳадик билан.

Инглиз йигит дадил уйга кирди. У кирганида Сусанна паришонхотирлик билан китоб варақларди, қиз уни кўриб кулимсиради.

— Лоуренс!— деб хитоб қилди Сусанна хурсанд бўлганидан.

Қиз кўришиш учун унга қўлни узатди. Йигит қизнинг қўлни қисди. Сусанна гапнинг жиловини кўййб юборди.

— Э худойим-ей, бу қандоқ мамлакат-а! Зерикишдан адоп тамом бўлдим! Эркак зоти йўқ, ҳеч ким йўқ! Хайрият, ўзинг келиб қолдинг! Бу ерда гаплашадиган одам ҳам йўқ! Келганинг жуда яхши бўлди-да. Қачон бўлмасин иссиқ мамлакатда учрашамиз деганинг эсингдами? Мана, учрашдик ҳам. Қадам ранжида қилганинг соз бўлди. Инсон зоти билан дийдор кўришишга анчадан бери зор эдим!

Лоуренс кулимсираганича қизга қараб туарди.

— Отанг қани?— деб сўради у.

— Отамми?— Сусанна диққати ошиб пешонасини тириштириди.— Буюк империя ишлари билан банд. Бу империяда нима ҳам бўларди?.. Дунёдаги энг яхши жой — Англиямиз. Бу ёввойларни маданиятга ўргатишдек дардисар ишни зиммасига олиб Англияга нима зарур экан-а? Зерикиш меъдамга тегди, жоним қийналиб кетди. Отамнинг билгани оффис, иш қофозлари солинган папкалар, рожа... Ҳаммаси қуриб кетсан!

Кажри Lourensga тикилди. У жим туарди. Сусанна дилидагиларнинг ҳаммасини йигит олдида тўкиб солаётган эди.

Бугун Кажри ясаниб олган, кайфияти ҳам баланд эди. У Lourensga қараб кулди. У бўлса бирдан қовоғини солиб олдй.

— Уйга кирайлик,— деди у Сусаннага.

Столга ўтиришгач, Lourenс виски шишасини очди ва Сукхрамга имо қилди. Сукхрам стол устига иккита қадаҳ қўйди. Шу пайт Lourenс Сусаннанинг лабидан ўпди. Сусанна хижолат чекиб кўзи билан Кажрини кўрсатди.

— Хўш, нима бўпти?— деди Lourenс инглиз тилида.

— Йўқ, Lourenс. Уларнинг олдида бундай қилиш ярашмайди. Улар нодон одамлар, кўп нарсани тушунишмайди, биз Англияда эмасмиз-ку.

Кажри Сукхрамга кўз қирини ташлади.

— Хизматкорим ажойиб хотин,— деди Сусанна бир оз жим тургач.

Улар вискини озгина-озгинадан ҳўплаб ичib ўтиришди. Лоуренс қисқа-қисқа, кам гапиради. Сусанна эса тинимсиз жаварди.

— Бегим, буюрсангиз соҳибнинг одамларини жойлаштириб келсан,— деди Сукхрам.

— Йес, йес,— деб маъқуллади Лоуренс.

Бунақа инглизча сўзларни Сукхрам ҳам биларди. У Лоуренснинг жавобини буйруқ ўрнида кўриб ташқарига чиқди.

— Бу йигит хизматкор аёлнинг эри, жуда ботир йигит,— деди Сусанна Сукхрам чиқиб кетгач.

— Буларнинг ҳаммасини беш қўлдай яхши биласанми?— деб ажабланди Лоуренс.

— Бошқа қанақа ҳам ишим бўларди? Ҳатто истаган итни таърифлаб беришим мумкин. Бирининг бўйнида қора холи бор. Бошқаси кичкина овчи итларга ташлангани ташланган. Жуда қопонғич, икки жойида сариқ холи бор. Малъун жуда хавфлида. Бироқ ола-була итларни учратганимча йўқ!— Сусанна шараклаб кулди.

— О!— деб Лоуренс ҳам кулимсиради.

— Нима ҳам қилардим? Қандай вақт ўтказишни билмайсан киши.

Сусаннанинг отаси келди. Лоуренс шошиб унга пешвоз чиқди. Улар саломлашишди. Сойер ҳамма вақтдагидай дилгир эди.

Сукхрам эшик орқасида турганидан уларнинг нима ҳақда гаплашганини эшитмади.

Кажри ошхонага кирди. Лоуренс унга кулимсираб нигоҳ ташлади, Сукхрамнинг бамбук дарпарда орқали бунга кўзи тушиди.

— Улар нима қилишяпти?— деб сўради Сукхрам Кажри қайтиб келганида.

— Қўйсанг-чи ўшаларни!— қўл силтади у.— Улар катта одамлар дегандинг. Анови йигит мени бақрайтириб туриб мэм саъбни бағрига босяти, ахир, у қиз бола-ку!

— Уларнинг жамоасида шунақа удум бор-да.

— Ана холос! Бунақа удум ҳатто натларда ҳам йўқ,— тўнгиллади Кажри.— Ана томошаю мана томоша! Анови йигит менга тикилиб қараганини сен бир кўрганингда эди!— деб кулиб юборди.

— Олдин ойна олиб башарангга боқ!— деди Сукхрам.

— Тилинг чиқиб қолибдими? Эҳ тентаквой, пахта термакка икки қўл, муҳаббатга эса розилик лозим,— деди Кажри.— Эҳ-тимол, мен розидирман? Қараб тур, кейин нима бўлишини кўрасан.

Сусанна тинимсиз жаварди. Лоуренс қулоқ солиб ўтиради. Кажри яқинлашиб, Сусаннанинг орқасида тик тураверди.

Лоуренс қачон Сусаннага кўз ташласа, унинг нигоҳи унга киприк қоқмай тикилиб турган Кажрига тушаверди. Лоуренс ҳатто ўзини йўқотиб ҳам қўйди. Кажри ташқарига чиқди.

— Кўрдингми? Энди нима дейсан? — деб Сукхрамга мурожаат қилди Кажри.

— Хўш, нима бўпти?

— Булар ҳам бошқалар қатори одам. Рожа ҳам одам. Улардан нега қўрқарканмиз?

— Қишлоқ одамлари қўрқанларидан уларнинг соясига ҳам салом беришади, — деди Сукхрам.

— Чунки уларни яхши билишмайди!

— Айтишларига қараганда Махатма Ганди улардан ҳеч ҳам қўрқмас экан.

— Шунинг учун ҳам у Махатма-да<sup>1</sup>.

Гандининг номини ҳатто Кажри ҳам биларди, унинг довруғи Ҳиндистоннинг ҳамма бурчакларига ёйилганди.

Кечки овқатдан кейин Сусанна патефон қўйди. Отаси ётгани кириб кетди, Лоуренс билан Сусанна алламаҳалгача танца тушиши.

\* \* \*

Эрталаб бир тўда деҳқонлар дак-бунгалога туташ территорияни тўлдирди, одамлар ғовур-ғувури шамолдай кучая борди. Улар катта соҳибининг ҳузурига ўзларини полиция зулмидан ҳимоя қилишини илтимос қилиб келишганди.

Соҳиб уларнинг олдига чиқди. Бугун у бутунлай қариганга ўхшаб кўринарди. Унинг орқасида Сусанна билан Лоуренс ҳам пайдо бўлишди. Кекса инглиз қуролсиз эди. У бир лаҳза жим қолган оломон қаршисида тўхтаб, одамларни эътибор билан кузата бошлади. Оломон тоқат қилиб кутар, чол эса ҳар бир одамнинг юзига тиканли назар ташларди. Баъзи деҳқонлар унинг нигоҳига бардош беришолмай ерга қараб олишди.

— Бу ерга нега келдиларинг? — деб сўради у шунда.

Ҳамма жим бўлди. Кейин битта-иккита одам, сўнг ҳамма бараварига тўлқинланиб бақира бошлади.

— Жим! — деб бўйирди полициячи. Оломон тинчланди.

— Биттадан гапиинглар, — деди Сойер, — шикоятларинг борми?

— Худди шундай, тақсир, — деди кимдир оломон ичидан. — Патвари<sup>2</sup> ижара шартномаларини чалкашириб юборибди. Энди нима қиласиз? Қандай тирикчилик ўтказамиш?

<sup>1</sup> Махатма — «улуг жон».

<sup>2</sup> Патвари — қишлоқ ҳисобчиси; мирза, қишлоқ маъмурларининг бошлиғи.

— Ер кимники?  
— Ҳукуматники, тақсир.  
— Мен текшираман. Яна бирон гапинг борми?  
— Тақсир, полиция бизга зулм ўтказяпти! — деб бир неча киши бараварига қичқирди.

— Қайси полиция? Рожанинг полициясими? — сўради у.  
— Худди ўнандай, марҳаматли тақсир,— деб жавоб қилишди оломон ичидан.— Полиция участкаси бошлиғи қизнинг тўйи учун солиқ йиғяпти... Тақсир, ҳукумат территориясида бунақа зўравонликка ўрин йўқ-ку...

— Тақсир,— деб инглизча мурожаат қилди каястх<sup>1</sup> табақасидан бўлган ўқитувчи.— Давлатимизда шер билан қўзи бир булоқдан сув ичишади, бу ерда эса ҳамма қонунларни жагирдор<sup>2</sup> жаноблари бир чеккага суриб қўйган, ўз билганича иш тутяпти.

Сойер бетоқатлик билан қошини чимирди.

— Бу ҳақда менга ҳеч нима маълум эмас,— деди у асабий ҳолда.— Буларнинг ҳаммасини менга ёзиб беринглар. Қаршиларингда қаққайиб тургани вақтим йўқ.

— Аммо марҳаматли тақсир, ҳеч ким арзимизни эшитмаяпти!

— Рожага мурожаат қилинглар. У арзларингни эшитади,— деб жавоб қайтарди Сойер.

Худди шу лаҳзада қуролланган полициячилар этиб келишди.

— Гап тамом. Тарқалинглар! — деб бақирди Сойер.

Оломон жимиб қолди. Одамлар ўзларига ўқталган милтиқларни кўриб олдинги дадилликларини йўқотиши ва тарқала бошлашди. Соҳиб кулимсиради. Лекин шу пайт боғ томонда тўпланган одамлар хитоби эшитилди:

— Яшасин Махатма Ганди!  
— Яшасин Неру!  
— Битсин инглиз ҳукмронлиги!  
— «Банде Матарам»<sup>3</sup>ни куйлаймиз!

Инглиз чол тишлигини фижирлатди.

— Буларнинг ҳаммаси конгрессчиларнинг иши... — деб полиция участкаси бошлиғи гап бошлаётган эди, Сойер унинг гапиришига йўл қўймади.

<sup>1</sup> Каястх — мирзалар табақаси вакили, бараҳманлардан кейин туради.

<sup>2</sup> Жагирдор — яхши хизматлари учун ҳукуматдан чек ер олган заминдор.

<sup>3</sup> «Банде Матарам» — «Салом, она Ватан» революцион қўшиқ бўлиб, уни 1873 йилда бенгал адабиёти классиги Бонкимчондро Чоттаподхай (1838—1894) ёзган.

— Йўқол кўзимдан, тўнғиз!

Полициячи жуфтакни ростлаб қолди. Сойер эса уйга қайтиди. муштини тугиб, ҳонада у ёқ-бу ёққа юра бошлади.

— Энди нима бўлади?— деб Лоуренсдан сўради уйга кирган Сусанна.

— Ҳеч нима бўлмайди, уларни тинчтишиади,— деди у жилмайиб.

Эртаси куни Сукхрамга иккита отни эгарлашни буюришди. Сукхрам одатдаги формасини кийиб олди, Кажри эса энг янги сарисини кийди. Қуёш уфққа бош қўйган, унинг нурлари қалин барглар орасидан аранг ўтарди.

Уйдан Сусанна билан Лоуренс чавандозлар кийимида чиқишиди. Сусаннанинг елкасида енгилгина ов милтифи бор эди. Лоуренс милтиқдан ташқари тўппонча ҳам тақиб олганди. Улар отларга минишиб йўлга тушишди. Сукхрам эса яёв илдам қадам ташлаб уларнинг ёнида борди.

— Мёни кутиб тур!— деб қичқирди Кажри, лекин Сукхрам тўхтамади. Кажри унга югуриб етиб олди.

— Сен қаёққа?— деб сўради ундан Сусанна.

— Хоним, мен ҳам сизлар билан бораман,— деди Кажри.

Лоуренс инглизчасига бир нима деган эди, Сусанна кулиб юборди.

Отлиқлар дарвозадан ташқарига чиқишиди. Чанг йўлдан ҳўкизларини ҳайдаб дехқонлар қайтарди. Улар ниҳоятда оч бўлганиларидан уйларига шошилишар, ўзларининг ҳам, қийналган ҳайвонларнинг ҳам нафсига ором бериш пайида эдилар.

Күшлар қувноқ сайрашиб, тўда-тўда бўлиб инларига қайтишарди. Улар гоҳ пастга ўқдай шўнғишар, гоҳ ҳавода доира ясаб, равон, чиройли парвоз қилиб, сўнг астагина қўнишарди. Йироқ-йироқларда мовий, улуғвор тоғлар кечқурунги қоронғилик бағрига аста-секин чўкарди.

Лоуренс қуённи кўриб қолди. Қуён ўт-ўлан устида сакраб-сакраб юрарди, шовқинни эшишиб, қулоқларини диккайтирганича қотиб қолди.

— Қўлимдан қутулиб бўпсан, азизим!— деди Лоуренс ва отини чоптириди. Қуён бир сакраб кўздан ғойиб бўлди.

— Тақсир!— деб қичқирди Кажри Лоуренсга, у қуённинг қаёққа кетганини кўрсатиб бермоқчи бўлди.

Лекин Лоуренс тўхтамади.

— Кажри, у ҳиндийчани мутлақо билмайди, шунинг учун таплинга тушунмади,— деди Сусанна.

Лоуренс қуруқ қайтиб келди. Сусанна унга савол назари билан бўқди. Үялганидан йигит:

— От тошга қоқилиб кетди!— дея баҳона қилди.

Лоуренс нима деганига тушунмаса ҳам Қажри қулиб юборди.

— Бас, эсипаст!— Сукхрам хотинининг этагидан сал тортиб қўйди.

Аммо Қажрининг шайтони қитиқлаётган эди. У Лоуренсга афтини бужмайтириб, қаҳ-қаҳ уриб кулишда давом этди.

— Қуённи қочириб юбординг, саъб,— деб меҳмон йигитга қичқирди ва унга айёр қараш қилди Қажри. Лоуренс хижолат бўлди. Лекин айборларча кулимсираб индамай тураверди. Қажри ундан кўзини узмади. Лоуренс Сусаннага қиё боқиб, ўзини жиддийлаштириди.

Орадан ҳеч қанча вақт ўтмай уларнинг олдидан катта момкин думлли тулки чопиб ўтди.

— Fox<sup>1</sup>— деб бақириб Лоуренс. Қўлига тўппонча олди.

— Қўйинг, тақсир!— деб қичқирди Қажри.— Уни ҳозир ўзим ушлайман.— Қандай ушлашини имо-ишора билан кўрсатди.

Лоуренс нима қилишини билмай қўлинни тушириди.

Қажри тулкини қувиб кетди. Рақибини пайқаган тулки ҳушёр тортиб, ўзини четга олди. Қажри қулочини кенг ёзиб, унга эргашиб кетаверди. Тулки доира ясад югурди. Лекин Қажри ички доира бўйича маҳлуқча тобора яқинлашарди. Чапсан тулки ён томонга ташланиб, инига яширинди. Қажри кулди. Ердан каттагина тош олиб, унинг изига тушди. Энгашиб инни эзтибор билан кўздан кечирди, кейин тупроқни тош билан уриб тушира бошлади. Индаги тупроқ тугагунча уни бузаверди. Қўрқиб кетган тулки инида типирчилади, ҳатто тумшуғини чиқариб Қажрни тишлаб олмоқчи ҳам бўлди. Лекин Қажри эпчиллик билан чап бериб, иккала қўли билан тулкини ушлаб олди. Тулки жувоннинг қўлидан чиқиб кетмоқчи бўлди, лекин Қажри маҳлуқни маҳкам ушлади ва ҳаммага ғолибона назар ташлади. Улар ҳайрат ва ҳавас билан Қажрига бақрайиб қараб қолишиди. Айниқса Сукхрамнинг ҳайратига чек бўлмади. Қажри Лоуренсга яқинлашиб таъзим қилди, тулкини хорижийнинг оёқлари остига ташлади. У Сусаннага ҳам таъзим бажо келтириб, кейин қўл-оёғи боғланган тулкини унинг эгарига боғлаб қўйди. Қоронғи туша бошлади. Йўл аранг қўринар эди, Сусанна баъзи-баъзида отининг жиловини торта бошлади.

— Бу ёигига чакалакзор бошланади,— деди Сусанна.

— Қўрқяпсанми?— деб кулди Лоуренс. Сусанна бандитлар воқеасини айтиб берди.

— Унда ёлғиз эдинг, мен билан бирга қўрқмасанг ҳам бўлаверади,— деб қулиб юборди Лоуренс.

<sup>1</sup> F o x — тулки (инглизча).

Улар отларни ҳайдашди, лекин Сусанна истар-истамас борарди. Чакалакзор бошланди.

— Йўл яхши кўринмаяпти. Орқага қайтинг, хоним,— деди Сукхрам.

Лоуренс ҳамон отини илгарлатиб борар, Сусанна унга эргашаётган эди.

Тўсатдан отлар кишинаб, ҳуркиб, ўзларини четга олишди.

— Орқага, хоним,— дейишга улгурди холос Сукхрам.

Чакалакзор ичидан қоплоннинг ўкириши эшилди. Кўрқиб кетган отлар қочди.

— Кажри, қоч!— деб бақирди Сукхрам.

Кажри олдинга югурди, лекин шу пайт буталар орасидан қоплон чиқиб келди ва Кажрига ташланди. Ўйлаб ўтиришга вақт йўқ эди. Сукхрам олдинга бир сакраб, қоплоннинг орқасига мушт туширди. Йиртқич орқасига ўгирилди, қоплон билан одам олиша кетишиди. Сукхрам дадаси билан онаси ҳалокатини хотирлади. Ҳозирга келиб бу йиртқич унинг Кажрисини тилкапора қилмоқчи! У ёнидан ханжарини чиқариб, йиртқичининг танасига сопигача ботирди. Яна бир неча бор ханжар санчди. Ва ниҳоят эпчиллик билан чап қўли билан йиртқичнинг бўйнидан қисиб, ерга қулатмоқчи бўлди. Етиб келган Лоуренс тўппончасини чиқариб, қоплонни нишонга олди. Бироқ Кажри унга ташланниб, ботирлик билан қўлига тирмашди.

— Кажри!— деб чинқирди ҳайратланган Сусанна.

— Тақсир, эримга бир қаранг! Сабр қилинг! Отманг! У ҳозир уни бир ёқлиқ қиласди. У ахир, эр йигит! Чинакам эр йигит!

Сукхрам билан қоплон ерда думалай бошлашиди. Йиртқичнинг тирноқлари унинг танасини дабдала қилиб ташлади. Қоплон фазаб ва оғриқдан бўкирар, нафаси тиқиларди.

Сусанна қотиб қолди. Қиз бечора умри бино бўлиб бунақа даҳшатли манзарани кўрмаганди.

Лоуренснинг тўппонча ушлаган қўли қалтирас, аммо ўзини хотиржам тутишга интиларди. Сукхрамнинг яраларидан қон чакиллаб оқа бошлади.

— Сукхрам, ўлдир уни!— жон-жаҳди билан қичқирди Кажри,— бу йиртқични ўлдир!

Шу пайт Сукхрам бир лаҳзага йиртқичнинг устига чиқиб қолди. У Кажрининг бақирганини эшилди. Бу хотинининг овозди эди! У яшин тезлигида йиртқичнинг қорнига ханжар суқди. Қоплон даҳшатли ўкирди. Сукхрам бир силтаниб унинг қорнини ёриб ташлади ва жон талvasасида титраётган йиртқич устига бехуц ѹйқилди.

Лоуренс билан Сусанна шошиб қолишиди. Сусанна Кажрининг оёқда зўрга турганини, ҳушидан кетиши муқаррарлигини пайқаб қолди. Қиз йиқилаётган Кажрини ушлаб қолишига ул-

гурди. Кажри Сукхрами эр йигит эканлигини билмоқчи бўлди, бунга ишончи комил бўлди ҳам. Аммо охирига бориб жанг шиддатига бардош қилолмай, энг даҳшатли ҳодиса орқада қолгандагина хушидан кетди.

Ўзига келганида ташвишланиб атрофга қаради, кўзи эрига тушгач, чопиб бориб бошини тиззасига олди. Сукхрам аста-секин хушига кёла бошлади.

Кажри кулимсиради ва Лоуренсга қаради. У ҳанузгача ўзига келолгани йўқ эди. Сусанна Сукхрам устига эгилиб, унинг кўксидаги яраларини ушлади.

— Кўйинг тегманг мэм саъб,— деди Кажри ва қизнинг қўлини нари сурди.

— Эҳ, нодон!— Сусаннанинг жаҳли чиқди.

— Одобин унутдинг-ку, Кажри! Ахир у бекамиз-ку! Ҳозироқ узр сўра,— шивирлади Сукхрам.— Оёғидан тупроқ ол<sup>1</sup>!

Кажри йиғлаб юборди.

— Унга нима бўлди ўзи?— деб сўради Сусанна.

— Хоним, унинг олдида биронта бегона аёл эрига қўл теккизмаслиги керак,— деб жавоб қилди Сукхрам.

Сусанна бунга тушуниб бош ирғади.

— Уни кечиринг. Сиз хонимсан, хотиним эса буни тушумайди.

Сусанна роса кулиб, унинг сўзларини Лоуренсга таржима қилиб берди.

У қизиқиб Кажрига тикилди. Лоуренс Кажри анча кир бўлиб қолган сариси билан эрининг яраларини артишини ҳафса-ла билан томоша қилди. Шу лаҳзада бу аёл жуда улугвор кўринишга эга эди. Ундаги фуур нақадар кучли!

— Лоуренс, йўқолган қўёнингни ахтаргани кетдик, қоплон билан олишиши ёввойиларнинг иши,— деди Сусанна инглиз тилида.

Лоуренснинг кўзлари совуқ чақнади. Лекин индамади, қизнинг бошидан оёғигача қараб қўйди холос.

— Тақсир, тўппончангиз бор, одамларни олиб келгунимча шу ерда тура туринг,— деб илтимос қилди Кажри.

Сукхрамини дак-бунгалога олиб боришиб, ҳужрачага ётқизиши. Сусанна полициячини посёлкадаги докторга юборди. Доктор ўша куни кечқуруноқ етиб келди. Кажри ҳайрон қолди. Ҳамиша бурнини кўтариб юрадиган доктор ҳозир хушомад қилиб ҳиринглар, Лоуренснинг кўзига қараб, лаганбардорлик қиласи, ўзини қўйгани жой тополмади. Лоуренс унга инглизчасига бир нима деди. У тушумади. Сусанна ҳиндий тилда га-

<sup>1</sup> Оёғидан тупроқ ол—одоб билан узр сўраш, бунда айбордекиши эгилиб, қўлини афв этувчи оёғига теккизади.

пирди. Доктор Сукхрамнинг яраларини боғлаб жўнаб кетди. «Буларнинг олдида ўзини шу ерлик қўрқоқлардай тутади,— деб ўйлади Кажри,— бизнинг олдимизда инглизлардай юради».

— Ов қилишга ҳафсалам аллақаҷонлар совиб кетган,— деди Лоуренс креслога ўтириб ўзига виски қуяркан.

— Ахир армияда хизмат қиляпсан-ку,— деди Сусанна пи-чинг билан.

— Кейинги пайтларда кўпроқ адабиётга қизиқяпман,— дея керилди Лоуренс.— Ҳозир сен нимани ўқияпсан?

— Газеталарни.

— Китобларни-чи?— ҳайрон бўлиб сўради Лоуренс.

Сусанна унга китобларни ҳам ўқиётганини, аммо китобга оз қараётганини, чунки бу ерда инглиз тилида ёзилган китобларни топиш қийинлигини тушунтириди. Лоуренс суҳбат мазмунини адабиётга буриб, кўпгина адабий асарлардаги бош мавзу бўлиб қолган шаҳвонийликнинг психологик проблемалари ҳақида ҳикоя қилди. Сусанна унинг гапларига қизиқиб қулоқ солди. Лоуренс ҳаддидан ошиб қизга анча беадаб шеърлардан ҳам ўқиб берди.

Сукхрам уйқуга кетганида Кажри ўрнидан туриб, унинг бошига сарисини ёпиб қўйди. Кейин кўз ёшлари изини йўқотиш учун ювинди, шошилмай бири чекди. Шундан кейингина уйга кирди.

Дастурхон тузайдиган вақт бўлди. Бугун Кажри ёлғиз хизмат қилди. Лоуренс тоҳ-гоҳ унга кўз қирини ташлаб қўярди. Лоуренс овқатни еб бўлиб, виски ичишга тушди. Сусанна тинимсиз жаврар, бир мавзудан бошқасига ўтарди. Лоуренс индамасди, кейин у қизни ўпди, қиз кулди.

Кажри эшик орқасида — оstonада кеч киргунга қадар ўтириди. Ўтиравериш жонига тегди, аммо кетишига журъят этолмади. Ниҳоят қиз ухлашга кетди. Лоуренс ҳам қўзғалди. У эшикка яқинлашиб уни оёғи билан тепди. Эшик очилиб мудраб ўтирган Кажрига қаттиқ тегди. У уйқудаги кўзларини йириб-ёртиб очганича сапчиб ўрнидан турди. Лоуренс қуруқшаган лабларини ялаб, Кажрига маъносиз тикилиб қолди. Кажри уйига қочиб кетди. Лоуренс гандираклаганича эшик олдида туриб қолди.

— Сусанна Сойер!— деб бақирди у бор овози билан.

Қаттиқ товушдан қўрқиб кетган Сусанна чопиб чиқди.

— Ҳаёт нега шундай!— деди Лоуренс мастиларча чулдираб.— Уни тушунолмаяпман. Бу унвону урф-одатлар кимга кепрак! Ҳаммаси бемаъни сафсата! Нима кераги бор буларнинг?

— Файлласуф бўлиб кетяпсан!— деб кулди Сусанна.— Яхшиси мизғиб олгин.

— Сусанна, мен ухлайман. Абадий уйқуга кетаман. Англиямдан жуда йироқда кўз юмаман.

— Юр, юра қол, ётгин! — деди Сусанна Лоуренснинг қўлидан ушлаб.

Лоуренс уни қучоқлаб ўпди.

— Маастсан, жойингга ётгин,— деди норози бўлиб қиз.

Лоуренс ўз хонасига итоаткорлик билан имиллаб кирди. Сусанна уни ётқизди, устига чойшаб ёпиб, ташқарига чиқди.

### 30

Бош соҳиб ҳали инспекцион сафардан қайтмаганди, осмон қалин булатлар билан қопланган, ёмғир ёғаман деб турса-да, Сукхрам қишлоққа тушиб чиқмоқчи бўлди. Заминдор Сукхрамни формали кийимда кўриб қўрққанидан титраб кетди. Бир вақтлар Сукхрамни полиция участкасидаги камерага қамаган одамлар бугун унинг ҳол-аҳволини сўрайдиган бўлиб қолишиди. Одамлар Сукхрамга инсон сифатида заррача ҳам қизиқмасликларини, улар фақат унинг лавозиминигина ҳурматлашаётганини яхши биларди. У оддий бир хизматкор, хизматкор бўлганда ҳам инглиз соҳибининг дастёри эди. У кўримсиз бир дум, дум бўлганда ҳам шернинг думи эди.

Бозорда унга эгилиб салом беришар, ўзларига тенг тутиб гаплашишар эдилар. Савдогарлар унга «ака», «укажон» деб мурожаат этадиган бўлди. Фақат Сукхрам бир мартағина орқасидан кимdir ғийбатини қилаётганини эшишиб қолди:

— У ҳазар қиласидан одам. Биронта яхши одам инглизларникида яшамайди. Улар билан фақат карнатлар, ахлат тўпловчилар, кир юувчилар, кучерларгина эл бўлишади. Инглизлар уларнинг қўлидан овқат ейишдан ҳам ҳазар қилишмайди. Муръюрлар! «Бхагват»да<sup>1</sup>, «Калиюга»да<sup>2</sup> мурдорлар ҳукмронлик қиласиди,— деб бежиз айтилмаган.

Ёмғир ёға бошлади.

Сукхрам аллақачон қайтиши керак эди, лекин у қўргошинсимон хунук булатларга тўла осмонга ҳадик билан боқди. Уйга етиб боргунча ҳаммаёғи шилта бўлади. Қайтиб бормаса Кажри сўкинади, мәм саъб ҳам норози бўлади. Сукхрам нима бўлса бўлар қабилида қўл силтаб йўлга тушди, бироқ сал ўтмай даҳшатли момақалдироқ гулдиради, пақирлаб ёмғир қуиди. Сукхрам ёмғирдан сақланиш учун жой ахтаришга мажбур бўлди.

<sup>1</sup> Бхагвата — қадимий ҳинд эпоси «Махабҳарата»даги боблардан бири. Унда Пандавлардан бўлмиш Кришна билан Аржуна сұҳбати баёни қайд этилади. Фалсафий характердаги талай фикрлар умумлаштирилади.

<sup>2</sup> Калиюга — ҳинд мифологиясида тўртта олам даври бор: Сатьюга — олтин аср, Третяюга — камуш аср, Двапараюга — мис аср ва Қалиюга — темир аср. Бу аср шу кунларда давом этяпти.

«Энди ҳаётим изга тушгандай бўлди,— деб ўйлади у айвон тагида туриб.— Кимга хизмат қилаётганимни ҳамма билади. Соҳиб мэндан хурсанд. Афсуски, у ҳамиша сафарда юради. Мэм саъб отаси менга мукофот олиб бериш ҳаракатида юрганини айтди. Буни эшигтан Кажри севинганидан боши осмонга етди. Эри медаль олса — бу ҳазилакам ишми! Округда бунаقا одамлар бармоқ билан санарлимикан?

Кажри янги, илгари ҳис этмаган аллақандай туйғуларни кечира бошлади. Юзи сал озди, бироқ лабларида баҳтиёр, ғуурга тўла табассум ўйнади. Бир куни эріга ҳомиладор эканлигини айтди.

Сукхрам терисига сиғмай кетди.

— Ростдан-а?— деб сўради ишонқирамай.

Кажри хижолат бўлганидан эрининг бошини силади. Сукхрам унинг сал ўзгариб қолган дийдорига қайта-қайта тикилди, кейин Кажрини меҳр билан бағрига босди.

\* \* \*

Кажри Сукхрамни кутмай жойинга ётди.

Ёмғир тинимсиз ёғаверди. Сукхрам қаёқда қолдийкан? Йўлда, бирон ерда тўхтаб қолгандир. Ёмғир тинишини кутгани маъқул, момақалдириқ бирам ваҳималики!— деб ўйлади Кажри. Том тепасида момақалдириқ гулдиради. Лоп этиб яшин чақнади, Кажри ўзи билан бирга қалби остида яна кимдир сесканиб кетганини ҳис этди. «Бу оддий бола эмас, шер боласи. Демак, бўлмиш фарзанди ҳам ҳақиқий шер бўлади,— деб кўнглидан ўтказди жувон. Кейин ширин хаёлларга берилиб кетди: ўзи билан Сукхрам икковлари қаришади, ўғиллари кенг елкали, соғлом йигит бўлиб вояга етади. Жудаям чиройли бўлса керак! Сукхрамдан ҳам чиройли бўлади. Кўркамликда тенги бўлмайди. Ўғли учун ҳатто жонини ҳам аямайди. Кажри ҳозирданоқ ўргак учун латта-путталарни тайёрлаб қўйяпти. Бола туғилиши биланоқ кўкрак бериб эмизади. Уз жигаргўшасига ҳаёт баҳш этаётганидан дунёга сиғмай ғуурланмайдими? Дунёга келган бир парча эт нимани ҳам билади? Ана шу бир парча этни вояга етказиш, ҳар лаҳзада унга бор бисотни бағишлиш, оламга бақувват, гўзал, янги бир инсонни ҳадя этиш нақадар буюк мўъжиза!

Гўдак тишсиз оғзини очиб кулади, дўумбоқ юзларида табасум ўйнайди ёки жажжи қўлчалари, оёқчаларини қимирлатиб йиғлайди. Кажри уни аллалайди, бола юпанади. Фарзанди уйқусида ҳам кулади, шунда унга фунча очилаётгандай бўлиб туюлади. Наҳотки, жажжи гўдаклар ҳам туш кўради? Нега улар уйқусида кулади? Кейин ўғли эмаклайди, тиши чиқади. Бола ерга эмаклаб думалайди. Кажри ўғлини кўтариб олмоқчи

бўлса, унамай ғашлик қиласи. Бироқ бола йиғлаб-сиқтаса ҳам Кажри ўғилчасининг ерда ифлосланишига йўл қўймайди.

У зўр, бақувват йигит бўладиган пайтлар келади. Сукхрам қоплонни енди, ўғли бўлса шерга ҳам бас келади. Кейин дил-банди уйланади. Ўйда келин пайдо бўлади.

Кажри унга:

— Ҳой келин! У мана бундай жажжи гўдак эди. Эрингиҳни ҳозиргидай қилиб вояга етказдим. Болагинам кичкиналигига менга қулоқ солмаганида ёнимга ўтқазиб қўярдим. Шунда қўзинчоғим менга норози бўлиб тикиларди. Мен ёлғондакам ачиқланардим, ичимда ундан кулардим. Аммо тентаквой йиғлаб менга ёпишганда ҳаммасини кечирардим,— деб айтади...

Лоуренснинг уйқуси қочди. Ёлғиз ўзи бир шиша вискини ичиб, меҳмонхонадан ташқарига чиқди. Сусанна хонаси эшиги ёнига келиб, пардан сурди ва қизни кузата бошлади. Ўқишга берилиб кетган Сусанна уни пайқамасди. Лоуренс оёғининг учиди юриб қизга яқинлаши.

Лоуренс ўзини қамраб олган орзу алангасида ёна бошлади. Кажри унинг эҳтиросини қўзғаб қўйди, аммо лўли хотинни тавакkal қилиб ёнига чақиролмади, чунки Сукхрамнинг куч-кувати қанақалигини билганди.

Сусанна эса ҳамон унинг келганини пайқамаётганди.

Лоуренс қиз каравотига яқинроқ келди. Бу қилмишини ҳеч ким билмайди. Ҳинд қишлоғи дунёнинг бир чеккасида. Англияда у аёлларсиз ҳаёт кечирмади. Бу ерда зерикиндан тарс ёрилиб ўлиш мумкин.

Сусанна кимнингдир ўзига қаттиқ тикилиб турганини сезди ва ҳадиксираб қўзгалди.

— Сени қўрқитиб юбордимми?— деди Лоуренс ҳансираб.

— Йўқ. Нега ухламаяпсан?

— Ухломаяпман. Хонангда ётсам майлими?

Қиз унга қараб қовоғини солди.

— Менга ёқиб қолдинг, Сусанна! Бу хилват жойда юксак идеаллар билан яшаш нечун? Икковимиз ҳам ёшмиз, бу ерда на клуб, на кўнгил очиш бор. Шу ҳам ҳаётми? Эртадан кечгача ейсан, ичасан, холос. Ўйқум қочиб кетди, ухлай дейману, ҳеч ухломаяпман.

— Мунча қалтираяпсан?

— Менми? Ҳеч-да,— деди Лоуренс, кейин Сусаннани ўзига тортиб, лабидан сўриб ўпди.

— Нима қиляисан?— деди қиз безовталаниб. Лоуренс жилмайди, лекин Сусанна унинг жилмайиш маъносини тушунмади.

— Сусанна, мени маҳкамроқ қутоқла,— деб шивирлади Лоуренс.— Қара, қандай ваҳимали тун, яшинлар чақнаб шамол гувиллаяпти, сен эса ёлғизсан. Наҳотки эҳтирос нималигини билмасан?

— Эҳтирос?— деб тақрорлади Сусанна. Қизнинг төвүши титради.

— Сусанна, ҳамма хурофий одатлар Англияда. Севиш нималигини фақат Америкадагилар билар экан.

Лоуренс ақлдан озган одамга ўхшар, кўп виски ичганидан қўзлари қизариб кетган, юзини тер босган эди. Оғзидан чидаб бўлмайдиган бадбўй ҳид тараларди.

Сусанна иргиб каравотдан пастга тушди.

— Эски дунё ўзгаряпти, Сусанна,— деди Лоуренс ҳамон каравотда ўтирганича.

— Биламан,— деди ачиқлана бошлаган Сусанна.

— Ўжарлик қилма, ёнимга кел! Ҳаётда ўзи қўлингга кирған нарсагина баҳт ҳисобланади.

— Мастсан!— деди Сусанна ва эшик томонга йўналди.

Лоуренс қизнинг йўлни тўсди.

— Йўлимни тўсма,— деди Сусанна.— Нималар деяётганингни ўзинг тушунмаяпсан. Бу ер Англия эмас, Ҳиндистон. Ҳеч ким йўқлиги баҳтимиз. Бўлмаса ҳаммаси хизматкорларга маълум бўларди.

— Ҳеч ким билмайди, Сусанна,— қизнинг елкасидан ушлаб гапира бошлади Лоуренс,— икковимиз бўламиз холос. Бу ёқа ким ҳам келарди? Жудаям хушрўйсан. Илк дафъа кўрганимдан бери сенга ишқивозман. Сусанна, Англияга бирга кетайлик. Амакимнинг мол-мулкини сотаман, жудаям йироқقا, Тинч океандаги биронта оролга кетамиз. Шундай қилишга журъатим етади...

— Қўён овидагига ўхшаб-а?— Сусанна кулимсиради. Қизнинг сўзлари унга малол келди.

— Мени анови ифлос итга teng қиляпсанми?— Лоуренс ловиллаб кетди.

— У бестир, кучли одам,— деб жавоб қилди Сусанна.

— Ботирмиш!— Лоуренс қизни масҳаралади.— Юк кўтарадиган эшак одамдан кучлимиш. Одамнинг кучи мускулларида эмас, ақлида.

— Шўнинг учун бугун ақлинг менга ўзини кўз-кўз қилаётган эканда,— ачитиб гапирди Сусанна.— Ҳатто сен билан қандай муомала қилишни ҳам билмай қолдим. Отамнинг обрўйини талашиб турибман, бўлмаса ҳозир хизматкорларни чақириб, сени бу ердан улоқтириб ташлашни буюардим.

Лоуренс безовта бўлди.

— Сусанна, мендан жирканяпсанми?

— Сенга ачиняпман, Лоуренс. Нафратланишга арзийдиган кишилардангина жирканадилар,— деди қиз.— Мени иродаси бўш, заиф қиз деб ўйлаганимдинг? Мен ҳалол христиан қизман, ор-номусимни эҳтиётлайман. Ҳою ҳавас қидирмайман.

Наҳотки мени бир камбағал идора ходими хонадонининг қизи деб ўйласанг? Отам сени ватандошим деб мен билан бирга қолдирди. Унинг меҳмондўстлигига шунчалар инсофсизлик қилмоқчимисан? Ҳозироқ чиқиб кет. Хонамга киришга нечун ҳаддинг сифди?

Лоуренс орқага тисланди.

— Мен чиқиб кетаман, Сусанна! Лекин аввал сени ҳовуриңгдан сал туширай,— деди у лабларини тишлаб.— Менга нисбатан анови қулвачча ҳиндиларга дурустроқ муомала қиласан. Отанг билан фахрланасан! Шуни билиб қўйки, Ҳиндистондан талаб олинган бойликларни ташиб кетувчи бу эмиссалар Англияда қадрланмайди. Эҳтимол, сен Ҳиндистоннинг вице-президентига куёвга чиқиш илинжидадирсан? Етар, бу гапларни қўяйлик. Отангнинг меҳмондўстлигидан инсофсизларча фойдаландим. Мени кечир, Сусанна. Мендан бунчалар жирканишингни билмаган эканман,— Лоуренс шундай дедиую қизнинг қаршисида тиз чўяди.

Сусанна сал юмшади.

— Ўрнингдан тур, Лоуренс,— деди қиз астагина.

— Йўқ, қаршингда тиз чўкканимча қола берай. Мен айборман.

— Керак эмас, Лоуренс, бу гапларни қўяйлик,— деди Сусанна ва Лоуренсни ўрнидан турғизди. У жуда хижолатда қолганга ўхшарди.

— Мени кечирдингми, Сусанна?

— Лоуренс, илтимос, бу ҳақда бошқа гапирма.

— Йўқ, бу воқеа умримнинг охиригача мени этга кирган зирапчадай азоблейди!— деб хитоб қилди у ва бошини чангллади. Сусанна унга яқинлашди.

— Инглама, Лоуренс. Эркакнинг қилиғини қил. Эркаклар йиғласа аёллар хуш кўрмайди.

— Авлиёсан, Сусанна! Кечирганлигинг ҳурмати, мени бир ўпид қўй.

Сусанна бошини сал кўтариши биланоқ Лоуренс унинг белидан маҳкам қучоқлади, қайноқ лабларини қизнинг лабига ҳирс билан босди. Сусанна унинг қўлидан чиқишга уринар, аммо Лоуренс қизни қўйиб юбормас эди.

— Хизматкорларингни чақиришинг мумкин,— деди у мамнун жилмайиб.— Ҳаммаёғинг ғижимланганини кўриб, улар бу ерда нима бўлганини дарҳол пайқашади.

Сусанна уни урди. Лоуренс қизни каравотга улоқтириди ва қўлларини оқрага қайира бошлади. Лоуренс каравот ёнидаги столчага тегиб кетди, столча лапанглаб, устидаги стакан жаранглаганича ерга тушиб синди.

Синган стакан жарангি Кажрини уйғотиб юборди. У ўрнидан сапчиб туриб, ўз бекаси ётоқхонасига чопди.

«Нима бўлдийкин?— деб ўйлади югуриб бораркан.— Мэм саъбнинг хонасида чироқ ёниб турибди. У ерда нималар бўлжати ўзи!»

— Хоним!— деб бақирди хонага чопиб кирган Кажри.

Жаҳлага минганди Лоуренс ўрнидан сакраб турди.

— Йўқол бу ердан!— деб бақирди у.

Кажри қўрқиб кетди. Сусанна унга бир нима демоқчи бўлди, лекин алам ва шармандалик уни тилсиз қилиб қўйганди.

— Йўқол!— Лоуренс яна бўкирди.

Сусанна мени холос қилгин дегандай ялиниш маъносига қўлларини чўзди.

Кажри ҳаммасига тушунди. Кўзлари совуқ чақнади.

— Менга қара, саъб, хонагга кириб кет,— деди у Лоуренсга қўли билан эшикни кўрсатиб.— Хоним, буюрсангиз бўлди, уни ҳозироқ бир ёқлик қиласман.

— Кажри, ўлдир уни!— деб аранг айтди Сусанна.

Кажрининг қўлида ханжар ярқиради. Сусанна қўзғалиб каравотга ўтиргди.

— Аблаҳ, ярамас, итвачча!— деб қичқирди қиз.

Лоуренс ханжарни кўриб ниҳоятда жаҳлга минди. Ёстиқни олиб, Кажрига улоқтириди, кейин олдинга ташланиб, Кажрини тепмоқчи бўлди. Кажри чап берди, бироқ ханжарнинг машъум сопи шойи ёстиққа қадалиб қолди. Лоуренс яна тепди бу сафар оёғи Кажрининг қорнидан пастроққа тегди. Аёл столга бориб урилди. Лоуренс эса дарғазаблиги ошиб, унинг юзига мушт туширди. Кажрининг кўз олди қоронғилашиб, ерга ийқилди ва ҳушидан кетди. Сусанна ўзини унинг устига ташлади. Лоуренс Кажрини уриш учун яна мушт кўтараётганини кўриб қўлидан ушлаб қолди.

— Нари тур!— деди Лоуренс пишиллаб.

— Йўқ, йўқ, уни уришингга йўл қўймайман!— Сусанна бурилиб, унинг қўлини тишлаб олди.

Лоуренс қизга тарсаки тортиб юборди, куч билан каравотга улоқтириди. Сусанна оғриқ азобига чидолмай чинқириб юборди, боши деворга тегди.

Лоуренс ичиқоралик билан тиржайди, йиртқич ҳайвондай ҳурпайди, Кажрининг оёғидан ушлаб, судраганича эшикдан ташқарига — коридорга олиб чиқиб ташлади. Қайтиб келиб Сусаннага тикилди, хахолаб кулди. Осмонни олов қиличидан кесиб яшин чақнади. Дераза ойналари сафсар рангла товланиб кетди. Яшиндан кейин қулоқни кар қилгундай момақалдироқ гулдиради, шариллаганича тропик жала ёғди.

Кажри ерда ҳушсиз ётарди...

У ўзига келганида атрофида сукунат ҳукмрон эди. Унинг ҳаммаёғи зирқираб оғрирди. Жувон аста туриб ўтириди, атрофга кўз югуртириди. Ёмғир тинмаганди, гёё унинг ҳадсиз-ададсиз ғам-кулфатларига ачиниб осмон аччиқ кўз ёшларини тўкаётгандай эди.

Қажри зўрға ўрнидан турди. Мэм соҳибининг эшиги берк эди.

Хира ойналари дераза табақасидан нимжон нур таралиб турарди.

Қажри дераза ва ойна ёруғидан ичкарига мўралади. Хона ичи осойишта. Чироқнинг нурсиз ёруғида синган стакан парчалари йилтиллаяпти. Дастурхон стол устидан сидирилиб, тўнтарилиб қолган китоб каравотга яқинроқ жойда ётибди. Ханжар санчилган ёстиқ бурчакда турибди.

Бека йиғлаляпти. Кўз ёшлари юзини ювялти. Қизнинг ияклари у ҳозир ўкириб йиғлаб юборадигандай титраялти. Ниҳоят қиз юзини қўллари билан яширди. Унинг кийимлари ёижимланган, йиртилган кўйлаги орасидан яланғоч бадани кўринялти.

Лоуренс хона ўртасида турибди. Кейин у Сусаннага яқинлашиб, гуноҳкорона товушда бир нималар деди. Қиз жавоб бермади. Қажри ҳеч нарса тушунмади, чунки улар инглизча гаплашаётгандилар. Сусанна унга қараб ҳам қўймади. Лоуренс юпатиш учун қизнинг бошларини силади, сўнг жилмайганича Сусаннанинг рўпарасига ўтирди.

Қиз ундан кескин ўгирилиб олди.

Шунда Лоуренс эшик томон юрди. Остонада тўхтади.

-- Энди нима қилмоқчисан?

Сусанна индамади.

— Тўғрисини айт, Сусанна, наҳотки ҳузур қилмаган бўлсанг? Сусанна унга ғазабли нигоҳ ташлади.

-- Энди жувон бўлдинг!— кулганича хитоб қилди у.

Сусанна Лоуренсга қиё боқиб ҳам қўймади. Лоуренс эшикни очди. Қажри ўзини четга олишга ва яширининшга аранг ултубриб қолди. Лоуренс у ёқ-бу ёққа қараб, Қажрини кўрмагач:

— Сусанна, анови ярамас қочиб кетипти. Ор-номусинг азиз бўлса шовқин кўтарма!— деди.

Сусанна жавоб қайтармади. Лоуренс бурилиб, хонасига кириб кетди. У бир шиша виски олиб, кетма-кет қадаҳ бўшата бошлади. Эндиликда қилмиши уни ташвишга solaётган эди. «Отаси қайтиб келганида бу ишни айтиб берса нима бўлади? Йўқ, қиз бунга журъат қиломайди. Унгача қизга ақл ўргатиб қўяман,— деб ўйлади Лоуренс.— Суссексда Беттини ҳам худди шундай қилгандим. Илк бор яқинлашганимиздан кейин у мени ўзидан нари итармай қўйганди. Йўқ, бу ҳузур-ҳаловат бир томонлама бўлмайди. Бурч, ор-номус тушунчаларига боғланиб қолган аёл ҳаёт нашъасини суришни истамаган тентак-

нинг ўзи. Унга ёқмасмиカン? Ёқмаса ёқмас, ишқилиб буни тушунган кишининг роҳатланишига монелик қилмаса бўлди».

Лоуренс тўғри иш қилдим деб ҳисобларди. Астойдил бўлмаганида қиз ишнинг расвосини чиқарган, ҳаммасини отасига чақсан бўларди, энди бўлса ҳеч нима айттолмаса керак. Чол шов-шув кўтаролмайди, чунки шовқин кўтарса шарманда бўлиши турган гап. Бўлган воқеадан бутун князлик хабар топади, Сойер эса ҳеч кимнинг юзига дадил қаролмайди.

Аммо Лоуренс ташвишдан халос бўлолмади. Ниҳоят гап нимадалигини тушуниб етди. Қажри ҳаммасини кўрди. Кўрса кўрар! Бари-бир, унинг гапига ҳеч ким ишонмайди. Бордию ҳадеб валақтайверса кўчага ҳайдаб юборишади. Энг аввало Сусаннанинг ўзи бу гаплар ёлғон дейди. Ўзини бир йигит зўрлаганини эътироф этишга юраги дов берармиди? Бу маданиятга эришган қиз, обрў қиммати нималигини билади. Ҳеч ким ҳеч нарса билмайди. Бироқ наҳотки Сусаннага уйланиши керак бўлса?

Сусанна чиройли қиз. Унинг бадани Лоуренсни ҳозиргача тўлқинлантирипти, эҳтиросини қўзғатяпти. Лекин севги бошқа, уйланиш бошқа. Улар муроса қилиб кетишолмайди, чунки ҳаётга қарашлари бошқа-бошқа. У Америкадалигига тунги клубларга майшат қилгани қатнарди. Ана ўшани ҳаёт деса бўлади! Клублардан бирида француз қиз рақсга тушарди.

Кўнгил хоҳиши ҳамон унинг қалбини қийнарди. Лоуренс қадаҳни тўлдириб, бир кўтаришда бўшатди. Кейин сигарета чекди, тутунни ҳузур қилиб ичига тортди.

Қажри яширинган жойидан чиқди, Лоуренснинг ўз хонасига кириб кетганига ишонч ҳосил қилгач, билинтиrmай Сусаннанинг ётоқхонасига кириб олди, эшикни зичлаб беркитди.

Сусанна бошини эгиб каравотда ўтиради. У йигини бас қилиб қўйганди. Номуси булғанган, шарманда бўлган бу шўрлик қизга Қажрининг раҳми келиб, юраги туз сепгандай ачишиди. Сусанна ўзини беҳад ночор ва ёлғиз ҳис қиласарди. Назариди бутун олам унга жирканиб қараётгандай эди. Қажри аста унга яқинлашди.

— Мэм саъб,— деб шивирлади.

Лекин Сусанна қимир этиб ҳам қўймади, олдинги ҳолатида ўтиришда давом этди.

— У қаёққа кетди?— сўради Қажри.

Сусанна жавоб бермади.

— Мэм саъб!— қўрқув ичиди гап қотди Қажри.

Сусанна қўллари билан юзини яширди.

— Нега йиглайсиз, мэм саъб?

Сусанна ўзини тутолмади, йирик ёш томчилари юзидан юмалаб туша бошлади.

— Ўзингизни босинг!

— Кажри!— деб фарёд қилди Сусанна ва ўкириб йиглаб юборди.

Аёл ҳамиша аёллигича қолади.

Кажри қизнинг бошини кўксига босиб меҳр билан силай бошлади.

Ўзининг noctorligidan изтиробга тушган Сусанна тинимсиз йиглайверди. Ўзининг пасткашлик билан, ёвуздарга алданганига қиз чидолмаётган эди. Кажри хўрланган соҳибасининг бошини силашда давом этди. Унинг сариси Сусаннинг кўз ёшлиридан ҳўл бўлиб кетди, қиз эса ҳеч йиғидан тўхтамасди.

— Мэм саъб қачонгача йифи-сиғи қиласиз. Эркакларнинг ҳаммаси бир гўр. Бир вақтлар мен ҳам шу кўйга тушганман,— деб бекасини юпатди.

Бироқ унинг сўзлари қизнинг ўтини баттар аланглатди. Бу сўзлар Сусаннага шармандалини яна бир бор эсга солгандай бўлди, қизнинг асабийлиги ошиб караҳт бўлиб қолди.

Сукхрам уйига хурсанд бўлиб қайтди. Ахир, бўлғуси фарзанди учун анча нарса олиб келди. «Буларни кўрса Кажри жудаям хурсанд бўлади-да»,— деб ўйлади. Ҳужрага кириб Сукхрам титраб кетди ва тўхтаб қолди: эшик ланг очиқ, чироқ ёқилмаган эди.. У қоронгида тездагина қуруқ кийимларини кийди. Келтирган нарсаларини бир четга қўйиб, чироқни ёқди.

Каравотдаги ўрин бўш, лекин чойшаблар ғижимланган эди. «Тун қоронғисида у қаёққа кетди экан?!» деб ҳайрон бўлди Сукхрам.

Юраги бесаранжом ура бошлади. У кўчага чиқди. Ҳаммаёқ зим-зиё. Фақат мэм саъбнинг хонасида чироқ ёнмоқда. У ўша ёққа бориб эшикни итарди. Берк.

«Демак, хоним ухлаяпти,— деб кўнглидан ўтказди.— У ҳолда Кажри қаёқда экан?» Сукхрам аста қайтиб кетаётган эди, Кажри унинг оёқ товушларини эшишиб овоз қилди.

— Ким у?

— Мен, Сукхрам.

Кажри эшикка юурди, аммо уни Сусанна тўхтатиб қолди.

— Очма, Кажри. У Лоуренс бўлса керак.

— Кажри, сенга нима бўлди?— аста сўради Сукхрам.— Ахир бу мен. Нега эшикни очмаяпсан?

Кажри нима қилай деган маънода Сусаннага қаради. Қиз очавер деб имо қилди.

Кажри эшикни очди, Сукхрам ичкарига кирди. Унга кўзи тушган Сусанна каравотдан сакраб турди, югуриб бориб унинг кўкрагига бош қўйганича йиглаб юборди. Сукхрам хижолат бўлиб кетди.

— Нима бўлди?— ўзини йўқотиб сўради у.

— Сукхрам!— деб ингради Сусанна.

Соҳиба яна шахсий соқчиси ҳимоясига ўтганди. Бир марта у қизни халос этиб, ор-номусини ҳимоя қилган эди. Сусаннанинг тўлиб-тўлиб йиғлашлари Сукхрамнинг ҳаяжонини ошира-ётган, безовта қилаётган эди.

— Кажри, нима гап ўзи? Нега индамайсан?— ҳайрон бўлди у.

— Сен билмасанг ҳам бўлаверади. Бу хотинларнинг иши.

Кажрининг тантилиги Сусаннани эритиб юборди. Кажри унинг шарманда бўлганини сир сақламоқчи.

— Кажри, унга айтишинг мумкин,— ижозат берди Сусанна.

— Янги соҳиб мэм саъб билан гуноҳ иш қилди.

— Гуноҳ?— деб хитоб қилди Сукхрам ва Сусаннани ўзи-дан нари итарди. Қиз каравотга ийқилди.

— Нега у йиғлаяпти?— ҳайрон бўлиб сўради у.

— Мэм саъб қаршилик кўрсатди, аммо у қизга зўрлик ишлатди.

— Зўрлик ишлатди дейсанми?!— Сукхрамнинг ғазаби қайнаб кетди. Тишларини гижирлатди. Сусаннага бурилиб, таъзим бажо келтирди, оёқларига эгилди.

— Кажри, Ҳұупа учун қандай қасд олганим эсингдами? Сиз буюрсангиз бўлди,— деб Сусаннага мурожаат қилди у.— Хизматкорингизман, тузингизни ичганман.

Сусанна иргиб ўрнидан турди. Кўзлари чақнаб кетди. Уч олиш ҳақидаги фикр қизга куч-кувват бағишилади.

— Сукхрам!— деб бақирди қиз.— Қўрқмайсан-а? Кетдик!

— Хоним, тирик эканман ҳеч нарсадан қўрқмайман.

Кажри сергакланди. «Бу қиз нима қилмоқчи? Муштлашинш бўлишини хоҳлаяпти шекилли?»

— Мэм саъб!— деди у Сусаннага.

— Нима дейсан?— қўрслик билан жавоб қилди қиз.

— Қаёққа кетяпсиз?

— Ишинг бўлмасин!

— Хоним, жаҳлингиз авжида.

— Сукхрам!— деб чақирди эшик сари бораётган Сусанна.

— Лаббай, хоним!

Кажри Сукхрамга яқинлашиб, уни тўхтатиб қолмоқчи бўлди, лекин эрининг важоҳатини кўриб, ўзини четга олди.

— Мен билан борасан!— деб буюрди Сусанна.

— Хоним!— дея Кажри қизни тўхтатди.

— Нима дейсан, Кажри?

— Ахир, Сукхрамнинг қуроли йўқ-ку.

— Мени ундан нимжон деб ўйлаяпсанми?— деб кулди Сукхрам.

Кажри индамай уларнинг орқасидан эргашди.

Сусанна икковига ишора қилиб эшик ёнида қолдирди, ўзи  
Лоуренснинг хонасига кирди.

Лоуренс оғзида сигаретаси билан дераза ёнида тик турар-  
ди. Оғзидан тутун чиқариб ҳузур қилиб керишди.

Сусанна эшик ёнида тұхтади. Ўнинг күzlары чақнарди.

— Ким у? — сұради Лоуренс.

— Бу мен, — деди қызы астагина.

Қызга күзи тушгач, мийифида кулиб қўйди.

— Келишингни билардим, — деди у.

Сусанна ўзини йўқотиб олдинга интилди ва унинг юзига  
тарсаки тушириди.

— Ур, яна ур! — Лоуренс кулди.

Қыз иккала қўли билан уни ура бошлади, Лоуренс эса ку-  
лишдан қолмади.

— Бўлди, етар! — деб қичқирди у орқага чекинаркан. —  
Қолганини кейин урарсан...

— Аблаҳ, итвачча! — деб бақирди Сусанна.

— Сусанна, яна ўзимникисан, — деди Лоуренс қизнинг қўл-  
ларидан ушлаб. — Бу ерда сени ҳеч ким ҳимоя қилмайди.  
Ўзингни аччиқланганга солаётганингни билиб турибман, бўл-  
маса ёнимга келмасдинг.

— Қўйиб юбор! — деб бақирди Сусанна.

Остонада Сукхрам кўринди.

Сусанна унга имо қилди. Сукхрамни кўрган Лоуренс Сусан-  
нанинг қўлини бўшатди, лекин шу заҳоти ҳушёр тортди.

— Йўқол кўзимдан, ҳинд чўчқаси! — деб бўкирди.

Сукхрам Лоуренсга йўлбарсдай ташланиб, уни деворга  
улоқтириди. Лоуренснинг боши деворга қаттиқ тегди. Қўз олди-  
да қизил доиралар ҳосил бўлди, лекин у зум ўтмай иргиб ту-  
риб Сукхрамга ташланди. Сукхрам уни пойлаб турганди. Қат-  
толнинг бўйнидан маҳкам қисиб, бошини орқага қайирди, ёғи  
билин эзиб уни ерга йиқитди! Лоуренс бўйилганидан ўкирди.  
Шунда Сукхрам Лоуренснинг бурнини ерга ниқтади, икки  
марта бўйни аралаш мушт тушириди, инглиз йигитнинг кўзлари-  
дан тирқираб ёш чиқиб кетди. Қажри ҳайратдан оғзини катта  
очди. Сусанна жон-жаҳди билан уни тепа бошлади. Қыз  
ғазабга миниб кетма-кет зарба бераверди. Лоуренс оғриқдан  
инграб юборди.

— Мана, ёнингга ўз ихтиёrim билан келдим, ифлос ит... —  
дерди Сусанна ҳар урганида. Қыз тишлигини ғижирлатар,  
тироноқларини кафтига ботгундай қилиб муштини ту-  
гарди.

Лоуренс Сукхрамнинг қўлидан чиқишига уриниб кўрди,  
ҳаракати зое кетди. Сукхрам унинг юзини цемент полга ишқай  
берди. Лоуренс бақирмай ҳам, ялинмай ҳам қўйди. Уришларга

инدامай чидаб турди. Кўнглида пушаймонга ўхшаган бир нима гимирлаб қолди. Унинг аҳлоқ, аёл ор-номуси ҳақидаги замонавий қарашлари ўрта аср тасаввури зарбалари остида чекина бошлади. Уни калтаклашиб турган айни пайтда сал олдин оғиз кўпиртириб панд-насиҳат қилган қарашларини лаънатлай бошлади. У аёл кишини қадимий бидъат кишанларидан зўравонлик билан «озод» қилганда, қизни амалдаги урф-одатларни назар-писанд қилмасликка мажбур қилганида аёл киши билан яқинлашув ўз-ўзидан гуноҳ эканлигини, ўз кучидан фойдаланиш ўта пасткашлик, ифлос иш эканлигини, аёл кишини ҳеч нима билан рози қилиб бўлмаслигини, обрў-эътибори икки пул бўлишини унутиб қўйганди.

Кажри эшик ёнида турар, бўлаётган ҳодисани индамай томоша қиласади.

— Отиб ташлайман! — деб хириллади Лоуренс.

— Кажри! — деди Сусанна бир зум уришдан тўхтаб. — Арқон келтир!

Кажри бирпасда арқон келтирди.

Сукхрам арқонни олиб, унинг нари туришини тайинлади.

Кажри итоаткорлик билан четга чиқди. У жуда ҳам қўрқиб кетди.

«Бош соҳиб қайтиб келса нима деркин?» деган ўй миясини қамраб олди. Лекин Сукхрам хотиржам эди.

— Хоним, унга қимиirlамай ётишни буюринг, — деди Сукхрам.

— Ҳой, ифлос, қимиirlамай тек ёт, бўлмаса суякларингни пачақлаб ташлашга буюраман, — деди Сусанна инглиз тилида. — Мени ожиз, ҳимоясиз деб ўйлагансан-да. Ўлсан ўламанки, сени жазосиз қолдирмайман.

Лоуренс чап бериб қочиб кетмоқчи бўлди.

Сукхрам унинг оёғидан ушлаб қолди, шунда инглиз йигит гурсиллаганича йиқилди. Сукхрам шу заҳотиёқ уни ерга қадади.

— Хоним, у одамлар эшитсин учун шовқин кўтаряпти. Буни меҳмонхонага олиб кираман, — деди Сукхрам ва Лоуренсни ҳеч қийналмай даст кўтарди. Уни меҳмонхонага олиб кириб полга улоқтирди.

Қўлида арқон билан Сусанна яқинлашди. Лоуренс оёқларини ўйнатиб, ўзини боғлашга ўйл қўймасди.

Сукхрам баттолнинг оёқларини босди, Сусанна боғлади. Сукхрам бекаси йигитнинг оёқларини жуфт қилиб боғлаб олишига кўмаклашди. Сусанна беҳад хафа бўлганидан жигибийрони чиқди.

— Уни тек қўйинг, мэм саъб, — деди Кажри.

— Йўқ!— деди ўшқириб Сусанна.

Лоуренс ерда чорасиз ётарди. Унинг қўл-оёқлари боғланганди. Баттол ўрнидан турмоқчи бўлди, аммо ёнбошлай олди, холос. Сусанна Лоуренсни жон-жаҳди билан тепти, бадкор юзи билан ерга тўнтарилиди.

— Хоним, буюринг, нима қилай?— ҳаяжон ичиди сўради Сукхрам.

Сусанна беҳад ғазаб учқунлари тўла кўзларини катта очиб унга қаради.

— Шу ерда қол!— деб буюрди.

Кажри ҳайрон бўлиб бекасига тикилди.

— Буюрганингиз, хоним!— деди Сукхрам одоб билан.

Сусанна хонадан чиқди.

— Энди нима бўлади?— Эридан аста сўради Кажри.

— Мен қаёқдан билай?— дея Сукхрам елка қисди.

— Оҳ, у ўлиб қолади. Хоним бутунлай ақлдан озди,— деб хўйсинди Кажри.

— Оғзингни юм!— паст товушда бақирди Сукхрам.

Кўп ўтмай Сусанна қўлида отасининг қамчисини ушлаб хонага қайтиб кирдӣ. Қиз қамчини силтаб тарсиллатди. У Лоуренсни уриш учун тирсагини ҳавога кўтарган эди. Кажри қўлидан ушлаб қолди.

— Эсингизни йиғинг, хоним!— деб қичқирди.

Сусанна уни нари итарди-да, Лоуренсни яна уришга тушди, бу сафар қамчи билан савалай бошлади. Қамчи вазиллаганича унинг елкасига тушаверди. Отларни елиб югуришга мажбур қилган қамчи Лоуренсдаги бор димоғдорлик, ўзига бино қўйишни йўқ қилди. У лабларини қонаб кетгундай тишлади, аммо Сусанна уришдан тўхтамади. Қиз қўлинини баланд кўтарганича бор кучи билан савалашда давом этарди. Ғазаб билан нафрат унинг қиёфасини бутунлай ўзгартириб юборганди.

Лоуренс ҳушдан кетди, лекин ҳеч додламади.

Кажри яна Сусаннанинг қўлидан ушлади.

— Ўз ҳолимга қўй!— деб қўл силтади қиз.

— Хоним, ахир у ўлиб қолади!— Кажри қизнинг қўлидан қамчини аранг тортиб олди, кейин ётоқхонага бошлади. Сукхрам уларга эргашди.

Сусанна мадорсизланиб ўтириб қолди. Сукхрам одоб сақлаганича қизнинг қаршисида қаққайиб турди.

— Сен кетишинг мумкин,— деди қиз Сукхрамга.

Кажри билан ёлғиз қолган Сусанна яна йиғига зўр берди.

— Хоним, йиғи билан аламни ювиб бўлармиди?— Кажри унинг ёнига ўтириб, қизни юпата бошлади.

— Оҳ, Кажри!— хитоб қилди аламига чидамаган Сусанна.

— Хоним, ҳали ёшсиз, одамларни яхши билмайсиз. Эҳтиёткор эмассиз, дод-войингизни бировлар эшиитмадими кан деган хавотирдаман. Яхшиямки, ўша пайтда яшин чақнаб момақалдироқ гулдираб тургани. Яна ким билсан? Эҳтимол, биронтаси эшиитгандир. Сизга маслаҳатим шу: ўзингизни шундай тутингки, одамлар ҳеч нарса сезмасин.

Сусанна индамади. «Бордию, бу ердан жўнаб кетсам-чи? Унда бу сирни ким биларди? Ҳеч ким,— деб ўйлади қиз.— Бу кун бошқаларнинг бўшига тушмабдими? Ўз-ўзини ўлдириш — гуноҳ, бўлиб ўтган шармандалик эса бутун вужудимни заҳарлаяпти. Бу ерда ҳеч қандай айбим йўқ! Унга бўш келганим йўқ. Қаршилик кўрсатдим. Шунга қарамай наҳотки худо мени туноҳкорлар қаторига қўшса?»

Сусанна қанча кўп ўйласа, шубҳалари тўрига шунча ўралашиб қолаверди. Лоуренс уни даҳшатга солар, жиркантирап эди. Анови иш бўлмасдан илгари у нақадар баҳтиёр эди! У ўзи ким бўлибдики, уни ҳаётига ҳаёсизларча суқулиб кирди? Нақадар пасткашлик!

— Ўйингга бор, Кажри,— деди Сусанна астагина. Унинг лаблари титрар, кўзи тўла ёш эди.

— Йўқ, бегойим, бу ерда ёлғизсиз. Сизни шу ҳолда қолдириб кетмайман. Ўзингизни тута олмаяпсиз,— деб жавоб қилди Кажри. У ўрнидан туриб, Сусаннанинг бошини силай бошлади.

Тўсатдан Сусанна Кажрининг сарисидаги қон доғларини кўриб қолди.

— Қон қаёқдан пайдо бўлди? Ўзингни бирон нарсага уриб олганинг йўқми?— сўради қиз.

— Хоним, ҳушимдан кетгандим, ҳеч нима билмайман. Лекин ҳомиладорман.— Кажри кулимсиради.— Шунинг учун қўрқиб турибман. Бошқа вақтда бунга эътибор ҳам бермасдим.

— Ҳомиладормисан?— гўёки бўлган ҳодисага ўзи айбдордай ташвишланиб сўради Сусанна.

— Ҳечқиси йўқ, хоним. Сукхрам даволайди,— деди Кажри.— У ҳар қандай дорини билади.

Бахтсизлик одамларни бир-бирига яқинлаштиради. Сусанна отасининг насиҳатларини ҳам, Кажри оддий чўри эканлигини ҳам унудти.

Киз дори-дармон солинган қутидан дори олиб, Кажрининг қорнидаги кўкарга жойга қўйди. Кейин эҳтиёткорлик билан боғлаб қўйди.

— Қалай, оғримаяптими?

— Ҳечқиси йўқ, хоним, тузалиб кетади,— деб жавоб қайтарди Кажри.— Сиз ухлаб олсангиз яхши бўларди.

Лекин Сусаннанинг ётгиси йўқ эди. У стулда ўтираверди.

Кажри унинг ёнига — полга жойлашди. Тонгга яқин тинкаси қуриган Сусанна бир оз мизғиди. Бу даҳшатли тун шундай ўтди. Тонг отди.

Кажри чой келтириди.

Эшикнинг ғижиллаши, оёқ товушларини эшитиб, Сусанна чўчиб турди.

— Хоним, чой ичиб олинг,— деди Кажри.

Лекин Сусанна бош чайқади. Қизнинг кўриниши саросимали, юзи бўздай оқарган, нурсиз ва ғамгин эди, аммо кўзларида ҳануз ғазаб ўти чақнаб турарди.

— Чойни ича қолинг, хоним,— қистади Кажри.

Сусанна бир хўрсиниб, унга бўйсунди. Кажри қизга гўдакка бергандай чой ичкиза бошлади.

Сукхрам патнисда стакан тўла чой билан Лоуренснинг ёнига кирди. У ҳушига келганди. Кўзлари қип-қизил, қаҳру ғазаб билан боқар, оғир нафас оларди. Сукхрамга кўзи тушгач, Лоуренс кўзини юмиб олди.

— Тақсир, бегойимнинг буйруғини бажардим. Бу ерда ҳеч қанақа айбим йўқ,— деди Сукхрам.

Лоуренс тескари ўгирилди. У Сукхрамнинг нима деганини билмаган бўлса керак. Сукхрам қўлида патнис билан бир оз турди-да, ташқарига чиқди.

Дак-бунгало дарвозаси олдига автомобиль келиб тўхтади; ундан Сойер тушди. Келиб-келиб ҳозир келганини қаранг! Сукхрам соҳиб бир неча кундан кейин келса керак деб тахмин қилганди. Унгача ёш хоним ҳам ҳовридан тушарди. Энди нима бўлади?

Сукхрам соҳибни кутиб олгани чиқди. У ҳар вақтдагидай қовоғи солиқ, илтифотсиз эди. Сукхрам дадилланиб унга жуда яқин келди. Сукхрамнинг кўриниши Сойерни ташвишлантириди. Сукхрам эгилиб таъзим қилди. Сойер унга жавобан сал бош қимирлатиб қўйди.

— Тақсир!— деди Сукхрам астойдилроқ. Ундаги қатъият. Сойерни тўхташга мажбур қилди.

— Ҳўш?— хотиржамлик билан сўради у. Унинг мавқеи кибр ва ўз қадрини билиб туришни тақозо этарди. Узоқ йиллар хизматда юриб совуқ, илтифотсиз муомала қилишга ўрганиб қолганди.

— Уйга кирайлик,— деди Сукхрам ва йўл бошлади.

Сойер сергакланди. Хизматкорлари илтимос қилмаяпти, балки тобелик қоидасини бузниб буйруқ қиласпти-ку? У ким билан гаплашаётганини наҳотки унугиб қўйган бўлса? Юзида қўрқувдан асар ҳам йўғ-а! Хизматкор ўзини қандай тутишни унугиб қўйибди. Лекин Сойернинг юзи илгаригидай ўзгармадай. У одатдаги ниқобни олиб қўйишни лозим топмади.

Сукхрам тез ва дадил борарди. Сойер унга эргашди. Қейин Сукхрам бурилиб ишора қилди. Сойер олдинга ўтди, шунда Сукхрам уни Сусанна хонасига киришини илтимос қилди. Сойер билан бирга Сукхрам ҳам кирди. Чол қизи хонасидаги тартибсизликни дарҳол пайқади.

— Тақсир! Кече қаттиқ жала қўйди, мен ушланиб қолдим... Кажри хонимни ҳимоя қилишга уринибди, аммо қўлидан келмабди.

Отасини кўрган Сусанна йиғлаб юборди. Сойер қизига яқинлашди.

— Сусанна!

Қиз қўли билан юзини яширди. Энди у ўкириб йиғларди.

Чолнинг кўзи ханжар суқилган ёстиққа тушди.

— Бу нима?

— Тақсир, Кажри ханжарни унга отган экан, аммо теккиза олмабди,— деб жавоб қилди Сукхрам.

— Сусанна, қизгинам, нима бўлди?— деб чол инглизча сўради.

— Ёдном бўлдим, адойи тамом бўлдим!— деди қиз йиғи аралаш.

Сойер ҳаммасига тушунди. Бу чолни донг қотириб қўйди! Қизининг номусини булғашибди! Лекин бунга ким журъат қилди?

Сойер ўзини тута биларди. Ҳатто ҳозир ҳам ҳаяжонини сөздирмади.

У Кажрига қаради. Кажри ўзидан нима сўрашини тушунидию айтольмади. Буни қандай айтиб бўларди? Соҳиб эса кўзини қадаб, нигоҳи билан пармалаяпти.

Кажри Сукхрамга ўғирилди. Чол энди нигоҳини Сукхрамга қадади.

— Гапир!— Сойер овозини сал баландлатди.

— Бу кичик соҳибнинг иши!— деди Сукхрам.

Чол сесканиб кетди. Лоуренс-а? Уша жирканч пасткаш-а?! У Сукхрамга ишонқирамай қараган эди, у бош иргаб тасдиқлади.

— Ҳа, тақсир! Қичик соҳиб...

Инглиз чолнинг ғазабдан қўллари қалтиради. Чўнтағидан тўппончасини чиқарди.

— Уни тўхтат!— деди Кажри Сукхрамга чолни кўрсатиб.

Сойер хона ичига ошиқди.

— Қани у?— деди чопиб бораркан.

Сукхрам олдинга ўтиб, йўл кўрсатди. Сойер унинг орқасидан борди.

— Ким уни бу ҳолга солди?— хонага кирган чол ерда ётган Лоуренсни кўриб сўради.

— Мәм саъб!

— Қим уни боғлади?

— Тақсир, мәм саъб шундай буюрдилар.

Сойер Сукхрамга миннатдорлик билан боқди. Лоуренс қўрқанидан оқариб кетди. Чол тўппонча ўқталди, лекин Сукхрам унинг қўлини ушлаб қолди.

— Йўқол!— деди Сойер аста, қаҳр билан.

Лекин Сукхрам унинг ўдағайлашига парво қилмади. Сойерни мажбуран бошқа хонага олиб кирди.

Чол ғазабдан титраб қақшарди.

— Тақсир, яххиси мени отиб ташлай қолинг,— деди Сукхрам чолнинг оёқларига йиқилиб.

Сойернинг тўпонча ушлаган қўли шалвираб пастга тушди.

— Сизга нима бўлди, тақсир? Жаҳл кўзингизни кўр қилиб қўйибди. Сиз жуда катта одамсиз, қилмишиғизнинг оқибатини ўйланг. Ўз-ўзингизни шарманда қиласиз. Ахир, ўғлингиз эмас, қизингиз бор,— қизишиб уқтира бошлади Сукхрам.

Сойер беихтиёр унинг гапларига кирди.

— Дак-бунгалодан ўқ товуши эшитилса,— деб давом этди Сукхрам,— бу сирдан бутун қишлоқ воқиф бўлади. Ушанда қаёққа яширинасиз? Тақсир, бу шум хабар бутун атрофга ёйлади.

Лоуренсни ўлдириб қўйса нималар бўлишини Сойер эндинга яққол тасаввур қилди. Миш-миш қишлоққа тарқалади, қишлоқ аҳли ундан кулади. Рожа ҳам, унинг одамлари ҳам, улардан кейин бутун князлик ҳам кулади. Бу ҳақдаги хабар Деҳлигача боради, вице-қирол Сойерни ўз марҳаматидан маҳрум қилади. Кейин миш-мishлар океан ошиб бориб Англиягача етади, бутун олам Буюк Британиянинг сиёсий агенти ва унинг қизи устидан мириқиб кулади! Инглиз йигит инглиз одамнинг қизини шарманда қилибди дейишади! Бунақа ишни ҳиндий қилганида эди, бу давлатлараро муносабатлар соҳасига тааллуқли бўларди, лекин Лоуренснинг жинояти Англиянинг улуғворлигига путур етказади!.. Нега энди Сойернинг шунга дарҳол ақли етмади? Унинг қаршисида фирт саводсиз ҳиндий одам эмас, энг хор табақадан бўлган қул турарди. У қизини ҳимоя қилибди, жиноятчининг қўл-оёғини боғлабди! Шу гадо сиёсий агентга энг оғир жиноятни қилишга йўл қўймади. Ҳукумат таъқиб қилаётган шу ҳиндий тоғда ҳаётини таҳлика остида қолдириб қизини йўлтўсарлардан халос қилди, уйга олиб келди. У қул, аммо унинг кўқсида олижаноб қалб депсисиб турибди. Бу ёввойи, саводсиз маҳлуқда кундалик ҳаёт донишмандлиги йўқ деб бўлмайди. Унинг бу қилиқлари ўта кулгили, аммо ҳақиқат учун ўлишга ҳам тайёр. Бу Хиндистон-а! Лоуренс эса талончилик руҳида тарбияланган. Шунинг учун

ҳам бошқа одамнинг номусини осонликча ўғирлади. Шунга ва шунга ўхшаган одамлар Англияning келажагини бошқаради-я!!!

Сойер панжаларини ёзди, тўппонча ерга тушди. Сукхрам оёғида зўрға турган соҳиб томон чаққон югурди. Сукхрам шу лаҳзада хўжайнин жуда қари эканлигини билди. Ҳозирги вазият ҳар қандай бўлса ҳам соҳибга бўшлиқ, иродасизлик, ожизлик кўрсатишга имкон бермасди, лекин чолнинг пешонасини тер босди, жудаям ожиз, аянчли одамга ўхшаб қолди.

Сукхрамнинг назарида шафқатсиз қўл билан кесилган улкан дараҳт тебрангандай бўлди. Қечагина бу инглиз нақадар кибрли, димоғдор эди! У пўлатдан яралганга, нуқул амр қилиш учун туғилганга ўхшарди!

Кекса инглиз юзини қўли билан тўсади. Энди у ҳеч кимнинг юзига қаролмайди. Соҳиб дўстлари, яқинларини яққол кўз олдига келтирди, уларнинг ҳаммаси уни масхара қилаётгандай бўлди. Сойер бўлса анави Лоуренсга ҳомийлик қилибди! Уни хизматга жойлабди! Жазоси шу бўлди! Қандай шармандалиқ!

Чол беҳол курсига ўтирди, ғамдан боши эгилди.

Булоқ ўзига тошлар орасидан йўл очади, тошларни кемириб, тепага отилиб чиқади. Чолнинг кўзидан дув-дув ёш тўкилди. Юз мингларча қашшоқ, оч одамларга амр қилган кўзлари ёшланди.

Сукхрамнинг ҳайрати ошди. У инглизнинг ҳам қалби борлигини, шу қалб ҳам алам, азоб чекишини ҳеч ақлига сиғдира олмасди. Сукхрам буларнинг ҳаммаси жаноблар, улар оддий одамлар сингари азоб чекмайди, нафратланмайди, нуқул роҳат-фароғатда юришади, амр қилиш ва ҳукмдорлик учун туғишишган деб биларди.

Бугун унинг аввалги тасаввурлари йўққа чиқди. Сукхрам соҳиб ҳам инсон эканлигини, унда одамларга ўхшаб изтироб чекиши фазилати ҳам борлигини кўриб, хўжаси олдида ҳамиша қўрқиб туриш ҳисси зим ғойиб бўлди.

Орадан бир оз вақт ўтгач, чол ўрнидан турди, хоналарни айланиб чиқди, эгилиб, ердан тўппончасини олди. Сукхрам индамай уни кузатиб турди. Ниҳоят Сойер эшик томон йўл олди.

— Тақсир!— дея Сукхрам уни йўлдан тўхтатди.

— Хўш?— Сойер ўғирилди.

— Тақсир! Ановини берсангиз.— Сукхрам тўппончани кўрсатди.

— Қўрқма. Уни отиб ташламайман,— деб жавоб қилди чол.

— Тўппончани нима қиласиз? Сиздан хавотирдаман. Фазабингиз ҳали босилгани йўқ. Кейин нима воқеалар юз беришини биласиз-ку!

— Хўш, нима бўлибди? — бехосдан савол берди чол, қулоғида ҳаммаёқдан ватандошлиарининг масхара қилиб кулаётган товушлари жаранглади. Назарида Британия байроғига ўт кетгандай, ўт байроқни кўкиш-қизил алангалари билан ямлаётгандай бўлиб кетди.

— Тақсир, тўппончани мана бу ерга қўйинг, — деди Сукхрам стол тортмасини кўрсатиб. Чол юмшади. Бугун унинг хулқида одатдаги устунлик, салобат йўқ эди. У Сукхрамга ўзига текнг одамдай қараб турарди. Ҳа, баҳтсизлик кишиларни анча яқинлаштириб қўяди.

— Ҳассамни келтир, — деди чол тўппончасини чўнтағига соларкан.

Сукхрам ҳассани олиб келиш учун кетди. Чол ҳассани олиб, Лоуренснинг ёнига йўл олди. Энди у бутунлай хотиржам эди, фақат кўзлари совуқ чақнарди.

Сусанна билан Қажри Лоуренснинг хонасига чопиб киришганда у калтак зарбидан мадори қурий бошлаганди.

— Мен айборман, кечиринг, ялинаман! Англияга жўнаб кетаман, мени кечиринг, — деб инграрди.

Аммо чолнинг газаби ҳеч босилмади.

Сусанна кўз қирини Лоуренста ташладию индамай хонасига кириб кетди. Сукхрам уйда бўлаётган машмашани ҳеч ким билмасин учун эшикни беркитди.

— Қўйиб юборинг мени... Англиямиз ҳурмати, мени кечиринг... — Инграшда давом этди Лоуренс.

Сойер унинг қандай ҳушдан кетганини ҳам пайқамади.

— Соҳибни тўхтат, бўлмаса шўрлиқни ўлдириб қўяди! — деди Қажри Сукхрамга.

— Тақсир, етар! — деди Сукхрам Сойернинг қўлини ушлаб.

Безбет, сиёсий агентнинг қўлини ушлайди-я! Лекин чол бугун шартлиликни тарк этган эди. Бугун унинг қаҳр-ғазаби адолат, инсонийликка тан берган эди, қонун бузишларни, Британия империяси шон-шавкатини ҳимоя қилмаётган эди. Сойер ҳозир қўли ҳаммаёқقا етадиган жаноб эканлигини ҳам, ўзининг қаршиисида қули турганини ҳам унуганди.

Сукхрам чолнинг қўлидан ҳассани олди. Сойернинг пешонасида йирик тер томчилари кўринди. Қажри чопиб бориб сув келтириди.

— Ичиб олинг, хўжайин, — деди у.

Чол қалтироқ қўллари билан стаканни олиб, катта-катта ҳўплаб сув иди. Жаноб кечагина столга савлат тўкиб ўтирадиган, аъло навли винони ичмасдан овқатга қўл урмайдиган одам эди. Соҳиб важоҳатли, салобатли кўриниш учун керагидан ортиқроқ ичарди. Унинг кибрини ўзи эгаллаб турган юқори лавозим учун зарур фазилат деб ҳисоблаши ундаги бутун

инсонийликни тўсиб турарди. Лекин бугун ана шу тўсиқ бир зумда қулади...

Сойер Сусаннанинг ёнига келганида қиз қайта кийиниб олишга улгурганди. Қиз киртайиб кетган кўзларини ҳадик билан отасига қадади.

— У қандай қилиб бу қадар ёввойига айландийкин? — деди чол қизини бағрига босиб. — Сусанна қизгинам!

Кўнглида түфён урган туйғулар гапиришга йўл қўймади, чоннинг юпатишга арзийдиган гапи ҳам йўқ эди. Бадном бўлган қизини нима деб юпатади?

Сусанна ерга қаради.

— Мендан аччиқланма, ота. Айб менда эмас. Ҳеч қачон унга бўш келмаганиман, — деди у секин.

— Ишонаман, қизим, иффатлисан, бунга ишонаман, аммо бундан буёғига нима қилишимизга ҳеч ақлим етмаяпти, — деди чол.

Сусанна ҳеч қандай жавоб беролмади

Сойер ўтириб, трубка чекди.

— Буни яна ким билади? — деб сўради у Сусаннадан.

— Ҳеч ким. Фақат анови иккови билади. Лекин уларга ишонса бўлади.

— Шундай дегин, — ғўлдиради чол.

Сукхрам қўлларини қовуштириб, улар қаршисида одоб сақлаб турарди. Чол ўйга толди.

Кажри олдин Сукхрамга, кейин Сусаннага қаради. Сусаннанинг кўзлари миннатдорчилик билан порларди. Бу қиз бирам чиройлики! Изтироб уни янада жозибали қилиб юборибди. Олтинни лойдан тозалаб олишди.

— Тақсир, ановини нима қиласми? — аста сўради Сукхрам.

Сойер ҳеч нима демади. Лекин у бугун Сукхрамга биринчи маротаба дадил қарай олмади, бутун борлиги билан ўзинг айт, нима қилай деб турарди.

Сукхрам унинг ҳолатини пайқади.

— Тақсир, кичик соҳибни жўнатиб юборинг, — деди у.

— Қаёққа?

— Хоҳлаган тамонига кетаверсин.

— Бирон одамга оғзидан гуллаб қўйса-чи?

— Йўқ, тақсир. Бу ҳақда у қандай гапира олади? Ҳали моматалоқ жойларини ҳеч кимга билдирамай даволатади. Айтганда ҳам ким унга ишонарди?

— Уни ўзинг ташлаб келасанми? — деб сўради чол. Шундай қилишишга ўзининг журъати етишмаётганди.

— Албатта, тақсир.

— Қаёққа?

— Тақсир, уни станцияга олиб бораман, билет олиб, поездга ўтказаман.

— Бирор билеб қолса-чи?

— Ким биларди? Ҳеч ким билмайди.

— Оҳ! — деб юборди чол.— Бўпти, билганингни қил.

Сукхрам Лоуренснинг ёнига кирди. Арқонларни ечиб, ўрнидан турғизди. Лекин у гандираклаб кетди.

Кажри нон билан чой келтирди.

— Ўтири, соҳиб,— деди Кажри.

Лоуренс унинг гапини тушунмади. Шунда аёл уни стулга ўтқазиб, ёнига ўзи ҳам чўкди, унга чой ичкиза бошлади.

Лоуренс ўз қўлларига қаради: шилиниб моматалоқ бўлиб кетибди. Кажрининг унга раҳми келди. Инглиз йигитга ёқишини сезгирилик билан пайқади. У ҳам Кажрига ёқарди. Ҳаёт ўзи шунаقا: аёл киши эри бўлса ҳам, баъзан ўзи пайқамаган ҳолда эркакларга ёқишга интилади. Аёл киши ёш экан, гўзаллиги, ўзидағи жозиба кучили эркаклар нигоҳи орқали текшириб олади. Аёл интиқ бўлиб атрофга назар ташлайди, бегона нигоҳларни ўзимга тортаяпманни ё йўқ деб туради. Агар унга тикилиб қарашаётган бўлса, демак у бошқаларга ёқяптикан. Кажри кўрсатган меҳрибонлик Lourensga у ҳали ҳам эркак эканлигини, ўзида ҳали ҳам аёллар эътиборини тортадиган жозиба борлигини ҳис этишда ёрдам берди. Ачиниш бўлса ҳам майли. Унинг хўрлиги келиб кетди, Кажрининг елкасига бошини қўйиб, ҳўнграб юборди. Кажри унинг бошини силади, стулда яхшироқ ўтиришга кўмаклашди, кейин орқамдан юрдеб имо қилди.

Лоуренс итоаткорлик билан унга эргашди. Мехмонхонага киргач Кажри кўзи билан Сусаннани кўрсатди, Lourenс Сойернинг олдидаги ўзини Сусаннанинг оёқлари остига ташлаб, аччиқ-аччиқ йиғлади. Лекин унинг йиғиси на чолнинг, на Сусаннанинг кўнглини юмшатди. Сусанна жирканиб Lourenс тумшуқлари остидан оёғини тортиб олди.

Кажри Сусаннадан уни афв этинг деб илтимос қилишга оғиз жуфтлаган эди, бироқ бирон-бир гап айтгани журъат қиломади.

— Олиб чиқ уни! — деб буюрди Сойер.

Кажри уни ташқарига олиб чиқди. У ҳамон пиқиллаб йиғларди. Кажри сарисининг учи билан унинг кўз ёшларини артди, Сукхрам кийим келтирди. Lourenс индамай йўлга ҳозирлик кўрди.

— Эш соҳибининг тоби қочди, кечаси билан иситмада алаҳлаб чиқди. Мэм саъб у билан овора бўлиб роса қийналди. Соҳибда беззак касали бор экан. Иситма таъсирида ақлдан озишгача борди.. Каравотдан сакраб туриб қочишга ҷоғланди.

Унинг қўл-оёғини боғлаб ўринга ётқизишга мажбур бўлдим.  
Энди уни олиб кетяпман,— деди Сукхрам хизматкорларга ба-  
ланд товушда.

— Қаёққа, шаҳаргами?— қизиқсинди боғбон.

— Албатта, бу ерда уни даволаб бўлармиди? Уни поездга  
ўтқизиб, ўзим қайтиб келаман. Заминдорнинг аравасини сўраб  
бергин.

— Кечаси, қаттиқ бўрон бўлди. Мен ҳеч нима эшигганим  
йўқ. Майли, кетганим бўлсин,— боғбон шошиб чиқиб кетди.

Кўп ўтмай арава келди. Заминдор ёш соҳибга хизмат қил-  
ганидан жуда севиниб кетди. Лоуренс аравага чиқди. Сукхрам  
аравани ҳайдади. Бир оздан кейин Лоуренсга қаради. У ухлаб  
қолган эди.

Кечқурун Сукхрам уйга қайтиб келганида ҳужраси остона-  
сида боғбон билан яна бир хизматкор туришарди. Унинг ўрни-  
да Сусанна ўтирибди. Қиз Қажрининг қуруқшаган лабларига  
тегиб турган термометрни ушлаб турарди!

— Нима бўлди?— деб ташвишланиб сўради Сукхрам..

— Ҳеч нима, ҳеч нима— деб уни юпатишга шошилишиди.

Сукхрам Қажрини ушлади. Унинг бадани иситмада ловил-  
лаб ёнарди.

— Безгак бўлганми дейман,— деди боғбон.

— У келди, икковларинг ҳам кетишлиаринг мумкин,— илти-  
мос қилди Қажри.

Боғбон билан хизматкор кетишиди.

— Мэм саъб, сиз ҳам боринг. Энди қўрқмайман

Сусанна кечаси бўлган воқеани оқизмай-томизмай Сукхрам-  
га айтиб берди. Қажрининг қорнига Лоуренс тепганини Сукх-  
рам энди билди.

— Қорнини боғлаб қўйдим,— деди Сусанна.

— Ҳаммаси ўтиб кетади, мэм саъб, ташвишланманг. Безгак  
билан оғримаган киши одаммиди?— ҳазиллашди Қажри.— Шун-  
га ҳам парво қилиб ўтирасизларми?

Сукхрам ўтириб бошини чангаллади.

Сусанна кетди.

— Қўрқма, ўлмайман,— Қажри унга далда берди.— Бунақа  
арзимаган касалга киши ўлмайди.

— Қажри, Пъяри сингари мени ташлаб кетмайсанми?

— Ташлаб кетмайман қўрқма. Жудаям кўнглинг бўш-да?

— Кечаси нималар келтирганимни кўрдингми?— сўради у ни-  
мадир дейиш учун.

<sup>1</sup> Термометрни ушлаб турарди — Ҳиндистонда термометр ки-  
чикроқ, ингичкароқ қилиб ясалади. Одатда қўлтиқ остига қўйилмайди, оғизга  
соливади.

- Йўқ.
- Мана, кўргин,— деди Сукхрам харид қилган нарсаларини Қажри ёнига ёзиб.
- Шу пайт хонага Сусанна кириб қолди.
- Қажри, тузуммисан?— сўради қиз.— Отам ҳолингни билмоқчи.
- Анча яхшиман, хоним,— жавоб қилди Қажри. Уялганича қўлларини орқасинга яширди.
- Лекин Сусанна кўришга улгурди.
- Бу нима?
- Ҳеч нима,— деди Қажри совғаларни кўрсатмай.
- Сукхрам хонимнинг тўсатдан бостириб кирганидан ўзини йўқотиб қўйганди. У сал тортиниб ерга боқди, аммо кўзлари мамнун чарақларди. У бир неча парча оддий газламадан ташқари жажжигина тугмача, иккита шилдироқ олиб келганди. Ахир энди у соҳибининг хизматкори, қашшоқ одам эмас-ку!
- О.— деб юборди Сусанна. Қажри ниманидир ундан яшираётганини қиз пайқаган эди.— Қажри, нега менга олдинроқ айтмадинг?— деди хоним.— Анови ярамас қорнингга тепгандими?— ташвишланиб сўради Сусанна.
- Бола топиладиган нарса. Яна бўйимда бўлар,— деб кулди Қажри.
- Бу гапни ҳақиқий натни айтди! Инглиз қиз бошини қуи солди, назаридан бу йўқотиш қайта тикланмайдигандай эди...
- Сукхрам хонимни кузатгани чиқди, йўлда Сусанна бир оғиз ҳам гапирмади.
- У отасини ҳузурига кирганида у қизга диққат билан тикилганича трубка сўрарди.
- Ота!— деди қиз. Унинг овози титради.
- Яна нима бўлди?— оғзидан паға-паға тутун чиқариб сўради Сойер.
- Докторга одам юбориш керак.
- Нега?
- Қажри касал, аҳволи оғир.
- Қажри дейсанми? Қизим, у докторсиз ҳам тузалиб кетади. Булар врачлар хизматидан бебаҳра одамлар. Бунинг устига унга керагидан ортиқ ачинишинг одамларда шубҳа туғдириши мумкин.
- Ёлбораман, сиздан ўтиниб илтимос қиласман. Ўзингиз кириб бир кўринг. У ҳомиладор. Унинг ҳолати қанақалигини билганингизда эди!
- Сойер ўрнидан туриб Қажрининг уйига йўл олди. уни кўрган Қажри ҳуркиб, шоша сариси чети билан юзини тўсди.

— Сенга нима бўлди? — сўради Сойер. Қажри қўли билан қорнини кўрсатди, боғланган латтада қон доғлари бор эди.

Сукхрам хонага Сойер билан бирга кирганди. У хўжайнинг юзидаги хавотирликни пайқади. Юраги тез ва бесаранжом ура бошлади.

— Буни ким шу ҳолга солди? — сўради Сойер.

Қажри индамади.

— Ўша ёвуз! — дея кўзида ёш билан жавоб берди Сусанна. Сойер қовогини солди.

— Сукхрам! — деди чол эшитилар-эшитилмас қилиб. Сукхрам чолнинг кўзларидаи илтижо, фам маъноларини уқди. Бугун у Сукхрамга катта жаноб сифатида эмас, балки унинг олдида гуноҳ иш қилиб қўйган одамдай қараб турар, чолнинг кўзи эса мени афв эт дегандай жовдирарди.

— Тақсир, нега ташвиш қиласиз? Тузалиб кетаман, — деб ишонтириди Қажри.

Сойер бошини эгди.

— Хўжайнин, ташвишланманг, боринг, уйингизга киринг. Ҳаёт билан ўлим оллонинг фармонида. Бандасининг қўлидан ҳеч вақо келмайди, — деди Сукхрам.

Сойер ерга қараганича индамай эшикка юрди. Сукхрамнинг ўзини тута билиши, обрўсини билиб жавоб бериши чолни ҳайратга солганди. Бу ёввойи унга иккинчи маротаба олижанобликтан сабоқ беряпти. Жуда паст одамлар деб билган қуллари унга инсонийлик алифбесини ўргатишяпти! Сойернинг виждони азобланди. У сирти ифлос кўзани кўриб, унинг ичи ҳам шундай ифлос бўлса керак деган ишончда қараса, соғ гавҳарга кўзи тушди.

Сусанна полициячини посёлкага докторга юборди. Доктор келганида Сукхрам ташқарига чиқиб турди. Доктор Қажри ёнида ўтирган Сусаннага кўзи тушиб ажабланди, лекин ортиқча серсавол бўлишдан сақланиши оқилона иш бўлса керак деган фикрга келди.

У Қажрини кўриб бўлиб шундай деди:

— Ортиқча хавфли эмас. Ғақат ташқи томони лат еган.

Сусанна енгил нафас олди.

— Нима бўлган эди? — доктор қизиқиб сўради.

Қажри Сусаннага қараб, қизнинг тилсиз илтижосини дарҳол уқди. Уз хонимига раҳми келиб кетди. Қажри кулимсиради, доктор жавоб кутиб гоҳ унга, гоҳ Сусаннага тикиларди.

— Ийқилиб тушдим, — деди Қажри ҳазин овозда.

— Бундан кейин оёғинг остига қараб юрарсан, — деб мин-ғиллади доктор.

— Худо оёққа кўз бермаган-да, — Қажри ҳазиллашди.

— Жуда маҳмадана экансан!

У кетганидан кейин Сусанна Қажрини қучоқлади. Хоним чўри аёлни бағрига маҳкам босди.

Сукхрам аёл кишига ор-номусдан азизроқ нарса бўлмаса керак, деб яна бир бор ўйлади. Нега хотинлар ор-номусини сақлашга маҳкам ёпишиб олишади? Чунки улар ҳайвоний эҳтиросдан йироқ, улар пасткашлиқ, қўполликдан жирканишади. Оналик туйғуси ҳурматидан барча сино, дард-аламларга бардош беришади. Лекин аёл ўзига нисбатан ҳурмат кўрсатишни ҳам талаб қилади. Улар ўзларини аёл, она сифатида ҳурматлашларини, ана шу ҳурмат болаларига ҳам ўтишини, бу анъана инсонийлик тантанаси рамзи сифатида ўсиб, мустаҳкамлануб боришини талаб қилишади.

Қажри тузала бошлади. Сусанна ҳар куни ундан хабар олиб турди, Қажрининг тузалаётганини кўриб, ўша машъум кечадан бери илк дафъя чеҳраси очилди.

Орадан бир неча ой ўтди.

— Бисотимизда нима борлигини бир кўриб қўй,— деди Қажри кунларнинг бирида Сукхрамнинг олдига чақалоқнинг жажжи кўйлакларини ёзиб.

— Пулни қаердан олдинг?— деб ҳайрон бўлди Сукхрам.

Лекин Қажри жавоб ўрнига кулиб қўйди, холос.

— Нега индамаяпсан? Бундай ҳолатингда ҳеч ким сенга эримаса керак. Аммо дунёда аҳмоқлар ҳам йўқ эмас.

— Сенга тикилиб туриб, мен ҳам шундай деб ўйлаяпман.

— Э худойим, марҳаматингни аямай ўғил ато қиласидаган бўлсанг, унга менинг ақлиму онасининг чиройини бергин!— деди Сукхрам.

Қажрининг ғазаби бир зумда сўнди.

— Одамлар қиз отага, ўғил онага ўхшаса, бу уларнинг баҳтили бўлиб туғилгани дейишади,— деди Қажри.

— Ҳақ гап ҳақ гап-да, мановиндақа буюмларга эга бўлганинг ҳам баҳтинг.

— Буларни мэм саъб берди.

— Наҳотки?— Сукхрам ажабланди.

— Худди шундай,— Қажри кулди.— Яна мановини ҳам берди,— у ҳали очилмаган атир совунни кўрсатди.

— Ҳой натни! Мени алдамаяпсанми?— шубҳаланди Сукхрам.

— Бор, хонимга арз қил,— деб тўнғиллади Қажри.— Бу энди қилаётган қилифинг эмас.

### 31

Дўстим Сукхрамни яна ўз ҳузурига чақирди. Улар нима хусусда гаплашганини билмайман, лекин Сукхрам, Чандани эрга беришга жазм қилди.

— Иўқ, эрга тегмайман! — деб тинмай бақирарди Чанда. Сукхрам Мангунинг ёрдамида қизига күёв топди. Унинг исми Нилу эди. Жуда ақлли бўлмаса ҳам юмшоққўнгил йигит эди. Чанда аламига чидолмай ўзини ўлдирмоқчи бўлди. Қиз ўзини қудуққа ташлаётганида Мангунинг хотини ушлаб қолди.

Винохўрлик, рақс авжига чиққан чинакам тўй бўлди. Йиф-лайвериб Чанданинг қовоқлари шишиб кетди. Сукхрам ҳеч нарсанни пайқамай тош ҳайкалдай жим ўтиради.

— Барибир уникига бормайман,— деди Чанда кўз ёшлари аралаш.

— Нима қиласан бўлмаса? — деб сўради Сукхрам.

— Ўзимни қудуққа ташлайман.

Нилу қизни куч ишлатиб аранг уйига олиб кетди. Аммо қиз чодирда ҳам унга бўш келмади. Нилу тунни ташқарида ўтказди. Чанда кечаси билан йиғлаб чиқди.

Сукхрам ҳамон жим эди. Унинг бунчалик қаҳри қаттиқ бўлиб қолганига тушунмадим.

— Чандани күёвга берганинг ростми? — сўрадим учрашиб қолганимизда.

— Рост. Ҳаётини йўлга солиб қўйдим,— деб жавоб қайтарди.

— Сени таниёлмаяпман, Сукхрам,— дедим ҳайрон бўлиб.

— Қўлимдан нима келарди, тақсир? Борди-ю, Чандани ўлдириб қўйишса нима қиласан? Инсон учун энг муҳими — ҳаёт. Ҳаёт бўлсангиз ҳаммаси бўлаверади! — деди Сукхрам.

— Ўлдириб қўйишади деб қўрқдингми?

Сукхрам жавоб қайтаришга улгурмади, шу пайт Нареш кўриниб қолди. Мен Нарешни чақирдим.

— Келавер, қўрқма,— деди Сукхрам.

Нарешнинг юзида ғам кўланкасини кўрдим. У аламзада, аянчли кўриниарди.

— Қизим күёвга чиққанини биласан. Нега ҳар куни бу ерга келаверасан? Яна нимадан умидинг бор? — жаҳл билан сўради Сукхрам.

Бу сўзларни эшитиш менга малол келди. Йигитча Чандани унутолмаётганга ўхшайди. Ахир, у қизни қаттиқ севарди-да!

— Нареш, Чандани күёвга беришганини биласан-а? — дедим.

— Ҳа,— деб бош қимирлатди у.

— Нега бўёққа келяпсан? — деб юбордим.

Сукхрам тескари ўгирилди, лекин у кўз ёшларини артаётганини сезиб қолдим.

Нареш кетди.

— Қай ҳолга тушганини кўрдингми? Индамайди, ҳар куни шу ерга келиб, ниманидир кутади,— деди Сукхрам оғир хўрси-

ниб.— Чанда бўлса Нилу билан гаплашмаяпти. Уни эр қаторида кўрмаяпти, ҳеч кимнинг гапига қулоқ солмаяпти. Үнинг онасига зўравонлик қилинганди, энди қиз ҳам онасининг кунига қолди,— деди у ўйчан.

— Ахир, қизингни Нилуга куёвга бердинг-ку,— дедим унинг сўзларига эътибор бермай.

— Бу ишини ўзим учун эмас, Чандани деб қилдим,— деб жавоб қайтарди Сукхрам.

Мен индамадим. Гапирадиган гапим ҳам йўқ эди. Уйга келиб, бўлиб ўтган суҳбатни Нарешнинг онасига айтиб бердим. У:

— Бу ҳақдаги гапни бас қилайлик. Ҳаммаси тамом бўлди. Үғлим қизининг олдига энди бормайди,— деб гапни чўрт кесди,

— Нега?

— Қиз натни. Шунинг ўзи етарли эмасми? Нареш олий табақа одамлари юрган йўлдан боради.

Бу аёл оддий турмуш тирикчилик категорияси нуқтаи назаридан фикр юритар, энди Нареш Чандани бутунлай унутади деб ўйларди.

— Қизни мажбуран куёвга беришибди,— деб эътиroz билдиридим.— У ҳозиргача эрининг ўзига қўл теккизишига йўл қўймабди. Нареш қизни ҳали ҳам унумаганидан хабаринг борми?

— Унга хотин олиб берсам унутади-қўяди. Қандай замонларга қолдик-а? Она сути оғзидан кетмай кўрсатган найрангларини қаранг-а? Улардақа пайтимизда ғинг дейишга ҳаддимиз сиғмасди.

Уйга Нареш кирди, индамай ўз хонасига йўл олди. Онасига маъносиз назар ташлади.

— Қай ҳолга тушганини кўрдингми?— деди аёл.

— Чиқмаган жондан умид деганилар. Унга ёрдам бермоқчиман.

— Ҳой ҳой! Унинг онасиман-а! Сендақа ёрдамчини қара-я.— Нарешнинг онаси гапимни шартта бўлди.

Шундай қилиб эртаси куни Нареш уйдан чиқиб кетди. Орқасидан боришга қарор қилдим. Йигитчадан хавотирланиш ва қизиқиш мени йўлга солди.

Нареш оқ мармардан қурилган қаср олдида тўхтади. Ниманидир узоқ ўйлаб туриб қолди. Мен ҳайрон бўлдим, хаёлан у бу ерда нима қиларкан деб ўз-ўзимга савол бердим. Кейин менда ҳам ёшлиқ ғулғула қилди, ҳаммасига тушундим. Нареш бир вақтлар Чанда билан учрашган қадрдон жойларини хотирлаётганди.

У нари кетди, мен ҳам унга эргашдим. Рўпарадан Чанда келаётган эди. Қизнинг юзи сўлиб, соchlари тўзиб кетипти.

Нарешга кўзи тушгач, каловланиб тўхтаб қолди. Нареш ҳам ўзини йўқотиб қўйди.

— Сен?— деди қиз ўзини йўқотган ҳолда ва ўша заҳоти йигитчага яқинлашди.— Келишингни юрагим сезганди. Мени қанчалар қийнашганини биласанми?

— Биламан.

— Билдингу индамадинг-а?

— Қўлимдан нима келарди?

— Нима келарди?— Чанда ажабланди.— Менга қанақа ваъдалар берганинг эсингдами?— аста сўради қиз.

— Илгари менини эдинг.

— Ҳозир кимникиман?— деб сўради Чанда бақириб юборгудай бўлиб.

Нареш юзини ўгирди.

— Нареш, менда шунчалар қасдинг бормиди? Нареш мени қўллаб-қувватлайди деб ўйлагандим. Сен-чи? Сен ановилардан ҳам золимроқ экансан!

— Золим эмасман, Чанда,— деди Нареш.— Мен... Мен... Сенга қандай уқтирсам экан? Сени куёвга беришди. Энди менини эмассан. Менини эмассан.

Бу гапларни эшитган Чанда оқариб кетди. Қиз севгилисига астойдил тикилди. Нареш қизнинг нигоҳига дош беролмади.

— Эртага сени уйлантиришса, унда нима бўлади?

Чанданинг саволи мени қувонтириб юборди. Ўзи ҳам тушуммаган ҳолда қиз беихтиёр йигит билан яккама-якка олишишга бошлаганди.

— Сен аёлсан, йўрифинг бошқа,— деди Нареш.

Бу сўзларда асрлардан бери тўпланган нодонлик бир томчи сувдагидай мужассамлашган эди. Одамлар онгига эркаклар афзаллиги туйғуси шунчалар чуқур илдиз отганки, буни фақат эркаклар эмас, ҳатто хотинлар ҳам тан олади. Уларга бу афзаллик шак-шубҳасиздай туюлади!

— Нега йўриғим бошқа бўларкан?— деб сўради Чанда.

— Сен бўлиб ўтган ишга кўникишинг керак!

Агар янги авлод кишиси бўлган Нареш «Йўқ, буларнинг ҳаммаси ёлғон! Сен ҳам эркинсан!» деганида қанчалар хурсанд бўлардим.

— Мен натни, ўзинг тҳакур эканлигингни билмасмидинг? Менга раҳминг келганидан учрашиб турармидинг?— деди Чанда ҳаяжони зўрайиб.

Мен Нарешга: «Ҳой, қулоқ сол, сен билан ҳаёт ҳақиқати гаплашмоқчи», деб юборгим келди. У нимадир деб эътиroz билдиromoқчи бўлди, аммо сўзлари томоғида тиқилиб қолди. Нареш индамай Чандага тикилди.

— Демак, севмас экансан-да?— сўради Чанда.

— Севаман.

— Нега бўлмаса менга тегиб кетишдан қўрқяпсан?

— Бу гуноҳ.

— Гуноҳ? Нега?

— Наҳотки тушунмасанг?

— Гуноҳмиш! — хитоб қилди Чанда,— яхшиси сени ҳеч қа-  
чон севмаганман, сохта ошиқ бўлганман деб қўя қол.

— Сени севмасам сен билан учрашишга интилмаган бўлар-  
дим.

— Менда қанақа гуноҳ бор экан? — аччиқланиб сўради  
Чанда.

Нареш қизнинг кўзларига тикилди.

— Бошқа одамнинг хасмисан,— деди аранг.

— Унақа эмаслигини ҳам биласанми! — хитоб қилди  
Чанда.

— Эрга текканинг йўқми?

— Текканман,— тасдиқлади Чанда.— Аммо қандай бўлсам  
ўшандайлигимча қолдим. Унинг хотини эмасман. У ҳали менга  
жимжилогини ҳам теккизгани йўқ.

Нареш индамай қолди.

— Аввалгидай сеникиман,— деди Чанда илтижо билан.

— Бундай бўлмайди, Чанда.

— Нега?

— Чунки сени бошқа одамнинг уйига олиб боришиди, сени  
унинг хотини деб билишади.

— Борди-ю, ўғри қўтосингни олиб кетса, ҳовлисига боғлаб  
олса жим тураверармидинг? — сўради Чанда.

— Йўқ.

— Нега?

— Чунки у меники.

— Демак қўтосинг учун олишасану мен учун йўқ, шундай-  
ми?

— Йўқ.

— Нега энди? Нега?

— Чунки одамлар устимдан кулишади:

— Демак, мендан воз кечар экансан-да? — овози титраб сў-  
ради Чанда.

— Ха.

— Бутунлай унугиб юборасанми?

— Йўқ,— деди Нареш, кўзларида ёши билан.

Чанда севиниб кетди, умидлари чиппакка чиқмаганга ўх-  
шайди.

— Рост гапиряпсанми? — дея сўради қиз.

— Сени қачон бўлмасин алдаган жойим борми?!

— Қандай кун кўрасан?

— Билмайман,— деди Нареш ичор ҳолда.

— Бу дунёда бирга бўлиш бизга насиб қилмаган экан, у дунёда бирга бўламиз, боравер,— деди қиз кескин оҳангда.

Нареш индамай уйига бурилди. Чанда гангиб қолди. Бир лаҳза унга тикилиб турди-да, орқасидан югурди.

— Мени ташлаб кетяпсанми?— деб сўради Чанда Нареш-нинг йўлинин тўсиги.

— Йўқ. Сени мен ташлаб кетаётганим йўқ,— Нареш қизга узоқ тикилди, кейин кетишга ҳозирланди.

Қиз ўзини унинг оёқлари остига ташлади. Шу пайт Нибу пайдо бўлди. У ҳеч иккиланмай Нарешга ҳужум қилди, уни ағанатиб юборди, кейин Чанданинг елкасидан ушлади.

— Йўқол бу ердан! Ярамас!— деб бақирди Нареш ва унга ташланди. Улар муштлашиб кетишди. Нибу Нарешни йиқитиб бўға бошлади. Шунда Чанда Нибунинг соchlарига чанг солди, оёғи билан тепди. Нареш эса унга бир неча мушт туширишга улгурди.

Нибу ниҳоятда ғазабланиб кетди: ахир уни хотини анови итвачча билан бир бўлиб уришяпти-я!

— Аблаҳ!— бўкирди Нибу.— Шошмай тур ҳали, сендаги бор тҳакурликни шилиб оламан!

Нареш бунга жавобан унинг юзига жон-жаҳди билан мушт тушириди. Нибу оғриқдан додлаб юборди, аммо шу заҳоти йигитчага ташланди. Бир зумдан кейин Нареш йўл тупроғига беланганича думалаб қолди.

Нибу жаҳлдан ақли тумланлашиб Чандага ҳужум қилди, бор кучи билан қизнинг қорнига тепди. Чанда фарёд чекиб, оёғидан чалингандай ерга йиқилди. Нареш яна Нибуга ташланди. Лекин Нибу гавдали, кучли бўлганидан уни ерга ағанатиб, сочидан ушлаганича бошини гурсиллатиб ерга ура бошлади. Нареш хушидан кетди. Шундагина Нибу уни ўз ҳолига қўйди.

— Лаънати қотил!— деб бақирди Чанда Нарешга ёпишиб. Унинг қўзларидан тинимсиз ёш оқарди.— Аблаҳ, уни ўлдириб қўйдинг!

Нибу қизни сочидан ушлаб кўтарди. Чанда қаршилик кўрсатди.

— Бузуқ!— деб сўкинди Нибу ва Чандани даст кўтариб уйига олиб кетди.

Уша куни кечқурун тҳакурлар таёқлар билан қуролланишиб, натлар томон йўл олишиди. Улар важ-корсонларга вақт ахтариб ҳам ўтиришмади. Бу улар учун аллақачон ечилган масала: нат тҳакурга қўл кўтарган, бунинг учун жазосини олиши керак. Қонун шунаقا.

Тҳакурлар таёқларини ўйнатишиб таборга ёпирилиб, бостириб киришди. Натлар уларни кутишмаганди. Нима бўлди ўзи?

Лекин тҳакурлар келишлари боисини тушунтириб ўтиришмади.

Хор табақа устига таёқлар ёғилди. Улар ўзларини йўқотиб ҳимояга ўтишди, охири бардош беришолмади.

— Хой, қачонгача бу хўрликларга тоқат қиласиз?— деб бақирди улардан бири.

Сукхрам натлар билан тҳакурлар жанг қилишаётгани устидан чиқиб қолди.

— Тўхтанглар! Бас қилинглар!— деб қичқирди, лекин унга ҳеч ким қулоқ солмади. Шу пайт Нареш етиб келди.

— Бас қилинглар, керак эмас, бас қилинглар!— қичқирди у ҳам. Бир зўмдан кейин Сукхрам билан Нареш ҳам ерда сулайиб ётиб қолишиди. Аламини олган тҳакурлар уй-уйларига тарқаб кетишиди.

Воқеа содир бўлган заҳоти жамоага чопиб бордим. Сукхрам ерда инқиллаб ётарди. Уни ўрнидан турғиздим.

— Нега келдинг?— деди аранг овоз чиқариб.

— Одамлар устидан қилинаётган яна бир эўравонликни кўргани.

— Кўришга арзимайди. Юрак-бағринг эзилиб кетади,— деди Сукхрам алам билан.— Ортиқ тоқат қилиб бўлмайди.

Сукхрамнинг яраларидан қон оқарди.

Юзидаги қонларни арта-арта Нареш яқинлашди.

Сукхрам ҳаммасига тушунди. У Чандага кескин ўгирилди.

— Сен яна ўша томонга бордингми?

— Мени Нилуга боғлаб қўйдим деб ўйловдингми?— деди Чанда.

— Ҳа!— бўкирди Сукхрам.

— Эҳтимол, кўнглимни ҳам унга боғлаб қўярсан?— деб сўради Чанда аввалгидек лоқайд оҳангда.

Сукхрам зарб егандай титраб кетди. У бошини чангаллаб, инграб юборди. Чанда: «Отажон, отажон!» деб йиғлаганича унинг оёқларига маҳкам ёпишиди. Сукхрам лом-мим демади.

— Яраларинг оғрияптими?— сўради Чанда.

— Йўқ.

— Нега бўлмаса йиғляяпсан?

— Чанда, отангга қўпол муомала қиляпсан.

— Айбим учун мени урсанг бўлмайдими? Мени ҳайдаб юборма, дада! Уникига жўнатмагин!— деди Чанда Нилуни кўрсатиб.— Уни кўргани тоқатим йўқ! Уларникига бормайман, мени Ниludeн халос қил.

— Уйимда қоласан, Чанда,— деди Сукхрам дадил.— Эшитдингми, Нилу? Қизим уйингда яшамайди, борди-ю, унга қўл кўтарадиган бўлсанг суякларингни пачоқлаб ташлайман.

Нилу индамади.

— Қизни тҳакур уйига олиб кетадими? — деди бу ерга етиб келган нат.

Сукхрам елкасини қисди.

— Тҳакур билан озгина яшаса қизни жин уармиди? Нилу, сен уни кейин уйингга олиб кетаверасан. Чанданинг ўзи уйингга қочиб боради. Ҳозир у иситма тутган пайтида алаҳсирагандек тентаклик қиляпти. Ана шу алаҳсираш ўтсин. Тҳакурницида озгина бўлса камиб қолмайсан! — деди тўпланиб турган аёллардан бири.

— Нималарни валдираяпсан?

Мангу ҳам хотини билан етиб келди.

— Кўп куйинаверма, ҳали кўрасан, қизинг буниси билан бўймаса, барибир бошқаси билан қочиб кетади, — деди ҳалиги натни.

Сукхрам индамади. У нима деб жавоб қайтаришини ҳам билмасди.

— Агар билсанг, Сукхрам, сенинг тҳакуранинг туфайли уч авлод азоб чекди. Ў замонларга қайтишнинг иложи йўқ, ҳамма кўприклар ёниб кетган. Сен бўлсанг ҳамон умид қилганинг қилган... — деди Мангунинг хотини.

— Устоз, хотиним беҳуда гапларни айтяпти. Ҳаммаси ўрнига тушиб кетади, — деб хотинининг гапини шартта бўлди Мангу.

— Сукхрам, мен билан юр, — деб чақирдим.

— Қаёққа, тақсир.

— Сен билан гаплашмоқчиман.

У аранг ўридан қўзғалди.

Мангу Чанданинг ёнида қолди, хотини қизнинг соchlарини тараф бошлади.

Сукхрам билан ҳеч ким бизни кўрмайдиган жойга кетдик.

— Сукхрам, нега Чандани куёвга бердинг? — деб гап бошладим.

— Бошқа иложим қанча?

— Ахир, Нареш уни севади-ку.

— Қўлимдан нима келарди? — У иложксизман дегандай қўлларини ёзди.

— Қизинингни ҳам ўйладингми?

— Ахир Чанда натни эмас. Унга буйруқ қилиб бўлмайди!

— Натни эмас дейсанми? — ажабландим мен.

— Сенга бор гапни айтганим йўқ, жуда қўрқсан эдим, — деди Сукхрам.

— Чанда Қажрининг қизи эмасми?

— Йўқ.

— У сенинг ҳам қизинг эмасми?

Сукхрам индамади.

— Гапирсанг-чи, нега индамайсан? — илтижо қилдим.

— Айтгани қўрқаман. Буни мендан бошқа ҳеч ким билмайди.

— Аммо менга кўп нарсаларни айтиб бердинг-ку,— дедим ишонқирамай.

— Мен ўзим ҳақимда ҳикоя қилиб берганман, холос,— деб жўнгина жавоб қилди у,— бу эса...

— Хўш?

— Бу эса фақат Чанда ҳақида,— деди у товушини сирли тарзда пасайтириб.— Чанда мэм саъбнинг, инглиз қизнинг фарзанди...

Мен ўз қулоқларимга ишонмадим.

— Сукхрам, аммо гап қон-қардошликда эмас,— дедим.— Энг муҳими, ким тарбия қилганида, қизни натнига ўхшатиб тарбия қилмагансан... Сукхрам, ҳаммасини билмоқчиман. Айтиб бер.

У ўйга чўмди.

— Ҳозир эмас, кейинроқ айтарман,— деди у анча жим тургач.

— Нега?

— Тҳакур икковимиз ўртамиизда қанақа гап бўлиб ўтганини биласанми? «Сукхрам, ёлғизгина ўғлим бор,— деди у.— Уни тинч қўй». Мен эса: «Тақсир, бу ерда менда ҳеч қанақа айб йўқ. Болалар гапимизга киришмаса нима ҳам қила олардим»,— дедим. У бўлса: «Гапингга қўшиламан, Сукхрам, замон ўзгариб кетяпти. Келажак билан ишимиз йўқ. Сен билан ҳозирги замонда яшаб турибмиз, уни қайта ўзгартиrolмаймиз». Бошқа тҳакур карнат билан шу алпозда сухбатлашармиди? Бу одамнинг бафри кенг. Уни ранжитгум келмайди. Камбағалман. Умр бўйи камбағалликда яшадим. Яна кўп яшармидим? Умрим тургаб боряпти. Бу ҳаётдан бошқа умидвор эмасман. Аммо Чанда! Наҳотки у бахтли бўлолмаса? Ў ҳов авави куни ўзини тҳакурани деб атагани хотирингдами? Хотирладингми? У инглиз аёлнинг қизи, ўзини тҳакурани авлодиданман деб керилиб юради. Уни ким эпақага келтиради?

Мен Сукхрамнинг гапларини бўлмай эшитдим.

— Чанда учун қўлимдан келганини қилдим,— давом этди у.— Мэм саъб жўнаб кетиши олдидан қўлимга етти минг рупия тутқазди. Ана шу пул билан Чандани вояга етказдим. Аммо жуда қўрққанимдан қиз хусусидаги ҳақиқатни ҳеч кимга айтмаганман.

— Тҳакурга ҳам айтмадингми?

— Ҳа, унга ҳам.

— Нега энди?

— Нима фойдаси бор?

— Ҳеч бўлмаса ўзини қандай тутишини кўрар эдинг.

— Йўқ, унга индамай тўғри иш қилдим. Ахир, Чанда одамларнинг кўзи ўнгидаги натни холосда. Унинг мэм саъб қизи эканлиги хусусида далилларим ҳам йўқ. Бўлганда ҳам бу ҳеч қанақа яхшиликка олиб келмасди.

— Нега? — ажабландим.

— Ахир у никоҳсиз туғилганда, — деб жавоб қилди Сукхрам. У индамай қолди, менинг фикримни билмоқчидай юзимга тикилди.

— Сукхрам! Ота-оналар паст, ифлос одамлар бўлиши мумкин. Лекин болалар эса ҳамиша покиза, бегуноҳдир.

— Сен ҳам шундай ҳисоблайсанми? — хитоб қилди Сукхрам. — Кажри ҳам шу ўйда эди.

— Кажри! Сукхрам, унинг ҳақида ҳикоя қилиб бермадин.

У чуқур хўрсинди: ҳа, ўтмишни хотирлаш ҳамиша оғир. Айниқса ўтмишни қайғуга тўла, ҳузур-ҳаловатсиз ўтган бўлса.

...Бош соҳиб яна сафарда эди. Сусанна ўзини қаерга қўйиншга жой тополмади.

— Ҳеч нарсани пайқадингми? — деб бир куни Кажри Сукхрамдан сўраб қолди. — Мэм саъб ҳомиладор.

Янгилик Сукхрамни эсанкиратиб қўйди.

— Ҳа, ишлар чатоқ, — деди Сукхрам ўйчан ҳолда, — энди нима бўларкин?

— Нима бўларди, бола бўлади-да, — деб ҳазиллашди Кажри.

— Она бўлишга ихтиёри қанақа?

— Паришонхотир юрибди. Фам-ғусса чекавериб безори жон бўлиб кетган. Фамини баҳам кўрадиган одами ҳам йўқ.

— Одами йўқ дейсанми? — Сукхрам ҳайрон бўлди. — Ахир, соҳиб отаси бўлади-ку.

— Қизни дардингни ёр деб қистадим. Юраги ҳеч дов бермаяпти. Болани бирон ёққа жойлаштириш ярасини ўйлаш керак.

— Мэм саъб сенга гўдак кийимларини мунча кўп беради?

Кажри унинг гап мазмунини уқмади.

— Хўш? — деб сўрашда давом этди Сукхрам, ичиди: «Она она-да. Шармандалик ваҳимаси қиздаги оналик туйғусини йўқ қилиб қўйяпти. Шунинг учун ҳам Кажридаги ана шу туйғуни рағбатлантиряпти».

— Нега мендан сўрайсан? Мен қаёқдан билай.

Сукхрам чекди. Унга қараб Кажри ҳам чекди.

— Қиз бечора қаерда туғаркан? — деб сўради Сукхрам. — Қишлоқда мумкин эмас, гап-сўзга қолиш мумкин.

— Билмасам.

— Қиздан сўраб кўрдингми?

— Йўқ. Менсиз ҳам юраги қон бўлиб юрибди.

— Сўраб ҳам бўлмайди шекилли! Майли, у азоб чекаверсин, сен у билан бирга адойи тамом бўлавер, шундайми?

— Нега унақа дейсан?

— Менга қара, сен ўзинг қиздан бир ўсмоқчилаб сўраб кўр! Буни чолга ҳам маълум қилиш керак. Болани ўша бирон ёққа жойлаширади!

— Қаёққа?

— Мен қаёқдан билай? — Сукхрам қўлларини ёзди. — Олпий табақа аёллари бола олдиришиади. Сен буни била туриб ўзингни билмаганга соласан. Бунга фақат биз йўл қўймаймиз, холос, Кажри. Ахир ёруғ дунёга янги одам туғилади-я!

— Туғилади, туғилади! — Кажри эрини мазах қилди. — Нега туғилади? Қанақа бола бўлишини ким билсин?

— Ахир қиз бечора күёвга чиқмаган-да!

— Хўш, нима бўпти? Күёвга чиқиш — тирикчилик иши, бола худонинг инояти. Нима бўлса ҳам гўдак гўдаклигича қолади. Гуноҳ begunoxlik туғидиради, — деди Кажри ўйчан ҳолда. Бир оз жим тургач, қўшиб қўйди. — Сукхрам, бир нарсага ҳеч ақлим етмаяпти, қизи тушмагур нега күёвга чиқмаяпти экан? Шу аҳволга тушиб қолган бўлса, чорасини ўзи ахтараверсинда.

— Бўйида бўлиб қолган қизга ким ҳам уйланарди? Бола бечора ҳам умрбод таънадан чиқмай ўтади.

— Нега?

— Нега энди бошқа бир эркак бироннинг боласи учун жон куйдираркан?

— Шунақами, ҳали?! — хитоб қилди Кажри. — Аёл киши бошқа аёлнинг боласини қандай вояга етказади?

— У унга она эмас, ўғай она бўлади!

— Ўғай оналарнинг ҳаммаси ҳам кам меҳр эмас-ку. Дунё шунақа: если она битта. Ўзиники бўлмагач ўғай дейилади-да. Тўғри, оталарга ҳам осон эмас...

— Асли гап маъноси шуки, — тасдиқлади Сукхрам. — Кел, бўладиган иш ҳақида бош қотирайлик.

— Мен сенингча бошқа гапларни гапиряпманми? Эҳ, худойим-эй! Аёл шўрлик она бўлса-ю, булғанганлар қаторига кириб қолса-я! Она қорни бамисоли она ернинг ўзгинаси. Нахотки ер гуноҳ қилса? Кейин дунёга келган болада нима гуноҳ?

— Сен буни одамлардан сўра, мен билан баҳслashiб нима қиласан?!

— Жавоб қайтаришга ожизсан, шу важдан жаҳлинг чиқяпти. Эҳ, сиз, эркаклар! Биздан туғиласизу қўл-оёғимизни боғлашга интиласиз! Аёллар садоқатини таъкидлаганларинг таъкидлаган. Нима, мен бошқа эркаклар билан бўлмабманми?

Бундан менга бирон ҳаром нарса ёпишиб қоптими? Ўзинг Пъяри билан бирга яшаб камиб қолдингми?

— Демак, сенингча одамлар кўнгли хоҳлаган билан яшайверсин экан-да? Бугун бу ерда овқатланиб, эртага у ёқда ичиб кетаверсин экан, шундайми?

— Э-э, сен ҳеч нарса тушунмаганга ўхшайсан! Бу ҳақда гапирайтганим йўқ. Агар кишининг ақли бўлса, қудуқдан сув ичади, ақли бўлмаса оқава сувдан ичаверсин.

— Унда ҳамма одамлар покиза бўларди.

— Жонгинам Сукхрам, ҳамма ҳам онадан покиза, иффатли ҳолда туғилади. Аёллар бу дунёга авлиёларни ҳадя қиласади! Ёмонликни одамлар ўзи сотиб олади.

Кечқурун Кажри Сусаннадан энди нима қилмоқчи эканлигини сўради.

— Нега буни сўраяпсан? — ажабланди қиз.

— Сукхрам қизиқяпти.

— Наҳотки унга айтиб қўйган бўлсанг? — Сусанна талвасага тушди.

— Айтдим, хоним.

Сусанна қизариб кетди.

— Нима, айтмаслигим керакми? — деб сўради Кажри. Сусанна бошини эгди.

— Сизга айтганим малол келдими? Бундай бўлишини билмабман-да! — хитоб қилди Кажри.

— У нима деди?

— Эсимда йўқ, жудаям ўзгариб кетди, вассалом,— Кажри ҳақиқатни яширди.

Сусанна жавоб қайтариш учун оғиз жуфтлади, лекин лаблари титраб кетди.

Қиз биринчи маротаба ўзини она деб ҳис этди, аммо бу тақдирнинг бераҳм шўри ғавфосини қаранг! Оналик бахти унга қўпол зўравонлик туфайли келди. Ҳар ҳолда қиз вужудида жажжи бир тирик мавжудотнинг яшатганилигини ҳис этиб, унга меҳр қўя бошлади. Кажри инглиз қизнинг бошини силади.

— Мэм саъб! Бола туғишмидан ўта бахтиёрман. Сиз ҳам шундай бўлсангиз керак. Аммо бу қанақа ҳаёт бўлди-а?! Сизларда ҳамма нарса етиб ортади-ю, эркинлик йўқ...

Кечаси кекса соҳиб уйга қайтди. У анчагача бир нималарни ўйлаб ўтириди. Сусанна билан бир-икки оғиз қисқа гаплашди, холос. Сусанна ҳам кўпроқ индамай ўтириди. Уйда ҳамма нарса ўзгариб кетди. Энди Кажри тинимсиз жаврар, Сусанна бўлса унга қулоқ соларди. Қиз илгаригидай серсавол эмасди.

Сойер столга ўтириди. Қизи унинг рўпарасига жойлашди, сал нарида Сукхрам билан Кажри тик туришди. Чол уларга кўз қирини ташлаб қўйди.

Бир муддат ҳаммалари жим қолишиди.

— Тақсир! Гапиришга изн беринг,— деб Кажри сукунатни бузди, Сукхрамга тез нигоҳ ташлади.

Чол лўли аёлга тикилди, нима гапинг бор дегандай қошини чимириди.

— Марҳаматли тақсири...— деб гап бошлиди Кажри, аммо тилдан қолгандай дами ичига тушиб кетди.

Чол Сукхрамга қаради, у бўлса тескари ўгирилди.

— Эҳтимол, сен гапиравсан?— деди Кажри эрига.

— Тақсир, мени авф этинг. Мэм саъб ҳадемай она бўладилар, шуни айтмоқчи эдим,— деди Сукхрам, эшитилар-эшитилмас товушда.— Биз бўлса...

— Нима?

Сусанна ранги оқариб, жонсиздай, тош ҳайкалдай қотганича ўтиради. Отасига буни билдиришга қанчалик ҳозирлик кўрмасин изтироб янги куч билан бутун вужудини қамраб олди.

Сойернинг боши ҳам бўлди. Сукхрам инглиз чолга ҳайрат билан тикилди.

Чол ун чиқармай, ўйга толганича узоқ ўтириди.

— Сукхрам!— деди ва ниҳоят.

— Лаббай, тақсир?

— Сен қишлоқдан ташқари бирон ерда бўлганмисан?

— Қиязликда кезганман, тақсир.

— Бирорта катта шаҳарда бўлмаганмисан?

— Иўқ, тақсир.

Чол яна индамай қолди, сўнг қизига қаради. Қиз бу нигоҳга тоқат қилолмади, юзини қўллари билан яшириб, аччиқ-аччиқ йиғлади.

— Ўлганим минг марта яхши эди. Яшашни хоҳламайман!— деди қиз пиқиллаб.

Кажри уни аранг юпатди. Сойернинг кўзлари ҳам намланди.

— Сусанна, Сукхрам билан Бомбейга борасан,— деди чол, бир оз жим тургач,— Кажри, сен ҳам улар билан бирга жўнайсан. Қейин Сукхрам билан қайтиб келасан. Сусанна, сен эса, Бомбейдан тўппа-тўғри Англияга жўнайсан. Ҳиндистон Англияга иснод келтирадиганлар жойи эмас.

Чол ҳам, Сусанна ҳам жим қолишиди.

— Сукхрам, гапимни уқдингми?

— Хўжайн, тирик эканман хизматингизда бўламан.

— Алдамайсанми?

— Шубҳалансангиз, ўша ёққа бормаганим маъқул.

Чол қўзғалиб, хона ичидаги юра бошлиди. Унинг панжалари титраб мушт бўлиб тугиларди. Тўсатдан у кескин тўхтаб босини чангллаганича инграб юборди.

- Э худойим, бу шармандаликка чидашга кўмак бер!  
Сусанна лом-мим ҳам демади.
- Йиғлаяпсанми? — Сойер ғазабланганича қизининг устига ўдағайлаб борди.
- Тақсир! Бу киши қизингиз, унинг ҳеч гуноҳи йўқ. Қиз бечора нима ҳам қилсин? — деб Сукхрам ўртага тушди.
- Чол бошини эгиб, шивирлаб чўқинди.
- Кажри! — деб чақирди чол.
- Лаббай, хўжайин!
- Бола нима бўлади?
- Тақсирим нима буюрсалар — шу.
- Борди-ю, биз уни сенга ишониб топширсак-чи?
- Тақсир, уни мен ўз боламдай парваришлаб катта қила-ман.
- Бунинг эвазига сенга кўпгина пул бераман.
- Тақсир, унда гапингизга унамайман.
- Нега?
- Тақсир, бола учун пул олмайман. Нон-тузингиздан баҳ-раманд бўлдим. Болани ҳам боқаман. Бутун оламнинг болала-рини эмас, ёлғиз болани боқаман-ку!
- Чол қўллари қалтираб, кўзи ёшланди. У Сусаннага яқин-лашиб, уни қучоқлади.
- Қизгинам! — деди у.
- Сусанна бошини отасининг кўксига яширди.
- Қизимнинг боласи ҳам менинг болам бўлишига тақдир йўл бермади... — деди чол алам билан.

\* \* \*

Эртаси куни улар Бомбейга жўнаб кетишли. Сойер қизини станциягача кузатиб қўйди. Кажри билан Сусанна биринчи класс вагоннинг бутун бир купесини эгаллашди. Сукхрам хизматкорлар хонасида қолди.

Кажри ҳайрат билан атрофга боқди. Сусанна пастки пол-кага ўрнашгач, Кажри қизнинг оёқ томонига ўтириди. Лекин Су-санна унинг қўлидан ушлаб шундай деди:

— Кажри, ёнимга ўтири.

— Вой, йўқ, мэм саъб. Сиз хонимсиз. Менга паст ҳам бўла-веради.

— Кажри, сен боламнинг онаси бўласан. Болагинамнинг кулгисидан ёлғиз сенгини қувониб, кўз ёшисидан алам чека-сан. Бу ерда сен билан мен холос. Бегона одам йўқ. Яқинроқ ўтири. Сенга боламни эмас, юрагимни беряпман... Сен унинг онаси бўласан.

Кажри хоним билан ёнма-ён ўтириди.

Сукхрам купега кирганда ҳайратдан анграйиб қолди.

— Дарров ерга ўтириб шивирлаб хотинига буйруқ берди.

Кажри уни эрмак қилиб, тескари бурилиб олди. Сукхрам унга жон-жаҳди билан имо-ишора қилишда давом этди, Кажри бўйсунишга мажбур бўлди.

— Нега яна ерга ўтириб олдинг? — деб сўради Сусанна.

— У буюрди! — Кажри Сукхрамга имо қилди.

— Айт, ишимизга аралашмасин, — деди Сусанна кулимсираб.

— Боравер, боравер... — Кажри эрига қўл силтади ва яна инглиз қиз ёнига ўтириб олди.

Сукхрам қароргоҳга қўлида гўдак билан қайтиб келди. У бир неча бор одамларнинг ҳаётини сақлаб қолди, энди бўлса мана шу жажжи жоннинг ҳаётини эҳтиётлаш учун манзилга қайтди. Сукхрам юриб келаркан, бўлган воқеаларни бир-бир хотирлади...

Бомбей Кажрини ҳайратга солди.

— Эҳ, худойим, олам нақадар кенг! — деб хитоб қилди Сусанна.

— Бомбей ҳали бутун олам эмас, — деди Сусанна.

— Осмондаги ўлдузларда бизнинг оламга ўҳшаган оламлар бўлади деб қария. Ҳарпал бежиз айтмаган экан, — деди Кажрӣ.

Буларнинг ҳаммаси бир гап эди холос. Бомбей! Шовқин-сурони, бойлиги, қашшоқлиги авж олган Бомбей бу! Чарчоқдан мадори қуриётган, очликдан ўлаётган, тириклайнин чириб бораётган бечоралар шаҳри Бомбей бу!

Улар ҳашаматли меҳмонхоналардан бирида тўхташди.

Лекин Сукхрамнинг ҳозир буларни эслагиси йўқ. Буларни хотирасидан бутунлай ўчириш истаги бор унда, Бомбей таас-суротлари унинг жону жаҳонини қовуриб ташлайди.

...Доктор келиб Кажрини кўрап, бошини чайқаганича чиқиб кетар, Сукхрам эса шошқатор ёшлиарини билинтирмай артарди.

Иёл азоби, Бомбейнинг иқлими Кажрининг соғлигига таъсир қилди, у қаттиқ оғриб қолди. Сукхрам оғир аҳволга тушди. У Кажрига қараши керак эди, бунинг устига мэм саъб ўнғайсизланмаслигининг ташвишини ҳам тортиши зарур эди. Ахир, қиз бегам, беташвиш яшашга ўрганганди.

— Кажри, сен тезроқ тузалишинг керак. Менинг боламни ҳам катта қилишингга тўғри келади, — дерди Сусанна.

Сукхрам ўзининг келиб чиқишини унугиб қўйганди. Хаёлида ўз боласининг дунёга келишини кўрарди. Аммо тақдир бошқача йўл тутди. Фақат бир лаҳзанинг ўзи хотирасида абадий қолиб кетди. Бошқасини эслолмайди. Ҳатто ҳозир ҳам

ўуларнинг ҳаммаси даҳшатли тушдай бўлиб туюлади. Қажри тирик, рўпарасида ўтиргандай...

...Кувноқ, бегам Қажри унинг кўз олдида жон берди. Сукхрам инсон изтироби теранлигини охиригача ҳис қилди. Қажри ўзини у ёқ-бу ёққа урди, алаҳсиради, эрини чақирди ва охири жимиб қолди. Доктор ҳеч бўлмаса болани асраб қолмоқчи бўлди. Иложини қололмади. Йиғлайвериб Сукхрамнинг кўзлари шишиб кетди. Нималар бўлаётганини у ҳеч тушуниб етмади. Бутун умри беомон, мантиқсиз тузоққа ўхшаб намоён бўлди. Одамлар нуқул азиат чекиш учунгина туғиладилар...

У Қажрининг ўрнига ўтириб йиғлади.

— Хоним, хотиним нечун бунчалик азоб-уқубатларга мубтало бўлди? Э худойим, наҳотки уни бошқа кўрмасам? — деб савол берарди, Сусанна жавоб қайтармасди. Ортиқча ҳаяжонланишлар, ўзидан кетиб қолишлар туфайли Сусанна кичкинагина, нимжонгина чала қизча туғди. Қизча бармоқларини оғзига олиб бориб сўришга бошлади. Кўзи роса очилмаган, сал филай боқарди. Ким билсин, бу гўдак қайси номаълум дунёга қарайпти? Сукхрам кўп вақт қимирламай, бир нуқтага тикилганича ўтирас, Сусаннанинг кўзларидан тинимсиз ёш оқарди.

— Хоним! Қажригинам қани? — деб сўрарди Сукхрам.

— У вафот этди. Худо боламни онасидан жудо қилди, — деб хўрсинарди Сусанна.

— Йўқ, хоним! Нега ундай дейсиз? Қажри, Қажри, ёнимга кел, сенсиз яшомлайман!

Сусанна уни қандай юпатишни билмас, юзидан тинимсиз кўз ёшлари қўйилар, тасалли сўzlари ҳеч оғзига келмасди. Аммо қизча йиғлашга бошлаши биланоқ Сукхрам ҳамма нарсани унутар, гўдакни қўлига олар, бошқа ҳеч нарсани сўрамас, уни бағрига босиб, то ухлаб қолгунча аллалар эди.

— Бирам оппоқ қизки, унга Чанда<sup>1</sup> деб исм қўйинг, — дерди у Сусаннага. — Қизчадан ажралишни хоҳламайман. Уни менга беринг! Буни қўлимда кўриб Қажри жудаям қувонади.

Сусанна унга ҳадик билан боқар, лекин Сукхрам соҳибанинг ҳадиксирашига парво ҳам қилмасди. У гўдакни меҳр билан ўпип, нуқул:

— Чанда! Чанда! Сен ўзимники! Сени уйимга олиб кетаман. Оламда сендан бошқа ҳеч кимим йўқ. Ҳеч кимим! — дерди.

Сусанна эса унга ялинишни қўймасди:

— Сукхрам, мен билан кета қол! Қизчани ўзимники дейсан, у мен билан яшайди. Уни вояга етказаман, тарбия қиламан...

<sup>1</sup> Чанда — ой демакдир.

Лекин Сукхрам ўжарлик билан нуқул: «Иўқ... иўқ...» дейишни қўймасди.

Чунки у ақлдан озиш даражасида эди, унинг қулғига йироқ-йироқлардан ғалати шовқин эшитилар, кўз олдида кўҳна қалъанинг нурсиз тасвири намоён бўларди...

Сукхрам Бомбейни қандай тарк этганини, Сусаннанинг йиғлаб-сиқтаганини, хотини ўлими туфайли ғам чекиб, ўз умрини шу бола учун бағишлиашга қасамёд қилганини, унинг қаршилигига қарамай Сусанна бор-бисотини ҳадя қилганини хотирлай олмайди. У тезроқ гузарга қайтиш лозимлигини таъкидлади ва ниҳоят айтганинг уддасидан чиқди.

Гузарда дастлабки пайтларда унга Мангур билан унинг хотини кўмаклашиши.

Мангунинг хотини Чандани қўлига олиб сут билан боқди. Қизча кулимсиради. Кулишлари бирам жозибали, ширин эдик!

— Кўй, йиғлама,— деди Мангунинг хотини Сукхрамга.— Тақдир бераҳм, йиғлашингдан не фойда? Чанданинг юзига бир қара... бамисоли ойга ўхшайди-я! Нега ҳадеб Қажри ўлди деяверасан? У сенга шу болани қолдириб, ўзи кетган.

Инсоннинг ичига ютиб тортган азоб-уқубати, ғам-андуҳидан кўра зоҳирига отилиб чиққани кишига унчалик азоб бермайди. Қанчадан-қанча чекилган азиятларнинг ҳаммаси унтулиб кетди... Сукхрамнинг эсида қолгани Қажрининг ўлими-ю, Сусаннанинг ўз гўдаги билан ажралиши бўлди, холос. Сукхрамнинг қалбини кемираётган кўҳна қалъа ҳақидаги сирли орзу уни Чанда билан яна қўналғага тортди. Чеккан ҳамма руҳий изтиробларидан кейин унинг учун Чанда илоҳий бир кучга айланиб қолди. Сукхрам зўр мамнуният билан зиммасига янги ташвиш ва мажбуриятларни олди. Қўлида гўдаги борлиги учун ҳам у ҳамма ғам-койишларга индамай бардош берди. Ҳали дунёга келмасдан олдин она меҳридан баҳраманд бўлиш ҳуқуқидан маҳрум бўлган Чанда унинг ҳаётини янги мазмун билан бойитди...

### 32

...Сукхрам чодирда ётар, унинг миясида ташвишли фикрлар чарх уради. Умрининг бошида у қандай орзуларни эъзозлаб-ардоқлаган эди. Ўша замонларнинг тасодифий воқеалари унинг ҳаётida қанчадан-қанча фалокатлар келтирди, уни кўҳна қалъа ҳақида ҳадеб ўйлайверишига мажбур қилди. Лекин шунча замон ўтса ҳам бугунга келиб, унинг орзулари орзулигича қолди. Ҳақиқатда эса уни нуқул ёмадсизлик таъқиб қилиб келди.

Кун чошгоҳдан ўтди. Сукхрам ўрнидан туриб ўтиради. У Чандада ҳақида ўйларди. Қиз бечорани шундай кулфатларга дучор қилгани у номард инглизнинг қандай ҳадди сиғди? Қайси қоидага кўра бироннинг фарзандига шунча алам-ситам ўтказди? Бола никоҳсиз туғилмаганида ҳаётни бутунлай бошқача бўларди, алам, йўқчилик нималигини билмай ҳашаматда ҳаёт кечирарди, азалдан одамларни табақа, синфлар бир-биридан ажратиб турган ташландиқ, хилват бир қишлоқда совуқдан қалтираб ўтирамасди...

...Тинимсиз ёқсан жала йўлларни сувга тўлдирди. Қудуққа сувга бораётган аёллар тиззаларидан лойга ботишди. Кўчага чиқсан деҳқонлар эски пойафзалларини авайлаб, оёқларидан ечиб олишарди.

Қишлоқ устига ёпирилган оғир булутлар эрта кундаёқ қоюқорайтиради. Осмоннинг энг олис жойида момақалдироқ гулдинради. Бора-бора самода заррача ёруғлик қолмай, ҳаммаёқ қорамтирил болугтариб пардасига бурканди. Одатда омади юришмаган одам бошига барча умидларини йўқ қилиб беҳисоб кулфатлар худди ана шундай ёпирилади.

Ҳаво совиб кетди. Ҳаммаёқда гулханлар ловиллади, унинг атрофида совуқотган кишилар бир-биirlарининг пинжига суқилиб давра қуришди. Иигирманчи асрда ҳам улар ибтидоий жамоада яшаган бобокалонларидан унча узоққа кетишолмаган эдилар. Шамол жинни одамнинг қаҳ-қаҳ уришига монанд ҳолда қаҳр билан ўкириб дараҳтларга ҳужум қилас, япроқларни юлқир эди.

Кўл устини кўкимтири тутун қоплаган. Кўл кўпирни, қирғоқларидан четга чиқмоқда. Ҳеч кимга зарурати бўлмаган қишки ёмғир деҳқонларининг кўп кунлик, оғир меҳнати эвазига эндиғина кўкарған экинларини йўққа чиқариб кетди. Жала остида ярқираб турган кўхна қалъа қизил тусга кирганди. Совуқдан қалтираётган товуслар оқшом сукунатини бузиб, жон-жаҳдлари билан қичқиришмоқда.

...Чанда ухларди. Сукхрам ўтириб олиб чилим чекарди. У чекишини тугатиб найни ўйга берилганча тозалади. Тўсатдан Чанда сакраб туриб кетди.

— Мен келаман... Мен келаман...— деб ғудирлади қиз уйқу аралаш.

Сукхрам қизини чақирди.

Чанда сесканиб кетди.

— Ким бу ерда? Дада, сенмисан?— қиз кўзларини катта очди, аммо илгаригидай кулимсирамасди. Сабаби, Сукхрам қизга Нареш билан учрашишни таъзиқлаб қўйған ўша кундан бери у кулишни бас қилганди. Сукхрам ўзини қўярга жой тополмасди. Чунки қизнинг ниҳоятда қийналётганини биларди.

— Сенга нима бўлди, қизгинам? Нега уйғониб кетдинг?— деб сўради у.

— Шундай ўзим, дада, шундай ўзим,— ғамгин жавоб қилди Чанда.

— Қизгинам! Отам душманим деб ўйлајпсан шекилли? Йўқ, қизим, менга ишонавер. Қўлимдан нима ҳам келарди? Дунё измимда эмас. Шу ишга аҳд қилган бўлсам сени халос қилиш учун қилдим.

— Дада, сенга таъна қилаётганим йўқ-ку.

— Лекин сен кулишни бас қилиб қўйдинг, ҳамиша алланималарни ўйлаб юрасан. Сезиб турибман, қизим, аламларингни унут, бутун хуш кунларинг олдинда.

— Дада, ажойиб туш кўрибман. Жуда ғалағи туш,— деди қиз ўйчан.— Кўҳна қалъада юргандаймишман.

Сукхрам сесканиб кетди.

— Ишонмаяпсанми? Узим ҳам шундай бўлади деб ўйлагандим. Дада, мени қалъага олиб бор! Тушимда қалъа мени чақиряпти.

Сукхрам қизига қўрқув аралаш тикилди.

— Йўқ, Чанда, туш фирт ёлғондан бошқа нарса эмас,— деди у.— Қалъа харобазорнинг ўзи.

— Биламан, дада,— деди Чанда.

— Оламнинг бағри кенг, қизим! Ҳали ҳеч нарса кўрганинг йўқ, ҳеч нарса билмайсан, шунинг учун ҳам мўъжизалар ҳақида хаёл сурасан.

— Лекин, дада, тҳакурани бўлсам Нарешнинг ёнига бора оламан.

— Қизим, отангнинг гапларига қулоқ сол, ўжарлик қилма,— деди Сукхрам қизининг гапларига эътибор бермай.

— Мен барибир бораман,— деди Чанда жиддий. Бугун қизнинг қатъияти зўр эди. Унинг шаддодлиги Сукхрамни чўчитди.

— Қаёқقا борасан?— деди у ташвишли оҳангда, Сукхрам ҳамон қизим фикридан қайтади деган умидда эди.

— Айтдим-ку,— деди Чанда.— Анови ёққа. Ана, тўғрида турибди.— Чанда бармоғи билан кўҳна қалъани қўрсатди.

Сукхрамнинг вужудини ёмон бир ғашлик қамраб олди. Чанда, мана шу нозик ниҳол гул тўсатдан қалъага, маккор, ёмон инс-жинслар маконига отланса-я!

— Йўқ, Чанда, ўёққа боришинг мумкин эмас!

— Нега?

— У ерда илонлар, чаёнлар, қоплонлар бор. Хавфли жой!— деди Сукхрам бақиргундай бўлиб.

— Ўндан бўлса сен ҳам бирга бор,— деб қистади Чанда.

Сукхрам қизини гапга кўндира олмаслигини билди. Қизи бир-

га боргин деяпти. Тўсатдан қизининг шивирлагани қулоғига чалинди.

— Дада, мен тҳакураниман, шу рост-а?

Тҳакурани!!!

— Йўқ, сен Чандасан,— деди Сукхрам ўзини вазмин тутишга интилиб.— Сен менинг Чандамсам, бор-йўғи Чандасан, суюкли қизимсан. Сени тҳакурани деб ким ишонтирди?

Чанда мийигида кулганича бошини сарак-сарак қилди. Сукхрам нима дейишини билмай ўзини йўқотиб қўйди.

— Эй, ёмғир ёғдими?— сўради қиз чодирдан мўралаб.

— Ҳа, қизим. Ташқари жуда совуқ,— деди Сукхрам қувониб.

— Ҳўш, нима бўпти? Аммо кейин исиб кетамиз,— деди Чанда.

— Кейин деганинг қачон?— ҳеч нарса тушунмай савол берди Сукхрам.

— Сен билан ўша ёқдан қайтганимизда,— деб жавоб қайтарди Чанда.

— Қаёқдан? Нега энди исиб кетарканмиз?

— Қалъадан. Дада, ўшанда бой бўлламиш! Ҳамма одамлар бизга хушомад қилишади, эгилиб салом беришади. Дада, бу дунёмизда бойликнинг қадрига етишади, тўғрими? Зодагон одамнинг қизи бўлганимда, мен...

Сукхрам қўз ёшлиарини артди.

— Дада, йиғлаяпсанми?

— Қўявер, қўявер, қизим, эътибор берма!

— Сенинг қизинг бўлганим учун мени фам чекяпти деб ўйлајпсанми? Йўқ, дада. Сен жудаям яхши одамсан.

— Ёмонман, Чанда. Жуда ёмон одамман. Сен эса чинакам ранисан. Аммо тақдир сенга ҳам муруват қилмаган...— деди Сукхрам зўрға, сўнг индамай қолди. Қўз ёшлиари гапиришга имкон бермади.

— Дада, мен билан борасанми?

Сукхрам беихтиёр Қажрини эслади. Қўз олдида унинг кулиб турган чехраси намоён бўлди.

— Йўқ, Чанда. Қалъани унут, уни бутунлай эсингдан чиқар!— деди Сукхрам қатъий, қўз олдидаги арвоҳни ҳайдаркан.

— Менга қара, дада... Уша ёқда мушукни кўрдим,— деди Чанда мужмалроқ қилиб.

Сукхрам қўрқувдан музлаб кетди.

— У гужри<sup>1</sup>, Чанда...— деди у зўрға.

— У бор-йўғи гужри бўлса, ундан қўрқиб ўтирмаса ҳам бўлади,— деб кулди Чанда.— Мен эса тҳакурани! Қалъа меники! Сандиқчангдаги суратни Мангунинг хотинига кўрсатдим, ҳаммасини сўраб билдим. Дада, сен ҳам тҳакурсан...

<sup>1</sup> Гужри — гужорлар табақасига мансуб аёл.

— Йўқ, йўқ, қизим. Мен тҳакур эмасман, карнатман, энг паст карнатман. Буларни бутунлай унут!— деди Сукхрам қўрқа-писа бидирлаб. Назарида онасининг тентакларча кулгани, «Эҳтиёт бўл, олов сенга ҳам етиб борди. Кўнглингни куйдириб кул қилади!» деган гаплари қулоқлари остида жаранглагандай бўлди.

— Дада, нега буларни мендан яширгансан?

— Ҳеч нарсани яширганим йўқ.

— Бўлмаса тҳакур авлодидан эканингни нега менга айтмагансан? Ахир, қизингман-ку. Мен ҳам ўша авлодданман-да.

Сукхрам бор гапни Чандага ҳикоя қилиб бергиси келди, аммо қизининг гуноҳ иш туфайли туғилганини қандай айтади! Сирни ошкор қилса Нарешнинг олдида нима деган одам бўлади! Уни натни деб аташгани ҳам етар! Одамларнинг назарида гўё натни билан фоҳиша бари бир гўр. Чандани мусаффо сақлаганига, ўзи кўргани кўзи бўлмаган иллатлар қизга соя ташламаганини айтса ҳеч ким ишонмайди. Кажри билан Пъяри ёшлиқ пайтларида натларни истаган пайтда хоҳлаган жиноятни тўнкаб қаматиб қўйишаверарди. Ҳозирга келиб кўп нарсалар ўзгариб кетди. Шунинг учун ҳам Сукхрам полициядан қизининг иффатини сақлаб қололди. Чанда Нилюнинг хотини бўлса ҳам у билан бирга яшамади. Қиз ҳозиргача нимагадир умид боғляяпти, ўзини Нареш учун пок сақляяпти. Чанданинг никоҳсиз туғилганини қизига қандоқ айтади!

— Дада,— деди Чанда яна.

— Лаббай, қизим.

— Мен аниқ қўрдим.

— Нимани?

— Олтин-гавҳарлар уюмини. Илон қўриқлаб турган экан. Илон мени кўрибоқ бошини эгди, сўнг нари кетди...

Чанданинг гаплари Сукхрамни безовта қилди.

«Ким билсин, эҳтимол қизчам ҳақ гапни айтиётгандир?—деб ўйлади у.— Бордию хазинани қўлга киритсак Чанда бой, зодағон аёл бўлади. Ахир, у рожанинг невараси, ранининг қизи. У Ҳиндистонга ҳукмронлик қилганлар авлодидан. Бир вақтлар инглизлар тҳакурларнинг хўжайини бўлишган. Уларнинг олдида тҳакурлар етти букилиб салом беришган. Эндиликда олтин қўлимизга кирадиган бўлса, Чанда қасрда яшайди, ҳатто Нарешни сотиб олишга ҳам қурби етади».

Унинг назарида қайғуга тўла ўтаётган ҳар бир куни, кўҳна қалъянинг ҳар бир тоши: «Сукхрам, ғафлат уйқусидан уйғон! Қизингнинг баҳти ҳурмати, уйғон!»— деб даъват қилаётгандай бўлиб кетди.

Кўз олдида отасининг ҳалок бўлган кунидаги қиёфаси намо-

ён бўлди. Ўша куни у онасининг олдида унга: «Сен нат эмассан! Сен тҳакурсан!»— деб бақирган эди. Бугун эса унинг азалий орзуси — қалъага эга бўлиш орзусини рўёбга чиқариш учун тҳакурани Чанда қиёфасида ҳозир бўлиб тўрибди. Қиз ўз хазиналарини хотирлаяпти.

Энди у илгариги итоатгўй Сукхрам эмас.

«Бойлик! Унинг қаршисида бутун олам тиз чўкади. Хазинани қўлга киритсан бутун қишлоқ оёғимга йиқилади. Ҳатто Нарешнинг отаси ҳам ўз табақасини унутиб, ҳаммадан олдин таъзим бажо келтиргани чопқиллаб келади. Бойлик! Олтин, гавҳарлар уюми!»— деган фикрлар бошида айланади.

Кўнглида уйғонган бойлика бўлган хирс унинг оромини будзи.

— Чанда, кетдик,— деди Сукхрам тўсатдан ўрнидан чаққон қўзғаларкан.— Эҳтимол, сени саройда кўриш менга насиб қиласар. Менинг қўлимдан келмаган ишни рўёбга чиқаришни тақдир сенга буюрганга ўхшайди.

Чанда қўлига машъала олди, эгнига чипта ташлаб, уни ёмғирдан тўсади. Энди машъалага ёмғир тегмайдиган бўлди. Сукхрам чўнтағига гугурт солди, дҳотийсини маҳкамроқ боғлади. Чанда юбкаси этакларини қайриб, орқасига қистириб олди, сўнг улар ташқарига чиқишиди.

Ёмғир пақирдан қўйгандай шовиллатиб ёғар, совуқ, изғирили шамол эсарди.

— Кўл суви қирғоқдан тошиб кетибди. Соҳил бўйлаб юриш хавфли,— деди Сукхрам.— Қирғоқ ювилиб боряпти. Айланис ўтамиш.

Чанда қалин бутазорга бурилди. Ҳаммаёқни сув босибди. Боғдаги сўқмоқ кўринмайди, истаган пайтда сув тўла чуқурга тушиб кетиш мумкин. Чанда сирғаниб кетди, лекин Сукхрам уни ушлаб қолишига улгурди. Энди улар ҳар бир қадамни пайпаслаб юра бошлашди. Атрофни кўкиш парда қоплаганди. Бешисоб сув оқимида ювилаётган мармар қаср охирлаб қолаётган кундузининг ёруғида аранг ялтираб турибди. Ҳўл япроқлар оғир ёмғир томчилари келиб урилишидан титрамоқда. Япроқлар гўё совуқдан қалтираётганга ўхшарди. Йироқдаги кулбалар деразасида чироқ нури милтиллади. Сукхрам билан Чанда саёз чуқурчаларга қоқила-суқила, сувларни шалоплатиб, йўлларида астойдил давом этишиди.

Чипта ивиб оғирлашди. Уни сал кўтаришса муздек сув оқими юзларига уриларди. Уларнинг чап томонидаги ўрмон шамол билан олишавериб ҳолдан тойгандай эди. Афсонавий улкан аждаҳони эслатувчи ёмғир ўрмонни жаҳл билан савалар, ивиб кетган тупроқ бўлак-бўлак бўлиб кўлга шалоплаб тушарди.

Сукхрам билан Чанда қалъа ҳовузи ёнига етиб келишганида

кўл шовқини қулоқларини қоматга келтирди. Кўлда юзлаб қўпирган оқимлар шовқин солиб қутурарди. Қечагина одам бўйига тенг келиб қолган соҳил ўт-ўланлари бугун сув бетида зўрга кўринади.

Сукхрам билан Чанда ҳовузни айланиб ўтиб, қалъага кирадиган жойга етиб келишди.

— Буёққа кел, Чанда. Манови катта эшик.— Сукхрам ички ҳовлига олиб борадиган учта эшикдан бирини кўрсатди.

— Бу ерда бўлғанмидинг?— деб сўради остонаядан ўтган Чанда.

— Ҳа. Ёшлигимда Қажри билан бирга келганмиз.

— Қим билан? Онам билан биргами?

— Ҳа,— деди Сукхрам чайналиброқ.

Сукхрам билан Чанда эгниларидачи чиптани олишиб, эшик ёнига қўйишиди.

— Ўғирлаб қўйишимасмикан?— Сукхрам ўубҳа билдириди.

— Дада, буёққа ким ҳам юрак ютиб келарди?— Чанда кулди.— Бу менинг уйим-ку, буёққа фақат мен келаман, холос. Ташибиши қилма, ҳеч ким олмайди!

Чанданинг овозидаги дадиллик Сукхрамни баттар талвасага солди. «Ўндаги қатъият қаёқдан пайдо бўлди? Наҳотки бу менинг Чандам бўлса? Йўқ, бу гапларни у айтадигани йўқ! У чиндан ҳам тҳакурани»,— деб ташвишланиб ўйлади у.

Ички ҳовли ҳамиша нимқоронғи бўлиб, ҳаво айнигани учун ҳозир зимиstonга айланганди. Деворлардан сув қўйилиб тушар, ерда ҳалқоб ҳосил бўлган. Бу ерга шамол билан бирга ёмғир томчилари ҳам учиб келмоқда эди. Ҳовуздан ички хоналарга олиб борадиган зинапояни сув босиб қетибди.

— Дада, мановини ёқ,— деди Чанда Сукхрамга машъалани узатиб.

Лекин гугурт намиқиб қолганидан ёнмади. Сукхрам машъалани ёқиб олгунча анча овора бўлди. Керосин шимдирилган латта лоп этиб ўт олди. Маъшаланинг титроқ нурида деворлардаги тошлар ажиб кўриниш ҳосил қилиб, улар билинар-билинмас қимирлаганга ўхшарди.

— Дада, кўяпсанми? Деворлар бизга таъзим қиляпти,— деди Чанда қувониб.— Нареш тҳакур, мен эса энди тҳакураниман. Дада, нега қалъа тўғрисида илгари менга ҳеч нима демагансан? Хазинага эга бўлганимиздан кейин нималар бўлишини биласанми? Нареш ўзимники бўлади! Ҳеч ким уни мендан тортиб ололмайди!

Сукхрам қизининг сўзларидан даҳшатга тушди.

— Дада, ўша сафар шу ерда бўлғанларингда онам билан шу йўлдан юрганимидиларинг?

— Ҳа,— деди Сукхрам.— Амма буердан ҳеч нарса тополмаганмиз.

- Ушандада онам мен тенги эдими?
- Ийқ, сал каттароқ эди.
- Онам жуда яхшимиди?
- Жуда яхши аёл эди.
- Дада, катта хотининг қанақа аёл эди?
- У ҳам яхши аёл эди.

Сукхрам Чанда билан қалъанинг нотаниш қисмига етиб боришиди.

- Машъалани менга бер, бир қарай. Мендан узоқлашма.
- Ийқ, дада, яхшиси сен орқамдан юр,— эътиroz билдириди Чанда. Сукхрам индамай розилик билдириди.

Улар катта хонага киришиди. Унинг деворлари тепага бўй чўзган бўлиб, қол-қорайиб турарди. Баъзи жойларидан тош қулав тушган, очилиб қолган ёриқлардан ўсиб чиқсан томирлар осилиб турарди. Сукхрам Чанданинг орқасидан эргашиб борар, қиз атрофни яхшироқ кўриш учун машъалани биланд кўтапарди. Олдинда яна бир катта хона бор эди. Улар хонага киришлиари билан вишиллаган товушни эшитишиди.

- Чанда! Илон!— қичқирди Сукхрам.
- Дада, бу илонни тушимда кўрганман.
- Чанда, яхшиси орқамдан юр, эҳтиёт бўл!

Чанда машъала тутган қўлини вишиллаш эшитилган томонинг тутди, улар томоғини шишириб, қимирламай жим турган илонни кўришиди.

— Дада, қўрқма, у чақмайди. Мангу бир вақтлар қалъага савдогарлар ғалла билан келганини айтди. Айтишларича, уларнинг бойликлари шу ерга кўмилган экан.

Илон улар томон кела бошлади.

Сукхрам орқага тисарилди.

— Дада, қўрқма, у тегмайди.

— Қоч!— деб қизига ялинди Сукхрам.

Лекин Чанда жойидан қимирламади. У машъалани энгаштириди. Илон қизнинг олдида тўхтаб, томоқларини шиширди.

— Дада, қара-чи, бошида доғлари бормикан? Э, бу кобра-ку!

Илонга машъаладан анқиётган керосин ҳиди ёқмади. У орқага тисарилиб, яна бошини кўтарди. Машъала баттар алнга олди. Хона ичи ёришиб кетди. Илон нурдан қўрқиб, девор тешникларидан бирига яширинди.

— Дада, кўрдингми? Сенга айтгандим. Илоннинг ўзи қочди. Ахир, у ота-боболаримизнинг худоси<sup>1</sup>. Бизни чақиб олишга ҳадди сифармиди,— деб кулди Чанда.

Сукхрам ўзини йўқотиб, тоҳ у, тоҳ бу оёғини босиб турди. У

<sup>1</sup> Ахир у ота-боболаримиз худоси— илон Ҳиндистонда муқаддас жонивор ҳисобланади. Илон авраш билан шуғулланувчи нафшар учун эса илон янада муқаддасроқдир.

нимада дейишини билмай қолди. Вужудини қўрқув қамраб олди.

— Дада, кетдик,— деб шошилтириди Чанда.

— Қаёққа борамиз, Чанда?

— Қаёққа деганинг нимаси? Илонга дуч келдикми, демак, хазина ҳам қаердадир шу атрофда,—деди Чанда дадил.

Сукхрам ўзини бутунлай йўқотиб қўйди.

У бу ерга Кажри билан бирга келганини хотирлади. Ушанда ҳозиргидақа даҳшатлимиди? Йўқ. Кажри қўрққанди — бу ҳақ, аммо ўзи қўрқмаганди. Нега энди ҳозир қўрқувдан титраб қақшайди? Наҳотки у ҳақиқий эркаклигини йўқотган бўлса? Наҳотки Сукхрам қўрқоққа айланган бўлса?

«Нима бўляпти ўзи?»— деб ўз-ўзига ажабланиб савол берди. Ундаги дадиллик, журъат қаёққа йўқолди. Тўғри, ўшанда у ёш эди, ёнида ўзи қўриқлаб, ҳимоя қилган Кажри бор эди. Лекин ҳамма гап шундами? Нега бугун қўлида эъзозлаб катта қилган қизчаси унга йўл қўрсатиб, зодагон бека сингари: «Қўрқма!»— деб таъкидлайверади?!

Чанда ён томондаги зинапоядан пастга туша бошлади. Сукхрам истар-истамай унга эргашди. Унинг орқага қайтгиси келарди, тузатиб бўлмас даҳшатли бир ҳодиса рўй беришини юраги сезаётган эди. Ахир, қалъя инс-жинс, арвоҳлар макони-ку!

— Донгинг улуғ бўлсин, Хонумон! Бизни инс-жинслардан асрагин. Шуҳрат сенга, Бҳайро!<sup>1</sup> Бизни ўзинг қўриқла!— дерди Сукхрам ўзига-ўзи.

Улар тор зинапоядан кўтарилишганда машъала алангаси титраб кетди. Шифтдаги кўршапалаклар булат сингари ёпирилиб, Сукхрам билан Чанданинг боши устида чарх уришли. Одамларнинг бу ерга тўсатдан кириши уларни безовта қилган эди.

Пастга тушган Сукхрам билан Чанда ўзларини кенггина хона ичида қўришиди. Унинг қоқ ўртасида тўғри бурчакли ҳовуз бор эди. Улар ҳовуз лабига келиб тўхташди. Чанда ҳовуз ичида қаради, Сукхрам ҳам шундай қилди. Ҳовуз ичида боши кесилган бир неча одамнинг склети ётарди. Бош суюклари ҳам ёнгиналарида, алоҳида турарди. Хонанинг полини қалин чанг қоплабди. Вақт-вақти билан тешиклардан кирган шамол кўринмас ногорага урилгандай товуш чиқаради. Машъала алангаси ён томонга интилар, деворларда эса ёруғ шуълани тутиб олиш учун қўлларини кенг ёзган улкан айиқларни эслатувчи соялар, ўйнарди.

Ҳаммаёқ кимсасиз. Сукхрам ташвиш, ҳаяжони ортаётганини

<sup>1</sup> Бҳайро (тўғрироғи Бҳайров) — худо Шива номларидан бирин — фазабонок Шива.

хис қилди, Чанда эса хотиржам, ҳатто куляпти! Сокин ва ҳоли қоронғи хонада қизнинг кулигиси бўғиқ акс-садо берарди. Сукхрамга қўшни хонада бошқа бир аёл товуши қизга жавоб қилаётганга ўхшаб кетди. Машъаланинг сирғаниб юрган нури гоҳ равшанлашар, деворга осилган чанг босган кўзгуларга тушар, гоҳ нури сусайиб, асрий чангни ёриб ўтишга ожизлик қинарди.

— Дада!— деб чақирди Чанда,— Анови ёқда одамларми?

— Қанақа одамлар?— Сукхрам шошиб қолди. Овози титради.

Назарида ёнгинасида кимдир тургандай бўлиб кетди. У безгак тутгандай титрай бошлади. Беҳудага қўрқиш бутун вужудини қоплаб олди. Бу қалъа — чинакам инсон қабри! Бу ер нақадар қоронғи! Сукхрамнинг назарида ўлганлар, ҳалок бўлғанларнинг руҳи тириклик пайтларида чеккан азоб-уқубатлари учун товоң талаб қилаётгандай бўлиб кетди.

— Чанда!— деб бақирди у.

Унинг бақириги Чандага жуда ғалати таъсир қилди. Киз шаҳло кўзларини катта очиб, ҳомимона, пўписа билан:

— Мени Чанда эмас, тҳакурани деб ата,— деди.

— Тҳакурани!— беихтиёр тақрорлади Сукхрам.

— Лаббай,— Чанда бош қимирлатди.— Қаерда турганини кўрмаяпсанми? Исмимни айтиб чақирсанг анови одамлар нима деб ўйлайди?— деди қиз таъна билан ва йўлида давом этди. Қиз «Анови одамлар» деганида қўли склетлар томонга чўзилгандай, Сукхрамнинг кўзига склетлар қимирлаб кетгандай бўлди. У Чанданинг орқасидан шитоб билан югурди, ўзини кенг зал ичиди кўрди. Деворлардан сув оқиб тушарди. Сукхрам машъала нурида каттакон бақани кўриб қолди.

— Кўряпсанми, дада?— сўради қиз.

Зал биқинидан қатор-қатор қоронғи хоналар бошланганди. Машъаланинг ожиз нури бу қоронғиликни ёритолмасди. Хоналарга тушган нур қайтганда улардан сон-саёқсиз қоронғилик чўзилиб тургандай бўлиб кетди. Улар осойишталикни бузгачларни бўғиб ташлашга интилгандай ҳар ёқдан қўл сингари чўзилиб келарди. Бақа уларнинг орқасидан баланд товушда вақвақлади. Сукхрам билан Чанда у хонадан бу хонага ўтишар экан, бақанинг товушини анчагача эшитишди. Сукхрамнинг руҳи бутунлай тушиб кетди. У индамай Чанданинг орқасидан эргашиб юраверди, қиз эса қўлида машъала билан олдинга дадил интиларди. Улар аллақандай хоналардан ўтишди, иланг билан йўлларга бурилишди, яна олдинга интилишди ва ниҳоят тўхташди.

Улар торгина йўлакдан ўтишиб, катта хонага кириб қолишиди, киришга улгуриб-улгурмай аллақандай йиртқич йўлакка

ташланди-ю, аянчли увилаганича қочиб кетди. Сукхрам орқага тисланди, оёғида аранг тик туриб қолди.

— Чанда!— қичқирди у ва ханжарини қўлига олди.

Жавоб бўлмади.

Сукхрамнинг назарида қоронғилик: «Тҳакурани!» деб қичқиргандай бўлди. Қичқириққа деворлар ҳам жўр бўлиб, ҳамма-еъдан: «Тентак! Уни тҳакурани деб чақир. Ахир у зодаган хоним-ку», деган товушлар янгради.

Шунда Сукхрам:

— Тҳакурани!— деб бақирди.

— Лаббай, дада!— деб жавоб қилди Чанда.

Сукхрам хонанинг охирида чўнқайиб ўтирганича аллақандай синиқларга тикилаётган Чанда томон шошилди.

— Бу ерда ҳеч нима йўқ,— деди Сукхрам.

— Нима йўқ?

— Хазина. Ҳаммаёқ бўм-бўш.

Лекин Чанда жойидан қимирламади.

— Дада, хазина шу ўртада бўлиши керак. Кобра ҳов анови ёққа ўрмалаб кетди, хазинани қаердалигини балки бизга кўрсатмоқчи бўлди. У бола сингари йиғлаши, чинқириши мумкин. Мангу қадимги вақтларда савдоргарлар кўтариб кетолмайдиган даражада кўп пул тўплашганда олтин тангларни чақалоқлари билан ерга қўмишганини, устига қўмилган бойликни қўриқлаш учун хамирдан ясалган илонни қўйиб қўйишганини айтиб берган. Кимнинг баҳти юришса уни топиб олади.

Сукхрам Чандага хавотирланиб назар ташлади, қиз гапида давом этди:

— Қальға аллақачондан бери қарашмай қўйган. Мен кетганимдан бери у қаровсиз ҳолда ётипти!

Сукхрам даҳшатдан донг қотиб қолди. Юраги уришдан тўхтаб қолгандай бўлди. Ранги оқариб, оғир нафас ола бошлади.

Хона деворларидаги қирор йилтираб, музлаган пол оёқни со-вук қотиряпти. Шиддат билан авж олаётган шамол асрий чангларни тўзитиб, ҳаммаёққа чирик ва пўпанак ҳидини таратади. Ярим қоронғи хоналарнинг бирида ҳавога ялтироқ қуртлар кўтарилидди. Улар хаёлий рақс тушиб айлана бошлишди. Деворнинг кўзга кўринар-кўринмас ёриқлари орасидан сизиб томчилаетган кўлнинг фосфорлашган сувлари оч кўкимтири нур таратиб ёнмоқда, рақсга тушувчи хаёлий юлдузларни ҳосил қилаётни.

Сукхрам сувнинг ёнишини ҳеч ақлига сиғдира олмади.

— Чанда!— бақирди у.— Бу нима бўлди?

— Олов!

— Сувда оловми?!— ташвишланиб хитоб қилди Сукхрам.

— Ҳа. Сувга ўт кетди,— хотиржам жавоб қилди Чанда.

Қизнинг товушидаги бепарволик Сукхрамни қўрқитди.

— Чанда, юр, қайтайлик,— деб ялинди у.

— Уйимга келишга улгурмай дарҳол қайтиб кетаманми?— деди виқор билан Чанда.— Сендан яна нималар кутиш мумкин? Зодагон тҳакур зотидан бўлсанг ҳам бутун умрингни хор табака орасида ўтказдинг!— Чанда жирканиб афтини бужмайтириди.— Мен тҳакураниман. Мен ўз қасримга келдим. Ўндан чиққанимда мени тҳакур Викрамасингхнинг ўзи кутиб олади. Нарешим ҳам күёвлик бош кийимида пешвоз чиқади. Карнай-сурнай, ногоралар чалинади, мушаклар шуъласидан осмон чароғон бўлиб кетади. Мен гавҳар, марварид безакларни тақаман, улар оловдан ҳам зиёда ярқирайди, кўзларни қамаштиради, менга кўзи тушган одамлар: «О, қимматбаҳо тошлари мунчаям кўп-а! О, тҳакуранидаги олтинларни қаранг!» деб бақиришади. Мен ҳовуч-ҳовуц тангаларни ҳар томонга сочаман. «Пулларни олинглар, оч қолманглар, олинглар, уялманглар! Ахир, мен сизларнинг хонимингизман!»— дейман.

— Чанда! Ақлдан озибсан. Нималар деяпсан?— ачинишга тўла товуш билан бақирди Сукхрам.

— Оҳ, сен ҳам ҳеч нима тушунмаяпсан! Тушуниб бўпсан! Сен натнидан туғилгансан!— деди Чанда сўнг нари кетди.

Сукхрам қизга эргашди.

Ташқаридан девор орқали шовқин эшитилди. Шунда Сукхрам бундақ бир неча йиллар олдин Қажри билан бу ерга келганини, бўғиқ зарбалар қалъя гумбазларини ларзага келтирганини хотирлади. Ўша эсдан чиқмайдиган кундаги сингари уни хурофий даҳшат босди. Сукхрам бу шовқинлар кўл суви тўлқинлари келиб қалъя деворига урилишидан ҳосил бўлаётганини билмасди.

— Дада, эшиятсанми?— сўради Чанда.

— Нимани, Чанда, нимани?

Чанда кулиб юборди.

— Ноғоралар гумбирини. Мен қайтдим! Юзлаб қўллар ноғораларни чаляпти, чунки уларнинг хоними қайтди.— Чанда виқор билан қаддини ростлади.

— Эсингни йиф!— хитоб қилди Сукхрам.

— Мен тҳакураниман. Бу ердаги ҳамма нарса меники. Мен шу қалъя эгасиман. Эгасиман... Қулоқ сол, ҳозир рақслар бошланади, замбараклардан ўқ отишади... Мен рани...— Чанда шундай дедио чопқиллаб кетди.

— Чанда. Тўхта, қаёқа?— қизини чақирди Сукхрам.

— Менга халақит берма!— деди Чанда чопиб бораётби.— Менинг шарафимга қанақа тантаналар бўлишини, мулозимларим оёқларим остига ҳовуч-ҳовуч гавҳарлар сочишини кўрасан...

Сукхрам Чандани қувиб етиб қўлидан ушлади. Сукхрамнинг аъзойи бадани титраб қақшарди.

Чанда уни итариб юборди.

Сукхрам гандираклади, лекин йиқилмади.

— Чанда! Ялинаман... Тўхта! Тўхта, Чанда!— деб бақирди у қизига қўлини чўзиб.

Аммо Чанда хоналар бўйлаб югуришда давом этди, тўсатдан боши деворга қаттиқ тегди.. Машъала қизнинг қўлидан тушиб, у чинқириб юборди ва ҳушидан кетди.

Сукхрам даҳшатдан довдираф қолди.

Ерга тушган машъала қалин чангга ботди, лекин олов чирсиллаганича тепага интилди. Сукхрам Чандани қўлига олиб, юзига қаради: юзида ҳамон табассум ўйнарди. Сукхрам Чандани орқасига кўтарди. Шу пайт машъала эсига тушди, энгашиб уни олмоқчи бўлди, бироқ шу лаҳзада кимдир даҳшатли товуш билан қаҳ-қаҳ уриб кулгандай бўлиб кетди. Кулгининг бўғиқ акс-садоси хоналарга ёйилди.

Сукхрам деворда ирғишлиб турган ўз сояси шаклидан қўрқиб чўчиб тушди. «Ҳозир у мени ушлаб олади, ҳозир ўз соям мени ушлаб олади!» Даҳшатли жирканч кулги қулоқларида жаранглади. Энди у бир тўда оломоннинг баланд қаҳқаҳасини эслатарди, унга гоҳ-гоҳида шамолнинг увиллаган товуши қўшилиб турди. Қейин Сукхрамнинг назаридаги бутун қалъа қулоқни кар қиласидиган даражада қаҳқаҳага тўлиб кетгандай бўлди.

У қоча бошлади.

Сукхрам орқасида Чанда билан қоча берди, қаёққа қочаётганини ўзи билмасди. Шўрлик гоҳ деворларга урилар, гоҳ алланималарга қоқиларди, лекин буни Сукхрам ўзи сезмасди. Чунки у бениҳоя даҳшат оғушида орқасига тҳакуранини кўтариб кетаётган эди!

Сукхрамни тер босди. Қалъа дарвозаси ёнида одамларни чақириб, тинимсиз жанговар ноғоралар садоси гумбирлади. Ва ниҳоят бугун тҳакурани қайтди! Сукхрам қўрқувдан ўзини йўқотиб бақирди:

— Қўй! Қўйиб юбор мени! Сенга Чандани бермайман! У менга хазинадан ҳам азиз! Ҳой, тҳакурани! Сен бизни тарк этган эдинг! Нега яна қайтиб келмоқчи бўласан.

Бунга жавобан даҳшатли қаҳқаҳа эшитилди. Ҳаммаёқда уни кўз илашмайдиган зими斯顿 қарши олди.

— Тҳакурани, йўқол кўзимдан!— деб бақирди Сукхрам.— Тириклар оламига қайта кўрма! Чанда менини! Менга сенинг бойлигинг... хазиналаринг керак эмас...

Лекин қоронғилик қаърига чўмган қалъа унга бақириб: «Керак! Керак!»— деб жавоб қилди.

Сукхрам бутунлай ҳолдан тойғанлигини ҳис қилди. «Йўқ, ўзимни тутишим керак, Чанда мен билан... Наҳотки уни ташлаб кетсан», деган фикр миясига келди.

У бир лаҳзалик ожизликни енгид, чопишда давом этди... Агар қалъадан чиқиб кетмаса, икковлари ҳалок бўладигандай бўлиб туюлди. Лекин қаёққа қочиш керак? Йўл қаёқда?

Қалин зимиштон, увиллаган шамол, тошларнинг фижирлайи, очларнинг жон-жаҳдлари билан нола чекиши, юракни эзадиган манови қаҳқаҳа! Гўёки жуда катта филлар подаси қалъага ўқдай учиб келаётгандай.

Яна ўша деворларни ларзага солаётган бўғиқ зарбалар, ўша шиддатли, кескин, даҳшатга соловчи ва ёвуз қаҳқаҳалар!

— Ярамас! Тинч қўй... тинч қўй қизимни... қўйиб юбор... мен кетаман... қўйиб юбор мени! — деб қичқири Сукхрам чопиб бораракан.

«Тинч қўй қизимни... қўйиб юбор! Кўйиб юбор!» — деб жавоб қайтарди қоронғилик.

Сукхрамнинг қичқиришлари қўҳна қалъага жойлашиб олган жониворларни безовта қилди. Улар ҳар қайсиси ўз маромига олиб бақириб увиллай бошлиди. Қалъа ичи уларнинг бақириқларига тўлиб кетди.

Сукхрам бирдан тўхтаб қолди. «Нима қилиш керак? Булар мени ютиб юборишади,— деб ўйлади.— Йўқ, бу ерда қолиш мумкин эмас!» — У жон-жаҳди билан яна югуриб кетди.

У арвоҳга айланиш учун бу ерда қолмайди! Үнда қалъа ичida арвоҳ, ажиналар орасида доим изғиб юради. Мадори қуриб бораётганини сезиб нафаси қайтди. Шунда у ўзини нурсиз ёруғлиқ тушиб турган хонага урди. Тўхтамай зинапоядан юқорига кўтарилди ва уч эшикли ички ҳовлига чопиб кирди, у Чанда билан ўз йўлинни шу ердан бошлаганди. Лекин қўрқув ҳисси уни тарқ этмаганди...

Сукхрам ўз назарида дўзахдан чиқсандай бўлди. У орқасига ўгирилмади, қалъага қарамади. Чипта ҳамон кираверишда ётарди.

Жала тинмаганди, аммо Сукхрам унинг тинишини кутиб ўтирамади. Йигит пастга, ҳовуз томонга тушди, тиззасигача сувга ботиб кетди. Ҳовузнинг қирғоғигача сув тўлиб кетганди. Сув зинапояннинг юқориги поғоналарини ҳам боса бошлаганди. Сукхрам аста-аста қадам ташлаб, тошлоқ жойлар сари юра бошлиди. Унинг ҳаммаёғи шилта бўлиб кетган, совуқдан тинимсиз қалтиарди. Ниҳоят Сукхрам ҳовуздан ўтиб олди, ўзига кучқудрат кирганини сезиб, яна чопиб кетди. Назарида қалъа уни қувлаётгандай, баҳодирни ушлаб олаётгандай бўлиб кетди. Ахир у ўз арвоҳлари ёнига қайтмоқчи бўлган тҳакуранини олиб қочяпти-да!

Сукхрам ўз кулбасига етиб борганида бутунлай ўзига келди. Демак, у ўз оламига қайтиб келди! Қаср атрофидаги боғ, саройнинг ўзи, унинг атрофидаги ҳамма нарса бошқа олам соқчи-

лари эди. Улар кўринмас қўллари билан уни ушлаб олмоқчи бўлишди.

Уйда Сукхрам Чандани аста каравотга ётқизди. Гулхан ёқиши учун ёниши мумкин бўлган ҳамма нарсани йифишириди, тагига қуруқ хашак солди, кул остидан чўғ парчасини топиб қўйти. Аввало гулхандан тутун чиқди, сўнг тутун орасидан лим-лим олов тили кўзга ташланди.

Сукхрам Чандага қуруқ кийимлар кийдирди, ўзи исияниш учун гулхан яқинига ўтириди, лекин шу заҳоти иргиб туриб, Чанданинг каравотини гулханга яқинлаштириди. Чанда совуқдан қотиб қолганди. Сукхрам қизининг қўл-оёқларини, қорин ва пешоналарини ишқалай бошлади. Бора-бора қиз исиб, ҳушига келди.

— Ким бу? Сенмисан, тҳакур? — сўради қиз.

— Бу мен, отангман, — деди Сукхрам. У даҳшатли «тҳакур» сўзини такрорлашга қўрқарди.

— Дада! — Чанда отасининг овозини таниб хўрсинди.

— Нима дейсан, қизим?

— Қаердамиз? Қалъадамизми? — сўради қиз.

— Йўқ, табордамиз.

— Қалъада бўлганимиз йўқми?

Сукхрам ўзини ҳам, қизини ҳам шу даҳшатли саёҳатни унучтишга мажбур қилишин истарди. Бўлиб ўтган воқеаларни эслашнинг ўзидан ҳозиргача вужуди жунжикарди.

— Қайси қалъада, қизим? — иложи борича бамайлихотир оҳангда сўради.

— Наҳотки унугтан бўлсанг? Биз кўҳна қалъага бордик-ку!

— Кўйсанг-чи, болам! Сен уйқуда эдинг, тушингга киргандир.

Чанда ўйга толди, каравотга ўтириди.

— Дада, назаримда сен билан ўша ёққа боргандаймиз. У ерда битмас-туганмас бойликлар бор! Ўша бойликларга эпди яқинлашганимизда нима бўлганини эслай олмайман. Илтимос, ўша ёққа яна бир борайлик!

— Йўқ, бу гапларни қўй, — Сукхрам сесканиб эътиroz билдириди. — Бутунлай ақлдан озибсан. Кўрган тушингни қара-я! Гапимга кирмасанг сендан жудо бўламан.

— Мени яна Нилунинг уйига жўнатасанми? — деди қизи.

— Йўқ, — деди Сукхрам — ўзим бирон ёққа бош олиб кетаман.

— Менсиз-а?

— Ха. Ёлғиз ўзим. Нима ҳам қилардим?

— Қайси гапингга кирмадим? — ажабланди Чанда. — Нарсий билан учрашма дединг, унинг ёнига бормаяпман.

— Бу жуда соз, доно қизимсан-да, — Сукхрам қизини мақтади.

— Лекин, дада, мен тҳакуранига ўхшайман,— деди Чанда.  
— Нима деяётганингни ўзинг ҳам билмайсан!— пўписа қилди  
Сукхрам қизига. Аммо ўзи ич-ичидан ларзага келди.

Чодирдаги гулхан чирсиллаб ёна бошлади, унинг алангаси  
анча юқорига ўрлади. Сукхрам бири чекди.

— Чекасанми?— деб сўради у Чандадан.  
— Йўқ,— рад қилди қиз.— Бирини нуқул натнилар чекади  
деб ўзинг айтгансан-ку.

— Сен кимсан?

— Йўқ!!! Мен натни эмасман.

— Демак, сен менинг қизим эмас экансан-да?

— Йўқ, сенинг қизингман. Ахир сен тҳакурсан-ку,— деб жа-  
воб қилди Чанда.

Сукхрамнинг бири ушлаган қўли шалпайди, сигарета ерга  
тушди.

Совуқ шамол гоҳ-гоҳ чодирга ёпирилиб кира бошлади.

— Совуқотганинг йўқми?— сўради Сукхрам.

— Дада, нега соchlарим хўл?— ўз навбатида қиз ҳам унга  
савол берди.

— Эҳтимол, шамол бу ёқса ёмғир томчиларини олиб кир-  
гандир. Сочингни қуритиб ол,— деди Сукхрам. У ўрнидан ту-  
риб қизининг сочини ёза бошлади.

Чанда жавоб қайтармади. Қизгина ёпинчиғи чети билан юзи-  
ни ёпиб, яна уйқуга кетди. Сукхрам тинчланди, аммо осойишта-  
лиги узоққа чўзилмади. «Демак, у ҳаммасини унудимикан? Ун-  
га нима бўлди ўзи? Наҳотки Чанда ақлдан озган бўлса? Йўқ!  
Ундей бўлгани йўқ!» У қизини шундай ардоқлаб вояга етказди,  
она ўрнида она бўлди, Чандага бутун меҳр-муҳаббатини бағиши-  
лади.

— Тҳакурани! Нега бизни таъқиб қиласан?!— фулдиради  
Сукхрам.— Сен мендан, ўз авлодингдан ўч оляпсан? Нега? На-  
ҳотки қалъянгни ўзингга қайтариб бермаганим учун бўлса?  
Ўзинг қандай йўл тутардинг? Сен беномус аёл, бутун авлод-  
аждодимизнинг шармадасини чиқардинг! Бу ўз уйига ўт қўйиш-  
нинг ўзи! Энди бўлса ўз оилангни хонавайрон қилиш учун ке-  
либ турибсан? Сен гулдай қизни хазон қилишини, ният қилияпсан,  
унинг кўнглига аҳмоқона кибрни соляпсан! Ўзинг ғазаб ўтида  
ённиб, гавҳар дурдоналарни майдалаб, талқонга айлантирганинг-  
ни эслади!

Сукхрам Чандага қаради. У осойишта ухлаяпти. Унинг юзи  
нақадар мулойим, гўзал! Қизи мэм саъбга бирам ўхшайдики!  
Онасиликдай кўзлари шаҳло, оқ юзида қизили кўп. Ахир, Чан-  
да — инглиз аёлининг қизи. Ўнда тҳакуруни билан қандай ўх-  
шашликлар бор?

Бироқ шу пайт Сукхрам бир куни инглиз қиз ҳам ўзини қалъа

эгасиман деб айтганини хотирлади. Демак, у ҳам тҳакуранинг тўймас руҳи қурбони бўлган экан-ку! У ўз чанқоғини бостириш учун яна қанчадан-қанча одамларни хароб қиласди? Э худо, раҳм-шафқат қил, наҳотки унга шунча кўп қурбон керак бўлса!

Сенга қону жонимни берай, фақат Чандага раҳм қил. Мени ўлдира қол, аммо қизимнинг умрини хазон қилма!

Сукхрам қутичадан тҳакуруни портрети ва мэм саъбнинг фотографиясини олди. Портретдан унга тҳакуруни, фотографиядан Чанданинг онаси қараб туради.

Демак, тҳакуруни аввал бу ерга инглиз қиз қиёфасида, энди бўлса унинг қизи қиёфасида келган экан-да? У қачонгача кутади, тҳакуруни уни қачонгача таъқиб қиласди?

Сукхрам портретга қаради. Тҳакуруни кулиб туради. «Кул-япсанми, маккор?— минфииллади Сукхрам.— Бироннинг noctor ҳолига ичиқоралик қилишгача жазм қиляпсан-а?!»

Сукхрам нигоҳини фотографияга бурди.

Инглиз қиз суратда туриб: «Сукхрам! Қизим қасрда яшами керак. Чандани вояга етказиш қисматингга тушгани бежиз эмас, ахир олдинги умримизда биз рожалар зотидан бўлганмиз»,— деяётгандай.

Сукхрам гоҳ портретга, гоҳ фотографияга, гоҳ уйқудаги Чандага қаради. Назарида учови ҳам бир ҳил юз бўлиб, бараварига кулаётгандай тюолди. Эҳтимол, уларнинг руҳи ҳам, тақдирини ҳам бир хилдир. Улардан ҳеч бири баҳт нималигини билмади. Уларнинг бири бой-бадавлат бўлиб, камбағал одамни севди, бошқасини бадном қилишиб, оналик қувончидан маҳрум этишиди, учинчиси эса қашшоқ, на зотининг, на қабиласининг тайини бор, у бой одамга кўнгил қўйди.

Чанда — инглиз аёлининг қизи. Лекин у овқат еб кетганидан кейин кўча супурувчи ҳам баргини кўтармайдиган<sup>1</sup> бебаҳт натнинг; уни парча ҳам ери бўлмаган; полициячилар бемалол хўрлайдиган, шу кунгача ер юзида энг жирканч одам ҳисобланган натнинг уйнда ўсиб, вояга етди...

Лекин Чанда тҳакурани-ку!

Тҳакуруни...

Бу сўз Сукхрамни бутун оламдан тўсиб қўядиган алпозда ўсиб, кенгайиб борди. Ҳа, тҳакуруни ҳеч қачон ҳеч нарса олдида тўхтаб қолмади. Бемаъни ҳавасини деб мулозими билан дон олишди, ўз табақасини ҳаром қилди. Энди унга нима керак? Бунингиз ҳам ҳаммасининг кули кўкка совурилди. Ушандা у

<sup>1</sup> Кўча супурувчи ҳам баргини кўтармайдиган — аксарият дарбадар кезиб-юрувчи паст табақа вакиллари одатда ҳеч қандай идишга эга бўлмайди. Овқатларини барг устига қўйиб ейишади. Бу ерда ҳазар қилиш кўзда тутилган,

ҳаммасидан воз кечиб кетиб қолганди! Яна нега қайтади? Нега ҳозиргача қалъада унинг руҳи, инс-жинс кезиб, дайдиб юради?

Уч алангаси барча тирик зотни қириб ташлади, ёндириди. Ҳамма душманлари ҳалок бўлмагунча у тинчимади. У ёш боладан тортиб қариягача ҳаммасини йўқ қилди. Аммо унинг ўч алангаси ҳамон сўнмабди!

— Эй Чанда, тҳакурани, яна инсон қаёфасига кириб, кўнглингнинг тўймас очкўзлиги нафсини қондирмоқчимисан? Мана, уч авлод ўтибдики, аждодларинг натнидан туғилмоқда, сен бўлса ичиқоралик қилиб куляпсан. Улар қийшилиб азият чекишияпти. Улар ўз қалъаларига тикилишганда уларни умидсизлик қамраб олади, сен эса кулласан, индамайсан. Улар муҳтоҷлик, шармандалилкка мубтало бўлган. Авлодларим бўлмиш тҳакурулар натга айланиб, ор-номуслари қанчалик поймол бўлганини ўз кўзлари билан кўришди. Улар ўз кўзларидан ёш ўрнида қон тўкиб йиғлашди, лекин сен уларга миқ этмай қарадинг, кулдинг.

Энди бўлса яна қайтиб келдинг. Сен манави қиз қиёфасида пайдо бўлдинг. Қайтиш ниятинг бор экан, нега Чанда туғилмасдан олдин қайтмадинг?!

Сукхрам жаҳлга минди. У портрет билан фотографияни олиб, ўтга ташлади. Улар лоп этиб ёниб кетди.

— Ениб, йўқ бўлиб кет! — деди у. — Бугундан бошлаб тҳакур эмасман. Мен натман! Онам ҳам, Пъяри ҳам, Кажри ҳам натни бўлган! Мени тҳакурдан итга айлантирган сен бўлдинг, энди бўлса устимдан куляпсан! Мен арвоҳинг устида титраб-қақшадим, уни авайладим, сен бўлса менга азиз, мўътабар бўлган ҳамма нарсаларни яшиндай куйдириб кул қилдинг. Йўқол кўзимдан!

Портрет ва фотографиядан кул қолди холос. Сукхрамнинг боши айланди. Таҳкуранини унтишга қанча уринмасин, барibir уддасидан чиқолмади. Унинг кўз олдида — гулхан алангасида тҳакуранининг даҳшатли қиёфаси яна рақсга тушди.

— Менга яна пўписа қиляпсанми? — деди у фазаб билан. — Лекин сендан қўрқмайман. Сенинг тўймас руҳинг кезиб юрган қалъада яшамайман. Сенга айтяпман, йўқол кўзимдан! Менинг қизимни таъқиб қиласиган бўлсанг ҳеч қаерда ором нималигини билмайсан!

Тўсатдан Сукхрамга гулхан ёнидаги каравотда Чанда эмас, тҳакурани ётганга ўхшаб кетди...

— Йўқол! — даҳшат ичиди хириллади у.

— Нима бўлди, дада? — сесканни бўшини кўтарди Чанда.

— Қизим, қизгинам, мени ташлаб кетмайсан-а? — деди Сукхрам қизини бағрига босиб.

— Сени нечун ташлаб кетарканман, дада? — Чанда ҳайрон бўлганича равшан кўзларини отасига тикди. Сукхрам бир оз тинчлана бошлади.

— Ухла, қизим, ухла,— деди у.

Чанда яна уйқуга кетди.

Қишлоқ аҳли ҳам уйқуда. Фақат гувала кулбаларда яшовчиларгина уйғоқ. Омонат томлардан сув оқиб тушишга улгурмай томлар ҳўл бўлиб, чакка ўта бошлади. Қаердадир йироқда момақалдироқ гулдиради, тоғлардан унинг акс-садоси янгради, шунда ер билан осмон чидаб бўлмас оғриқдан нола чекиб, додлаётганга ўхшаб кетди.

Тун бошланди. Сукхрам ҳамон гулхан ёнида ўтиради. У ухлашга қўрқарди. Тўсатдан бирор Чандани ўғирлаб кетиши мумкин. Эртагаёқ қизини Нилунинг уйига жўнатади, икковини ҳам бу ердан жўнаб кетишга мажбур қиласди... Лекин тҳакуранчи-чи? Ҳатто у Англиядан бу ерга қайтиб келибди-ку...

— Йўқ, йўқ... У ерда хазина,— Чанда уйқусида ғулдиради.— Нарёш тҳакур... мен тҳакуруниман... у меники!

Сукхрам Чанданинг ёнига ўтириб, қўлини унинг пешонасига қўйди. Гулхан алантаси шамол шиддати остида ғаройиб буралганича рақсга туша бошлади, баъзида Сукхрамнинг назарида оддий гулхан эмас, балки дафи гулхани ёнаётганга ўхшаб кетди. Шунда қўрққанидан кўзини юмиб олар, баданини совуқ тер босарди.

Ташқарида тинимсиз ёмғир ёғяпти. Оғир томчилар такиллаб ерга тушяпти. Ҳаммаёқда сув ҳокимлиги ҳукмрон.

Совуқ кучайди. Шамолнинг увилаши момақалдироқ билан олишиб турди. Яқин ўртада тентак бир аёл изғиб, даҳшатли чинқираётгандай. «Бу нима? Наҳотки бу тўймас тҳакуруни чинқириғи бўлса?»— деб ўйлади Сукхрам ва сесканиб кетди.

Натларнинг чодирларини сув юваб кетди, чодирлар сув бетида сузиб юрди. Бошпанасиз қолган чодир эгалари тепароқдаги кулбалардан паноҳ топишга интилишди.

Аммо ҳамма нарсанинг ҳам охири бор. Бу серташвиш кечатуб кетди.

Тонг отиб, ёмғир тинди. Сукхрам ташқарига чиқди.

— Эшилдингми? Кўпгина кулбаларни сув юваб кетибди... Ие, сенга нима бўлди?— деди Мангу Сукхрамнинг хорғин қис-фасига боқиб.

— Ҳеч нима бўлгани йўқ, ухладим,— деди тўғри жавоб беришдан қочиб Сукхрам.

— Юр, бориб кўрайлик, шўрликларнинг бошпанаси ҳам қолмабди.

Улар кетишли. Кўп ўтмай иккови ҳам одамларнинг кулбасини тикилашга ёрдамлашиши.

Чанда уйғониб, отасини чақирди, лекин унга ҳеч ким жавоб қилмади.

Қандайдир зонтик тутган бир одам күчадан туриб бақирди:  
— Ҳой, карнат Сукхрам шу ерда турадими?

Чанда чодирдан чиқди. Тўсиқ олдида почтальон турарди.

— Ҳа, шу ерда,— деди қиз.

Почтальон қизга хат берди. Сукхрам ҳамон қайтмаган эди...

Шунда Чанда ҳузуримга чопиб келди. Қизни курсига ўтқизиб, хатни очдим ва ўқий бошладим. Унинг мазмуни мени ҳайратга солди...

Мен хатни яна бир карра ўқиб чиқдим, ҳаяжонимни ҳеч босолмадим. Хат Лондондан келган эди.

— Овоз чиқариб ўқи,— деб мени шошилтирди Чанда.

Мен инглизчани ҳиндийга тажрима қилиб, хатни қизга ўқиб бердим.

«Сукхрам! Сен билан ажralишганимиздан бери ўн тўрт йил ўтди. Ҳозирга келибгина сенга хат ёзишга жазм қилдим. Ўн тўрт йил муқаддам мен дак-бунгалода яшардим, сен қўлимда ишлардинг. Қизимни халос қилган кунинг сен билан танишдим. Сен эътиқод билан хизмат қилганинг Сусанна ўтган йили оламдан ўтди. Мен ҳам жуда қариб қолдим, касалмандман. Қанча умрим қолганини ҳечким билмайди, Ҳиндистонда юрганимда тўплаган пулларим менга наф келтирмади. Ҳиндистон мустақилликка эришди. Ҳозир қандай ҳаёт кечираётганингни билмайман... Борди-ю, хатим қўлингга тегса, менга жавоб хати ёз. Касал ётибман, ўрнимдан қўзғалолмайман... Хатингни бетоқатлик билан кутаман...

Менинг шу вақтгача нега хат ёзмаганимнинг боисини сўрашинг мумкин. Бунга жавоб қайтаришга қийналаман. Гап шундаки, мартабам ўсиб борган ўша йилларда биз инглизлар дунёни бошқарадик. Мен ҳам хукмдорликка ўрганиб қолгандим. Ҳамма ҳиндиларни нодон, аҳмоқ одамлар деб ҳисоблардим. Сен билан Кажрини учратганимдан кейин бошқача ўйлай бошладим. Инсон қашшоқлик, қуллиқда ҳам инсонлигича қолишини кўрдим. Ҳокимлик ва бойлик — худди мана шулар инсонни ўз моҳиятидан маҳрум қиласар экан. Бу моҳият эса төғ ва денгизларни ҳам енга оладиган инсонийлик экан. Инсонийлик Англияда ҳам, Лондондаги сингари машиналари, кўпгина одамлари бўлмаган сенинг қишлоғингда ҳам бор. Лекин буни бирданига тушуниб етмадим.

Лоуренс ҳақида гап кетса унинг қизим билан учрашишга доим интилгани ва қайта-қайта кечирим сўраганидан бошқа ҳеч нарса дея олмайман. У ўтган урушда ҳалок бўлди, марҳумлар ҳақида ёмон гапириш ярашмайди.

Сусаннанинг умри қандай ўтганини биласанми? Кажри вафот

этганида Сусанна унга қолдирган барча жамғарма пулларини сенга берди. Англияга қайтиб келиб, ҳеч қачон эрга тегмасликка қатъий аҳд қилди. Қизим менга: «Ота, дунёниг ҳамма ерида яхши, олижаноб одамлар бор. Қажри хотирингдами? Лоуренс ҳомиладор аёлнинг қорнига тепганида у мени ранжитмаслик учун: «Ингламанг, бола яна топиладиган нарса!»— деган эди.

Сусанна қизини жуда-жуда соғинди. Хатим энди бегона қўлларга тушиб қолишидан асло қўрқмайман. Яна қанча яшардим?! Ҳозирга келиб биз тарқатмоқчи бўлган ор-номус ва одамлар ҳақидаги тушунчалар ўзимизнинг ҳақиқий қиёфамизни яшириш учун мўлжалланганлигини яхши тушуниб турибман. Бир куни Қажри: «Нега ер давлатлар ўртасида тақсимлаб олинган?—деб ҳайрон бўлган экан.— Одам қаерда турган бўлса, ўша жой унинг ери», деган ажойиб фикрни айтганини Сусанна менга маълум қилди. Нақадар тўғри фикр! Ҳамма ер барча одамларга бир хил тегишли, уни тақсимлаш гуноҳ...

Сусанна қизчасини ҳамиша, ҳатто ҳаётининг сўнгги дамларида ҳам эслаб турди. Бу ерда, Англияда у медицина ҳамшираси бўлди. Жуда кўп муносиб одамлар унга уйланишга жазм қилди, лекин қизгинам ҳаммасига рад жавобини берди. Сусанна мусаффо, бегуноҳ эди. Уни азиятга қолдиришда айборд бўлган одам умр бўйи пушаймон бўлиб ўтди.

Мен ҳадемай ўламан. Ҳокимият, қонун, нуфузни деб юзлаб одамларга қўполлик қилдим. Аммо бугун дунёдаги бор нарсалардан воз кечиб, шу ҳақда ўйларканман, назаримда бу қўполликларни мен эмас, балки мен бор-йўғи кичкина бир винти бўлган баҳайбат, фаросатсиз машина қилгандай туюляпти.

Улим муқаррарлиги билан нақадар улуғвор. У ҳеч нарсани беркитмасликка, яширмасликка амр қилди. Ҳар биримиз ўлим олдидан одам бўлиб қоламиз. Мен ўзимдан нафрат, душманлик, кибр, нотўғри фикр каби ҳамма пуч нарсаларни соқит қилмоқчиман.

Сен Сусанининг қизини вояга етказдинг. Қиз сенга азиз, мўътабарлигини биламан. Унга Чанда деб ўзинг исм қўйдинг, тўғрими? Буни менга Сусанна айтган. Лекин Сусанна энди йўқ. Қизчага онаси кимлигини айтгин... Аммо қўрқма, уни сендан тортиб олмоқчи эмасман. Менинг куним битган. Агар Чандага менинг набирам эканлигини маълум қилсанг, ҳиндистонлик бу қиз мамлакатимиздаги одамлар бир хил эканлигини ҳис қиласди. Ҳозирга келиб Ҳиндистон мустақиллик олди, бундан фаҳрланаман, бордию Ҳиндистон аввалгида қолса, набирам чўри бўлишини тушуниб турибман. Озодлик — буюк куч, бироқ бирорвлар бошқаларни мағлуб этиш ҳисобига эришилган озодлик бўлмасагина, у шундай қудратли бўлади.

Мен учун Чандани эркалатиб қўй. Биз христианлармиз, жоннинг кўчишига ишонмаймиз. Лекин сен ҳиндусан, бунга ишонасан... Одамлар ўлгандан кейин қайта дунёга келадими ё йўқми — билмайман, бордию янгидан дунёга келса, қачон бўлмасин, қанақа қиёфада бўлса ҳам учрашишимизни хоҳлайман. Менинг номимдан қизча бегуноҳ эканлигини, биз уни қалбаки уят, номус ҳамда хурофот туфайли ташлаб кетганимиз учун Чанда бизларни афв этишини илтимос қилиб қўй. Лекин унинг онаси қаттиқ изтироб чекди. Қизим ана шу қалбаки тушунчалардан юқори турмоқчи бўлди. Жамият унга ўз қонунларини бажаришни айтиб тургач, нима ҳам қила оларди? Шу важдан ҳам Сусанна бир умр қийналиб ўтди. Чеккан азиятлари, уни вақтидан илгари қабрга судради.

Хатимга жавоб ёз. Жавоб хати ололмасам, бу ҳам худонинг хоҳиши. Хайр.

Сенинг Сойеринг».

Мен Чанданинг ҳайратдан катта очилиб кетган кўзларига қарадим.

— Ким эканлигимни энди билдингми? — деди у кибрли табассум билан. — Мен натни эмас, инглиз қизман. Нареш меники. Нареш меники! — Ўз ўзига ишонмай деди у. — Улар бизни жудо қилишмоқчи бўлишди, энди бу қўлларидан келиб бўпти! — ҳаяжонланганича давом этди Чанда. — Мен натни эмасман!

— Менга қара, Чанда! — гап бошламоқчи бўлдим.

— Мени алдамоқчимисан? Биламан, ҳаммасини биламан... бошқа ҳеч нарсани эшитишни хоҳламайман! — деб бақирди қиз ва чопиб кетди.

Қизнинг орқасидан ташвишланиб қараб қолдим. У қаёққа кетди ва нима қилар экан? Хат келганини билгач, Сукхрам ўзини қандай тутар экан? Эҳтимол, менга бу хатни ўқишинг керак эмас эди деб айтса керак.

Оқшом туша бошлади, бунингсиз ҳам ҳавонинг қовоғи солиқ эди. Шамол қишлоқ устида осилиб турган тунд булутларни ҳайдаб юбормади. Атрофда аввалги ҳадикли сукунат ҳукмронлик қилмоқда.

Ташқаридан ноаниқ ғовур-ғувур шовқин эшитилди. Деразадан кўчага қарадим.

Кўчада бир тўда одам борарди. Сукхрам ҳамманинг олдида Чандани қўлида кўтариб боряпти. Сукхрам аста-аста, оғир қадам ташларди.

Сукхрамни полициячилар қўриқлашиб боришарди. Лекин у ҳеч кимни пайқамагандай хотиржам эди. Қўзларида аллақандай ҳаммадан юз ўғиргандай изтиробли маъно бор эди.

Полициянинг орқасидан ўзаро аста гаплашиб натлар тўдаси — эркак ва аёллар боришарди.

— Қизингга нима бўлди, Сукхрам? — деб сўрадим унга яқинлашиб. У жавоб бериш ўрнига аста кулиб қўйди. Шунда Чандага қарадим, оёқларим остидаги ер чўкиб кетаётганга ўхшади; Чанда ўлган эди.

— Ким ўлдирди? — деб сўрай олдим холос.

— Мен! — деди Сукхрам дадил.— Мен! Бундай ишга мендан бошқа ким ҳам журъат қила оларди?!

Нарешнинг онаси қотиб қолди.

— Бу кимлигини биласизми? — тўсатдан бақириб юборди Сукхрам.

Нареш ҳам ҳеч нарсани тушунмай Сукхрамга маъносиз тикилиб қолди.

— Нега ўлдирдинг? — аста сўради у.

— Яна сўрашига куйиб ўлайми?! — деди Сукхрам. — Аммо ғамга ботма. Бу Чанда эмас, бу тҳакуранинг ўзи. Мен уни кўхна қалъадан топиб олдим...

Даҳшатдан соchlарим тикка бўлиб кетди.

— У хандон ташлаб кулиб, нуқул тҳакураниман, инглиз қизман деяверди,— дедио тўхтади Сукхрам. Ва яна:— Қўлимда эса...— деб гап бошлиётган Сукхрам бирдан хаҳолаб кулиб юборди.— Чанда ўйқолиб қолди, уни ҳеч қаердан тополмадим, — яна гапга тушди Сукхрам.— У туш кўрди, уни қалъага олиб боришими қаттиқ туриб талаб қилди. Қўрққанимдан қалъадан қочиб келдим. Аммо қизи тушмагур ёлғиз яна қалъага кетди... Ўзим ҳам тҳакурлар авлодиданман, у эса тҳакурани. У уч авлод ўтгунгача қалъада кезиб юрибди.

Сукхрам давом этди:

— Одамлар доим унга азоб бериб келишди. Аввал уни ўлдиришиди, кейинги сафар кўкракларидан сути чакиллаб томиб турса ҳам қизчани боқишига беришмади... Энди учинчи марта... Аммо йигламанглар, бугун уни худо барча азблардан халос қилди. Энди у ҳеч қачон қайтиб келмайди!

Қизга нега хатни ўқиб бердиму нега ўша пайтда уни ушлаб қолмадим! Мен гоҳ Сукхрамга, гоҳ Чандага назар ташладим, кўрганларимга ишонишга юрагим дов бермади. Сукхрам ҳамон кулганича гапиради:

— Тақсир! Уни қаердан топиб олганимни биласанми? Ер остидаги уйдан. Атрофида одам сүяклари уюлиб ётипти, рўпассида эса бойқуш ўтирибди. Чанда бойқушга: «Айта қол! Хазина қаердалигини менга айтиб бер? Қимлигимни биласанми? Мен тҳакураниман! Сени қўриқчиликка қўйган ҳам мен!» деб ҳадеб таъкидляяпти. Бойқуш ҳувиллаганда Чанда ҳам бақириди, кейин яна бойқушга мурожаат қилди: «Ер ости уйи қўриқчиси, гапимга қулоқ сол: Нареш меники! Улар у билан учрашувимга йўл қўйиншмаяпти, чунки менинг тҳакурани эканимни

билишмайди. Бойлигимни қайтариб бер, севгилим ўзимники, меники бўлиб қолади!» Бу гапларнинг ҳаммасини эшидим. Кейин нима бўлганини яхши эслолмайман, фақат: «Тҳакурани, сен очкўзсан, доим изғиб юрасан, оромингни тополмаяпсан. Энди беором жонингни халос қиласман!» — деганимни элас-элас биламан. Бошқа њеч нимани билмайман... Қичик тақсирим, — у Нарешга мурожаат қилди. — Чанданг яхши қиз. Мана, ола қол, Чанда сеники!.. Анови кетгани эса, Чанда эмас, у тҳакурани эди... тҳакурани! Мен унинг жонини инс-жинслардан халос қилдим, холос.

Кейин қовоғи солиқ осмонга гапиргандаи қичқирди:

— Энди очкўзлигинг нафси қонди; Бҳавани! Уч авлоддан бери одамлар қалбини ўтда қовурасан, энди эса, сен очофат ниҳоят ором оласан. Сен даҳшатли зимиштон... Ўша ерда скелетлар қимирлади... Деворлар тҳакурани, тҳакурани! деб бақирди.

Сукхрам шунақаям қаттиқ хаҳоладики, одамларнинг юраги увишиб кетди.

— Ҳақ гапни айтдинг, дада,— деди Нареш Сукхрамга, онасининг куйиб-пишиб чақиришларига парво ҳам қилмади.— Улар ишонишмади. Аммо у чиндан ҳам тҳакурани эди. Үнга ишонардим... У фақат меники эди...

Полиция Сукхрамни олиб кетди. Дўстим уйига қайтиб келиб, Ганди портретига яқинлашди. У гоҳ Гандига, гоҳ кўчага, кўл устидан кўкка бўй чўзган қалъага астойдил тикилди. Кейин у дераза ёнига келди, ўтири, лекин ўзини қўярга жой тополмай яна ўрнидан турди, хона ичида юра бошлади. Мен уни кузатдим, шу лаҳзада нималар ҳақида ўйлаётганини сўрашга оғзим бормади.

Нареш эса девор ёнида бир нуқтаға тикилганича турибди. Тўсатдан унинг юзи ёришиб кетди. У менга узоқ астойдил тикилди.

Қаердадир узоқда мамоқалдироқ гумбурлади.

Нареш менга яқинлашди-да:

— Сиз қачон бўлмасин қалъа ичини кўрганмисиз? Мени ўша ёққа олиб боринг. Ахир у ерда Чандам яшайди, — деди.

Нарешнинг онаси ўликдай оқариб кетди.

— Нареш, ўзингни бос, — дедим унга.

— Иўқ, иўқ, ачинишга муҳтоҷ эмасман,— деди у алам билан. — Тҳакураним кетди. Тҳакур қонга ташна, шундайми?

Мен унга ажабланиб боқдим.

— Тҳакуранимни қайтаринг! Полиция уни нега олиб кетди?

Чанданинг жасадини Викрамасинх уйига олиб келишга полицияни аранг кўндиридим. Сукхрам уни бўғиб ўлдирган эди. Қиз бақириб-чақирган, лекин у қизни жим бўлишга мажбур қилган. Аввалига қизнинг жасадини беришгá полиция мутлақо унама-

ди, лекин дўстим анча нуфузли одам бўлгани учун полиция ён беришга мажбур бўлди. Жасадни уйга келтиришиб, дафн замбилига ётқизиши. Нареш ўз қўли билан жасадни гулчамбарлар билан ясатди.

— Мана бу ёқقا озгина гул, бу ерга ҳам, — дерди у. — Энди чиройли бўлди. Қаранглар, унинг юзида қўрқувдан асар ҳам йўқ.

\* \* \*

— Тҳакурани, сени олов ихтиёрига топширишади, мен эса яшайманми? Сени халос қилолмаганим — айбим! — деди Нареш дафн гулхани Чанданинг танасини қуршаб олганда.— Бебаҳт қиз, тҳакурани бўлганингда мен тҳакур бўлишдан тўхтадим. Мен оддий одам бўлиб қолдим... Ҳузурингга бораётганда ортиқ ҳеч кимдан қўрқмадим! Аммо сен буни билмадинг...

Намхуш тараашалар орасидан тутун аралаш дафн гулхани ёриб чиқди, Нареш гулхандан кўзини олмай тикилганича турди.

Келгуси кун эрталаб Сукхрамни кўриб чиқмоқчи бўлдим. Участка бошлиғи мени унинг камерасига бошлаб олиб кирди. Сукхрам панжарали деразага индамай тикилиб ўтиради. Сочлари ҳурпайиб, қонсиз юзи сўниб, кўзларі ичига ботиб кетибди.

У мен томонга қайрилиб қараб ҳам қўймади. Фақат Нарешга мурожаат қилиб гапирган бўлди:

— Кичик тақсирим, мен ҳеч қачон Чандани ўлдирмасдим, у юрагимнинг бир парчаси эди. Мен фақат тҳакуранинг изғиб юрган жонини танидан халос қилдим, холос...

Сукхрамга тикилиш мен учун ниҳоятда оғир эди: у мени танимади, кўп ўтмай мен кетдим.

Уйга қайтганимда Нареш нонушта тўлдирилган дастурхон ёнида ўтиради.

— ... Одамлар тҳакураним устидан марваридлар сепишмоқда, — деди у ғурур билан. Кейин менга яқинроқ келиб аста сўради: — У нега хафа бўлганини, бугун сен билан нима учун гаплашмаганини билдингми?

Мен жаҳл устида:

— Нареш! — деб бақирдим.

— Ана! Энди эслаяпсан! — Нареш қах-қах уриб кулди. — Қиз эрга теккан эди! Уни шоҳона ўринга ётқизаётганда бошидаги фарқини гавҳар тизилган ип билан безатишни, қўл ҳамда товонини бўяшни, унга сандал ёғи сепишни унутибман. У улуғ тҳакурани эди! У хафа бўлмай ким хафа бўлади?

Баланд осмонда момақалдироқ гулдиради, унинг гулдуроси тоғларда акс-садо берди, гўёки ер осмонга қаршилик билдираёт-

гандай эди. Шу лаҳзада кўз олдимда узоқ Англияда ўлим тўшагида ётган чол қиёфаси намоён бўлди. Эҳтимол, унинг лаблари охирги марта: «Қаердасан, бечора Чандагинам?» деб ожизгина пичирлаётгандир.

Инсофга келган! Умрининг охирида кўзи очилган собиқ соҳибдаги инсонийлик туйғулар жуда кеч уйғонди!

\* \* \*

Инсонийлик тантанаси ҳақидаги улуғвор ҳикоям қаёққа йўқолди? Ҳатто мен ҳам инсонийлик ҳақида ҳикоя ёзишни уддалай олмасам нима қиласай? Лекин мен бор овоз билан: «Қулоқ солинг, ҳаммангиз қулоқ солинг! Ҳаммаёқда адолат талаб қилувчи баланд товушлар янграомоқда. Мен ҳам индамай туролмайман. Мен тантанали равишда айтаманки, энг оддий кишиларгина ҳақиқий инсонлардир. Қолган одамларнинг ҳаммаси гуноҳга ботган, чунки очкўзлик ва калондимоғлик улар кўнглини қул қилиб қўйган. Манови эзилган, бебаҳт ва қашшоқ одамлар ўз нодонликлари азиятини чекишмоқда. Уларнинг кўзи очилгунга қадар бу азият уларни қийнайверади, чунки уларнинг нодонлиги, бир-бири билан қийпичноқ бўлишиб бир-бирига нисбатан кек ва адоват сақлаб бутун зулмат ва зўравонлик дунёсига асосланиб иш кўради. Уларнинг кўзи очилмагунга қадар болалари ифлосликда туғилаверадилар, эгасиз ит сингари ўлиб кетаверадилар. Эҳтимол, мазлумлар азоб-уқубатларга ўрганиб, кўнишиб қолгандир, шу азобларни инсон учун муқаррар деб билишар? Лекин улар чинакам инсонийликни тушуниб етишганда инсониятни азоб-уқубатлардан халюс қилишади. Ана ўшандагина янги инсон пайдо бўлади!» — деб ҳайқиргим келади.

*На узбекском языке*

РАНГЕЯ РАГХАВ

**ДО КАКИХ ПОР БУДУ ЗВАТЬ?**

Роман

Перевод с издания издательства «Прогресс», Москва, 1957.

Тақризчи  
*Сиддиқа Аҳзамова*

Редактор *Ш. Одилов*  
Рассом *Ю. Габзалилов*  
Расмлар редактори *А. Киза*  
Техн. редактор *Э. Сайдов*  
Корректорлар *Ш. Соатова, С. Тоҳирова*

ИБ № 1823

Босмахонага берилди 20.10.83. Босишига рухсат этилди 23.01.84. Формати 60x84 1/16.  
Босмахона көғози № 3. Адабий гарнитура. Юқори босма. Шартли босма л, 20,92.  
Шартли кр.—оттиск 21, 38. Нашр л. 23,54. Тиражи 15000. Заказ 1595. Баҳоси 2 с. 10 т.  
Гафур Руслон номидаги Адабиёт ва санъат нашриёти, 700129, Тошкент, Навоий кӯчаси, 30.

Нашриётлар, полиграфия ва китоб савдоси ишлари бўйича ЎзССР Давлат комитети Тошкент  
«Матбуот» полиграфия ишлаб чиқариш бирлашмасининг Бўзи көрхонаси. Толикент — 700129,  
Навоий кӯчаси, 30.

## **Рагхав, Рангея.**

Тоқайгача чорлайман сени? Роман [Русчадан А. Ѓекубов тарж.].—.:Адабиёт ва санъат нашриёти, 1984.— 360 б.

Машхур ҳинд ёзувчиси Рангея Рагхавнинг ушбу романидаги паст табақадаги эзилган ва хўрланган кишиларнинг ўз инсоний қадр-қиммати учун олиб борган кураши тасвирланади. Шу билан бирга эркесвар ҳинд ҳалқининг миллий мустақиллик йўлидаги курашлари ёрқин бўйцуларда чизилган.

Асарда Сукхрам, Пыяри, Кажри ҳамда севишганлар Чанда билан Нарешларнинг аяичли қисматлари кенг планда ёритиб берилган.

Рагхава, Гангэя. До каких пор я буду звать? Роман.

И (Ҳинд)